

李义山诗集
笺注

朱鹤龄

文硕阁

wenshuoge.com

目录

关于我们	3
序	5
●李义山诗集注卷一上	6
●李义山诗集注卷一下	40
●李义山诗集注卷二上	71
●李义山诗集注卷二下	95
●李义山诗集注卷三上	128
●李义山诗集注卷三下	159
●新添集外诗	172

版权声明

本书版权保护已经过期，属于公版书！并由"文硕阁"网站的用户制作并发布于文硕阁 网站内,请大家在“合理使用”范围内使用

这本电子书可供中华人民共和国（the People's Republic of China）和世界上大多数其他地区的任何人免费使用，几乎没有任何限制。您可以根据本文件中包含的"传硕公版书许可条款"中的授权许可进行复制、赠送或改编它。

如果您不在中华人民共和国，您必须在使用本电子书之前查看您所在国家/地区的法律。

什么是公版书？

根据我国现行「著作权法」第 20、21 条的规定，除署名权、修改权、保护作品完整权外，中国公民对其著作的法定权利均于作者死亡后第五十年的 12 月 31 日截止。超过著作权法保护日期后，其作品就进入了公有领域（公共版权）

这种因作者死亡超过 50 年而丧失发行权、改编权等著作权利的书籍，就称为“公共版权书籍”，简称“公版书”。

传硕公版书保护计划

中华文明5000多年绵延不断、经久不衰，在长期演进过程中，形成了中国人看待世界、看待社会、看待人生的独特价值体系、文化内涵和精神品质，这是我们区别于其他国家和民族的根本特征，也铸就了中华民族博采众长的文化自信。

文化是一个国家、一个民族的灵魂。文化兴国运兴，文化强民族强。

所以我们发起了公版书保护计划。来帮助把中国五千年的文明硕果进行电子化并服务于大众，我们网站所有内容都是免费、自由、无版权的。对所有的读者免费！

使用 **文硕阁** 中的公版书 不需要获得许可（在中国，这属于“合理使用”）。这适用于所有用途，包括商业用途。换句话说，即使是商业盈利用途，也无需支付版税。

我们希望能有更多的用户加入到文硕阁网站中来，让我们一起来保护传承文明的硕果。

源浚者流长，根深者叶茂。文化自信是一个国家、一个民族发展中最基本、最深沉、最持久的力量。

如何联系我们？

网站：www.wenshuoge.com

邮箱：7sbook@duck.com



(扫码访问网站)



(扫码加客服微信)

序

申酉之歲，予箋注杜工部詩于紅豆山莊。既卒業，有友人謂予曰：“玉溪生詩，沈博絕麗，王介甫稱為善學老杜，惜從前未有為之注者。元遺山云：詩家總愛西崑好，只恨無人作鄭箋。子何不併成之，以嘉惠來學？”予因繙覈新舊唐書，本傳，以及箋啓序狀諸作所載，于英華文粹者，反復參考，乃喟然嘆曰：“嗟乎義山，蓋負才傲兀，抑塞于鈞黨之禍，而傳所云‘放利偷合，詭薄無行’者，非其實也。”

夫令狐綯之惡義山，以其就王茂元鄭亞之辟也；其惡茂元鄭亞，以其為贊皇所善也。贊皇入相，薦自晉公，功流社稷。史家之論，每曲牛而直李。茂元諸人，皆一時翹楚。綯安得以私恩之故，牢籠義山，使終身不為之用乎？綯特以仇怨贊皇，惡及其黨，因併惡其黨贊皇之黨者，非真有憾于義山也。太牢與正士為讐，綯父楚比太牢而深結李宗閔楊嗣復。綯之繼父，深險尤甚。會昌中贊皇擢綯臺閣，一旦失勢，綯與不逞之徒竭力排陷之，此其人可附離為死黨乎？義山之就王鄭，未必非擇木之智，渙邱之公。此而目為放利偷合，詭薄無行，則必將朋比奸邪，擅朝亂政如八關十六子之所為，而後謂之非偷合，非無行乎？且吾觀其活獄弘農，則忤廉察；題詩九日，則忤政府。于劉蕡之斥則抱痛巫咸；于乙卯之變則銜冤晉石。太和東討，懷積骸成莽之悲；黨項興師，有窮兵禍胎之戒。以至《漢宮》《瑤池》《華清》《馬嵬》諸作，無非諷方士為不經，警色荒之覆國。此其指事懷忠，鬱紆激切，直可與曲江老人相視而笑，斷不得以放利偷合詭薄無行嗤摘之者也。

或曰，義山之詩半及閨闈讀者，與玉台香奩例稱，荆公以為善學老杜，何居？予曰：男女之情，通于君臣朋友，《國風》之螭首蛾眉，雲髮瓠齒，其辭甚褻，聖人頗有取焉。《離騷》托芳草以怨王孫，借美人以喻君子，遂為漢魏六朝樂府之祖。古人之不得志于君臣朋友者，往往寄遙情于婉變，結深怨于蹇修，以序其忠憤無聊，纏綿宕往之致。唐至太和以後，閹人暴橫，黨禍蔓延。義山阨塞當塗，沈淪記室。其身危，則顯言，不可，而曲言之；其思苦，則莊語，不可，而謾語之。計莫若瑤台瑤宇，歌筵舞榭之間，言之可無罪，而聞之足以動。其《梓州吟》云：“楚雨含情俱有託”，早已自下箋解矣。吾故曰：義山之詩，乃風人之緒音，屈宋之遺響。蓋得子美之深而變出之者也。豈徒以徵事奧博，擷采妍華，與飛卿柯古爭霸一時哉？學者不察本末，類以才人浪子曰義山。即愛其詩者，亦不過以為帷房暱媾之詞而已，此不能論世知人之故也。予故博考時事，推求至隱，因箋成而發之，以復于友人，且以為世之讀義山集者告焉。

順治己亥二月 朱鶴齡書于猗蘭堂

●李义山诗集注卷一上

吴江朱鹤龄撰

锦瑟

锦瑟无端五十弦。一弦一柱思华年。庄生晓梦迷蝴蝶。望帝春心託杜鹃。

沧海月明珠有泪。蓝田日暖玉生烟。此情可待成追忆。只是当时已惘然。

△周礼乐器图。雅瑟二十三弦。颂瑟二十五弦。饰以寶玉者曰寶瑟。绘文如锦曰锦瑟。汉书郊祀志。秦帝使素女鼓五十弦瑟。悲。帝禁不止，故破其瑟为二十五弦。或曰。吕氏春秋云。朱襄氏作五弦瑟。以采陰气。以定羣生。瞽叟乃拌五弦。为十五弦之瑟。命之曰大章。舜立。乃益八絃以为二十三弦之瑟。此诗五十弦。当倒其文为十五弦。与下思华年相应。一云。五十疑作廿五。正用素女事。廿。人汁切。音入。古人书二十字。多併省为廿。顏之推稽圣赋。中山何伙有子百廿。但诗家罕用。庄子。昔者庄周梦为蝴蝶。栩栩然蝶也。水经注。来敏本。蜀论望帝者。杜宇也。从天下。女子朱利自江源出。为宇妻。遂王于蜀。号曰望帝。蜀王本纪。望帝使鼈灵治水。与其妻通。惭愧。且以德薄。不及鼈灵。乃委国授之。望帝去时。子规方鸣。故蜀人悲子规鸣而思望帝。成都纪。望帝死。其魂化为鸟。名曰杜鹃。亦曰子规。文选注。月满则珠全。月亏则珠阙。郭宪别国洞冥记。珠勒国在日南。其人乘象入海底取寶。宿于蛟人之宫。得泪珠。则蛟人所泣之珠也。亦曰泣珠。博物志。南海有蛟人。水居如鱼。不废绩织。其眼泪则能出珠。长安志。蓝田山在长安县东南三十里。其山產玉。亦名玉山。困学纪闻。司空表圣云。戴容州叔伦谓诗之景。如蓝田日暖。良玉生烟。可望而不可置于眉睫之间也。李义山玉生烟之句。蓋本于此。○按。义山房中曲。归来已不见。锦瑟长于人。此诗寓意略同。是以锦瑟起兴。非專赋锦瑟也。绀素杂记引东坡适怨清和之说。吾谓不然。恐是伪託耳。刘贡父诗话云。锦瑟。当时贵人爱姬之名。或遂实以令狐楚青衣说。尤诬妄。当亟正之。

重过圣女祠

白石岩扉碧藓滋。上清沦谪得归迟。一春梦雨常飘瓦。尽日灵风不满旗。

萼绿华来无定所。杜兰香去未移时。玉郎会此通仙籍。忆向天阶问紫芝。

△水经注。武都秦冈山悬崖之侧。列壁之上。有神像状妇人之容。其形上赤下白。世名之曰圣女神。福应愆违。方俗是祷。按。武都。今汉中府略阳县地。灵寶本元经。四人天外曰三清境。玉清。太清。上清。亦名三天。太真经。三清之间。各有

正位。圣登玉清。真登上清。仙登太清。释道源注。上清蕊珠宫。大道玉宸君居之。梦雨。用巫山神女事。九歌。东风飘兮神灵雨。陶贞白真诰。英王夫人歌。阿母延轩观。朗肃蹑灵风。道源注。云笈七籤。灵风扬音。绿霞吐津。真诰。萼绿华者，自云是南山人。女子。年可二十许上下。青衣。颜色绝整。以晋穆帝昇平三年十一月夜降于羊权家。自此往来。一月之中辄六过其家。授权尸解药。亦隐身化形而去。墉城仙录。杜兰香者。有渔父于湘江之岸见啼声。四顾无人。惟一二岁女子。渔父怜而举之。十馀岁。天姿奇伟。灵颜姝莹。天人也。忽有青童自空下。集其家。携女去。临升天。谓渔父曰。我仙女也。有过。谪人间。今去矣。其后降于洞庭包山张硕家。搜神记。汉时有杜兰香者。自称南康人氏。以建业四年春数诣张硕。言本为君作妻。情无旷远。以年命未合。其小乖。太岁东方卯。当还求君。真诰。北元中玄道君太保玉郎李灵飞之小妹。道源注。云笈七籤。登命九天司命侍仙玉郎开紫阳玉。云锦之囊。出九天。生神玉章。茅君内传。句曲山有神芝五种。其三色紫。形如葵叶。光明洞彻。服之。拜为太清龙虎仙君。

寄罗劭兴

棠棣黄花发。忘忧碧叶齐。人閒微病酒。燕重远兼泥。

混沌何由凿。青冥未有梯。高阳旧徒侣。时复一相携。

△兴。一作輿。棠棣。疑即唐棣。本草。不言花黄。侯考。博物志。合欢蠲忿。萱草忘忧。庄子。凿七日而混沌死。楚词。据青冥而攄虹兮。注青冥。云也。谢朓诗。共登青云梯。史记。酈生叱使者曰。入言沛公。吾高阳酒徒也。

令狐舍人说昨夜西掖翫月因戏赠

昨夜玉轮明。传闻近太清。凉波衝碧瓦。晓晕落金茎。

露索秦宫井。风弦汉殿箏。几时絳竹颂。拟荐子虚名。

△唐书。令狐綯。字子直。楚之子。大中三年拜中书舍人。袭封平阳男。初学记。中书省在右。因谓中书。为右曹。又称西掖。○李贺诗。玉轮轧露湿团光。世说。会稽王道子斋中夜坐。于时天月明净。都无纖翳。歎以为佳。谢景重曰。意谓不如微云点缀。王因戏谢曰。卿居心不净。乃复强欲滓秽太清耶。汉郊祀志。月穆穆以金波。刘騊駼诗。缥碧以为瓦。广韵。晕。日月旁气也。汉武故事。帝作金茎。擎玉杯。承云表露。和玉屑服之。以求仙。西都赋。擢双立之金茎。注。金茎。铜柱也。广韵。绁。井索。古乐府。桃生露井上。曹植述行赋。濯予身于秦井。杜甫诗。风箏吹玉柱。丹铅录。古人殿阁。簷稜间有风琴。风箏皆因风动成音。自叶宫商。汉书。絳竹县属广汉郡。蔡梦弼杜注。绵竹。产汉州绵竹县之紫岩山。扬雄甘泉

赋序。孝成帝时。客有荐雄文似相如者。翰注。雄尝作绵竹颂。成帝时。直宿郎杨庄诵此文。帝曰。似相如之文。庄曰。非也。此臣邑人扬子云。帝即召见。拜黄门侍郎。按。子云答刘歆书云。先作县邸铭。王卬颂。阶闕铭。及成都四隅铭。蜀人杨庄为郎诵之于成帝。帝以为似相如。后又作绣补灵节龙骨之铭。诗三章。成帝好之。遂得尽意。不及縣竹颂。翰注云云。不知何本。五臣注极为东坡所讥。然间有可采者。如此事。义山亦引用之矣。

崔处士

真人塞其内。夫子入于机。未肯投竿起。惟欢负米归。

雪中东郭履。堂上老莱衣。读遍先贤传。如君事者稀。

△庄子。万物出乎机。入乎机。家语。昔者由也为亲百里负米。史记。东郭先生行雪中。履有上无下。足尽践地。列士传。老莱子行年七十。作婴儿娱亲。著五采斑斓衣。

自喜

自喜蜗牛舍。兼容燕子巢。绿筠遗粉箨。红药绽香苞。

虎过遥知弃。鱼来且佐庖。慢行成酩酊。邻壁有松醪。

△古今汪。蜗牛，陵螺也。野人为圆舍。如其壳。曰蜗舍。魏志。焦先自作一蜗牛庐。净扫其中。韵会。筠竹。青皮。白居易诗。筠粉污新衣。谢朓诗。红药当阶翻。本草。松叶松节松胶。皆可为酒。能已疾。裴嗣传。奇酒名松醪春。

题僧壁

捨生求道有前踪。乞脑剜身结愿重。大去便应欺粟颗。小来兼可隠针锋。

蚌胎未满思新桂。琥珀初成忆旧松。若信贝多真实语。三生同听一楼钟。

△道源注。知玄三昧懺。捨头目髓脑。如弃涕唾。报恩经。有婆罗门往乞其头。王许之。婆罗门寻断王头。持还本国。又转轮圣王为求佛法。有一婆罗门言。若能就王身上剜作千疮。灌满膏油。安施灯炷。然以供养者。我当为汝解说佛法。陈启源曰。佛偈。一粒粟中藏世界。即此句义。道源注。维摩经。如持一针锋。举一枣叶。而无所烧。涅槃经。尖头针锋。受无量衆。吕氏春秋。月望则蚌蛤实。羣陰盈。月晦则蚌蛤虚。羣陰缺。吴都赋。蚌蛤珠胎。与月亏全。虞喜安天论俗传。月中有

仙人桂树。今视其初生。见仙人之足。渐已成形。桂树后生。李贺诗。新桂如蛾眉。陈藏器本草。旧说松脂入地千年。化为琥珀。今烧之亦作松气。○按。新桂旧松。即未来过去之喻。酉阳杂俎。贝多出摩伽陀国。西土用以写经。长六七丈。经冬不凋。齐民要术。嵩山记云。嵩高寺中忽有思维树。即贝多也。一年三花。翻译名义集。贝多形如北方梭榈。直而且高。长八九十尺。花如黄米子。西域记云。南印建那补罗国北不遠。有多罗树林三十餘里。其叶长广。其色光润。诸国书写。无不採用。般若经。如来是真语者。实语者。道源注。过未现为三生。

霜月

初闻征雁已无蝉。百尺楼高水接天。青女素娥俱耐冷。月中霜里鬪婵娟。

△淮南子。秋三月。青女乃出。以降霜雪。高诱注。青女。青腰玉女。主霜雪也。谢庄月赋。集素娥于后庭。注。嫦娥窃药奔月。月色白。故曰素娥。

异俗二首

鬼疟朝朝避。春寒夜夜添。未惊雷破柱。不报水齐簷。

虎箭侵肤毒。鱼钩刺骨鉙。鸟言成谍诉。多是恨彤幃。

户尽悬秦网。家多事越巫。未曾容獭祭。只是纵猪都。

点对连鳌饵。搜求缚虎符。贾生兼事鬼。不信有洪炉。

△原注。时从事岭南。○本传。给事中郑亚廉察桂州。请为观察判官。检校水部员外郎。后汉书礼仪志注。颛顼氏有三子。生而亡去为疫鬼。一居江水。为疟鬼。宾退录。高力士流巫州。李辅国授谪制。力士方逃疟功臣阁下。则避疟之说。自唐已然。世说。夏侯太初尝倚柱作书。时大雨霹雳。破柱。衣服焦燃。神色无变。桂海虞衡志。蛮箭以毒药濡箭锋。中者立死。药以蛇毒草为之。岭表志。鳄鱼大如船。牙如锯齿。尾有三钩。极利。遇鹿豕即以尾戟之。韩愈文。小吏十馀家。皆鸟言夷面。北山移文。牒诉恹恹装其懷。注。牒。文牒也。诉。告也。○周礼。巾车有容盖。郑司农云。容。谓幃车。山东谓之裳帋。以帋障车旁如裳为容饰。其上有盖。四旁垂而下。谓之幃。地理志。桂林郡。本秦置。网罟之利开于秦。故曰秦网。汉郊祀志。命越巫立越祝祠。安台无坛。亦祠天神。帝。百鬼。而以鸡卜月令。孟春之月。獭祭鱼。然后虞人入泽梁。酉阳杂俎。伍相奴或扰人。许于伍相庙。多已。旧说。一姓姚。二姓王。三姓汪。昔值洪水。食都树皮。饿死。化为鸟都。皮骨为猪都。妇女为人。在树根居者。名猪都。在树半可攀及者。名人。在树尾者。名鸟都。南中多食其巢。味如木芝。窠表可为履。〈上尸。下。洩去水。加双人旁〉

。治脚气。列子。龙伯之国有大人。一钓而连六鳌。抱朴子。道士赵眎能禁虎。虎伏地。低头闭目。便可执缚。真诰。道家有制虎豹符。南中多虎。故求符禁之。汉贾谊传。上方受鳌。坐宣室。因感鬼神事。问以鬼神之本谊。具道所以然之故。庄子。今一以天地为大炉。贾谊鹏鸟赋。天地为炉兮造化为工。杜甫诗。汨没聽洪炉。

归墅

行李踰南极。旬时到旧乡。楚芝应徧紫。邓橘未全黄。渠浊村舂急。旗高社酒香。故山归梦喜。先入读书堂。

△按诗有踰南极之句。时必归自桂林。十道志。商洛山在商州东南九十里。亦名楚山。高士传。四皓避秦。入商洛山。作歌曰。煜煜紫芝。可以疗饥。唐书地理志。邓州南阳郡。属山南东道。王维诗。商山包楚邓。张衡南都赋。穰橙邓橘。杜甫诗。村舂雨外急。广韵。青帘。谓之酒旗。张载酒赋。拟酒旗于玄象。白居易诗。青旗沽酒趁梨花。

商于

商于朝雨霁。归路有秋光。背坞猿收果。投岩麝退香。

建瓴真得势。横戟岂能当。割地张仪诈。谋身绮季长。

清渠州外月。黄叶庙前霜。今日看云意。依依入帝乡。

△唐书。商州。上洛郡。属關内道。即古商于地。埤雅。麝絕爱其香。为人追逐。即自投高岩。举爪剔出其香。汉书高帝纪。下兵于诸侯。譬犹居高屋之上建瓴水也。史记。张仪说楚能闭關絕齐。请献商于之地六百里。楚果絕齐求地。仪与六里。三辅旧事。汉惠帝为四皓立碑。一曰园公。二曰绮里季。三曰夏黄公。四曰角里先生。

和孙朴韦蟾孔雀咏

此去三梁遠。今来万里携。西施因网得。秦客被花迷。

可在青鸚鵡。非關碧野鸡。约眉怜翠羽。刮目想金篦。

瘴气笼飞遠。蛮花向坐低。轻于赵皇后。贵极楚悬黎。

都护矜罗幕。佳人炫绣桂。屏风临烛釳。捍拨倚香脐。

旧思牵云叶。新愁待雪泥。爱堪通梦寐。画得不端倪。

地锦排苍雁。帘钉镂白犀。曙霞星斗外。凉月露盘西。

妬好休夸舞。经寒且少啼。红楼三十级。稳稳上丹梯。

△唐诗纪事。韦蟾。字隱珪。下杜人。表微之子。大中七年进士。为徐商掌书记。咸通末。官尚书左丞。○按义山樊南乙集序云。大中二年。自桂府归。为盩厔尉。与孙朴韦蟾同官。诗当作于是时。三梁。在桂管。本集。为郑亚桂州谢上表。三梁路阻。九峽山遥。西谿丛语。吴越春秋云。吳亡。西子被杀。杜牧之诗。西子下姑苏。一舸逐鸱夷。后人遂云。范蠡将西子去。尝疑之。别无所据。杨慎曰。修文御覽引吳越春秋逸篇云。吳亡。后越浮西施于江。令随鸱夷以终浮沉也。反言耳。随鸱夷者。子胥潛死。盛以鸱夷。西施有功焉。今沉之江。所以报子胥之忠。○按西施沉江。事容有之。但此云。西施因网得。他诗又云。莫将越客千丝网。网得西施别赠人。皆言初得西施。非吳亡后事也。其故实未详。疑出小说家。今逸之耳。秦客。未详。集内赠人诗。岂知一夜秦楼客。偷看吴宫苑内花。疑即此秦客。山海经。黄山有鸟焉。青羽赤喙。人舌。能言。名曰鸛鷖。南方异物志。鸛鷖有三种。一种青。大如鸟鷖。一种白大如鸛鷖。一种五色。大于青者。交州巴南尽有之。汉郊祀志。秦文公获若石于陈仓北坂城。祠之。其神从东方来。若雄雉。其声殷殷云。野鸡皆鸣。又云。宣帝时。或言金马碧鸡之神。可醮祭而致。于是遣王褒持节求焉。○言孔雀如青鸛鷖之可玩。非若碧野鸡之形声恍惚也。登徒子好色赋。眉如翠羽。涅槃经。有盲人诣良医。医即以金鑊刮其眼膜。续汉书。西南夷曰滇池出孔雀。是从蛮瘴中来也。稗雅。博物志。孔雀尾多变色。有金翠。始春而生。三四月后复凋。与花萼相荣衰。杜甫诗。翠尾金花不辞辱。西京杂记。赵后体轻腰弱。善行步进退。白帖。飞燕体轻。能为掌上舞。战国策。梁有悬黎。楚有和璞。杜氏通典。汉置西域都护。唐永徽中。始于边方置安东安西安南安北四大都护府。○释名。妇人上服曰桂。广雅。长襦也。沉约诗。先表绣桂香。说文。釳。金饰器口。乐府杂录。琵琶以蛇皮为槽。厚二寸馀。鳞介亦具。以楸木为面。其捍拨以象牙为之。海录碎事。金捍拨在琵琶面上。当弦或以金涂为饰。所以捍护其拨也。说文。麋如小麋。脐有香。陆机云赋。金柯分。玉叶散。梁简文帝诗。云开玛瑙叶。卢纶送张少府诗。判词花落纸。拥吏雪成泥。郑嵎津阳门诗。锦鳧绣雁相追随。注。温泉汤中。缝缀锦绣为鳧雁。李贺诗。玳瑁钉帘薄。东观汉记。章帝元和元年。日南献白雉白犀。广志。犀角之好者。称鸡昧白。三辅故事。武帝于建章宫立铜柱。高二十丈。上有仙人掌承露盘。纪闻。孔雀自喜其尾而甚妬。遇妇人童子好衣服。必逐而啄之。闻管弦笙歌。必舒张翅尾。盼睇而舞。顾有孝曰。北地多寒。戒之以少啼。即子美花鸭诗。作意莫先鸣意也。酉阳杂俎。长乐坊安国寺红楼。睿宗在藩时舞榭也。李白诗。紫殿红楼觉春好。王建宫词。禁寺红楼内里通。谢灵运诗。躡步凌丹梯。

。注。丹梯。陞阶也。○后四语全是寓意。

人欲

人欲天从竟不疑。莫言圆盖便无私。秦中久已乌头白。却是君王未备知。

△刘氏正歷。问黄帝为盖天。以天象盖。宋玉大言赋。方地为车。圆天为盖。艺文类聚。燕丹子曰。秦止燕太子丹为质。曰。乌头白乃可归。丹仰天叹。乌即白头。

华山题王母祠

莲华峯下锁雕梁。此去瑶池地共长。好为麻姑到东海。劝栽黄竹莫栽桑。

△华山记。山巔有池。生千叶莲花。服之羽化。因名华山。穆天子传。天子觴王母于瑶池之上。神仙传。麻姑谓王方平曰。接待以来。见东海三变为桑田。向到蓬莱。水浅于往时略半也。岂将复还为陆陵乎。方平笑曰。圣人皆言。海中行复扬尘也。穆天子传。天子游黄台之丘。猎于苹泽。有陰雨。天子乃休。日中大寒。北风雨雪。有冻人。天子作诗三章以哀之。曰。我徂黄竹。负□〈脱一字〉寒。

华清宫

华清恩幸古无伦。犹恐蛾眉不胜人。未免被他褒女笑。只教天子暂蒙尘。

△唐书。天寶六载。改骊山温泉宫曰华清宫。治汤为池。环山列宫殿。唐书。太真得幸。进册贵妃。三姊皆美。帝呼为姨。帝幸华清。贵妃与三夫人皆从。遗簪堕舄。瑟瑟玳瑁。狼籍于道。香闻数十里。言褒姒能灭周。而玄宗不久便归国。是贵妃之倾城。犹在褒氏下也。二语深著色荒之戒。意最警策。

楚泽

夕阳归路后。霜野物声乾。集鸟翻渔艇。残虹拂马鞍。

刘桢元抱病。虞寄数辞官。白袷经年卷。西来及早寒。

△刘桢诗。余婴沉痾疾。窜身清漳滨。南史。虞寄。字次安。性冲静。有栖遁志。大同中。闭门称疾。惟以书籍自娱。陈寶应既擒文帝。敕章昭达。发遣还朝。衡阳王出阁。手敕用为掌书记。后除东中郎。建安王諮议加昭戎将军。寄辞以疾。王于是命长停公事。其有疑议。就以决之。说文。袷。夹衣。无絮。亦作袂。真诰。许长史著葛屨。单衣白袷。李贺诗。白袷王郎寄桃叶。

蝉

本以高难饱。徒劳恨费声。五更疎欲断。一树碧无情。

薄宦梗犹汎。故园芜已平。烦君最相警。我亦举家清。

江亭散席循柳路吟归官舍

春咏敢轻裁。衔辞入半杯。已遭江映柳。更被雪藏梅。

寡和真徒尔。殷忧动即来。从诗得何报。惟感二毛催。

潭州

潭州官舍暮楼空。今古无端入望中。湘汨浅深滋竹色。楚歌重叠怨兰丛。

陶公战舰空滩雨。贾傅承尘破庙风。目断故园人不至。松醪一醉与谁同。

△唐书。潭州。长沙郡。属江南西道。元和郡国志。隋平陈。改湘州曰潭州。取昭潭为名。博物志。舜二妃曰湘夫人。舜崩。二妃啼。以泪挥竹。竹尽斑。楚词九歌称澧兰秋兰者不一。故曰。重叠怨兰丛。晋陶侃传。刘弘为荆州刺史。以侃为江夏太守。又加督护。使与诸军。并力拒陈恢。侃乃以运船为战舰。所向必破。后讨杜弢。进克长沙。封长沙郡公。西京杂记。贾谊在长沙。鵬鸟集其承尘。俗以鵬鸟至人家。主人死。谊作鵬鸟赋。释名。承尘施于上。以承尘土也。寰宇记。贾谊庙在长沙县南六十里。庙即谊宅。宅中有井。上圆下方。

赠刘司户

江风吹浪动云根。重碇危檣白日昏。已断燕鸿初起势。更惊骚客后归魂。

汉廷急诏谁先入。楚路高歌自欲翻。万里相逢欢复泣。凤巢西隔九重门。

△刘司户。蕢。○唐书。刘蕢。字去华。昌平人。太和二年策试贤良。蕢切论黄门太横。将危宗社。考官不敢留蕢在籍中。人读其文。至有相对垂泣者。令狐楚在兴元。牛僧孺在襄阳。皆辟为从事。中人嫉之。诬以罪。贬柳州司户。张协诗。云根临八极。注。云根。石也。云触石而生。故曰云根。韵会。碇。镇舟石。帝王世纪。黄帝时。凤凰止帝东园。或巢于阿阁。九辨。君之门兮九重。道源曰。东坡诗。九重新扫旧巢痕。本此。

哭刘司户二首

离居星歲易。失望死生分。酒瓮凝餘桂。書籤冷旧芸。

江風吹鴈急。山木帶蟬嚙。一叫千迴首。天高不為聞。

有美扶皇運。無誰荐直言。已為秦逐客。復作楚冤魂。

湓浦應分派。荆江有會源。並將添恨淚。一洒問乾坤。

△蕢。卒于貶所。楚詞。奠桂酒兮椒漿。杜甫詩。書籤映夕曛魚豢。魏略。芸香。辟紙魚蠹。故藏書台曰芸台。謂屈原。杜甫詩。應共冤魂語。投詩贈汨羅。廬山記。江州有青盆山。故其城曰湓城。浦。曰湓浦。一統志。湓浦。在今九江府城。西江賦。流九派乎浔陽。

悼傷后赴東蜀辟至散關遇雪

劍外從軍遠。無家與寄衣。散關三尺雪。回夢旧鴛機。

△本傳。柳仲郢鎮東川。辟為節度判官檢校工部郎中。方輿勝覽。大散關在梁泉縣。為秦蜀要路。通志。在鳳翔府寶雞縣城南。通褒斜大路。屬漢中府。劍外。劍閣之外也。杜甫詩。草木變衰行劍外。

樂游原

向晚意不適。驅車登古原。夕陽無限好。只是近黃昏。

△兩京新記。漢宣帝樂游廟。一名樂游苑。亦名樂游原。基地最高。四望寬敞。

北齊二首

一笑相傾國便亡。何勞荆棘始堪傷。小憐玉體橫陳夜。已報周師入晉陽。

巧笑知堪敵萬几。傾城最在著戎衣。晉陽已陷休回顧。更請君王獵一圍。

△吳越春秋。夫差听諛。子胥垂涕曰。以曲為直。舍諛攻忠。將滅吳國。城郭丘墟。殿生荆棘。北齊書。后主馮淑妃。名小憐。大穆后從婢也。穆后愛衰。以五月五日進之。號曰續命。慧黠。能彈琵琶。工歌舞。后主惑之。愿得生死一处。宋玉諷賦。主人之女為臣歌曰。內憊惕兮徂玉牀。橫自陳兮君之旁。釋德洪楞嚴合論。引

司马相如好色赋曰。花容自献。玉体横陈。今此赋不传。或出假託。

北齐书。武平七年十二月。周武帝来救晋州。齐师大败。帝弃军先还。留安德王延宗等守晋阳。帝走入邺。辛酉。延宗与周师战。大败。为周师所虏。北齐书。周师取平阳。帝猎于二堆。晋州告急。帝将还。淑妃请更杀一围。从之。

街西池馆

白阁他年别。朱门此夜过。疎帘留月魄。珍簟接烟波。

太守三刀梦。将军一箭歌。国租容客旅。香熟玉山禾。

△杜牧有街西诗。鼓吹注。长安。领街西五十四坊及西市。多王公贵戚之家。通志。紫阁白阁黄阁。三峯俱在圭峯东。紫阁。旭日射之。烂然而紫。白阁。陰森。积雪不融。黄阁。不知所谓。三峯相去不甚遠。杜甫诗。错磨终南翠。颠倒白阁影。晋书麴游歌。南开朱门。北望青楼。晋书。王濬梦悬三刀于梁上。须臾又益一刀。李穀曰。三刀为州。又益者。明府其临益州乎。果迁益州刺史。唐诗纪事。杨巨源诗。三刀梦益州。一箭取辽城。由是知名。此诗三刀一箭。即用巨源语。但下事未详。张协七命。琼山之禾。善曰。琼。仙山。即崑崙。山海经。崑崙之上有木禾。长五寻。大五围。鲍炤诗。遠食玉山禾。

南朝

玄武湖中玉漏催。鸡鸣埭口绣襦迴。谁言琼树朝朝见。不及金莲步步来。

敌国军营漂木柁。前朝神庙锁烟煤。满宫学士皆顔色。江令当年只费才。

△宋书。元嘉二十三年。筑北隄。立玄武湖于乐游苑北。建康实録。吴开城北渠。引后河水流入新宫。又名练湖。徐爰释文曰。本桑泊。晋大兴三年始创北海。筑长隄以壅北山之水。东自覆舟山。西至宣武城。六里餘。宋元嘉中。有黑龙见。因改玄武湖。张衡浑天制。以玉虬吐漏水。入两壶。李兰刻漏赋。以玉壶玉管流珠。马上奔驰行漏。南史。齐武帝数幸琅琊城。宫人常从早发。至湖北埭。鸡始鸣。故呼为鸡鸣。埭。一统志。在晋溪西南潮沟之上。陈书。后主製新曲。有玉树后庭花。临江乐等。其略云。璧月夜夜满。琼树朝朝新。大抵美张贵妃孔贵嫔之容色。二句乃江总词也。齐书。东昏侯凿金为莲花。贴地。令潘妃行其上。曰此步步生莲花也。隋书。文帝将伐陈。命大作战船。或请密之。文帝使投柁于江。曰。若彼能改。吾又何求。陈书。后主于郭内大皇佛寺。起七层塔。未毕。火从中起。飞至石头。烧死者甚衆。陈书。后主起临春结绮望仙等阁。珠帘寶帳。服玩瑰丽。近古未有。上自居临春。张贵妃居结绮。孔龚二贵嫔居望仙。複道往来。以宫人袁大捨等为女

学士。陈书。江总。字总持。后主授尚书令。总为宰辅。不亲政务。侍宴后庭。谓之狎客。与诸嫔妃及女学士共赋诗。采其尤豔丽者。被以新声。

复京

虏骑胡兵一战摧。万灵回首贺轩台。天教李令心如日。可要昭陵石马来。

△唐书。德宗建中四年十月。泾原卒拥朱泚叛。上如奉天。兴元元年二月。如梁州。五月戊戌。李晟收复京城。七月壬子。上至自兴元。艺文类聚。山海经曰。西王母之山。有轩辕台。射者不敢西向。梁元帝临终诗。寂寥千载后。谁畏轩辕台。唐书。兴元元年六月。加李晟司徒。兼中书令。实封一千户。唐书。京兆府醴泉县有九峻山。太宗昭陵在西北六十里。唐会要。上欲阐扬先帝徽烈。乃刻石。为尝所乘破敌马六匹于昭陵阙下。安禄山事蹟。潼關之战。我军既败。贼将崔乾祐领白旗引左右驰突。又见黄旗军数百队。官军潜谓。是贼。不敢逼之。须臾。见与乾祐鬪。黄旗军不胜。退而又战者不一。俄。不知所在。后昭陵奏。是日灵宫前石人马汗流。

浑河中

九庙无尘八马回。奉天城垒长春苔。咸阳原上英雄骨。半向君家养马来。

△唐书。浑瑊。本铁勒九姓之浑部也。与李晟同平朱泚。德宗还宫。以瑊为河中尹。晋绛节度使。河中同陕虢等州。及管内行营副元帅。封咸宁郡王。贞元十五年薨。八马。八骏也。唐书。奉天县属京兆府。文明元年。分醴泉置。汉书。金日磾以父不降见杀。与母阼氏。弟伦。俱没入官。输黄门养马。后以讨莽何罗功。封秬侯。按旧唐书。瑊忠勤谨慎。功高不伐。时论方之金日磾。故末语云然。

鄠杜马上念汉书

世上苍龙种。人间武帝孙。小来惟射猎。兴罢得乾坤。

渭水天开苑。咸阳地献原。英灵殊未已。丁傅渐华轩。

△一云五陵懷古○汉书。宣帝尤乐鄠杜之间。注。杜属京兆。鄠属扶风。汉书。宣帝。武帝曾孙。戾太子孙也。高材好学。然亦喜游侠。鬪鸡走狗。上下诸陵。周徧三辅。昌邑王废。霍光与诸大臣迎。即皇帝位。三辅黄圖。汉有三十六苑。羽猎赋序。武帝广开上林。北绕黄山。滨渭而东。长安志。长安万年二县之外。有毕。白鹿原。少陵原。高阳原。细柳原。吳融诗。咸阳一火便成原。汉书。哀帝时。帝舅丁明封阳安侯。皇后父傅晏封孔乡侯。說文。轩。曲輶輶车也。

柳

动春何限叶。撼晓几多枝。解有相思苦。应无不舞时。

絮飞藏皓蝶。带弱露黄鹂。倾国宜通体。谁来独赏眉。

△道源注。梁刘邈折杨柳诗。春来谁不思。相思君自知。北史柳昂传。杨素尝于朝堂见昂子调。因独言曰。柳条通体弱。独摇不须风。梁元帝诗。柳叶生眉上。唐太宗柳诗。半翠几眉开。

巴江柳

巴江可惜柳。柳色绿侵江。好向金銮殿。移阴入绮窗。

△三巴记。阆白二水。南流。自汉中经。始宁城下。入涪陵。曲折三回如巴字。曰巴江。经峻峡中。谓之巴峡。两京记。大明宫紫宸殿。北曰蓬莱殿。西龙首山支厠起平地。上有殿。名金銮殿。殿旁坡名金銮坡。五代会要。殿因金銮坡以为名。与翰林院相对。

咸阳

咸阳宫阙鬱嵯峨。六国楼台豔绮罗。自是当时天帝醉。不关秦地有山河。

△史记。始皇每破诸侯。寫放其宫室。作之咸阳北坂上。殿屋複道。周阁相通。所得美人钟鼓。以充入之。西京赋。昔者大帝悦秦缪公而覲之。飡以钧天广乐。帝有醉焉。乃为金策锡。用此土而翦诸鹑首。薛综曰。大帝。天也。虞喜志林。谚曰。天帝醉秦暴。金误陨石坠。缪公梦天帝。奏钧天乐时。有此谚。事详史记。非言暴秦之兼并六国。实天帝畀之。非以其地有山河之固也。

同崔八诣药山访融禅师

共受征南不次恩。报恩惟是有忘言。岩花涧草西林路。未见高僧只见猿。

△道源注。稽古略。药山在澧州。惟俨禅师为初祖。太和六年入寂。融禅师或其后也。杜氏通典。征南将军。汉光武建武二年置。以冯异为之。高僧传。沙门慧永居在西林。与慧远同门游好。遂邀同止。刺史桓伊以学徒日衆。更为远建东林。

闻著明凶问哭寄飞卿

昔歎谗销骨。今伤泪满膺。空馀双玉劒。无复一壶冰。江势翻银砾。天文露玉绳。何因携庾信。同去哭徐陵。

△旧唐书。温庭。字飞卿。大中初应进士。累年不第。徐商镇襄阳。往依之。署为巡官。咸通初。迁隋县令。卒。曹植七启。步光之剑。错以荆山之玉。卢思道诗。犀渠玉剑良家子。剑有雌雄。故言双也。鲍照诗。清如玉壶冰。○说文。砾。小石也。梁简文帝雪诗。晚霞飞银砾。《春秋元命苞》。玉衡北两星为玉绳。

听鼓

城头叠鼓声。城下暮江清。欲问渔阳掺。时无祢正平。

△卫公兵法。鼓三百三十三槌为一通。鼓止角动。吹十二声为一叠。掺。七勘切。后汉书。祢衡。字正平。善击鼓。曹操召为鼓吏。著岑牟单绞之衣。为渔阳掺挝。容态有异。音节悲壮。徐锴曰。掺。三挝鼓也。

送崔珏往西川

年少因何有旅愁。欲为东下更西游。一条雪浪吼巫峡。千里火云烧益州。

卜肆至今多寂寞。酒垆从古擅风流。浣花牋纸桃花色。好好题诗咏玉钩。

△唐书。艺文志。崔珏。字梦之。大中进士。有诗一卷。徐凝瀑布诗。一条界破青山色。卢思道纳凉赋。火云赫而四举。高士传。严君平卖卜成都市中。日阅数人。得百钱足自养则闭肆。下帘而讲老子。史记。相如与文君俱之临邛买酒舍。令文君当垆。寰宇记。浣花溪在成都西郭外。属犀浦县地。名百花潭。大历中。崔宁镇蜀。其夫人任氏本浣花溪人。后薛涛家其旁。以潭水造纸。为十色牋。资暇录。元和初。薛涛尚松花牋。而好製小诗。惜其幅大。乃命匠狭小为之。蜀中才子以为便。后减诸牋亦如是。特名曰薛涛牋。招魂。砥室翠翘。挂曲琼些。王逸注。挂。悬也。曲琼。玉钩也。雕饰玉钩以悬衣服。

代赠

杨柳路尽处。芙蓉湖上头。虽同锦步障。独映钿箜篌。

鸳鸯可羡头俱白。飞去飞来烟雨秋。

△晋书。石崇与王恺奢靡相尚。恺作紫丝步障四十里。崇以锦步障五十里敌之。拾遗记。石虎为浴室。列凤文锦步障紫蔽于浴所。风俗通。箜篌。一名坎侯。汉武帝

令乐人侯调作坎侯。言其坎坎应节。侯。以姓冠章也。或曰。箜篌。取其空中。以钹饰之。曰钹箜篌。

桂林

城窄山将压。江宽地共浮。东南通绝域。西北有高楼。

神护青枫岸。龙移白石湫。殊乡竟何祷。箫鼓不曾休。

△山海经。桂林八树在贲隅东。注。八桂成林。言其大也。旧唐书。江源多桂。不生杂木。故秦时立为桂林郡。武德四年。置桂州总管府。后置桂管经略观察使治桂州。柳宗元记。桂州多灵山。发地峭竖。林立四野。方舆胜览。桂州有湘漓二江。荔江。阳江。方舆胜览。桂州东接诸溪。南浮琼崖。桂海虞衡志。灵川兴安之间。有严关。朔雪至此辄止。大盛则度关至桂州城下。不复南矣。北城旧有楼曰雪观。所以夸南州也。道源注。南方草木状。五岭之间多枫木。岁久则生瘤瘿。一夕遇暴雨骤雨。其树赘暗长三五尺。谓之枫人。越巫取之。作术。有通神之验。取之不以法。则能飞去。述异记。南中有枫子鬼。枫木之老者。人形。亦呼为灵枫焉。一统志。白石湫在桂林府城北七十里。俗名白石潭。宋李彦弼八桂堂记。民俗笃信阴阳。多尚巫卜。病不求医药。

夜雨寄北

君问归期未有期。巴山夜雨涨秋池。何当共剪西窗烛。却话巴山夜雨时。

陈后宫

茂苑城如画。阊门瓦欲流。还依水光殿。更起月华楼。

侵夜鸾开镜。迎冬雉献裘。从臣皆半醉。天子正无愁。

△吴都赋。带长洲之茂苑。虞世南诗。高台临茂苑。按。茂苑。非必吴地始可称。南史。宋有乐游苑。齐起新林芳乐等苑。皆在台城内。所谓茂苑城如画也。若吴地记之茂苑。其名立于贞观中。有引此者。非是。宋书。元嘉十二年。新作阊阖广莫二门。陈书。后主盛修宫室。无时休止。税江税市。徵取百端。范泰鸾鸟诗序。昔鬬宾王结置峻卯之山。获一鸾鸟。王甚爱之。三年不鸣。其夫人曰。尝闻鸟见其类而后鸣。何不悬镜以映之。王从其言。鸾睹影悲鸣。冲霄一奋而绝。晋咸宁起居注。太医司马程据上雉头裘一领。诏于殿前焚之。北齐书。后主好弹琵琶。自为无愁之曲。民间谓之无愁天子。

属疾

许靖犹羈宦。安仁复悼亡。兹辰聊属疾。何日免殊方。

秋蝶无端丽。寒花只暂香。多情真命薄。容易即迴肠。

△蜀志。许靖。字文休。避难。走交州。与相随中外同其饥寒。后因刘璋招入。蜀先主即尊号。以靖为司徒。潘岳集有悼亡诗二首。

石榴

榴枝婀娜榴实繁。榴膜轻明榴子鲜。可羡瑶池碧桃树。碧桃红颊一千年。

△道源注。尹喜内传。喜从老子西游。省太真王母。共食碧桃紫梨。

明日

天上参旗过。人间烛燄销。谁言整双履。便是隔三桥。

知处黄金鑊。曾来碧绮寮。凭栏明日意。池濶雨萧萧。

△天官书。参为白虎。其西有句曲九星。一曰天旗。正义曰参旗。九星在参。西天旗也。过即所谓参横。三桥。三渭桥也。三辅黄圖。渭水贯都。以象天汉。横桥南渡。以法牵牛。史记索隱。今渭桥有三所。一在城西北咸阳路。曰西渭桥。一在东北高陵邑。曰东渭桥。其中渭桥。在古城之北。唐书。德宗至自兴元。李晟戎服。谒见于三桥。鑊。门鑊也。魏都赋。皎日笼光于绮寮。注。寮。窻也。

饮席戏赠同舍

洞中屐响省分携。不是花迷客自迷。珠树重行怜翡翠。玉楼双舞美鷗鸡。

兰迴旧藥綠屏綠。椒缀新香和壁泥。唱尽阳關无限叠。半杯松叶冻颇黎。

△长安志。莲花洞在神禾原。郑驸马潜曜所居。子美有郑驸马宅宴洞中诗。行。音杭。山海经。三珠树在厌火国北。生赤水上。树如栢。叶皆为珠。尔雅。翠。鹖也。说文。翡。赤雀。翠。青雀。十洲记。崑崙山有天墉城。四方千里。城上安金台五所。玉楼十二。楚词注。鷗鷄。似鹤。黄白。杜甫诗。沙僻舞鷗鸡。西京杂记。温室以椒涂壁。世说。石崇以椒为泥涂室。东坡志林。旧传阳關三叠。然今世歌者。每句再叠而已。若通一首言之。又是四叠。皆非是。或每句三唱。以应三叠之说。

。则丛然无复节奏。余在密州。有文勋长官以事至。自云得古本阳關。其声宛转凄断。及在黄州。偶读乐天对酒诗云。聽唱阳關第四声。自注云。第四声。劝君更尽一杯酒。以此验之。若一句再叠。则此句为第五声。餘为第四声。是首句不叠。审矣。道源注。煮松叶汁浸米。并饌饭。泥酿封头。七日发。饮之。得此酒力者甚衆。韵会。玻璃。寶玉名。本草作颇黎。云西国寶。或云是水玉。千歲冰为之。乐史。太白集序。白进清平调词三章。太真妃持颇黎七寶杯。酌西凉蒲萄酒。笑领歌意。

西溪

近郭西溪好。谁堪共酒壶。苦吟防柳恹。多泪怯杨朱。

野鹤随君子。寒松揖大夫。天涯常病意。岑寂胜欢娱。

△梁书。柳恹。字文暘。河东解人。少工篇什。为诗曰。亭皋木叶下。陇首秋云飞。琅琊王融书之斋壁。入梁。为秘书监。终吳兴太守。淮南子。杨朱见岐路而哭之。为其可以南。可以北。抱朴子。周穆王南征。一军尽化。君子为猿鹤。小人为沙虫。汉官仪。秦始皇上封泰山。风雨暴至。休于松下。因封其树为五大夫。汉书注。五大夫。秦第九爵名。

忆梅

定定住天涯。依依向物华。寒梅最堪恨。常作去年花。

赠柳

章台从掩映。郢路更参差。见说风流极。来当婀娜时。

桥迴行欲断。隄遠意相随。忍放花如雪。青楼扑酒旗。

△汉书。张敞为京兆尹。时罢朝会。走马章台街。唐人诗有章台柳。史记注。楚都于郢。今江陵县。世说。桓温自江陵北征。经金城。见少为琅琊时所种柳。皆已十围。慨然叹曰。木犹如此。人何以堪。南史。刘俊之为益州刺史。献蜀柳数株。枝条状如丝缕。武帝植于灵和殿前。尝赏玩咨嗟曰。此杨柳风流可爱。似张绪当年。魏文帝柳赋。柔条婀娜而蛇伸。行，音杭。晋伍辑之柳赋。扬零花而雪飞。齐书。武帝兴光楼上施青漆。谓之青楼。白居易杨柳枝词。红板江桥青酒旗。

谑柳

已带黄金缕。仍飞白玉花。长时须拂马。密处少藏鸦。

眉细从他斂。腰轻莫自斜。玳梁谁道好。偏拟映卢家。

△刘禹锡杨柳枝词。千条金缕万条丝。柳眉。注见前。杜甫诗。隔户杨柳弱嫋嫋。恰似十五女儿腰。沉佺期古意。卢家少妇鬱金堂。海燕双栖玳瑁梁。

北禽

为恋巴江好。无辞瘴雾蒸。纵能朝杜宇。可得值苍鹰。

石小虚填海。芦荻未破罾。知来有乾鹊。何不向雕陵。

△山海经。赤帝之女名女娃。游于东海。溺而不返。化为精卫鸟。常取西山木石以填东海。淮南子。雁衔芦而飞。以避矰缴。埤雅。鹊取木杪枝。不取堕地枝。名乾鹊。淮南子。乾鹊知来而不知往。此修短之分也。庄子。庄周游雕陵之樊。睹一异鹊自南来。翼广七尺。目大运寸。感周之颡。而集于栗林。周执弹而留之。

初起

想像咸池日欲光。五更钟后更迴肠。三年苦雾巴江水。不为离人照屋梁。

△淮南子。日出于暘谷。浴于咸池。神女赋。耀乎如白日。初出照屋梁。

楚宫

複壁交青琐。重帘挂紫绳。如何一柱观。不碍九枝灯。

扇薄常规月。钗斜只镂冰。歌成犹未唱。秦火入夷陵。

△风赋。楚襄王游于兰台之宫。汉书注。青琐。户边刻为连琐文。以青涂之。渚宫故事。宋临川王义庆镇江陵。于罗公洲立观。甚大。而惟一柱。一统志。一柱观。在松滋县东。丘家湖中。西京杂记。汉高祖入咸阳。有青玉五枝灯。汉武内传。七月七日王母至。帝扫除宫内。然九光之灯。王筠灯檠诗。百花曜九枝。班婕妤怨歌行。裁为合欢扇。团团似明月。梁简文帝诗。青山衔月规。盐铁论。如画脂镂冰。费日损功。道源注。刻水玉作钗。如镂冰然。李贺诗。寒鬟钗斜玉燕光。史记。秦昭襄二十一年。白起伐楚。拔郢。烧夷陵。唐书。峡州夷陵郡。属山南东道。

柳

柳映江潭底有情。望中频遣客心惊。巴雷隱隱千山外。更作章台走马声。

石城

石城夸窈窕。花县更风流。簾水将飘枕。帘烘不隱鉤。

玉童收夜钥。金狄守更筹。共笑鸳鸯绮。鸳鸯两白头。

△乐府。莫愁乐。莫愁在何处。莫愁石城西。唐书。乐志。石城在竟陵。有女子名莫愁。善歌谣。白帖。潘岳为河阳令。遍树桃李。庾信枯树赋。若非金谷满园树。定是河阳一县花。唐韦思谦传。涕泗冰鬚。冰谓涕著鬚而凝也。读去声。包佶诗。晓漱琼浆冰齿寒。萧谿诗。珠帘半上珊瑚鉤。李白诗。双鬟白玉童。张衡浑仪制。铸金人居壶之左。金胥徒居壶之右。以左手把箭。右手指刻。别天时早晚。西京赋。列坐金狄。善曰。金狄。金人也。道源注。筹。即漏箭也。王褒洛都赋。挈壶司刻。漏樽泻流。指日命分。应则唱筹。古诗。客从遠方来。遗我一端绮。文彩双鸳鸯。裁为合欢被。

韩碑

元和天子神武姿。彼何人哉轩与羲。誓将上雪列圣耻。坐法宫中朝四夷。

淮西有贼五十载。封狼生豸生黑。不据山河据平地。长戈利矛日可麾。

帝得圣相相曰度。贼斫不死神扶持。腰悬相印作都统。陰风惨澹天王旗。

愬武古通作牙爪。仪曹外郎载笔随。行军司马智且勇。十四万衆犹虎貔。

入蔡缚贼献太庙。功无与让恩不訾。帝曰汝度功第一。汝从事愈宜为辞。

愈拜稽首蹈且舞。金石刻画臣能为。古者世称大手笔。此事不繫于职司。

当仁自古有不让。言讫屡颌天子颐。公退斋戒坐小閣。濡染大笔何淋漓。

点窜尧典舜典字。涂改清庙生民诗。文成破体书在纸。清晨再拜铺丹墀。

表曰臣愈昧死上。咏神圣功书之碑。碑高三丈字如斗。负以灵鼉蟠以螭。

句奇语重喻者少。谗之天子言其私。长绳百尺拽碑倒。龕砂大石相磨治。

公之斯文若元气。先时已入人肝脾。汤盘孔鼎有述作。今无其器存其辞。

呜呼圣皇及圣相。相与烜赫流淳熙。公之斯文不示后。曷与三五相攀追。

愿书万本诵万遍。口角流沫右手胝。传之七十有二代。以为封禅玉检明堂基。

△按史。肃宗寶应初。以李忠臣镇蔡州。大历末。为军中所逐。歷李希烈陈仙奇吳少诚吳少阳元济。据有淮西凡五十馀年。思玄赋。射罽象之封狼。注。封。大也。说文。羆似狸。能捕兽。一云虎。五指为羆。尔雅。罽如熊。黄白文。柳宗元罽说。鹿畏羆。羆畏虎。虎畏罽。旧唐书。吳少诚阻兵三十馀年。王师未尝及其城下。尝走韩全义败于頔。骄悍无所顾忌。又恃陂浸阻迴。故以天下兵环攻三年。所得者一县而已原。注。晏子春秋。仲尼。圣相也。○唐书。元和十年六月。上召裴度入对。拜中书侍郎同平章事。李师道遣客杀武元衡。擊裴度。伤首。墮沟中。度羶帽厚。得不死。元和十二年七月。度请自往督战。上悅。以度充淮西宣慰招讨处置使。元和十一年十二月。李愬为唐邓隋节度使。十年九月。韩弘为淮西都统。弘请使子公武以兵万三千会蔡下。十一年。李道古为鄂岳观察使。十年二月。李文通为壽州团练使。碑文。光顏重胤公武合攻其北。道古攻其东南。文通战其东。愬入其西。旧唐书。以司勋员外郎李正封都官员。外郎冯宿。礼部员外郎李宗闵。皆兼侍御。从度出征。度奏右庶子韩愈兼御史中丞。充彰义军行军司马。十二年十月己卯。李愬执吳元济。送长安。帝御兴安门受俘。以元济献庙社。徇于市斩之。度策勋进金紫光禄大夫。上柱国。封晋国公。户三千。旧书韩愈传。淮蔡平。十二月。随度还朝。以功授刑部侍郎。仍诏撰平淮西碑。道源注。破体。破当时为文之体。旧书韩愈传。碑辞多叙裴度事。时入蔡擒吳元济。李愬功第一。愬不平之。愬妻。唐安公主女也。出入禁中。因诉碑辞不实。诏令磨去愈文。命翰林学士段文昌重撰文勒石。史记。古者封太山禪梁父者七十二家。封禪仪。玉牒长一尺三寸。广厚五寸。玉检如之。厚減三寸。其印齿如玺。纚以金绳五周。

令狐八拾遗絢见招送裴十四归华州

二十中郎未足希。骊驹先自有光辉。兰亭讌罢方回去。雪夜诗成道韞归。

汉苑风烟吹客梦。云台洞穴接郊扉。嗟予久抱临邛渴。便欲因君问钓矶。

△唐书令狐絢传。太和四年登进士第。开成初为左拾遗。地理志。华州。华陰郡。属關内道。○晋书。谢万弱冠辟抚军从事中郎。世說。谢中郎万。是王蓝田女壻。古乐府。何以识夫壻。白马从骊驹。海錄。山陰县西南二十里。有兰渚。渚有亭。曰兰亭。羲之旧迹。何延之兰亭记。永和九年三月三日。琅琊王羲之与太原孙统孙绰。广汉王彬之。陈郡谢安。高平郗昙。太原王蘊。释支遁。并其子凝之。徽之。操之等。四十有二人。会于会稽山陰之兰亭。修祓禊之礼。晋书。郗愔。字方回。

鑒之子。官会稽内史。加镇军都督。晋书。王凝之妻谢氏。字道韞。安西将军。奕之女也。尝内集。俄而雪骤下。叔父安曰。何所似也。安兄子朗曰。撒盐空中差可拟。道韞曰。未若柳絮因风起。○按。郗愔不与兰亭四十二人之数。晋书。王羲之娶郗鑒女愔。又。羲之姊夫裴十四必令狐氏之壻。时携内归华州。故有此二语耳。华山志。岳东北有云台峰。其山两峰峥嵘。四面悬絶。上冠景云。下通地脉。巖然独秀。有若云台下。有穴。昔有人入此穴。出东方。云经黄河底。上闻流水声。西京杂记。相如素有消渴疾。

离思

气尽前溪舞。心酸子夜歌。峡云寻不得。沟水欲如何。

朔雁传书絶。湘篁染泪多。无由见顔色。还自託微波。

△寰宇记。前溪在乌程县南。东入太湖。谓之风渚。夹溪悉生箭箬。晋车骑将军沉玩家于此。乐府有前溪曲。玩所制。乐府解题。前溪。舞曲也。唐书乐志。子夜歌者。晋曲也。晋有女子名子夜。造此歌。声过哀苦。乐府解题。后人更为四时行乐之词。谓之子夜四时歌。又。有大子夜歌。子夜警歌。子夜变歌。文君白头吟。今日斗酒会。明旦沟水头。蹀躞御沟上。沟水东西流。汉书苏武传。天子射上林中。得雁。足有繫帛书。言武等在某泽中。注。见前洛神赋。托微波而通辞。

宿骆氏亭寄懷崔雍崔袞

竹坞无尘水檻清。相思迢递隔重城。

秋陰不散霜飞晚。留得枯荷听雨声。

△唐年补録。长庆元年二月。王庭湊使河阳回。及沔水。酒困。寢于道。有济源骆山人。熟视之。曰。贵当列土。在今年秋。既归。遇田弘正之难。军士拥为畱。后访骆山人。待以函丈之礼。乃别搆一亭。去则悬榻。号骆氏亭。又。唐语林。骆浚者。度支司书手。李吉甫擢用之。后典名郡。有令名。于春明门外筑台榭。食客皆名人。卢申州题诗云。地盤如拳石。谿横似叶舟。即骆氏池馆也。此诗骆氏亭未知在何地。唐书。崔雍。字顺中。戎之子。由起居郎出为和州刺史。龐勋劫。乌江雍遣人。持牛酒劳之。密表其状。民不知。诉诸朝。宰相路嵩傳其罪。赐死。袞。字炳章。雍之弟。见集内安平公诗。

风雨

凄凉寶劍篇。羈泊欲穷年。黄叶仍风雨。青楼自管弦。

新知遭薄俗。旧好隔良緣。心断新丰酒。销愁斗几千。

△唐书。武后索郭元振所为文章。上寶劍篇。王维诗。新丰美酒斗十千。

梦泽

梦泽悲风动白茅。楚王葬尽满城娇。未知歌舞能多少。虚减宫櫺为细腰。

△云梦。楚二泽名。汉阳圖经。云在江之北。梦在江之南。墨子。楚灵王好细腰。其臣皆三饭为节。后汉马廖传。楚王好细腰。宫中多饿死。

赠歌妓二首

水精如意玉连环。下蔡城危莫破顏。红绽櫻桃含白雪。断肠声里唱阳關。

白日相思可奈何。严城清夜断经过。只知解道春来瘦。不道春来独自多。

△拾遗记。吴孙和尝于月下舞水精如意。误伤邓夫人颊。战国策。始皇遗齐襄王后玉连环。后引椎破之。登徒子好色赋。嫣然一笑。惑阳城。迷下蔡。注。阳城下蔡。二县名。水经注。蔡城公自新蔡迁于州来。谓之下蔡。

谢书

微意何曾有一毫。空携笔砚奉龙韬。自蒙半夜传衣后。不羨王祥得佩刀。

△太公六韬。一曰龙韬。李舟能大师传。五祖弘忍告之曰。汝緣在南方。宜往教授。持此袈裟以为法信。一夕南逝。公灭度后。诸弟子求衣。不获。始相谓曰。此非卢行者所得耶。使人追之。已去。寶林传。能大师传法衣处。在曹溪寶林寺。晋书。吕虔有佩刀。工相之曰。当为三公。虔以赠别驾王祥。祥果为太傅。

寄令狐学士

秘殿崔嵬拂彩霓。曹司今在殿东西。赓歌太液翻黄鹄。从猎陈仓获碧鷄。

晓饮岂知金掌迴。夜吟应讶玉绳低。钧天虽许人间听。阊阖门多梦自迷。

△令狐綯传。大中二年。召拜考功郎中。寻知制誥。充翰林学士。西京杂记。始元元年。黄鹄下大液池。帝为歌曰。黄鹄飞兮下建章。唐书。凤翔府寶鸡县。本陈仓。至德二载更名。晋太康地志。秦文公时。陈仓人猎。得兽。如鼯。不知名。牵以

献之。逢二童子。童子曰。此名为媚。常在地中。食死人脑。即欲杀之。拍捶其首。媚亦语曰。二童名陈寔。得雄者王。得雌者霸。陈仓人乃逐之。化为雌雉。上陈仓北坂为石。秦祀之。水经注。昔秦文公感伯王之言。游猎陈仓。遇之于此坂。得若石焉。其色如肝。归而寔祠之。故曰陈寔。三辅旧事。仙人掌在甘泉宫。长安志。仙人掌。大十围。以铜为之。谢朓诗。玉绳低建章。史记。赵简子疾寤。语大夫曰。吾之帝所。甚乐。与百神游于钧天。广乐九奏万舞。不类三代之乐。其声动人心。

酬令狐郎中见寄

望郎临古郡。佳句洒丹青。应自丘迟宅。仍过柳恽汀。

封来江渺渺。信去雨冥冥。句曲闻仙诀。临川得佛经。

朝吟搢客枕。夜读漱僧瓶。不见衔芦雁。空流腐草萤。

土宜悲坎井。天怒识雷霆。象卉分疆近。蛟涎浸岸腥。

补羸贪紫桂。负气託青萍。万里悬离抱。危于讼阁铃。

△魏书。孝文曰。吏部郎必使才望兼允者。本集为郑亚谢上表。极望郎于南省。梁书。丘迟。字希范。吴兴人。丘灵鞠之子。八岁能属文。累官中书郎。迁司徒。从事中郎。卒。白居易记。湖州城东南二百步。抵霅溪。溪连汀洲。洲。一名白苹。梁吴兴太守柳恽于此赋诗云。汀洲采白苹。因以名洲也。○按丘迟宅。柳恽汀。皆在苕霅间。此必令狐綯官湖洲时。有诗寄义山。而以此酬之也。唐史。开成中。綯累迁库部户部员外郎。出为湖州刺史。真诰。勾曲洞天。东通林屋。北通岱宗。西通峨眉。南通罗浮。南史。陶弘景止于句容之勾曲山。此山下是第八洞。宫名金陵华阳之天。周迴一百五十里。乃于山中立馆。自号华阳陶隐居。徧游名山。访求仙药。既得神符秘诀。以为神丹可成。而苦无药物。帝给黄金朱砂曾青雄黄等。复合飞丹。色如霜雪。服之体轻。宋书谢灵运传。帝不欲复使东归。以为临川内史。庐山记。灵运一见远公。肃然心服。乃即寺翻涅槃经。名其台曰翻经台。月令。腐草化为萤。坎井。见易。吴武陵与孟简书。霆砰电射。天怒也。不能终朝。海录。鸟荒象卉寻隔于皇风。北梦琐言。蛟形如马蟻。涎沫腥粘。掉尾纏人。而噬其血。道源注。拾遗记。閼河之北有紫桂成林。羣仙餌焉。韩终采药诗。閼河之桂。实大如枣。得而食之。后天而老。陈琳荅曹植牋。君侯秉青萍干将之器。注。青萍。劒名。铃阁。风摇离绪如之。○句曲以下。皆自序。时义山羈宦桂管。故有象卉蛟涎等句。

七月二十八日夜与王郑二秀才听雨梦后

初梦龙宫寶燄然。瑞霞明丽满晴天。旋成醉倚蓬莱树。有箇仙人拍我肩。

少顷遽闻吹细管。闻声不见隔飞烟。逡巡又过潇湘雨。雨打湘灵五十弦。

瞥见冯夷殊怅望。蛟绡休卖海为田。亦逢毛女无繆极。龙伯擎将华岳莲。

恍惚无倪明又暗。低迷不已断还连。觉来正是平阶雨。独背寒灯枕手眠。

△郭璞诗。右拍洪崖肩。楚词。使湘灵鼓瑟兮。山海经。冰夷。人面。乘两龙。注。冰夷。冯夷也。搜神记。冯夷。潼乡隄首人。八月上庚日死。上帝署为河伯。博物志。蛟人水居如鱼。不废织绩。时出人家卖绡。说文。销。生丝。繒也。列仙传。毛女。字玉姜。在华阴山中。形体生毛。自言始皇宫人也。秦亡入山。道士教食松叶。遂不饥寒。韵会。繆。悲恨也。按。唐人用无繆。皆与无聊同。通鑑注。无繆。无聊赖也。其义未详。河图玉版。崑崙以北九万里。龙伯国人长三十丈。万八千歲。

寄令狐郎中

嵩云秦树久离居。双鲤迢迢一纸书。休问梁园旧宾客。茂陵秋雨病相如。

△古诗。客从远方来。遗我双鲤鱼。呼儿烹鲤鱼。中有尺素书。史记。司马相如客游梁。梁孝王令与诸生同舍。后为孝文园令。病免。家居茂陵。

漫成三首

不妨何范尽诗家。未解当年重物华。遽把龙山千里雪。将来拟并洛阳花。

沉约怜何逊。延年毁谢庄。清新俱有得。名誉底相伤。

雾夕咏芙。何郎得意初。此时谁最赏。沉范两尚书。

△南史。何逊。字仲言。八歲能赋诗。弱冠举秀才。范云见其对策。大相称赏。结为忘年友。鲍照诗。胡风吹朔雪。千里度龙山。注。龙山在云中。何逊集范广州宅联句。洛阳城东西。却作今年别。昔去雪如花。今来花似雪。范广州。即云也。云尝迁广州刺史。南史。沉约尝谓逊曰。吾每读卿诗。一日三复。犹不能已。南史。谢庄。字希逸。七歲能属文。孝武尝问颜延之曰。谢希逸月赋何。答曰。美则美矣。但庄始知隔千里兮共明月。帝召庄以延之语语之。庄应声曰。延之作秋胡诗。始知生为久离别。没为长不归。帝抚掌竟日。何逊集看伏郎新婚诗。雾夕莲出水。霞朝日照梁。何如花烛夜。轻扇掩红粧。沉约。领中书令。迁尚书令。范云。领太子

中庶子。迁尚书右僕射。杜甫诗。沉范早知何水部。

无题

白道萦迴入暮霞。斑骓嘶断七香车。春风自共何人笑。枉破阳城十万家。

△李白诗。日日采蘼芜。上山成白道。斑骓注。别见。魏武帝与杨彪书。今赠足下画轮。四望。通幰。七香车二乘。乐府。青牛白马七香车。

槿花二首

燕体伤风力。鸡香积露文。殷鲜一相杂。啼笑两难分。

月里宁无姊。云中亦有君。三清与仙岛。何事亦离羣。

珠馆薰燃久。玉房梳扫馀。烧兰才作烛。襞锦不成书。

本以亭亭远。翻嫌脉脉疎。迴头问残照。残照更空虚。

△说文。舜。木槿也。朝华暮落。广志。日及。木槿也。鸡香。鸡舌香也。梦溪笔谈。按齐民要术云。鸡舌香。世以其似丁子。故一名丁子香。即今丁香是也。○燕体。比其条之轻。鸡香。比其色之豔。广韵。殷。赤黑色。罗浮山记。木槿。一名赤槿。花甚丹。四时敷荣。江摠木槿赋。啼妆梁冀妇。红妆荡子家。若持花并笑。宜笑不胜花。《春秋感精符》。人君。父天。母弟。兄日。姊月。宋均注。兄日于东郊。姊月于西郊。九歌有云中君三清。注见前。仙岛。蓬莱三山也。言云月之质。宜在三清仙岛之间。何为亦离羣在此耶。楚词。紫贝阙兮珠宫。或曰。江赋。蛟人搆馆于悬流。蛟人能泣珠。故曰珠馆。汉郊祀歌。神之出。排玉房。晋庾阐游仙诗。玉房石龕磊砢。白居易诗。蝉髻加意梳。蛾眉用心扫。又。三梦记。唐末宫中髻。为闹扫妆。犹盘鸦堕马之类。唐人诗。还梳闹扫学宫妆。招魂。兰膏明烛。逸曰。以兰香练膏也。晋书。窦滔妻苏若兰。织锦为迴文璇玑图诗。以赠滔。辞甚悽惋。尔雅。脉。相视也。古诗。脉脉不得语。

哭刘蕡

上帝深宫闭九阍。巫咸不下问衔冤。广陵别后春涛隔。湓浦书来秋雨翻。

只有安仁能作诔。何曾宋玉解招魂。平生风义兼师友。不敢同君哭寝门。

△初学记。世本曰巫咸。作筮。○按。招魂。帝告巫阳云。云乃下招曰。王逸注。

巫阳受天帝之命。因下招屈原之魂。此诗巫咸恐当作巫阳。潘岳传。岳词藻絶丽。尤善为哀诔之文。集有夏侯常侍及冯衍督诸诔。招魂注。宋玉怜屈原魂魄放佚。厥命将落。故作招魂。檀弓。孔子曰。师吾哭诸寝。朋友吾哭诸寝门之外。

杜司勳

高楼风雨感斯文。短翼差池不及羣。刻意伤春复伤别。人间惟有杜司勳。

△旧唐书。杜牧。字牧之。太和二年擢进士第。累官膳部比部员外郎。出牧黄。池。睦。三郡。迁司勳员外郎。史馆修撰。又授湖州刺史。迁中书舍人。卒。有集二十卷行于世。杜牧惜春诗。春半年已除。其馀强为有。即此醉残花。便同尝腊酒。怅望送春杯。殷勤扫花帚。谁为驻东流。年年常在手。又。赠别诗二首。娉娉袅袅十三馀。荳蔻梢头二月初。春风十里扬州路。卷上珠帘总不如。多情却似总无情。惟觉罽前笑不成。蜡烛有心还惜别。替人垂泪到天明。

荆門西下

一夕南风一叶危。荆云迴望夏云时。人生岂得轻离别。天意何曾忌嶮巇。

骨肉书题安絶徼。蕙兰蹊径失佳期。洞庭湖濶蛟龙恶。却羡阳朱泣路歧。

△盛弘之荆州记。郡西泝江六十里南岸。有山曰荆門。水经注。荆門在南上合下。开状似門。

碧瓦

碧瓦衔珠树。红轮结绮寮。无双汉殿鬢。第一楚宫腰。

雾唾香难尽。珠啼冷易销。歌从雍门学。酒是蜀城烧。

柳暗将翻巷。荷欹正抱桥。钿辕开道入。金管隔隣调。

梦到飞魂急。书成即席遥。河流衝柱转。海沫近槎飘。

吴市螭甲。巴賔翡翠翘。他时未知意。重迭赠娇饶。

△碧瓦珠树。注俱见前。按沉约诗。画扇迎初暑。红轮映早寒。庾肩吾诗。粉白映轮红。庾信诗。红轮帔角斜。红轮不知是何物。杨用修云。想是妇女所执如暖扇之类。又。唐太宗白日半西山诗。红轮不暂驻。此则谓红日也。绮寮注。见前。太平

御覽。史记曰。卫皇后。字子夫。与武帝传衣得幸。头解。上见其髮鬢。悅之。因立为后。按今本史记无此语。细腰。注见前。列子。韩娥东之齐。遗粮过雍门。鬻歌假食而去。馀响遶梁三日不絕。雍门人至今善歌。效娥之遗声也。萧子显诗。朝酤成都酒。暮数河间钱。唐国史补。酒则剑南之烧春。搜神记。杜兰香。数詣张硕。有婢子二人。大者萱支。小者松支。钿车青牛上。饮食皆备。白居易诗。曲江碾草钿车行。沉约诗。金瑱玉柱响洞房。李白诗。玉箫金管坐两头。书传。河水分流包山。而过山见水中如柱然。故曰砥柱。博物志。有人居海上。年年八月见浮槎去来。不失期。海録。作蟺蜋。道源注。岭表録异。蟺蜋。俗谓之兹夷。乃山龟之巨者。潮循。人採之。取殼以货。要全其殼。须以木楔出肉。龟吼如牛。声响山谷。广州有巧匠取其甲黄明无日脚者煮而拍之。陷黑玳瑁花以为梳篦杯器之属。状甚明媚。注。甲上有散黑晕为日脚。稗雅。蟺蜋谓之蟺。自關而东谓之蟺蜋。旧曰蛭蟺。化为复育。转而为蟬类。吳女以蟬蛻和凤仙搗之。染指甲。极红媚可爱。鱼玄机诗。偏怜爱数蛭蟺掌。每忆光抽玳瑁簪。愚按。蟺蜋。大龟。其甲即玳瑁之类。故吳市有之。作蟺蜋。非是。说文。寶。南蛮赋。晋书食货志。巴人输寶。布户一匹。晋中兴书。巴人谓赋为寶。因名巴寶。招魂。砥室翠翹。絳曲琼些。注。翠。鸟名。翹。羽也。炙穀子。高髻名凤髻。上有珠翠翹。

蜨

叶叶复翻翻。斜桥对侧门。芦花惟有白。柳絮可能温。

西子寻遗殿。昭君覓故村。年年芳物尽。来别败兰荪。

△方輿胜覽。归州东北四十里。有昭君村。

蠅蜨鸡麝鸾凤等成篇

韩蜨翻罗幕。曹蠅拂绮窓。鬪鸡迴玉勒。融麝暖金釭。

瑋瑋明书阁。琉璃冰酒缸。画楼多有主。鸾凤各双双。

△彤管新编。韩憑为宋康王舍人。妻何氏。美。王欲之。捕舍人。筑青陵台。何氏作乌鵲歌以见志。遂自縊死。韩亦死。列异传。宋康王埋韩憑夫妻。宿昔。文梓生。有鸳鸯雌雄各一。恒栖树上。音声感人。或云。化为蝴蝶。吳録。曹不兴画屏。误笔点污。因就改为蠅。孙权谓是真。以手弹之。说文。勒。马头络衔也。有衔曰勒。无衔曰羈。博雅。釭。车轴中鍊。汉书。赵昭仪居昭阳。舍壁带往往为黄金釭。注。壁带。壁之横木。露出如带者。以金为釭。若车釭之形。西都赋。金釭衔壁。是为列钱。又。说文。俗谓灯为釭。江淹赋。冬釭凝兮夜何长。李白天坐吟。金釭清凝照悲啼。

韩翃舍人即事

萱草含丹粉。荷花抱绿房。鸟应悲蜀帝。蝉是怨齐王。

通内藏珠府。应官解玉坊。桥南荀令过。十里送衣香。

△唐书。韩翃。字君平。南阳人。侯希逸表佐淄青幕府。李勉在宣武。复辟之。俄以驾部郎中知制诰。终中书舍人。鲁灵光殿赋。圆渊方井。反植荷蕖。绿房紫葍。窈窕垂珠。铣曰。绿房。莲子也。注见前。古今注。牛亨问董仲舒曰。蝉名齐女。何也。对曰。昔齐王之后。怨王而死。尸变为蝉。登庭树嚙啖而鸣。王悔恨之。故名齐女。录异记。江州南七里店有藏珠。石梁四公记。东海龙王第七女。掌龙王珠。藏通志解。玉溪在成都华阳县大慈寺南。唐韦皋所凿。用其砂解玉则易为功。○言其通内则藏珠之府也。应官则解玉之坊也。因韩官中书舍人。故云。然未必用故实。习凿齿襄阳记。刘季和性爱香。谓张坦曰。荀令君至人家坐幙三日。香气不歇。为我何如。坦曰。丑妇效颦。见者必走也。晋荀勗为尚书令。故云令君。

公子

一盏新罗酒。凌晨恐易消。归应衝鼓半。去不待笙调。

歌好惟愁和。香浓岂惜飘。春场铺艾帐。下马雉媒娇。

△通典。新罗国其先本辰韩种。在百济国东南五百馀里。按。五代唐时。新罗国併于高丽。通考云。高丽土无秫。以秬为酒。新罗酒。当即此也。鲍照雉朝飞。专场挟雌恃强力。道源注。艾帐。雉翳也。李贺艾如张。艾叶绿花谁剪刻。中藏祸机不可测。射雉赋注。媒者。少养雉子。长而狎人。能招引野鸡。

子初全溪作

全溪不可到。况复尽馀醕。汉苑生春水。昆池换劫灰。

战蒲知雁唼。皱月觉鱼来。清兴恭闻命。言诗未敢迴。

△曹昆志怪。汉武凿昆明池。极深。悉见灰墨。无复土。以问东方朔。朔曰。试问西域胡。至明帝时外国道人入。时有忆朔言。问之。胡人曰。经云。天地大劫将尽则劫烧。此劫烧之餘。

杨本胜说于长安见小男阿衮

闻君来日下。见我最娇儿。渐大啼应数。长贫学恐迟。

寄人龙种瘦。失母凤雏痴。语罢休边角。青灯两鬓丝。

△本集。樊南乙集序。大中七年十一月。弘农杨本胜始来军中。悬索所有四六。时义山在东川。世说。举头见日。不见长安。杜甫诗。愿托长安日。按。崔珣哭义山诗云。成纪星郎字义山。可证。义山乃陇西成纪李氏。义山诗亦云。我系本王孙。此故称龙种新书。或云。英国公世勣之后。考英公孙敬业。则天时起义事败。被诛。复姓徐氏。新史所云。不足信也。

西溪

怅望西溪水。潺湲奈尔何。不惊春物少。只觉夕阳多。

色染妖韶柳。光含窈窕萝。人间从到海。天上莫为河。

凤女弹瑶瑟。龙孙撼玉珂。京华他夜梦。好好寄云波。

△诗笺。天河。水气也。从到海。以其有朝宗之义。莫为河。以其隔牛女之会合。列仙传。弄玉随凤皇飞去。故秦作凤女祠于雍宫。世有箫声。道源注。龙孙。龙驹也。本草。珂。贝类。皮黄黑而骨白。可为马饰。生南海。义山谢河东公和诗后。某前因假日出次西溪。既惜斜阳。聊裁短什。盖以徘徊胜境。顾慕佳辰。为芳草以怨王孙。借美人以喻君子。

柳下暗记

无奈巴南柳。千条傍吹台。更将黄映白。拟作杏花媒。

△枯树赋。昔年杨柳。依依汉南。陈留风俗传。县有仓颉师旷。城上有列仙之吹台。梁王增筑以为吹台。元和郡国志。吹台在开封县东南六里。

妓席

乐府闻桃叶。人前道得无。劝君书小字。慎莫唤官奴。

△古今乐录。桃叶歌。晋王子敬所作也。桃叶。子敬妾。縁于笃爱。所以歌之。乐府集。桃叶。王献之妾。妹曰桃根。今秦淮口有桃叶渡。海录。右军书乐毅论与子敬。论后题云。书赐官奴。官奴。子敬小字也。按。右军有官奴帖。

少年

外戚平羌第一功。生年二十有重封。直登宣室螭头上。横过甘泉豹尾中。

别馆觉来云雨梦。后门归去蕙兰丛。灞陵夜猎随田窦。不识寒郊自转蓬。

△东观汉记。马防。援之子也。兄弟三人。各六千户。防为颍阳侯。特以前参医药勤劳。绥定西羌。以襄城羹亭一千二百户增防。防身带三绶。宠贵至盛。汉书注。宣室未央前殿正室。又曰丹墀。直上之阶曰螭头。唐会要。唐左右二史分立殿下。直第二螭首坳处。号曰螭头。闕辅记。甘泉宫。一曰云阳宫。一曰林光宫。在今池阳县西甘泉山。本秦造。汉武帝建元中增广之。周十九里。去长安三百里。望见长安城。扬雄传。每上甘泉常法从。在属车间。豹尾中。服虔曰。大驾八十一乘。最后一乘悬豹尾。汉书。文帝葬灞陵。注。在长安东南。武安侯田蚡。魏其侯窦婴。皆外戚。

无题

近知名阿侯。住处小江流。腰细不胜舞。眉长惟是愁。

黄金堪作屋。何不作重楼。

△乐府。河中之水水东流。洛阳女儿名莫愁。十五嫁为卢家妇。十六生儿字阿侯。后汉志。元嘉中。京都妇女作愁眉。所谓愁眉者。细而曲折。古今注。梁冀改惊翠为愁眉。

玄微先生

仙翁无定数。时入一壶藏。夜夜桂露湿。村村桃水香。

醉中抛浩刼。宿处起神光。药裹丹山凤。碁函白石郎。

弄河移砥柱。吞日倚扶桑。龙竹裁轻策。蛟绡熨下裳。

树栽嗤汉帝。桥板笑秦王。径欲随闕令。龙沙万里强。

△后汉方术传。费长房为市吏。有卖药老翁悬一壶于肆头。及市罢。輒跳入壶中。度人经。惟有元始浩刼之家部制我界。广异记。儒谓之世。释谓之刼。道谓之尘。汉礼乐志。用事甘泉圜丘昏祠至明夜。常有神光集于祠坛。杜甫诗。药裹關心诗总废。汉武内传。仙药有蒙山白凤之脯。道源注。碁函。碁筒也。乐府白石郎曲。积

石如玉。列松如翠。郎豔独絕。世无其二。李贺诗。沙浦走鱼白石郎。愚按。列仙传。白石生。常煮白石为粮。因号白石山居。又述异记。晋王质入山。见二童子石室中围碁。坐观之。及起。斧柯已烂矣。此句似合用二事。西京杂记。鞠道龙说淮南王方士能画地为江河砥柱。真诰。欲得延年。日出二丈。正面向之。口吐死气。鼻噏日精。又曰。太虚真人以月五日夜半时。存日象在心中。日从口入。使照一心之内。十洲记。扶桑在碧海中。树长数千里。一千馀围。两两同根。更相依倚。故曰扶桑。后汉方术传。壶公以竹杖与长房曰。乘此任所之。长房乘杖须臾来归。投杖葛陂中。视之。则龙也。王绩诗。鸭桃闻已种。龙竹未经骑。蛟绡。注见前。韵会。熨。火展布。南史。何敬容衣裳不整。伏床熨之。汉武故事。王母以桃食帝。帝留核。欲种之。王母笑曰。此桃三千年一著子。非下土所植也。三齐略记。始皇作石桥。欲过海看日出处。有神人驱石下海。石去不速。神輒鞭之。石皆流血。列仙传。老子西游關。令尹喜知真人当过。物色而得之。与老子俱至流沙之西。莫知所终。汉班超传赞。咫尺龙沙。注。龙沙。沙漠也。

药转

鬱金堂北画楼东。换骨神方上药通。露气暗连青桂苑。风声偏猎紫兰丛。

长筹未必输孙皓。香枣何劳问石崇。忆事懷人兼得句。翠衾归卧绣帘中。

△神仙传。药之上者。有九转还丹。太乙金液。僧中寤诗。炉烧九转药新成。说文。鬱金。香草也。魏略。大秦国出鬱金。乐府。卢家兰室桂为梁。中有鬱金苏合香。沉佺期诗。卢家少妇鬱金堂。文昌杂录。唐宫中每行幸。即以鬱金布地。鬱金堂或以鬱金然于堂中也。庾信诗云。然香鬱金屋。汉武内传。王母谓帝曰。子但爱精握固。闭气吞液。一年易气。二年易脉。三年易精。四年易肉。五年易髓。六年易筋。七年易骨。八年易髮。九年易形。杜甫诗。相哀骨可换。文选注。养生经。上药养命。五石练形。六芝延年。中药养性。合欢蠲忿。萱草忘忧。嵇含。南方草木。状桂。出合浦。生必以高山之巅。冬夏长青。林无杂树。洞玄记。西王母驾玄鸾之与。至坛所。四面列软条青桂。风至自拂堦上游尘。楚词。秋兰兮青青。绿叶兮紫茎。刘次庄乐府集。今沅澧所生花。在春则黄。在秋则紫。然春黄不如秋紫之芬馥。道源注。长筹。厠筹也。法苑珠林。呉时。于建业后园平地获金像一躯。孙皓素未有信。置于厠处。令执厠筹。至四月八日浴佛时。遂尿头上。寻即通肿陰处。尤剧痛楚。号叫忍不可禁。太史占曰。犯大神圣。所致宫内伎女。有信佛者曰。佛为大神。陛下前秽之。今急可请邪。皓信之。伏枕皈依。懺谢尤恳。有顷。以香汤洗像。慙悔殷勤。隐痛渐愈。道源注。白帖。石崇厠中。尝令婢数十人。曳罗縠置漆箱中。盛乾枣。奉以塞鼻。大将军王敦至。取箱枣食。羣婢笑之。愚按。世说。石崇厠尝有十馀婢侍列。皆丽服藻饰。置甲煎粉沉香汁之属。又与新衣。著令出。客多羞。不能如厠。王敦往。脱故衣。著新衣。神色傲然。羣婢相谓曰。此客必能作贼。又曰。王敦初尚舞阳公主。如厠。见漆箱盛乾枣。本以塞鼻。王谓厠上亦下

果食。遂至尽。羣婢莫不掩口。白帖合之为—。义山诗亦如此用。岂别有所据耶。

岳阳楼

欲为平生—散愁。洞庭湖上岳阳楼。可怜万里堪乘兴。枉是蛟龙解覆舟。

△方輿胜覽。岳阳楼在岳州郡治西南。西面洞庭。左顾君山。

岳阳楼

汉水方城带百蛮。四隣谁道乱周班。如何—梦高唐雨。自此无心入武關。

△高唐赋序。昔者先王尝游高唐。梦见—妇人曰。妾巫山之女也。旦为朝云。暮为行雨。武關。秦刼楚懷王处。汉书注。武關。秦南关。通咸阳。—统志。在商县东—百八十里。

寄成都高苗二从事

家近红蕖曲水滨。全家罗袜起秋尘。莫将越客千丝网。网得西施别赠人。

△南都赋。罗袜蹑蹠而容与。洛神赋。凌波微步。罗袜生尘。

越燕二首

上国社方见。此乡秋不归。为矜皇后舞。犹著羽人衣。

拂水斜纹乱。衔花片影微。卢家文杏好。试近莫愁飞。

将泥红蓼岸。得草綠杨村。命侶添新意。安巢复旧痕。

去应逢阿母。来莫害王孙。记取丹山凤。今为百鸟尊。

△酉阳杂俎。紫胸轻小者是越燕。胸斑黑声大者是胡燕。格物总论。胡燕作巢喜长。越燕作巢如碗。文昌杂錄。燕以春社来。秋社去。谓之社燕。拾遗记。周昭王昼而假寐。有人衣服皆羽毛。因名羽人。卢家。注见前。长门赋。饰文杏以为梁。容斋随笔。莫愁。郢州石城人。莫愁乐所云。莫愁石城西是也。梁武河中之水歌。洛阳女儿名莫愁者。洛阳人也。近世周美成西湖—阕。专咏金陵。有莫愁艇子曾繫之语。岂非误指石头城为石城乎。梅鼎祚曰。金陵莫愁湖。以石城误名耳。非。误始周也。○道源曰。本朝袁海叟白燕诗。似从此诗翻出。说文。蓼。辛菜。蒿簋也。

尔雅。翼蓼有紫赤青等种。最大者名笼。有花。白居易诗。水蓼冷花红簇簇。原注。乐府诗。东飞伯劳西飞燕。黄姑阿母时相见。按。今本作黄姑织女。汉书。成帝时童谣云。燕飞来。啄王孙。山海经。丹穴之山。有鸟名曰凤皇。自歌自舞。韦应物诗。凤皇五色百鸟尊。

杜工部蜀中离席

人生何处不离羣。世路干戈惜暂分。雪岭未归天外使。松州犹驻殿前军。

座中醉客延醒客。江上晴云杂雨云。美酒成都堪送老。当垆仍是卓文君。

△此拟杜工部体也。元和郡国志。雪山在松州嘉城县东八十里。春夏常有积雪。故名。唐书。松州交川郡。属剑南道。取界内甘松岭为名。又曰。广德元年。鱼朝恩以神策军归禁中。永泰元年。又以神策屯苑中。自是势居北军右。数出征伐。有功。唐语林。蜀之士子。莫不沽酒藜相如涤器之风。陈会郎中家。以当垆为业。元和元年及第。

隋宫

紫泉宫殿锁烟霞。欲取芜城作帝家。玉玺不缘归日角。锦帆应是到天涯。

于今腐草无萤火。终古垂杨有暮鸦。地下若逢陈后主。岂宜重问后庭花。

△上林赋。左苍梧。右西极。丹水更其南。紫渊径其北。文颖曰。西河穀罗县有紫泽。长安为在北。按唐人避高祖讳。故渊作泉。鲍照芜城赋注。宋孝武时。照为临海王子璿参军。随至广陵。子璿叛逆。照见广陵故城荒芜。乃汉吴王濞所都。照以子璿事同于濞。遂为赋以讽之。隋书。大业元年。发民十万开邗沟入江。自长安至江都。置离宫四十馀所。册府元龟。太宗为秦王。于宫西造宅初成。高祖送玉玺以至于帝所。东观汉记。光武隆准日角。郑玄尚书中侯注。日角。谓庭中骨起。状如日。旧唐书。太宗年四岁。有书生相之曰。龙凤之姿。天日之表。开河记。炀帝御龙舟。幸江都。轴轳相继。自大堤至淮口。联绵不绝。锦帆过处。香闻十里。○言神器若不归太宗。则帝之佚游应不止江都而已。隋书。大业末。天下已盗起。帝于景华宫徵求萤火数斛。夜出游山。放之。光照山谷。隋书。炀帝自板渚引河作街道。植以杨柳。名曰隋隄。一千三百里。隋遗录。炀帝在江都。昏湎滋深。尝游吴公宅鸡□，恍惚与陈后主相遇，尚唤帝为殿下。后主舞女数十中一人迴美。帝屡目之。后主云。即丽华也。乃以海蠡酌红梁新醞劝帝。帝饮之。甚欢。因请丽华舞玉树后庭花。丽华徐起。终一曲。后主问帝。萧妃何如此人。帝曰。春兰秋菊。各一时之秀也。

二月二日

二月二日江上行。东风日暖闻吹笙。花鬣柳眼各无赖。紫蝶黄蜂俱有情。

万里忆归元亮井。三年从事亚夫营。新滩莫悟游人意。更作风簷夜雨声。

△杜甫诗。随意数花鬣。白居易杨柳枝。花含浓露如啼眼。陶潜归园田诗。井灶有遗处。桑竹残朽株。汉书注。长安有细柳聚，周亚夫屯兵处。张揖曰。在昆明池南。今柳市是也。元和郡国志。京师万年县东北三十里有细柳营。

筹笔驿

猿鸟犹疑畏简书。风云常为护储胥。徒令上将挥神笔。终见降王走传车。

管乐有才终不忝。關张无命欲何如。他年锦里经祠庙。梁文吟成恨有馀。

△方輿胜覽。筹笔驿在绵州绵谷县北九十九里。蜀诸葛武侯出师。尝驻军。筹画于此。杜牧诗。永安宫受诏。筹笔驿沉思。画地乾坤在。濡毫胜负知。长杨赋。木拥枪纍以为储胥。注。木拥。栅。其外又以竹枪纍为外储。○储胥。军中藩篱也。蜀志。邓艾破蜀。后主銜璧舆棕降。遂送洛阳。寰宇记。诸葛武侯祠在先主庙西。府城西有故宅。盛弘之荆州记。邓城西七里。有独乐山。诸葛亮尝登此。作梁父吟。

屏风

六曲连环接翠帷。高楼半夜酒醒时。掩灯遮雾密如此。雨落月明俱不知。

△唐书。宪宗著书十四篇。号前代君臣事迹。书寫于六曲屏风。李贺屏风曲。团迴六曲抱膏兰。李尤屏风铭。壅阂风邪。雾露是抗。

春日

欲入卢家白玉堂。新春催破舞衣裳。蝶衔红蘂蜂衔粉。共助青楼一日忙。

△古乐府。黄金为君门。白玉为君堂。

武侯庙古柏

蜀相阶前柏。龙蛇捧閤宫。陰成外江畔。老向惠陵东。

大树思冯异。甘棠忆召公。叶凋湘燕雨。枝拆海鹏风。

玉垒经纶远。金刀歷数终。谁将出师表。一为问昭融。

△成都记。武侯庙前有双大柏。古峭可爱。人云诸葛手植。杜甫诗。丞相祠堂何处寻。锦官城外柏森森。杜甫古柏行。先主武侯同閼宫。方輿胜覽。水自渝上合州至绵州者。谓之内江。自渝上戎泸至蜀者。谓之外江。蜀志。昭烈帝葬惠陵。陆游笔记。予在成都。屡至昭烈惠陵。此柏在陵旁庙中忠武侯室之南。湘中记。零陵有石燕。遇风雨则飞舞如燕。止则为石。鹏风，见庄子。蜀都赋注。玉垒。山名。湔水出焉。在成都西北。寰宇记。在茂州汶川县北三里。汶水所经。王莽传。刘之为。字卯。金刀也。道源注。昭融。天也。杜甫诗。契合动昭融。

风

撩钗盘孔雀。恼带拂鸳鸯。罗荐谁教近。斋时锁洞房

△汉武内传。帝以紫罗荐地。燔百和之香。以待王母。

即日

一歲林花即日休。江间亭下怅淹留。重吟细把真无奈。已落犹开未放愁。

山色正来衔小苑。春陰只欲傍高楼。金鞍忽散银壶漏。更醉谁家白玉鉤。

△丁仙芝诗。帘垂白玉鉤。

李义山诗集注卷一上

●李义山诗集注卷一下

吴江朱鹤龄撰

九成宫

十二层城阆苑西。平时避暑拂虹霓。云随夏后双龙尾。风逐周王八骏蹄。

吴岳晓光连翠巘。甘泉晚景上丹梯。荔枝卢橘沾恩幸。鸾鹊天书湿紫泥。

△唐书。九成宫在凤翔麟游县西五里。本隋仁寿宫。贞观间。修之以避暑。因更名焉。按。十洲记。水经注。俱言崑崙天墉城有金台五所。玉楼十二。郊祀志亦言。五城十二楼。义山诗每用十二城。未详所本。西王母传。王母所居在崑崙之圃。阆风之苑。十洲记。崑崙山有三角。其一角正北名曰阆风。西都赋。虹霓回带于棼楣。山海经。太栾之野。夏后启于此舞九代〈马名〉。乘两龙。博物志。夏德之盛。二龙降之。禹使范成光御之行域外。既周而还。二作马。穆天子传。八骏之乘。曰赤骥。盗骊。白义。踰轮。山子。渠黄。骅骝。騄耳。王融曲水诗序。夏后两龙。载驱璿台之上。穆满八骏。如舞瑶池之阴。周礼。雍州镇曰岳山。注。吴岳也。汉志。吴山在汧县西。秦都咸阳。以为西岳。元和郡国志。吴岳在汧阳县西南五十里。甘泉。注见前。上林赋。卢橘。夏熟。善曰。卢。黑也。张勃吴录。朱光为建安太守。有橘。冬月树上覆裹之。至明年春夏。色变青黑。味绝美。上林赋所云殆近是乎。海录。花木志。给客橙。出蜀土。若柚而香。冬夏花实相继。或如弹圆。或如拳。通岁食之。名卢橘。郝天挺注。荔枝卢橘。皆当夏而熟。故贡于九成宫。杜甫诗。紫诰鸾迴纸。汉旧仪。天子信玺六。皆以武都紫泥封之。

少将

族亚齐安陆。风高汉武威。烟波别墅醉。花月后门归。

青海闻传箭。天山报合围。一朝携剑起。上马即如飞。

△萧子显。齐书。安陆昭王缅。字景乘。宣皇帝之孙也。太祖受禅。封安陆侯。累迁雍州刺史。加都督。永明九年薨。赠司徒。汉书。武威郡。故匈奴休屠王地。武帝太祖四年开。道源注。神仙感应录。汉武威太守刘子南。从道士尹公授术成子萤火九佩之隐形。辟疫鬼及五兵。白刃。盗贼。凶害。永平间与虏战。矢下如雨。未至子南马数尺辄堕地。终不能伤。刘禹锡诗。不逐张公子。应随刘武威。十三洲记。允吾县西有羌海。谓之青海。杜甫诗。青海休传箭。史记索隐。祁连山曰天山。亦曰白山。在张掖酒泉二郡界。唐书。西州交河郡有天山。

咏史

歷览前贤国与家。成由勤俭破由奢。何须琥珀方为枕。岂得真珠始是车。

运去不逢青海马。力穷难拔蜀山蛇。几人曾预南薰曲。终古苍梧哭翠华。

△西京杂记。赵飞燕为皇后。其女弟在昭阳殿上襪三十五条中。有琥珀枕。龟文枕。宋书。武帝时。宁州尝献琥珀枕。光色甚丽。价盈百金珍。史记。梁惠王谓齐宣王曰。寡人国小。尚有径寸之珠炤车前后各十二乘者十枚。华覈。騶马赋。鞍罽緝裘。珠轮玉光。隋书。吐谷浑青海中有小山。其俗至冬輒放牝马于其上。言得龙种。有波斯草马放入海。因生骠驹。日行千里。故时称青海骠马。蜀王本纪。蜀五丁。力士。能徙山。秦献美女于蜀王。蜀王遣五丁迎之。还至梓潼。见一大蛇入山穴中。五丁共引蛇。山崩。五丁皆化为石。上林赋。建翠华之旗。注。以翠羽为旗上葆也。

赠白道者

十二楼前再拜辞。灵风正满碧桃枝。壶中若有天地。又向壶中伤别离。

△一作咏史第二首。误。

无题二首

昨夜星辰昨夜风。画楼西畔桂堂东。身无彩凤双飞翼。心有灵犀一点通。

隔座送钩春酒暖。分曹射覆蜡灯红。嗟余听鼓应官去。走马兰台类断蓬。

闻道阊门萼绿华。昔年相望抵天涯。岂知一夜秦楼客。偷看吴王苑内花。

△南州异物志。犀有神异。表灵以角。抱朴子。通天犀角有白理如线。置犀粟中。鸡见輒惊。南人呼为骇鸡犀。汉西域传。通犀翠羽之珍。如淳曰。通犀谓中央色白。通两头。道源注。汉武故事。钩弋夫人少时手拳。帝披其手。得一玉钩。手得展。故因为藏钩之戏。后人效之。别有酒钩。当饮者以钩引盃。白居易诗。酒钩送盏推莲子是也。汉东方朔传。上尝使诸数家射覆。置守宫盃下。射之。注。于覆器之下置诸物。令暗射之。故云射覆。唐六典。汉御史中丞掌兰台秘书图籍。故歷代建台省秘书。与御史为隣。杜氏通典。御史大夫所居之署。谓之宪台。后汉以来。亦谓之兰台寺。按。义山释褐秘书省校书郎。王茂元辟为掌书记。得侍御史。故此用兰台事。萼绿华。注见前。列仙传。用秦楼客萧史事。

汉宫词

青雀西飞竟未迴。君王长在集灵台。侍臣最有相如渴。不赐金茎露一杯。

△道源注。汉武故事。七月七日。上于承华殿斋。忽青鸟从西来。上问东方朔。朔曰。西王母欲来。有顷。王母至。洞玄记。东方朔望见巨灵。目之。化青雀飞去。帝乃起青雀台。三辅黄图。集灵台在华陰县界。武帝所造金茎露。注见前。按史。宪宗服金丹。暴崩。穆宗武宗复循其辙。义山此作深有託讽。与后瑶池诗同旨。

无题四首

来是空言去絕踪。月斜楼上五更钟。梦为遠别啼难唤。书被催成墨未浓。

蜡照半笼金翡翠。麝熏微度绣芙蓉。刘郎已恨蓬山遠。更隔蓬山一万重。

飒飒东风细雨来。芙蓉塘外有轻雷。金蟾齧鎖烧香入。玉虎牵丝汲井迴。

贾氏窥帘韩掾少。宓妃留枕魏王才。春心莫共花争发。一寸相思一寸灰。

含情春畹晚。暂见夜阑干。楼响将登怯。帘烘欲过难。

多羞钗上燕。真愧镜中鸾。归去横塘晚。华星送寶鞍。

何处哀箏随急管。樱花永巷垂杨岸。东家老女嫁不售。白日当天三月半。

溧阳公主年十四。清明暖后同墙看。归来展转到五更。梁间燕子闻长叹。

△江淹翡翠赋。糅紫金而为色。刘遵诗。金屏障翡翠。崔颢卢姬诗。水晶帘箔绣芙蓉。李贺金人辞汉歌。茂陵刘郎秋风客。道源注。蟾善闭气。古人用以饰鎖。按。玉虎是井栏之饰。或以施汲器者。老杜铜瓶诗。蛟龙半缺落。犹得折黄金。旧注云。蛟龙刻铸。瓶上玉虎亦此类耳。丝。井索也。庾丹诗。银牀素丝纆。世说。韩受美姿容。贾充辟以为掾。贾女于青琐中见壽。悦之。与之通。充见女盛自拂拭。又闻壽有异香之气。是外国所贡。一著人衣。歷月不歇。充疑壽与女通。取左右婢拷问之。婢以状言充。秘之。以女妻壽。洛神赋序。黄初三年。予朝京师。还济洛川。古人有言。斯水之神。名曰宓妃。善曰。宓妃。宓牺氏之女。溺洛水。为神。又曰。魏东阿王求甄逸女。不遂。太祖回。与五官中郎将。植殊不平。黄初中。入朝。帝示甄后玉镂金带枕。植见之。不觉泣。时已为郭后谗死。帝意寻悟。因令太子留宴。仍以枕赉植。植还度轡轅。将息洛水上。忽见女子来。自言。我本託心君王。其心不遂。此枕是我嫁时物。前与五官中郎。将今与君王。遂用荐枕席。欢情交

集。又云。岂不欲常见。但为郭后以糠塞口。今披髮掩面。羞将此形貌重睹君王耳。言讫。不复见所在。王悲喜不自胜。遂作感甄赋。后明帝见之。改为洛神赋。元稹诗。班女恩移赵。思王赋感甄。○窥帘留枕。春心之摇荡极矣。迨乎香销梦断。丝尽泪乾情燄。炽然终归灰灭。不至此。不知有情之皆幻也。乐天和白微之梦游诗序。谓曲尽其妄。周知其非然后返乎真归乎。实义山诗即此义。不得但以豔语目之。楚词。白日晚晚。其将入兮。古乐府。月没参横。北斗阑干。阑干。横斜貌。洞玄记。元鼎元年。起招灵阁。有神女留一玉钗。帝以赐赵婕妤。元凤中。宫人谋欲碎之。视钗匣。惟见白燕升天。宫人因作玉燕钗。魏文帝诗。华星出云间。乐府捉搦歌。老女不嫁只生口。梁书。溧阳公主。简文帝女也。年十四。有美色。侯景纳而嬖之。大寶元年三月。请简文楔饮于乐游苑。上还宫。景与公主共据御牀。南面坐。

赴职梓潼留别畏之员外同年

佳兆聯翩遇鳳凰。雕文羽帳紫金牀。桂花香處同高第。柿葉翻時獨悼亡。

烏鵲失栖長不定。鴛鴦何事自相將。京華庸蜀三千里。送到咸陽見夕陽。

△唐書。梓州。梓潼郡。屬劍南道。乾元後分東西川。梓為東川節度治所。時義山為梓州節度判官。畏之。韓瞻也。唐詩紀事。韓偓父瞻。開成二年李義山同年。左傳。懿氏卜妻敬仲。其妻占之曰。吉。是謂鳳皇于飛。和鳴鏘鏘。江總詩。新人羽帳挂流蘇。洞玄記。上起神明台。有金牀象席。時韓留京師。

桂林路中作

地暖無秋色。江晴有暮暉。空餘蟬嘒嘒。猶向客依依。

村小犬相護。沙平僧獨歸。欲成西北望。又見鷓鴣飛。

△禽經。子規啼。必北向。鷓鴣飛。必南翔。

無題

照梁初有情。出水舊知名。裙衩芙蓉小。釵茸翡翠輕。

錦長書鄭重。眉細恨分明。莫近彈碁局。中心最不平。

△何遜詩。霧夕蓮出水。霞朝日照梁。釋名。裙下裳也。婦人蔽膝曰香衩。楚詞。集芙蓉以為裳。宋玉諷賦。以其翡翠之釵。挂臣冠纓後。漢梁冀傳注。菰經曰彈碁

。两人对局。白黑碁各六。后先列碁相当。更相弹也。其局以石为之。魏丁廙弹碁赋。文石为局。金碧齐精。义山诗。莫近弹碁局。中心最不平。谓其中尊也。柳子厚序用二十四碁者。即此戏也。今人罕为之矣。

蝶三首

初来小苑中。稍与琐闥通。远恐芳尘断。轻忧艳雪融。

只知防皓露。不觉逆尖风。回首双飞燕。乘时入绮栊。

长眉画了绣帘开。碧玉行收白玉台。为问翠钗钿上凤。不知香颈为谁迴。

寿阳公主嫁时粧。八字宫眉捧额黄。见我佯羞频照影。不知身属冶游郎。

△拾遗记。石虎太极殿楼高四十丈。春杂宝异香为屑。使数百人于楼上吹散之。名曰芳尘台。庾阐扬都赋。结芳尘于绮疏。韦应物诗。艳雪凌空散。乐府有情人碧玉歌。碧玉。宋汝南王妾。梁简文帝对烛赋。碧玉舞罢罗衣单。玉镜台注。别见。拾遗记。石崇爱婢翾风紫金。为凤冠之钗。杂五行书。宋武帝女寿阳公主。人日卧于含章殿檐下。梅花落公主额上。自后有梅花粧。海录。唐明皇令画工画十眉图。一曰鸳鸯眉。又名八字眉。张萧远诗。玉指休匀八字眉。梁简文帝诗。同安鬟里拨。异作额间黄。庾信诗。额角轻。黄细安。杨慎曰。温飞卿诗。豹尾车前赵飞燕。柳风吹散蛾间黄。王荆公诗亦云。汉宫娇额半涂黄。其制已起于汉。特未见所出耳。

无题二首

八岁偷照镜。长眉已能画。十岁去踏青。芙蓉作裙衩。

十二学弹箏。银甲不曾卸。十四藏六亲。悬知犹未嫁。

十五泣春风。背面鞦韆下。

幽人不倦赏。秋暑贵招邀。竹碧转怅望。池清尤寂寥。

露花终裊湿。风蝶强娇饶。此地如携手。兼君不自聊。

△杜甫诗。银甲弹箏用。按。银甲。繫爪之类。菰林。伐山妓女以鹿角琢为爪。以弹箏。曰繫爪。荆楚岁时记。春节悬长绳于高木。女子絃服立其上。推引之。名曰打鞦韆。汉武帝千秋节日。以之戏于后庭。

王十二兄与畏之员外相访见招小饮时予以悼亡日近不去因寄

谢傅门庭旧未行。今朝歌管属檀郎。更无人处帘垂地。欲拂尘时簟竟牀。

嵇氏幼男犹可悯。左家娇女岂能忘。秋霖腹疾俱难遣。万里西风夜正长。

△按。王十二。必茂元之子。义山娶茂元女。故诗有谢傅门庭旧未行之句。通玩前赴职梓潼留别畏之员外诗。及后韩同年新居饯西迎家室诗。盖畏之与义山为僚壻。此云悼亡日近。疑所悼即茂元女也。晋书。谢安薨。赠太傅。諡曰文靖。世说。谢道韞曰。一门叔父。则有阿大中郎。杜甫诗。谢瞻不遑远。李贺诗。檀郎谢女眠何处。或曰。檀奴。潘安仁小字。后人因号曰檀郎。潘岳悼亡诗。长簟竟牀空。晋书。嵇绍。字延祖。康之子。十岁而孤。左思娇女诗。左家有娇女。皎皎颇白皙。小字为纨素。口齿自清历。

隋宫

乘兴南游不戒严。九重谁省谏书函。春风举国裁宫锦。半作障泥半作帆。

△隋宫。一云隋堤。隋书。大业十二年。幸江都。奉信郎崔民象表谏上。大怒。先解其颐。乃斩之。道源注。障泥。以披马鞍旁者。西京杂记。武帝时。贰师得天马。以绿地五色锦为蔽泥。晋书。王济所乘马。不肯渡水。曰马必是惜障泥。解之。乃渡。

落花

高阁客竟去。小园花乱飞。参差连曲陌。迢递送斜晖。

肠断未忍扫。眼穿仍欲归。芳心向春尽。所得是沾衣。

△谢朓诗。乡泪尽沾衣。

月

池上与桥边。难忘复可怜。帘开最明夜。簟卷已凉天。

流处水花急。吐时云叶鲜。姮娥无粉黛。只是逞婵娟。

△池上与桥边。一作楼上与池边。

赠宗鲁筇竹杖

大夏资轻策。全溪问所思。静怜穿树远。滑想过苔迟。

鹤怨朝还望。僧闲暮有期。风流真底事。常欲傍清羸。

△汉书。张骞至大夏。见筇竹杖。问之。云贾人市之身毒国。北山移文。蕙帐空兮夜鹤怨。

垂柳

娉婷小苑中。婀娜曲池东。朝佩皆垂地。仙衣尽带风。

七贤宁占竹。三品且饶松。肠断灵和殿。先皇玉座空。

△晋书。阮籍。嵇康。向涛。向秀。刘伶。王戎。阮咸。共为竹林之游。白居易诗。九龙潭月落杯酒。三品松风飘管弦。宋武帝植蜀柳于灵和殿前。详前注。江淹诗。玉座犹寂寞。

曲池

日下繁香不自持。月中流豔与谁期。迎忧急鼓疎钟断。分隔休灯灭烛时。

张盖欲判江灏灏。回头更望柳丝丝。从来此地黄昏散。未信河梁是别离。

△淳于髡传。堂上烛灭。主人留髡而送客。搜神记。赵炳尝临水求渡。船人不许。炳乃张帷盖坐其中。长啸呼风乱流而渡。李陵别苏武诗。携手上河梁。

代应二首

沟水分流西复东。九秋霜月五更风。离鸾别凤今何在。十二玉楼空更空。

昨夜双钩败。今朝百草输。關西狂小吏。惟喝遶牀卢。

△西京杂记。庆安世。年十五为成帝侍中。善鼓琴。能为双凤离鸾曲。陶潜诗。上絃惊别鹤。下絃操孤鸾。周处风土记。义阳腊日饮祭之后。叟妪儿童为藏钩之戏。分为二曹。以较胜负。庾阐赋。歎近夜之藏钩。赏一时之戏望。初学记。荆楚岁时记。五月五日。四民并踏百草。今人又有鬪百草之戏。晋书。刘毅于东堂聚樗蒲大掷。余人并黑犢以还。惟刘裕及毅在后。毅次掷得雉。大喜。遶牀叫曰。非不能卢。

。不事此耳。裕因援五木久之曰。老兄试为卿答。既而四木俱黑。一子转跃未定。裕厉声喝之。即成卢。

席上作

淡云轻雨拂高唐。玉殿秋来夜正长。料得也应怜宋玉。一生惟事楚襄王。

△原注。予为桂州从事。故府郑公出家妓。令赋高唐诗。一本题作席上赠人。注云。故桂林荥阳公席上出家妓。○郑公。郑亚也。注见迎弔桂府常侍诗。一云。淡烟微雨恣高唐。一曲清尘遶画梁。料得也应怜宋玉。只因无奈楚襄王。

访隱者不遇成二絕

秋水悠悠浸墅扉。梦中来数觉来稀。玄蝉去尽叶黄落。一树冬青人未归。

城郭休过识者稀。哀猿啼处有柴扉。沧江白日樵渔路。日暮归来雨满衣。

△杜甫诗。玄蝉无停号。

破镜

玉匣清光不复持。菱花散乱月轮亏。秦台一照山鸡后。便是孤鸾罢舞时。

△飞燕外传。飞燕始加大号婕妤。奏上三十六物以贺。有七尺菱花镜一奩。庾信镜赋。临水则池中月出。照日则壁上菱生。骆宾王诗。粧镜菱花暗。愁眉柳叶颦。西京杂记。高祖初入咸阳宫。有方镜广四尺。高五尺九寸。表里洞明。人直来照之。影则倒见。以手掩心。即见肠胃五脏。杜甫诗。秦台镜欲临。异苑。山鸡爱其毛羽。映水则舞。魏武时。南方献之。公子仓舒令置大镜其前。鸡鑑形而舞。不知止。遂乏死。注见前。

无题

紫府仙人号寶灯。云浆未饮结成冰。如何雪月交光夜。更在瑶台十二层。

△抱朴子。项曼都言到天上。先过紫府。金牀玉几。晃晃昱昱。道源注。佛有寶灯之名。神仙无此号。然佛亦称金仙。故可通用。庾信温汤碑序。其色变者流为五云之浆。其味美者结为三危之露。离骚。望瑶台之偃蹇兮。拾遗记。崑崙山傍有瑶台十二。各广千步。皆五色玉为台基。

贈庾十二朱版

固漆投胶不可开。贈君珍重抵琼瑰。君王晓坐金銮殿。只待相如草诏来。

△原注。时庾在翰林。○旧唐书。大中三年九月。以起居郎庾道蔚充翰林学士。疑即此人也。古诗。以胶投漆中。谁能别离此。

李花

李径独来数。愁情相与悬。自明无月夜。强笑欲风天。

减粉与园籜。分香沾渚莲。徐妃久已嫁。犹自玉为钿。

△道源注。李开不与莲同时。此只彷彿其色耳。南史。元帝徐妃。讳昭佩。天监十六年十二月。拜湘东王妃。与瑶光寺智远道及帝左右暨季江淫通。帝逼令自杀。初。妃嫁夕。车至西州。夕风大起。发屋折木。无何。雪霰交下。帷帘皆白。帝以为不祥。后果不终妇道。

柳

曾逐东风拂舞筵。乐游春苑断肠天。如何肯到清秋日。已带斜阳又带蝉。

△杨慎曰。形容先荣后悴之意。

三月十日流杯亭

身属中军少得归。木兰花尽失春期。偷随柳絮到城外。行过水西闻子规。

△方輿胜覽。巴州西龕寺。唐乾元间严郑公武所剏。其水曲折。可以流觴。一统志。流觴亭在巴县西龕山上。本草。木兰。大树。皮似桂而香。花粉红色。二三月间开。述异记。木兰川在浔阳。江中多木兰。吴王阖闾植此搆宫殿。又。七里洲中。鲁班刻木兰为舟。至今在。

过招国李家南园二首

潘岳无妻客为愁。新人来坐旧粧楼。春风犹自疑联句。雪絮相如飞不休。

长亭岁尽雪如波。此去秦關路几多。惟有梦中相近分。卧来无睡欲如何。

△招国里。在京师。白居易传。自皇子陂归招国里。雪絮。用谢道韞事。哀江南赋。十里五里。长亭短亭。

留赠畏之

清时无事奏明光。不遣当关报早霜。中禁词臣寻引领。左川归客自迴肠。

郎君下笔惊鹦鹉。侍女吹笙弄凤凰。空寄大罗天上事。衆仙同日咏霓裳。

待得郎来月已低。寒暄不道醉如泥。五更又欲向何处。骑马出门乌夜啼。

户外重阴黯不开。含羞迎夜复临台。潇湘浪上有烟景。安得好风吹汝来。

△原注。时将赴职梓潼。遇韩朝迴三首。○第二首絶句。唐人选入才调集。注云。遇韩朝迴。汉官仪。尚书郎直宿建礼门。奏事明光殿。三秦记。未央宫渐台西有桂宫。中有明光殿。珠玑为帘箔。金甃玉阶。昼夜光明。当关。门卒也。东观汉记汝郁传。汝郁载病。徵诣公车。台遣两当关扶入。拜郎中。絶交书。卧喜晚起。而当关呼之不置。杜甫诗。诏许辞中禁。左川即东川。后汉祢衡传。黄祖大会宾客。人有献鹦鹉者。衡揽笔作赋。文无加点。辞采甚丽。按此语谓韩瞻子偓也。偓。小字冬郎。尝即席为诗。一座尽惊。汉武内传。王母命侍女董双成吹云和之笙。云笈七籤。最上一天名曰大罗。在玄都玉京之上。合三十六天。总是三尊所统。故经云。三界之上眇眇大罗。菰林。世传大罗天放榜于菰珠宫。故称菰榜。异闻录。开元六年八月望。上与申天师洪都客作术。夜游月宫。榜曰。清虚广寒之府。少前。见素娥十余人乘鸾舞于广庭桂树之下。音乐清丽。遂归。製霓裳羽衣之曲。蔡宽夫诗话。唐开成初。尉迟璋尝倣古作霓裳羽衣曲以献。诏以曲名。赐贡院为题。是岁。榜首李肱所试诗即此题也。此曲世无谱。好事者每惜之。○或云。义山与畏之。疑皆李肱榜进士。故有末句。其年。高锴权知贡举。按。新旧书皆云义山开成二年进士。集中有李肱画公诗。亦不云同年。后汉周泽传。一日不斋醉如泥。

为有

为有云屏无限娇。凤城寒尽怕春宵。无端嫁得金龟婿。辜负香衾事早朝。

△西京杂记。赵飞燕为皇后。女弟昭仪。遗云母屏风。琉璃屏风。梁戴暠诗。丹凤俯临城。赵次公杜注。秦缪公女吹箫。凤降其城。因号丹凤城。其后言京都之盛曰凤城。唐书。天授二年改佩鱼皆为龟。三品以上龟袋饰以金。

无题

相见时难别亦难。东风无力百花残。春蚕到死丝方尽。蜡炬成灰泪始乾。晓镜但愁云鬓改。夜吟应觉月光寒。蓬山此去无多路。青鸟殷勤为探看

△庾信对烛赋。铜荷承泪蜡。铁钭染浮烟。

碧城三首

碧城十二曲阑干。犀辟尘埃玉辟寒。阆苑有书多附鹤。女牀无树不栖鸾。

星沉海底当窗见。雨过河源隔座看。若是晓珠明又定。一生长对水晶盘。

对影闻声已可怜。玉池荷叶正田田。不逢萧史休回首。莫见洪崖又拍肩。

紫凤放娇含楚佩。赤鳞狂舞拨湘弦。鄂君怅望舟中夜。绣被焚香独自眠。

七夕来时先有期。洞房帘箔至今垂。玉轮顾兔初生魄。铁网珊瑚未有枝。

捡与神方教驻景。收将凤纸写相思。武皇内传分明在。莫道人间总不知。

△道源注。太平御覽。元始天尊居紫云之阁。碧霞为城。道源注。南越志。高州巨海有大犀。出入有光。其角开水辟尘。岭表錄异。辟尘犀。妇人为簪梳。尘不著髮。天寶遺事。宁王有暖玉盃。会昌年间。扶餘国贡火玉三斗。色赤。光照十步。寘之室中。不复挟纊。道源注。锦带。仙家以鹤传书。山海经。女牀之山有鸟焉。其状如翟。五彩文。名曰鸾鸟。见则天下安宁。东京赋。鸣女牀之鸾鸟。飞燕外传。真腊夷献万年蛤。不夜珠。光彩皆若月照。人无妍丑。皆美豔。帝以蛤赐后。以珠赐婕妤。后以蛤装成五色金霞。帐中常若满月。久之。帝谓婕妤曰。吾昼视后。不若夜视之美。每旦。令人忽忽如失。婕妤闻之。即以珠号枕前不夜珠。为后壽。太真外传。成帝獲飞燕。身轻欲不胜风。恐其飘翥。帝为造水晶盘。令宫人掌之而歌舞。沉约东武吟。誓辞金门宠。去饮玉池流。古诗。江南可採莲。莲叶何田田。列仙传。秦穆公以女弄玉妻萧史。日于楼上吹箫作凤鸣。神仙传。卫叔卿与数人博。其子问向与博者为谁。叔卿曰。是洪崖先生。郭璞游仙诗。古拍洪崖肩。禽经。鸾。鸾凤之属也。五色而多紫。楚词离骚。纫秋兰以为佩。又云。折琼枝以继佩。别赋。耸渊鱼之赤鳞。道源曰。此句暗用瓠巴鼓瑟游鱼出听语。说苑。鄂君乘青翰之舟。张翠羽之蓋。越人拥楫而歌曰。山有木兮木有枝。心悅君兮君不知。于是鄂君揄袂而拥之。举绣被而覆之。汉武内传。帝閒居承华殿。忽见一女子。美丽非常。曰。我墉宫玉女王子登也。七月七日。王母暂来。帝下席跪诺。于是登延灵之台。盛斋存道以候之。至七月七日二更后。王母果至。玉轮注。见前。天问。夜光何德。死而又育。厥利维何。而顾兔在腹。王逸注。言月中有兔。何所贪利。居月之腹。而顾望乎。书。惟三月哉生魄。传。始生魄。月十六日明消而魄生。汉志。死魄

。朔也。生魄。望也。本草。珊瑚似玉。红润。生海底盘石上。一歲黃。三歲赤。海人先作鍊网沉水底。贯中而生绞网出之。失时不取则腐。○汉武内传。上元夫人命侍女纪离容径到扶广山〈左来右力〉青真小童出六甲。左右灵飞。致神之方十二事。以授刘彻。乃告帝曰。夫五帝者。方面之天。精六甲六位之通灵。佩而尊之。可致长生。王母因授以五岳真形圖。帝拜受俱毕。王母与夫人同乘而去。

对雪二首

寒气先侵玉女扉。清光旋透省郎闱。梅花大庾岭头发。柳絮章台街里飞。

欲舞定随曹植马。有情应湿谢庄衣。龙山万里无多远。留待行人二月归。

旋扑珠帘过粉墙。轻于柳絮重于霜。已随江令夸琼树。又入卢家妒玉堂。

侵夜可能争桂魄。忍寒应欲试梅粧。關河冻合东西路。肠断斑骓送陆郎。

△原注。时欲之东鲁。灵光殿赋。玉女窥窓而下视。哀江南赋。倚弓于玉女窓扉。白帖。诸曹郎署曰粉署。刘孝绰对雪诗。浮光乱粉壁。积照朗彤闱。旧唐书。东峽县即大庾岭。属韶州。一名梅岭。白帖。大庾岭上梅。南枝落。北枝开。洛神赋。车殆马烦。宋书符瑞志。大明五年正月戊午元日。花雪降殿庭。时右卫将军谢庄下殿。雪集衣。还白。上以为瑞。于是公卿并作花雪诗。唐太宗望月诗。魄满桂枝圓。说文。骓。马苍黑。杂色。一曰苍。白色。陈乐府明下童曲。陈孔骄赭白。陆郎乘斑骓。按。陈孔谓陈暄孔范。陆谓陆瑜。皆后主狎客。李贺诗。陆郎去兮乘斑骓。又。牵云曳雪留陆郎。皆用此。

蜂

小苑华池烂熳通。后门前槛思无穷。宓妃腰细纔胜露。赵后身轻欲倚风。

红壁寂寥崖蜜尽。碧帘迢递雾巢空。青陵粉蝶休离恨。长定相逢二月中。

△洛神赋。腰如约素。宓妃。即洛神。飞燕外传。帝临太液池。后歌归风送远之曲。帝以文犀簪击玉瓠。酒酣风起。后扬袖曰。仙乎。仙乎。去故而就新乎。帝令冯无方持后裾。风止。裾为之约。他日。宫姝或褰裾为约。号留仙裾。拾遗记。每轻风至。飞燕殆欲随风入水。帝以翠缨结飞燕之裾。本草。石蜜。又名崖蜜。人以长竿刺出。多者至三四石。味醖色绿。比他蜜尤胜。青陵蝶。注见前。

公子

外戚封侯自有恩。平明通籍九华门。金唐公主年应小。二十君王未许婚。

△西京杂记。汉掖庭有云光殿。九华殿。金唐公主。未详。

赋得鸡

稻粱犹足活诸雏。妒敌专场好自娱。可要五更惊晓梦。不辞风雪为阳乌。

△韩诗外传。鸡有五德。敌在前敢鬪者。勇也。曹植鬪鸡诗。愿蒙狸膏助。常得擅此场。阳乌。日也。蜀都赋。阳乌迴翼于高标。

明神

明神司过岂令冤。暗室由来有祸门。莫为无人欺一物。他时须虑石能言。

△左传。石言于晋魏榆。

钱龙惕笺此诗为甘露之变作也。当时事起仓卒。王涯贾餗等实不与闻。仇士良执而讯之。五毒俱备。涯等诬伏。遂族诛之。一时不以为冤。实以涯等执政时。招权僭侈结怨于民。故曰明神。司过决无冤滥暗室祸门自招之也。然涯等国之大臣。一旦以无辜之事骈首就戮。专杀者自谓举世无人。一物可欺。抑知其取精多而用物弘。凭石而言得无虑乎。训注之咆虬于中国也。士大夫咸怨忿之。及其败也。又以畏中官之势未有言其冤者。岂惟不冤之又从而快之。如杜牧之诗曰。元礼去从缢氏学。江充来上犬台宫。又曰。其冬三凶败。涣汗开汤罟。他可知矣。独义山于此事抑扬反覆致其不平之意。以示诛戮不出于文宗。其人虽恶。犹然冤也。况履霜坚冰其渐。可无深戒哉。然犹不敢显言。特于是诗微寓其意。可见当时奄人暴横。士林胁息如此。悲夫。

辛未七夕

恐是仙家好别离。故教迢递作佳期。由来碧落银河畔。可要金风玉露时。

清漏渐移相望久。微云未接过来迟。岂能无意酬乌鹊。惟与蜘蛛乞巧丝。

△道源注。度人经。昔于始青天中。碧落空歌。注。东方第一天有碧霞遍满。是名碧落。白帖。天河。谓之银汉。亦曰银河。李密诗。金风荡初节。玉露凋晚林。淮南子。乌鹊填河成桥而渡织女。荆楚岁时记。七夕。人家妇女结采缕。穿七孔针。陈瓜果于庭中。以乞巧。有蟪蛄网于瓜上者。则以为得巧。

壬申七夕

已驾七香车。心心待晓霞。风轻惟响珮。日薄不嫣花。

桂嫩传香远。榆高送影斜。成都过卜肆。曾妒识灵槎。

△七香车。注见前。何逊七夕诗。仙车驻七襄。凤驾出天潢。谓月中桂树。古诗。天上何所有。历历种白榆。博物志。旧说天河与海通。有人居海上。年年八月见浮槎去来。不失期。多齎粮乘槎而往。十馀日至一处。遥望宫中。多织妇。一丈夫牵牛渚次饮之。其人还。至蜀问严君平。曰。某年某月有客星犯牵牛宿。计年月。正此人到天河时也。杜甫诗。沧海有灵槎。

壬申闰秋题赠乌鹄

绕树无依月正高。邺城新泪溅云袍。几年始得逢秋闰。两度填河莫告劳。

△通鑑日錄。宣宗大中六年闰七月乙未。朔八月一日甲子。秋分。魏武乐府。月明星稀。乌鹄南飞。绕树三匝。无枝可依。魏武都邺。唐书。相州邺郡。属河北。道乾元二年。改为邺城。

端居

遠书归梦两悠悠。只有空牀敌素秋。堦下青苔与红树。雨中寥落月中愁。

△梁元帝纂要。秋曰白藏。亦曰素秋。

夜半

三更三点万家眠。露欲为霜月堕烟。鬪鼠上堂蝙蝠出。玉琴时动倚窗絃。

△嵇康琴赋。徽以荆山之玉。杜甫诗。收书动玉琴。

玉山

玉山高与阆风齐。玉水清流不贮泥。何处更求回日驭。此中兼有上天梯。

珠容百斛龙休睡。桐拂千寻凤要栖。闻道神仙有才子。赤箫吹罢好相携。

△穆天子传。天子北征。东还至于羣玉之山。阆风巔。注见前。尸子。凡水方折者

有玉。圆折者有珠。清水有黄金。龙渊有玉英。沉约诗。玉水记方流。庄子。千金之珠必在九重之渊。骊龙颌下。能得珠者。必遭其睡也。诗疏。凤皇非梧桐不栖。三十国春秋。凉州胡安盗发晋文王张骏墓。得赤玉箫紫玉笛。

张恶子庙

下马捧椒浆。迎神白玉堂。如何铁如意。独自与姚苌。

△北梦琐言。梓潼县张恶子神。乃五丁拔蛇之所也。或云。嵩州张生所养之蛇。因而立祠。时人谓为张恶子。其神甚灵。方輿胜覽。张恶子庙。即梓潼庙。在梓潼县北八里七曲山。按。图志。神姓张。讳亚子。其先越嵩人也。因报母仇。遂陷县邑。徙居是山。其墓在隆庆府梓潼县东二十里。楚词。奠桂酒兮椒浆。乐府。白玉为君堂。道源注。《梓潼七十五化》云。建兴末。作儒士。称谢艾。为张〈左车右丸〉主簿张重华嗣位石季龙使将。麻秋侵寇。命艾以千人击之。秋单骑宵遁。继而往關中与姚苌为友。然厌处凡世。思归蜀峰。约苌曰。苟富贵。无相忘。后苌以龙骧将军使蜀。至凤山访予。予礼待之。假以铁如意。祝之曰。麾之可致兵。苌疑予。予为之一麾。戈盾戎马万馀。列之平坡。今试兵埧是也。后苌以苻坚死。即帝位。因号秦焉。即其地祝之庙。先号九曲。蓋梓潼来朝九折而去。后号七曲。迨至隋唐。其灵尤著。

雨

撼撼度瓜园。依依傍竹轩。秋池不自冷。风叶共成喧。

窓迴有时见。簷高相续翻。侵宵送书雁。应为稻粱恩。

△卢谿诗。撼撼芳叶零。广絶交论。分雁鹜之稻粱。

菊

暗暗淡淡紫。融融冶冶黄。陶令篱边色。罗含宅里香。

几时禁重露。实是怯残阳。愿汎金鸂鶒。升君白玉堂。

△陶潜诗。采菊东篱下。晋罗含传。含致仕还家。埧庭忽兰菊丛生。以为德行之感。道源注。岭表録异。鸂鶒螺。旋尖处屈而朱。如鸂鶒觜。故以名。殼装为酒盃。奇而可玩。亦有范金为其形者。梁简文帝书。车渠屡酌。鸂鶒骤倾。

牡丹

锦帟初卷卫夫人。绣被犹堆越鄂君。垂手乱翻雕玉佩。招腰争舞鬱金裙。

石家蜡烛何曾剪。荀令香炉可待熏。我是梦中传彩笔。欲书花叶寄朝云。

△原注。典略云。夫子见南子在锦帟之中。乐府解题。大垂手。小垂手。皆言舞而垂手也。书。顾命雕玉仍几。注。雕。刻镂也。招。当作折。招腰争舞。英华作细腰频换。西京杂记。戚夫人能作翘袖折腰之舞。歌出塞入塞望归之曲。王僧达诗。缕金罗袖鬱金裙。世说。王恺以〈左米右台〉糒澳釜。石崇以蜡烛代薪。荀令香法。见前。刘向有熏炉铭。南史。江淹尝梦一丈夫。自称郭璞。谓淹曰。吾有笔在卿处多年。可见还。淹乃探怀中。得五色笔一以授之。尔后为诗。绝妙句。朝云。用神女事。

北楼

春物岂相干。人生只强欢。花犹曾敛夕。酒竟不知寒。

异域东风湿。中华上象宽。此楼堪北望。轻命倚危栏。

△倚。英华作俯。

拟沉下贤

千二百轻鸾。春衫瘦著宽。倚风行稍急。含雪语应寒。

带火遗金斗。兼珠碎玉盘。河阳看花过。曾不问潘安。

△唐诗纪事。沉亚之。字下贤。吴兴人。登进士第。太和初。李同捷反。授柏耆行营。计会使亚之以殿中侍御史为判官。谕旨耆。诛同捷。诸将嫉其功。潜之耆。贬循州司户参军。亚之贬南康尉。有集九卷。道源注。金斗。熨斗也。隋书。李穆奉熨斗于高祖曰。愿以此熨安天下。梁简文帝诗。熨斗金涂色。白居易诗。大珠小珠落玉盘。

蝶

飞来绣户阴。穿过画楼深。重傅秦台粉。轻涂汉殿金。

相兼惟柳絮。所得是花心。可要凌孤客。邀为子夜吟。

△古今注。萧史与秦穆公鍊飞雪丹。第一转与弄玉。粉。今水银膩粉是也。道书。

蝶交则粉退。汉书。赵昭仪居昭阳舍。殿上髹漆。切皆铜沓冒。黄金涂。注。切。门限也。沓冒。其头也。涂以金。涂铜上也。子夜注。见前。

饮席代官妓赠两从事

新人桥上著春衫。旧主江边侧帽簷。愿得化为红绶带。许教双凤一时衔。

△原注。隋独孤信举止风流。曾风吹帽簷。侧观者塞路。说文。绶。韞维也。红绶。即朱绂。白居易诗。鹞衔红绶遶身飞。

代魏宫私赠

来时西馆阻佳期。去后漳河隔梦思。知有宓妃无限意。春松秋菊可同时。

△原注。黄初三年已隔存没。追代其意。何必同时。亦广子夜吴歌之流。魏志陈思王传。黄初二年。植贬爵安乡侯。改封鄧城侯。四年来朝。帝责之。置西馆。未许朝。水经注。魏武引漳流。自城西东入。迳铜雀台下。洛神赋。荣曜秋菊。华茂春松。

代元城吴令暗为答

背阙归藩路欲分。水边风日半西曛。荆王枕上原无梦。莫枉阳台一片云。

△魏志。吴质。字季重。济陰人。以文才为文帝所善。出为朝歌长。迁元城令。封列侯。洛神赋。背伊阙。越轘辕。又曰。余从京师。言归东藩。洛神赋。日既西倾。车殆马烦。寰宇记。巫山县西有阳台古城。即襄王所游之地。亦曰阳云台。高一百二十丈。南枕长江。西谿丛语。楚襄王与宋玉游高唐之上。见云气之异。问宋玉。玉曰。昔先王梦游高唐与神女遇。玉为高堂赋。先王。谓懷王也。玉是夜梦见神女。寤而白王。王使为神女赋。后人遂言襄王梦神女。非也。愚按。宋玉作赋。本假梦为词。即懷王亦岂真有梦乎。西谿此辨。尚是呖语。○此诗为洛神辨诬。明思王感甄之说。未足深信。

牡丹

压迳复縁沟。当窻又映楼。终销一国破。不啻万金求。

鸾凤戏三岛。神仙居十洲。应怜萱草淡。却得号忘忧。

△比其豔于佳人之倾国。唐国史补。长安贵游尚牡丹。每春暮。马若狂人。种以求

利。一本有数万者。史。封禅书。海中有三神山。曰蓬莱。方丈，瀛洲。十洲记。四方巨海之中。有祖洲。瀛洲。元洲。炎洲。长洲。充洲。凤麟洲。聚窟洲。流洲。生洲。

百果嘲樱桃

珠实虽先熟。琼莛纵早开。流鶯犹故在。争得讳含来。

△汉书葭莛注葭芦也莛其筒中白皮至薄者吕氏春秋仲夏之月羞含桃注含桃樱桃也鶯鸟所含食故曰含桃

樱桃答

衆果莫相诮。天生名品高。何因古乐府。惟有郑樱桃。

△乐府集石季龙宠惑优僮郑樱桃而杀郭氏更纳清河崔氏樱桃又譖而杀之樱桃美丽擅宠宫掖乐府由是有郑樱桃歌十六国春秋石虎郑后名樱桃晋冗从僕射郑世达家妓也

晓坐

后閣罢朝眠。前墀思黯然。梅应未假雪。柳自不胜烟。

泪续浅深纒。肠危高下弦。红颜无定所。得失在当年。

△一云后閣一作阁广韵纒井索道源注弦急则絶以比愁肠易断

咏史

北湖南埭水漫漫。一片降旗百尺竿。三百年间同晓梦。鍾山何处有龙盘。

△北湖即玄武湖注见前道源注金陵志南埭上水闸也王荆公赠段约之诗闻君更欲通南埭非鸡鸣埭也刘禹锡金陵懷古诗一片降旗出石头徐爱释问建康东北十里有鍾山旧名金山后更号蒋山诸葛亮以为鍾山龙盘即蒋山也

一片

一片非烟隔九枝。蓬峦仙仗俨云旗。天泉水暖龙吟细。露畹春多凤舞迟。

榆荚散来星斗转。桂花寻去月轮移。人间桑海朝朝变。莫遣佳期更后期。

△孙氏瑞应图非气非烟五色綢緼谓之庆云九枝灯注见前齐地记齐有天齐泉汉书注临菑城南有天齐水五泉并出离骚既滋兰之九畹兮注十二亩为畹春秋运斗枢玉衡星散为榆元命苞三月榆莢落

日射

日射纱窓风撼扉。香罗掩手春事违。迴廊四合掩寂寞。碧鸚鵡对红蔷薇。

△碧鸚鵡即青鸚鵡也注见前

题鵞

眠沙卧水自成羣。曲岸残阳极浦云。那解将心怜孔翠。羈雌长共故雄分。

△一作雀○孔翠孔雀翡翠也杜甫诗孔翠望赤霄秋思雕笼养谢灵运诗羈雌恋旧侶鲁陶嬰黄鵠歌夜半悲鸣兮想其故雄○言孔翠之羈孤不若鵞羣有眠沙卧木之适也

华清宫

朝元阁迴羽衣新。首按昭阳第一人。当日不来高处舞。可能天下有胡尘。燕

△注见前道源注雍録朝元阁在骊山天寶七载玄元皇帝见于朝元阁改名降圣阁太真外传天寶四载七月于凤凰园册太真宫女道士杨氏为贵妃半后服用进见之日奏霓裳羽衣曲汉书飞燕立为皇后宠少衰女弟絶幸为昭仪居昭阳舍李白诗宫中谁第一飞燕在昭阳

梓潼望长卿山至巴西复懷譙秀

梓潼不见马相如。更欲南行问酒垆。行到巴西觅譙秀。巴西惟是有寒芜。

△道源注方輿胜覽长卿山在梓潼县治西南旧名神山唐明皇幸蜀见山有司马相如读书之窟因改名长卿山譙周巴记刘璋分巴以永宁为巴东郡垫江为巴郡阆中为巴西郡是谓三巴孙盛晋阳秋譙秀字元彦巴西人譙周孙李雄盗蜀安车徵秀不应桓温平蜀返役上表荐之

齐宫词

永壽兵来夜不扃。金莲无复印中庭。梁台歌管三更罢。犹自风摇九子铃。

△齐书废帝寶卷别为潘妃起神仙永寿玉壽三殿皆币饰以金璧萧衍兵入建康王珍国张

稷引兵入殿御刀丰勇之为内应宝卷方在含德殿作笙歌兵入斩之稷召僕射王亮等令百僚署牋以黄油裹寶卷首遣博士范云等送詣石头金莲注见前按晋成帝七年作新宫輿地圖云即台城也容斋随笔晋宋后谓朝廷禁省为台故称禁城为台城西京杂记昭阳殿上设九金龙皆衔九子金铃每好风日幡眊光影照耀一殿铃铎之声惊动左右齐书庄严寺有玉九子铃外国寺佛面有光相禅灵寺塏诸寶珥皆剥取以施潘妃殿饰

十一月中旬至扶风界见梅花

匝路亭亭艳非时裊裊香素娥惟与月青女不饶霜贈遠虚盈手伤离适断肠为谁成早秀不待作年芳

△唐书凤翔府扶风郡属關内道至德二载号西京一作雨说苑越使诸发执一枝梅遗梁王荆州记陆凯自江南寄梅花一枝詣长安与范煜贈诗云云

青陵台

青陵台畔日光斜。万古贞魂倚暮霞。莫訝韩憑为蛺蝶。等閒飞上别枝花。

△详前注一统志台在开封府封丘县界英华作春英华作许注见前

东还

自有仙才自不知。十年长梦採华芝。秋风动地黄云暮。归去嵩阳寻旧师。

△抱朴子华芝赤蓋白茎上有两叶三实服之可以长生唐书河南登封县神龙元年改曰嵩阳嵩山有中岳祠有嵩阳宫

酬崔八早梅有贈兼示之作

知访寒梅过野塘。久留金勒为迴肠。谢郎衣袖初翻雪。荀令薰炉更换香。

何处拂胸资蝶粉。几时涂额藉蜂黄。维摩一室虽多病。亦要天花作道場。

△谢庄衣见前又谢惠连雪赋紉袖慙冶注见前英华作要舞英华本原注时余在惠祥上人讲下故崔落句有梵王宫地罗含宅頼许时时听法来○维摩经长者维摩诘以其方便现身有疾因以身疾广为说法佛告文殊师利汝詣维摩诘问疾时维摩诘室有一天女见诸大人闻所说法便现其身即以天花散诸菩萨大弟子上而为供养

春风

春风虽自好。春物太昌昌。若教春有意。惟遣一枝芳。

我意殊春意。先春已断肠。

蜀桐

玉垒高桐拂玉绳。上含非雾下含冰。枉教紫凤无栖处。斲作秋琴弹坏陵。

△一作梧一作霏潘岳赋天霏霏以垂雾英华同一作广琴操十二曲曰坏陵伯牙所作坏一作怀应璩与刘劭书听广陵之清散

蜀桐

通灵夜醮达清晨。承露盘晞甲帐春。王母不来方朔去。更须重见李夫人。

△王褒云阳记钩弋夫人从至甘泉而卒既殡尸香闻十里帝哀悼乃起通灵台于甘泉宫有一青鸟集其上往来汉武故事上以琉璃珠玉明月夜光杂错天下珍寶为甲帐其次为乙帐甲以居神乙以自居汉书李夫人早卒帝思念不已方士齐人李少翁言能致其神乃夜张灯烛设帷帐陈酒肉而令帝居他帐望见好女如李夫人之貌还幄坐而步又不得就视帝益相思悲感

判春

一桃复一李。井上占年芳。笑处如临镜。窥时不隐墙。

敢言西子短。谁觉宓妃长。珠玉终相类。同名作夜光。

△古乐府桃生露井上李树生道旁江总李花诗当知露井上复与夭桃隣登徒子好色赋此女子登墙窥臣三年神女赋穠不短纖不长搜神记隋珠盈径寸夜有光明可以烛室十洲记周穆王时西湖献玉杯是百玉之精明夜照夕

促漏

促漏遥钟动静闻。报章重迭杳难分。舞鸾镜匣收残黛。睡鸭香炉换夕熏。

归去定知还向月。梦来何处更为云。南塘渐暖蒲堪结。两两鸳鸯〈上𠂔下左言右隻〉水纹。

△一作字唐书内官有掌书二人掌符契经籍宣传啓奏杜甫诗宫女开函近御筵是也通俗

文染青石谓之点黛李贺诗深帙金鸭冷一作岂淮南子羿请不死之药于西王母姮娥窃之奔月注姮娥羿妻也服药得仙奔入月中为月精江总经故妃殿诗若令归就月照见不须疑乐府西州曲采莲南塘秋李贺乐词官街柳带不堪折早晚菖蒲胜绾结道源注言纵如姮娥入月终是独居神女为云徒成幻梦岂若南塘之鸳鸯长匹不离哉高棅曰此诗拟深宫怨女而作

江东

惊鱼拨刺燕翻翩。独自江东上钓船。今日春光太漂荡。谢家轻絮沉郎钱。

△方割切力达切谢灵运赋鱼水深而拨刺杜甫诗船尾跳鱼拨刺鸣鸂鶒赋鸂鶒之陋体兮谢絮注见前晋食货志吴兴沉充铸小钱谓之沉郎钱此以比榆荚也汉有小钱名榆荚钱李贺诗榆荚相催不知数沉郎青钱夹城路

读任彦昇碑

任昉当年有美名。可怜才调最纵横。梁台初建应惆怅。不得萧公作骑兵。

△南史任昉字彦昇乐安博昌人雅善属文尤长载笔入梁历官御史中丞出为新安太守卒梁书武帝与昉遇竟陵王西邸从容谓昉曰我登三府当以卿为记室昉亦戏帝曰我若登三事当以卿为骑兵以帝善射也

荷花

都无色可并。不奈此香何。瑶席乘凉设。金羁落晚过。

迴衾灯照绮。渡袜水沾罗。预想前秋别。离居梦擢歌。

△楚词瑶席分玉璫英华作晓曹植乐府白马饰金羁英华作覆雪赋援绮衾兮坐芳褥注见前英华作愁前汉武帝秋风辞箫鼓鸣兮发擢歌

五松驿

独下长亭念过秦。五松不见见舆薪。只应既斩斯高后。寻被樵人用斧斤。

△按白氏长庆集有望秦赴五松驿诗此驿在长安东贾谊有过秦论

灞岸

山东今岁点行频。几处冤魂哭虏尘。灞水桥边倚华表。平时二月有东巡。

△杜甫诗行人但云点行频三辅黄圖霸桥在长安东灞水上说文亭邮表徐曰表双立为桓今邮亭立木交于其端或谓之华表按桥柱亦曰华表杜甫桥成诗天寒白鹤归华表是也

送臻师二首

昔去灵山非拂席。今来沧海欲求珠。楞伽顶上清凉地。善眼仙人忆我无。

苦海迷途去未因。东方过此几微尘。何当百亿莲花上。一一莲花见佛身。

△水经注灵鹫山胡语云耆闍崛山山是青石遠望似鷲鸟形故曰灵鷲法显亲宿其山诵首楞严香花供养道源注法华释注灵山灵鹫山也又名狼迹山前佛今佛皆居此地既是灵圣所居故呼为灵山法华经尔时世尊告舍利佛汝今谛听吾当为汝分别解说尔时会中有比丘比丘尼优婆塞优婆夷五千人等即从座起礼佛而退所以者何此辈罪根深重及增上慢未得为得未证为证有如此失是以不住拂席而起譬喻经王舍国人欲作寺钱不足入海得名寶珠杜甫诗僧寶人人沧海珠道源注阁笔记梵云楞伽此云不可往惟神通者能至其上峯顶有夜叉城佛于此说楞伽经楞伽经大慧菩萨白佛言世尊于大衆中唱如是言我是过去一切佛及种种受生尔时作曼陀转轮圣王六牙大象及鹦鹉鸟释提桓因善眼仙人如是等百千生经说道源注善眼仙人以比臻师也楞严经引诸沉冥出于苦海庄子七圣皆迷无所问途去未因过去未来之因法华经假使有人磨以为墨过于东方千国土乃下一点大如微尘又过千国土复下一点如是展转尽地种墨是诸佛土若算师知其数否传灯録释迦佛生刹利王家放大智光明照十方世界涌金莲花梵网经一华百亿国一国一释迦各坐菩提树一时成佛道

七夕

鸾扇斜分凤幄开。星桥横过鹊飞迴。争将世上无期别。换得年年一度来。

△庾信诗思为鸾翼扇愿备明光宫

谢先辈防记念拙诗甚多异日偶有此寄

晓用云添句。寒将雪命篇。良辰多自感。作者岂皆然。

熟寝初同鹤。含嘶欲并蝉。题时长不展。得处定应偏。

南浦无穷树。西楼不住烟。改成人寂寂。寄与路绵绵。

星势寒垂地。河声晓上天。夫君自有恨。聊借此中传。

△国史补互相推敬谓之先辈一作徒梁褚云蝉诗天寒响屡嘶楚词送美人兮南浦鲍照诗始出西南楼柳子原集序粲然如繁星丽天而芒寒色正楚词望夫君兮归来

马嵬二首

冀马燕犀动地来。自埋红粉自成灰。君王若道能倾国。玉辇何由过马嵬。

海外徒闻更九州。他生未卜此生休。空闻虎旅传宵柝。无复鸡人报晓筹。

此日六军同驻马。当时七夕笑牵牛。如何四纪为天子。不及卢家有莫愁。

△通志马嵬坡在西安府兴平县西二十五里左传冀之北土马之所生燕犀燕地之犀甲也郑玄周礼注燕近强胡习于甲冑或曰谓弓也列子燕角之弧朔蓬之干郭璞毛诗拾遗今西方有以犀角及鹿角为弓者长恨歌渔阳鞞鼓动地来国史补玄宗幸蜀至马嵬驿缢贵妃于佛堂梨树之前太真外传妃死瘞于西郭之外一里许道北坎下时年三十八岁英华作堪原注邹衍云九州之外复有九州英华作决长恨传玄宗命方士致贵妃之神旁求四虚上下跨蓬壶见最高仙山上多楼阁署曰玉妃太真院玉妃出揖方士问天寶十四载以还事言讫惘然取金钗钿合各折其半授使者还献上皇将行乞当时一事不闻于他人者为验玉妃曰昔天寶十年秋七月牵牛织女相见之夕时夜始半独侍上上憑肩而立因仰天感牛女事密相誓愿世世为夫妇执手各呜咽此独君王知之耳方士还奏上皇嗟悼久之此诗起二语正指其事言夫妇之愿他生未卜而此生先休徒髣髴其神于海外耳能无悲乎西京赋陈虎旅于飞廉周礼鸡人夜呼旦以班百官汉官仪宫中不得畜鸡卫士于朱雀门外传鸡唱王维诗绦帟鸡人报晓筹○按仙传拾遗云玄宗属念贵妃往往废寝则虎旅鸡人皆增感怆矣旧书肃宗纪杨国忠讽玄宗幸蜀至马嵬顿六军不进大将军陈玄礼请诛杨氏于是诛国忠赐贵妃自尽长恨歌六军不发可奈何宛转蛾眉马前死见上玄宗纪诏曰聿来四纪人亦小康

可歎

幸会东城宴未迴。年华忧共水相催。梁家宅里秦宫入。赵后楼中赤凤来。

水簾且眠金缕枕。琼筵不醉玉交盃。宓妃愁坐芝田馆。用尽陈王八斗才。

△梁冀传冀爱监奴秦宫官至太仓令得出入妻孙壽所壽见宫輒屏御者託以言事因与私焉飞燕外传后所通宫奴燕赤凤雄健能超观阁兼通昭仪赤凤始出少嫔馆后适来幸是日连臂蹋地歌赤凤来曲杜甫诗恩分夏簟水洛神赋注东阿王入朝帝示甄后玉镂金带枕李白序开琼筵以坐花拾遗记崑崙山第九层山形渐狭小下有芝田蕙圃皆数百顷羣仙种耨焉洛神赋秣騊乎芝田陈思王谢灵运曰天下才共一石曹子建独得八斗自古及今共用一

斗奇才博识安可继也秦宫赤凤以刺当时之事也陈思之于宓妃情通而不及乱作者殆以自况欤

望喜驿别嘉陵江水二絕

嘉陵江水此东流。望喜楼中忆阆州。若到阆中还赴海。阆中应更有高楼。

千里嘉陵江水色。含烟带月碧于蓝。今朝相送东流后。犹自驱车更向南。

△寰宇记嘉陵水一名西汉水又名阆中水周地圖云水源出秦州嘉陵因名嘉陵江

别薛岳宾

曙爽行将拂。晨清坐欲凌。别离真不那。风物正相仍。

漫水任谁照。衰花浅自矜。还将两袖泪。同向一窗灯。

桂树乖真隱。芸香是小愆。清规无以况。且用玉壶冰。

△奴卧切英华作清淮南王招隱桂树丛生兮山之幽二语义山自谓也义山释褐秘书省校书郎旋调补弘农尉故有芸香之句

富平少侯

七国三边未到忧。十三身袭富平侯。不收金弹抛林外。却惜银牀在井头。

綵树转灯珠错落。绣檀迴枕玉雕鏤。当關不报侵晨客。新得佳人字莫愁。

△七国谓汉景时七国隋明馀庆诗三边烽乱惊汉书张安世封富平侯子延壽嗣延壽卒子放嗣放敬武公主所生娶皇后弟平恩侯许嘉女与上卧起宠爱殊絕西京杂记韩嫣以金为弹丸一日失数十每出儿童随之长安语曰苦饥寒逐弹丸乐府淮南篇后园凿井银作牀金瓶素绠汲寒浆吴曾漫錄山海经崑崙墟九井以玉为檻银牀者以银作栏犹所云玉檻耳名义考银牀非井栏乃轆轳架也广韵轆轳圆转木用以汲水开元遗事韩国夫人上元夜然百枝灯树高八十餘尺?之高山百里皆见拾遗记魏明帝检寶库中得一玉虎头枕单池国所献其额下有篆书云帝辛之枕尝与妲己同枕之是殷时遗物也语林王武子从荊州来敦欲杀之平子恒持玉枕以自防古诗玉枕龙鬚席郎眠何处牀魏都赋木无雕鏤当關注见前

肠

有懷非惜恨。不奈寸肠何。即席迴弥久。前时断固多。

热应翻急烧。冷欲彻微波。隔树淅淅雨。通池点点荷。

倦程山向背。望国阙嵯峨。故念飞书及。新懽借梦过。

染筠休伴泪。绕雪莫追歌。拟问阳台事。年深楚语讹。

△湘中记衡山如阵云九向九背乃复不见用湘妃事鲍照诗蜀琴抽白雪郢曲绕阳春杜甫诗朱?绕白雪

赠宇文中丞

欲构中天正急材。自縁烟水恋平台。人间只有嵇延祖。最望山公启事来。

△旧唐书太和六年八月以御史中丞宇文鼎为户部侍郎判度支列子西极化人见周穆王王为改筑宫室其高千仞临终南之上名曰中天之台汉书梁孝王治複道自宫连属于平台三十馀里注平台在大梁东北原注公感歎亡友张君故有此句○晋书嵇绍传绍字延祖康之子以父得罪靖居私门山涛领选启武帝请为秘书郎帝谓涛曰如卿所言乃堪为丞何但郎也山涛传所奏甄拔人物各为题目时称山公启事

晓起

拟杯当晓起。呵镜可微寒。隔箔山樱熟。褰帷桂烛残。

书长为报晚。梦好更寻难。影响输双蝶。偏过旧畹兰。

庾信对烛赋刺取灯花持桂烛

闺情

红露花房白蜜脾。黄蜂紫蝶两参差。春窗一觉风流梦。却是同袍不得知。

△郑谷蝶诗微雨宿花房王元之蜂记蜂酿蜜如脾谓之蜜脾本草蜡是蜜脾底也古效切

月夕

草下陰虫叶上霜。朱栏迢递压湖光。兔寒蟾冷桂花白。此夜姮娥应断肠。

杏花

上国昔相值。亭亭如欲言。异乡今暂赏。眇眇岂无恩。

援少风多力。墙高月有痕。为含无限意。遂对不胜繁。

仙子玉京路。主人金谷园。几时辞碧落。谁伴过黄昏。

镜拂铅华腻。炉藏桂烬温。终应催竹叶。先拟咏桃根。

莫学啼成血。从教梦寄魂。吴王採香径。失路入烟村。

△秦中记唐人举进士会杏园谓之探花宴去声谢灵运集有田南树园激流植援诗注援卫也英华作到灵枢金景内经下离尘境上界玉京元君注玉京者无为之天也玉京之下乃崑崙北都太霄隱书无上大道君治无极大罗天中玉京之上七寶玄台金牀玉几一作佳水经注金谷水出河南太白原东南流歷金谷谓之金谷水经石崇故居洛神赋铅华不御善曰博物志烧铅成胡粉拾遗记王母取綠桂之膏然以照夜张协诗尺烬重寻桂张衡七辨玄酒白醴蒲萄竹叶张华轻薄篇苍梧竹叶清宜城九醞酒王献之桃叶歌桃树连桃根禽经子规夜啼达旦血漬草木方輿胜覽姑苏灵岳山有西施採香径此诗因杏花而寓失路之感玩首末语可见

灯

皎洁终无倦。煎熬亦自求。花时随酒遠。雨后背牕休。

冷暗黄茅驿。暄明紫桂楼。锦囊名画揜。玉局败碁收。

何处无佳梦。谁人不隱忧。影随帘押转。光信簾文流。

客自胜潘岳。侬今定莫愁。固应留半燄。迴照下帏羞。

△阮籍诗膏火自煎熬鲍昭诗凤楼十二重桂树玉盘龙诗耿耿不寐如有隱忧汉武故事上起神屋以白珠为帘箔玳瑁押之象牙为簾萧贯晓寒歌海牛押帘风不入梁简文帝诗簾文生玉腕香汗浸红纱陈后主曰梁纪少瑜灯诗惟餘一两燄纔得解罗衣结语从此化出

清河

舟小迴仍数。楼危凭亦频。燕来从及社。蝶舞太侵晨。

绦雪除烦后。霜梅取味新。年华无一事。只是自伤春。

△汉武内传上药有玄霜绦雪

韞

尝闻宓妃袜。渡水欲生尘。好借嫦娥著。清秋踏月轮。

追代卢家人嘲堂内

道却横波字。人前莫谩羞。只应同楚水。长短入淮流。

△傅毅舞赋目流睇而横波道源注横波同楚水谓其情之长也以淮代懷乃隱语如古乐府石阙衔碑之类

代应

本来银汉是红墙。隔得卢家白玉堂。谁与王昌报消息。尽知三十六鸳鸯。

△襄阳耆旧传王昌字公伯为东平相散骑常侍早卒妇任城王曹子文女也道源注古乐府入门时左顾但见双鸳鸯鸳鸯七十二罗列自成行此云三十六纯举雌言之

离亭赋得折杨柳二首

暂憑樽酒送无憀。莫损愁眉与细腰。人世死前惟有别。春风争拟惜长条。

含烟惹雾每依依。万绪千条拂落晖。为报行人休尽折。半留相送半迎归。

寄永道士

共上云山独下迟。阳台白道细如诗。君今併倚三珠树。不记人间落叶时。

△真诰王屋山仙之别天谓阳台也始得道者皆诣阳台是清虚之宫也注见前一作计

华州周大夫宴席

郡斋何用酒如泉。饮德先时已醉眠。若共门人推礼分。戴崇争得及彭宣。

△旧唐书周墀字德升长庆二年擢进士第开成四年正拜中书舍人武宗即位出为华州刺

史镇国军潼關防御等使海録唐制吏部三铨尚书中铨两侍郎分东西两铨裴秀诗有肉如丘有酒如泉汉书张禹弟子尤著者淮阳彭宣沛郡戴崇宣为人恭俭有法度而崇恺悌多智禹心亲爱崇敬宣而疎之崇每 禹禹将入后堂馀食妇女相对优人管弦铿锵极乐昏夜乃罢而宣之来也禹见之于便坐讲论经义日晏赐食不过一肉卮酒相对未尝得至后堂及两人皆闻知各自得也

荆山

压河连华势孱顔。鸟没云归一望间。杨僕移關三百里。可能全是为荆山。

△唐书虢州湖城县有覆釜山一名荆山寰宇记荆山在鼎湖县南出美玉即黄帝铸鼎之所一统志在陕州闾乡县南二十五里○此诗一统志收入富平荆山非是相如大人赋放散畔岸壤以孱顔注不齐貌汉书元鼎三年冬徙函谷關于新安应劭曰时楼船将军杨僕数有大功耻为關外民上书乞徙东關以家财给用武帝意亦好广濶于是徙關新安去弘农三百里

次陕州先寄源从事

离思羈愁日欲晡。东周西雍此分途。迴銮佛寺高多少。望尽黄河一曲无。

△唐书陕州陕郡本弘农郡属河南道上声唐书代宗广德元年十月吐蕃入寇奉天上出幸陕州十二月上还京物理论河百里一小曲千里一大曲一直一曲九曲以达于海

过郑广文旧居

宋玉平生恨有馀。逡循三楚弔三闾。可怜留著临江宅。异代应教庾信居。

△唐书玄宗爱郑虔才更置广文馆以虔为博士长安志韩庄在韦曲之东退之与孟郊赋诗又送其子读书处郑庄又在其东南郑十八虔之居也离骚序屈原与楚同姓仕于懷王为三闾大夫三闾之职掌王族三姓曰昭屈景西谿丛语唐余知古渚宫故事曰庾信因侯景乱自建康遁归江陵居宋玉故宅宅在城北三里故哀江南赋云诛茅宋玉之宅穿径临江之府老杜云会闻宋玉宅每欲到荆州李义山亦云可怜留著临江宅异代应教庾信居是也然子美移居夔州八宅诗云宋玉归州宅云通白帝城又有江山故宅空文藻之句蓋归州亦有宋玉宅也

东下三旬苦于风土马上戏作

路遶函關东复东。身骑征马逐惊蓬。天池辽濶谁相待。日日虚乘九万风。

△水经注潼關歷北出东崤通谓之函谷關遂岸天高空谷幽深涧道之峡车不容轨天池九

万风见庄子

莫愁

雪中梅下与谁期。梅雪相兼一万枝。若是石城无艇子。莫愁还自有愁时。

△乐府莫愁在何处莫愁石城西艇子打两桨催送莫愁来

梦令狐学士

山驿荒凉白竹扉。残灯向晓梦清晖。右银台路雪三尺。凤诏裁成当直归。

△李肇翰林志翰林院在银台门北麟德殿西厢重廊之后学士院在翰林之南别户东向引铃门外虽宣事不敢入又曰学士每下直出门相谑谓之小三昧出银台门乘马谓之大三昧邙中记石虎诏书以五色纸衔木凤皇口中飞下端门令狐綯传綯为翰林承夜对禁中烛尽帝以乘舆金莲华炬送还院吏望见以为天子来及綯至皆惊

涉洛川

通谷阳林不见人。我来遗恨古时春。宓妃漫结无穷恨。不为君王杀灌均。

△洛阳记城南五十里有大谷旧名通谷洛神赋经通谷凌景山又曰容与于杨林流眄乎洛川善曰杨林地名多生杨因名五臣本作阳洛神赋恨人神之道殊怨盛年之莫当原注灌均陈王典籤譖诸王于文帝者○魏志植与诸侯并就国黄初二年监国谒者灌均希旨奏植醉酒悖慢刼胁使者有司请治罪帝以太后故贬爵安乡侯

有感

中路因循我所长。古来才命两相妨。劝君莫强安蛇足。一醎芳醪不得尝。

△战国策有祠者赐其舍人酒一卮舍人相谓曰数人饮之不足一人饮之有馀请画地为蛇蛇先成者饮酒一人蛇先成乃左手持酒右手画地曰吾能为之足未成一人蛇成夺其卮曰蛇故无足子安能为遂饮酒为蛇足者终亡其酒

宫妓

珠箔轻明拂玉墀。披香新殿鬬腰支。不须看尽鱼龙戏。终遣君王怒偃师。

△宫妓内妓也教坊记西京右教坊在光宅坊左教坊在延政坊右多善歌左多工舞妓女入

宜春院谓之内人亦曰前头人尝在上前也三秦记明光殿皆金玉珠玑为帘箔昼夜光明三辅黄图武帝时后宫八区中有披香殿雍録唐庆善宫有披香殿王諲诗披香殿里荐蛾眉梁邵陵王诗软媚著腰支汉书武帝作鱼龙角抵之戏师古曰鱼龙者为舍利之兽先戏于庭极毕乃入殿前激水化成比目鱼跳跃激水作雾障日化成黄龙长八丈出水敖戏于庭炫燿日光西京赋海鳞变而成龙即为此色也列子周穆王西巡狩道有献工人名偃师偃师所造能倡者輒步俯仰鎖其颐则歌合律捧其手则舞应节千变万化惟意所适王以为实人技将终瞬其目而招王之左右侍妾王大怒欲诛偃师偃师立剖散倡者以示王内外肝胆支节等皆假物也

柳

为有桥边拂面香。何曾自敢占流光。后庭玉树承恩泽。不信年华有断肠。

△李白诗风吹柳花满店香

寄在朝郑曹独孤李四同年

昔歲陪游旧迹多。风光今日两蹉跎。不因醉本兰亭在。兼忘当年旧永和。

△道源注法书要録永和九年王右军与亲友四十二人修禊于兰亭挥毫製序兴乐而书遒媚劲健谓有神助醒后日再书数十百纸终不能及右军自珍爱之秘藏于家七传而至智永子徽之派也舍俗为僧居越之永欣寺后授弟子辨才人所罕见唐太宗遣御史萧翼以计赚取太宗不豫命太宗以此本从塋昭陵愚按南部新书云兰亭序武德四年欧阳询就越诈求之始入秦王府麻道嵩奉教搨两本一送辨才一王自收贞观十三年褚遂良请入昭陵其說与此不同

李义山诗集注卷一下

●李义山诗集注卷二上

吳江朱鹤齡撰

南朝

地险悠悠天险长。金陵王气应瑶光。休夸此地分天下。只得徐妃半面粧。

△春秋运斗枢北斗七星第一天枢第二璇第三机第四权第五衡第六开阳第七摇光江淹诗瑶光正神县南朝为正朔所归故曰应瑶光也南史徐妃讳昭佩无容质不见礼帝二三年一入房妃以帝眇一目每知帝将至必为半面粧以俟帝见则大怒而出

题汉祖庙

乘运应须宅八荒。男儿安在恋池隍。君王自起新丰后。项羽何曾在故乡。

△汉书京兆新丰秦曰骊邑高祖七年置三辅旧事太上皇不乐關中思慕乡邑高祖徙丰沛酤酒煮饼商人立为新丰项羽传富贵不归故乡如衣绣夜行

韩冬郎即席为诗相送一座尽惊他日余方追吟连宵侍坐徘徊久之句有老成之风因成二絶寄酬兼呈畏之员外

十歳裁诗走马成。冷灰残烛动离情。桐花万里丹山路。雏凤清于老凤声。

劒栈风樯各苦辛。别时冰雪到时春。为凭何逊休联句。瘦尽东阳姓沉人。

△南部新书冬郎韩偓小字父瞻字畏之义山同年张正见诗丹山下威风来集帝梧桐薛道衡诗集凤桐花散劒栈谓劒阁栈道何逊尝于范广州宅联句原注沉东阳约尝谓何逊曰吾每读卿诗一日三复终未能到余虽无东阳之才而有东阳之瘦矣

评事翁寄赐饧粥走笔为答

粥香饧白杏花天。省对流鶯坐绮筵。今日寄来春已老。凤楼迢递忆鞦韆。

△玉烛宝典寒食节今人悉为大麦粥研杏仁为酪引饧沃之孙楚祭子推文云黍饭一盘醴酪二盂是其事也

东阿王

国事分明属灌均。西陵魂断夜来人。君王不得为天子。半为当时赋洛神。

△魏志明帝太和二年植复还雍丘三年徙封东阿注见上卷邳中故事魏武帝遗命诸子曰吾死之后葬于邳之西岗婕妤美人皆著铜雀台上施六尺牀下總帳朝脯上酒脯粳〈備。去人加米〉之属每月朔十五辄向帐前作伎乐汝等时登高望吾西陵墓田魏志植既以才见异丁仪丁廙杨修等为之羽翼太祖狐疑几为太子者数矣而植任性而行不自雕厉文帝御之以术矫情自饰宫人左右并为之說遂定为嗣注见上卷

圣女祠

松篁台殿蕙香帙。龙护瑶窗凤掩扉。无质易迷三里雾。不寒长著五铢衣。

人间定有崔罗什。天上应无刘武威。寄问钗头双白燕。每朝珠馆几时归。

△英华作花閨谢承后汉书张楷有道术居华山谷中能为五里雾时關西人裴优亦能作三里雾一作六博异志贞观中岑文本于山亭避暑有叩门云上清童子文本问曰衣服皆轻细何土所出对曰此上清五铢服又问曰比闻六铢者天人衣何五铢之异对曰尤细者则五铢也出门忽不见惟得古钱一枚道源注酉阳杂俎长白山有夫人墓魏孝昭之世清河崔罗什被徵夜过此忽见朱门粉壁一青衣出遇什曰女郎须见崔郎什恍然下马入两重门青衣引前曰女郎乃平陵刘府君之妻侍中呉质之女府君先行故欲相见什遂前入就牀坐其女在户东立与什叙温凉女曰比见崔郎息驾庭树嘉君吟啸故欲一叙玉顏什与论汉魏时事悉与魏史符合什曰贵夫刘氏愿告其名女曰狂夫刘孔才之第二子名瑶字仲璋比有罪被掇乃去不返什下牀辞出女曰从此十年当更相逢什留玳瑁簪女以指上玉环赠什什上马行数十步回顾乃一大冢后十年什在园中食杏忽云报女郎信俄即去食一杏未尽而卒注见上卷注见上卷

独居有怀

麝重愁风逼。罗疎畏月侵。怨魂迷恐断。娇喘细疑沉。

数急芙蓉带。频抽翡翠簪。柔情终不远。遥妬已先深。

浦冷鸳鸯去。园空蛱蝶寻。蜡花长遶泪。筝柱镇移心。

觅使嵩云暮。迴头灞岸陰。只闻凉叶院。露井近寒砧。

△梁元帝乌栖曲芙蓉为带石榴裙后汉舆服志太皇太后皇太后入庙簪以玳瑁为搔长一尺端为花胜上为凤雀以翡翠为毛羽梁费〈上日下永〉诗日照茱萸领风摇翡翠簪傅玄箏赋序弦柱十二拟十二月梁王台卿咏箏诗促调移轻柱顾野王箏赋既留心于别鹤亦含

情于採莲道源注汉武内传武帝夜梦与李少君俱上嵩高山半道有锦衣使者乘龙持节从云中下言太乙君召觉即告近臣曰如朕梦少君将舍朕去矣王粲诗南登灞陵岸回首望长安

过景陵

武皇精魄久仙昇。帐殿凄凉烟雾凝。俱是苍生留不得。鼎湖何异魏西陵。

△唐书宪宗服方士柳泌金丹毒发多躁怒元和十五年正月暴崩谥曰圣神章武孝皇帝景陵在蒲城县金帙山梁庾肩吾诗廻川入帐殿唐六典凡大驾行幸设三部帐幕帐皆乌氍为表朱绂为覆汉书黄帝铸鼎荆山之下有龙垂胡须下迎黄帝骑龙上天后世名其地名鼎湖西陵注见前

临发崇让宅紫薇

一树浓姿独看来。秋庭暮雨类轻埃。不先摇落应为有。已欲别离休更开。

桃绶含情依露井。柳绵相忆隔章台。天涯地角同荣谢。岂要移根上苑栽。

△宣室志崇让里在东都西谿丛语洛阳崇让坊有河阳节度使王茂元宅义山乃茂元之壻应劭汉官仪二千石绶青地桃花缥三采张正见诗竹叶当炉满桃花带绶轻古乐府桃生露井上陈祖孙登咏柳诗飞绵乱上空西京杂记初修上林苑羣臣远方各献名果异卉三千馀种植其中

及第东归次灞上却寄同年

芳桂当年各一枝。行期未分压春期。江鱼朔雁长相忆。秦树嵩云自不知。

下苑经过劳想像。东门送饯又差池。灞陵柳色无离恨。莫枉长条赠所思。

△晋郗诜传臣对策为天下第一犹桂林一枝崑山片玉汉书注宜春下苑即今京城东南隅曲江池是寰宇记本属下杜故云下苑英华作追水经注长安城东出北头第一门曰宣平门亦曰东城门其郭门亦曰东都门三辅黄图文帝灞陵在长安城东七十里灞桥跨水作桥汉人送客至此桥折柳赠别一作把

野菊

苦竹园南椒坞边。微香冉冉泪涓涓。已悲节物同寒雁。忍委芳心与暮蝉。

细路独来当此夕。清樽相伴省他年。紫云新苑移花处。不取霜栽近御筵。

△此诗又见孙逖集题作咏楼前海石榴齐民要术竹之丑者有四曰青苦白苦紫苦黄苦一作微

板桥晓别

廻望高城落晓河。长亭窗户压微波。水仙欲上鲤鱼去。一夜芙蓉红泪多。

△列仙传琴高赵人也行涓彭之术浮游冀州涿郡间二百馀年后入涿水中取龙子与诸弟子期曰明日皆洁斋候于水旁果乘赤鲤来留月馀复入水去拾遗记薛灵芸别父母以玉唾壶承泪皆为红色

过伊僕射旧宅

朱邸方酬力战功。华筵俄歎逝波穷。廻廊簷断燕飞去。小阁尘凝人语空。

幽泪欲乾残菊露。馀香犹入败荷风。何能更涉沅江去。独立寒流弔楚宫。

△唐书伊慎兖州人善骑射大厯间以军功封南兖郡王厯官检校尚书右僕射兼右卫上将军元和六年卒赠太子太保玉海郡国朝宿之舍在京者谓之邸朱邸邸有朱户也谢朓辞隋王賓朱邸方开効蓬心于秋实英华作出一作閣英华作砌閭江切水经注沅水又南出峡谓之沅口又南迳曲江县东一统志在韶州府乐昌县英华作沙按楚宫在荆南疑此诗乃自桂林奉使江陵时作故有末二句

關門柳

永定河边一行柳。依依长发故年春。东来西去人情薄。不为清陰減路尘。

酬别令狐补阙

惜别夏仍半。回途秋已期。那修直諫草。更赋赠行诗。

锦段知无报。青萍肯见疑。人生有通塞。公等繫安危。

警露鹤辞侶。吸风蝉抱枝。弹冠如不问。又到扫門时。

△英华有八字令狐綯传开成初为左拾遗二年丁父丧服阙授本官寻改左补阙史馆修撰张衡四愁诗美人赠我锦绣段何以报之青玉案青萍注见上卷○言已虽无报令狐必无按

剑之疑也一作吾稗雅鹤性警八月白露降流于草上?滴有声则高鸣相警温峤蝉赋饥噉晨风渴饮清露汉书王阳在位贡禹弹冠史记魏勃欲见齐相曹参家贫无以自通早夜扫齐相舍人门舍人见之参拜为内史

银河吹笙

怅望银河吹玉笙。楼寒院冷接平明。重衾幽梦他年断。别树羁雌昨夜惊。

月榭故香因雨发。风帘残烛隔霜清。不须浪作缑山意。湘瑟秦箫自有情。

△列仙传王子晋善吹笙七月七日乘白鹤于缑氏山头举手谢时人而去

与同年李定言曲水閒话戏作

海燕参差沟水流。同君身世属离忧。相携花下非秦赘。对泣春天类楚囚。

碧草暗侵穿苑路。珠帘不捲枕江楼。莫惊五胜埋香骨。地下伤春亦白头。

△贾谊传秦人家贫子壮则出赘师古曰言其不出妻家如人身之有赘疣也一作风前左传晋侯问曰南冠而縶者谁也有司曰郑人所献楚囚也王导传何至作楚囚相对泣耶去声一作经汉律厯志秦推五胜自以为获水德注五行相胜秦以周为火用水胜之按秦本纪二世始皇骊山后宫无子者皆令从死故云埋香骨

彭城公薨后赠杜二十七胜李十七潘二君并与愚同出故尚书安平公门下

梁山兗水约从公。两地参差一旦空。谢墅庾村相弔后。自令岐路各西东。

△当作阳文集作藩旧唐书令狐楚传元和十四年楚拜同平章事太和中厯任宣武天平河东节度使七年入为吏部尚书九年十月守尚书左僕射进封彭阳郡开国公开成元年四月出为兴元尹充山南西道节度使二年十一月卒于镇新书杜胜宰相黄裳之子宝厯初擢进士第宣宗大中朝拜给事中迁户部侍郎判度支欲倚为宰相及萧邺罢为中人沮毁更用蒋伸以胜检校礼部尚书出为天平节度使不得意卒李潘未详旧书崔戎字可大裴度领太原戎为参谋迁剑南东西川宣慰使还拜给事中改华州刺史迁兗海沂密都团练观察使太和八年五月卒赠礼部尚书世系表戎封安平县公本集有为安平公兗州奏杜胜李藩等充判官状唐书汉中郡属山南西道本梁州汉川郡天宝元年改汉中兗州鲁郡属河南道梁山谓彭阳兗水谓安平也谢安传苻坚寇淮淝安命驾出与玄围碁赌别墅庾村未详钱龙惕笺杜李二君既同出安平之门又同为彭阳从事故二公没而赠之以诗也诗中并感二公故有梁山兗水谢墅庾村之目

闻歌

歛笑凝眸意欲歌。高云不动碧嵯峨。铜台罢望归何处。玉辇忘还事几多。

青冢路边南雁尽。细腰宫里北人过。此声肠断非今日。香炷灯光奈尔何。

△高云不动用秦青响遏行云事魏武西陵事见前拾遗记穆王御黄金碧玉之辇迹轂遍于四海西王母乘翠凤之辇而来与穆王欢歌归州图经胡地多白草昭君冢独青乡人思之为立庙香溪一统志昭君墓在古丰州西六十里细腰注见上卷杜牧诗细腰宫里露桃新斜上声说文炷烛烬也世説桓子桢闻清歌辄唤奈何

赠华阳宋真人兼寄清都刘先生

沦谪千年别帝宸。至今犹谢蕊珠人。但惊茅许同仙籍。不道刘卢是世亲。

玉捡赐书迷凤篆。金华归驾冷龙鳞。不因杖屨逢周史。徐甲何曾有此身。

△句容句曲山名曰华阳之天详上卷列子清都紫微钧天广乐上帝之所居英华作识道源注黄庭内景经太上大道玉宸君閒居蕊珠作七言秘要经仙宫中有寥阳之殿蕊珠之阙李白诗传诗蕊珠宫○洞仙传茅濛字初成咸阳南關人即东卿司命君盈之高祖也师北郭鬼谷先生受长生之术入华山修道白日升天集仙传大茅君盈南至句曲之山南岳真人赤君西城王君及诸青童并从王母降于盈室天皇大帝命五帝君赐以紫玉之板黄金刻书九锡之文拜盈为东岳上卿司命真君太元真人王母命上元夫人授盈之二弟茅固茅衷太霄隐书丹景道精等四部宝经命侍女张灵子执交信之盟以授于盈固及衷事讫升天而去十二真君传许逊字敬之祖琰父肃世慕至道师大洞君呉猛传三清法要太康二年八月一日于洪州西山拔宅上升晋尚书郎迈散骑常侍护军长史穆皆逊之族子后俱得道晋书许迈字叔玄丹阳句容人志求仙道立精舍于余杭悬霤山往来茅山洞室父母既终乃遣妇孙氏还家徧游名山刘卢刘琨卢湛也文选琨答湛诗郁穆旧恩嫵婉新婚善曰臧荣绪晋书琨妻即湛之从母湛赠琨诗申以婚姻著以累世向曰婚姻谓湛妹嫁琨弟英华作籙○汉书注封禅有金泥玉捡谓以玉为捡束也御览三元玉捡经三玄台玉检紫文九天真书在其内真诰二侍女持锦囊囊盛书十许卷以白玉检緘囊口古今篆 文体凤篆白帝朱宣氏有凤鸟之瑞文字取以为象三洞经道家字曰云篆曰天书曰龙章曰凤文神仙传皇初平丹溪人年十五家使牧羊有道士见其良谨将至金华山石室中四十馀年兄初起寻索不得后见一道士求得之问羊何在曰近在山东初起往视但见白石初平叱曰羊起于是白石皆变为羊初起便弃妻子就初平学修功德二十七年忽见虎驾龙车二人执节下庭中顾谓友曰此迎我也道士即邓紫阳神仙传老子姓李名耳字伯阳楚国苦县赖乡人周文王时为守藏史至武王时为柱下史神仙传徐甲御老子青牛出關西昇中路乞顾直求去老子曰汝年不长吾以长生符与汝吞之故能至此汝欲去耶甲不悟必欲求去老子以水噉之便成白骨一具衆为甲哀求老子复以水噉之甲复形如故遂随老子仙去

楚宫二首

十二峰前落照微。高唐宫暗坐迷归。朝云暮雨长相接。犹自君王恨见稀。

月姊曾逢下彩蟾。倾城消息隔重帘。已闻佩响知腰细。更辨弦声觉指纤。

暮雨自归山悄悄。秋河不动夜厌厌。王昌且在牆东住。未必金堂得免嫌。

△天中记巫山十二峰曰望霞曰翠屏曰朝云曰松峦曰集仙曰聚鹤曰淨坛曰上昇曰起云曰飞龙曰登龙曰圣泉月姊注见上卷王昌注见上卷乐府人生富贵何所望恨不早嫁东家王后汉桓帝时童謡曰以钱为室金为堂陈后源曰东家王为卢莫愁咏也

和友人戏赠二首

东望花楼会不同。西来双燕信休通。仙人掌冷三霄露。玉女窗虚五夜风。

翠袖自随回雪转。烛房寻类外庭空。殷勤莫使清香透。牢合金鱼锁桂丛。

迢递青门有几关。柳梢楼角见南山。明珠可贯须为佩。白璧堪裁且作环。

子夜休歌团扇掩。新正未破剪刀閒。猿啼鹤怨终年事。未抵熏炉一夕间。

△道源注开元遗事长安郭绍兰嫁任宗宗为商于湘中数年音问不达绍兰语梁间双燕欲凭寄书于壻燕子飞鸣似有所诺遂飞泊膝上兰乃吟诗曰我壻去重湖临 泣血书殷勤凭燕翼寄与薄情夫任宗得书感泣而归张説传其事仙掌注见上卷道源注三霄神霄玉霄太霄也汉郊祀志鄠县有仙人玉女祠鲁灵光殿赋神仙岳岳于栋间玉女闌 而下视卫宏汉旧仪中黄门持五夜五夜者甲夜乙夜丙夜丁夜戊夜杜甫诗天寒翠袖薄洛神赋飘飘兮若流风之迴雪谢庄月赋去烛房即月殿金鱼鱼钥也梁简文帝诗夕门掩鱼钥芝田録门钥必以鱼取其不瞑目守夜之义子夜注见上卷乐府有白团扇歌荆楚歳时记正月七日剪綵为人或镂金箔为人帖屏风上亦戴之头鬟像人入新年形容改新○新正未破言未入正月也用字本沉佺期诗别离频破月又杜诗二月已破一月来英华作望英华作炉香道源注言终歳相思不如一夕佳会

题二首后重有戏赠任秀才

一丈红蔷拥翠筠。罗窗不识绕街尘。峡中寻觅长逢雨。月里依稀更有人。

虚为错刀留远客。枉缘书札损文鳞。遥知小阁还斜照。羞杀乌龙卧锦茵。

△汉书王莽更造错刀以黄金错其文曰一刀直五千四愁诗美人赠我金错刀搜神后记会稽句章民张然滞役在都养一狗甚快名曰乌龙后其妇与奴私通遂谋杀然然拍膝大呼曰乌龙与手狗应声伤奴奴失刀杖然因杀奴以妇付县杀之白居易诗乌龙卧不惊青鸟飞相逐

有感二首

九服归元化。三灵叶睿图。如何本初輩。自取屈〈上。左牙右文。中厂。下毛〉诛。

有甚当车泣。因劳下殿趋。何成奏云物。直是灭萑苻。

证逮符书密。辞连性命俱。竟縁尊汉相。不早辨胡雏。

鬼籙分朝部。军烽照上都。敢云堪恸哭。未免怨洪炉。

丹陛犹敷奏。彤庭歟战争。临危对卢植。始悔用龐萌。

御仗收前殿。兵徒剧背城。苍黄五色棒。掩遏一阳生。

古有清君侧。今非乏老成。素心虽未易。此举太无名。

谁瞑衔冤目。宁吞欲絶声。近闻开壽讌。不废用咸英。

△原注乙卯年有感丙辰年诗成○唐书文宗以宦者权宠太盛继为祸胎元和末弑逆之徒尚在左右思欲芟除本根以雪讐耻李训既因郑注得幸上密以诚告之擢为礼部侍郎同平章事训既秉权衡即谋诛内竖以注为凤翔节度使先之镇又以郭行馀镇邠寧王璠镇太原未赴镇间广令召募豪杰太和九年乙卯十一月二十一日上御紫宸班定金吾街使韩约不报平安奏曰金吾左仗院石榴开夜来有甘露臣已进状讫乃舞蹈再拜宰相百官称贺李训请上亲幸左仗观之班退上乘软輿出紫宸门升含元殿令宰相两省官先往视既还曰臣等恐非真甘露不敢轻言上曰韩约妄耶命左右中尉仇士良鱼志弘帅诸内臣往视既去训召王璠郭行馀曰来受勅旨璠恐悚不能前行馀独拜殿下时两镇官健皆执兵在丹凤门外训已令召之惟璠从兵入邠寧兵竟不至士良等至左仗闻幕下有兵声惊恐走出阊者欲扃锁之为士良所叱闕不得上士良等回奏曰事急矣请陛下入内即举软輿迎帝训呼金吾卫士曰来上殿护乘輿者人赏百千内官决殿后罽毼举輿疾趋训攀呼曰陛下不得入内金吾兵已登殿京兆尹罗立言中丞李孝本率台府从人四百余人上殿纵击内官死伤者数十人乘輿入宣政门训攀呼益急宦者郗志荣奋拳击其胸训仆地乘輿既入门即阖须臾内官率禁兵五百人露刃出东阁门遇人即杀训璠行馀约立言孝本及宰相王涯贾餗舒元舆等皆族诛注为凤翔监军所杀传首京师周礼有九服侯甸男采卫蛮夷镇藩也典引荅三灵之繁祉

注天地人也后汉袁绍传中常侍段珪等杀何进劫帝及陈留王走小平津绍勒兵捕诸阉人无少长皆杀之死者二千余人急追珪等珪等悉赴水死汉书刘屈〈上。左牙右文。中厂。下毛〉中山靖王子也征和二年为左丞相郭穰告与贰师共祷祠欲令昌邑王为帝有诏载屈〈上。左牙右文。中厂。下毛〉厨车以狗腰斩东市魏志嘉平六年景王废帝遣使者授齐王印绶当出就西宫帝受命遂载王车与太后别垂涕始从太后殿南出羣臣送者数千人司马孚悲不自胜馀多流涕梁武本纪大通中谚曰荧惑入南斗天子下殿走左传分至啓闭必书云物此谓金吾街使奏石榴甘露左传郑国多盗聚人于萑苻之泽子太叔兴兵攻之旧唐书李训事败王涯等苍皇步出为禁兵所擒并其家属奴婢皆繫狱仇士良鞫涯反状涯实不知其故械縛既急榜笞极酷乃令手书反状自诬与训同谋狱具腰斩汉书王商容貌过人单于大畏之天子曰此真汉相矣晋书石勒年十四倚啸上东门王衍顾谓左右曰向者胡雏吾观其声视有异志恐将为天下患遣使收之会勒已去魏文帝与吴质书亲故姓名多为鬼籙唐书至德元载号西京曰上都洪炉注见上卷原注是晚独召故相彭阳公○后汉书大将军何进谋诛宦官乃召董卓以惧太后植知卓凶悍难制必生后患固止之进不从及卓至果陵虐朝廷议欲废立羣臣无敢言植独抗议不同卓怒罢会旧唐书训乱之夜文宗召右僕射郑覃与令狐楚宿禁中商量制勅后汉书平敌将军龐萌为人逊顺帝信爱之使与蓋延共击董宪诏书独下延而不及萌萌疑遂反帝大怒自将讨之与诸将书曰吾尝以萌为社稷臣将军得无笑其言乎一作队魏志太祖除洛阳尉造五色棒各十馀枚悬左右犯禁者不避豪强棒杀之京师斂迹甘露事在十一月正冬至时乐纬黄帝乐曰咸池帝嘗乐曰六英道源曰旧书开成元年上元赐百寮曲江亭宴令狐楚以新诛大臣不宜赏宴独称疾不赴时论美之此诗结句蓋有讥也○钱龙惕笺甘露之变从古所未有也阉竖横行南司涂炭当时士大夫深疾训注之奸邪反若假手宦寺殲除大慙者一时如郑覃李石以不忤中人而命相矣李德裕李宗闵以训注所逐而量移矣令狐楚号为仇士良所不悦而上问王涯手书反状则应曰然矣节度使兵仗参辞则乞停罢矣汲汲然惟恐得罪宦官以取祸后世不咎文宗之不密失臣则恨训注之狂躁误国而当日情势未有冤论之者可异也自古以来宦官盗窃国柄莫横于汉之十常侍故何进等谋诛之不胜反为所杀然进之谋进始之非命于灵帝也训内与文宗谋而外连藩镇以诛宦奴谓之奉天讨可也诡言甘露衷甲帷幄谓之谋勇可也事已败裂犹攀呼乘輿投身虎口谓之死事可也迨奄人得志身分族灭此时文宗稍欲救之则有阎乐望夷之祸天道至此不可问矣何独区区罪训也使非平日倾险君子犹将与之不成之责何乃甚乎其时设国有重臣不畏强御倡言训等之无辜士良诸凶犹未必刃加其颈也乃箝口不言而请王涯三相罪名仅仅出于刘从諫亦可耻矣义山诗云古有清君侧今非乏老成素心虽未易此举太无名谁瞑衔冤目寧吞欲絶声其感愤激烈有不同于衆论者予故表而出之

重有感

玉帐牙旗得上游。安危须共主君忧。窦融表已来關右。陶侃军宜次石头。

岂有蛟龙愁失水。更无鹰隼与高秋。昼号夜哭兼幽显。早晚星闕雪涕收。

△抱朴子外篇兵在太乙玉帐之中不可攻也唐菽文志兵家有玉帐经一卷张湜云谷杂记按袁卓遁甲专征赋或倚直使之游宫或居贵神之玉帐盖玉帐乃兵家厌胜之方位主将于其方置军帐则坚不可犯犹玉帐然其法出于黄帝遁甲以月建前三位取之东京赋牙旗缤纷薛综曰牙旗者将军之旌古者天子出建大牙旗竿上以象牙饰之南部新书诗祁父予王之爪牙祈父司马象兽以爪牙为卫故军前大旗谓之牙旗出师则有建牙褫牙军中听号令必立牙旗之下与府朝无异近俗尚武通呼公府门为牙门字讹转为衙后汉书窦融为众所推行河西大将军遥闻光武即位心欲东向遣长史刘钧奉书献马帝授融为凉州牧晋书苏峻作逆温峤要陶侃同赴朝廷因推为盟主侃戎服登舟直指石头一作曾一作长道源注天官书两河天阙间为闕梁索隐曰宋均云两河六星知逆邪言闕梁之限知邪伪也正义曰阙丘二星在河南金火守之主兵战阙下○钱龙惕笺太和九年十月以前广州节度使王茂元为泾原节度使逾月李训事作茂元在泾原故曰得上游也昭义节度使刘从谏三上疏问王涯等罪名仇士良闻之惕惧故曰窦融表已来闕右也初获郑注京师戒严泾原鄜坊节度使王茂元萧?皆勒兵备非常故曰陶侃军宜次石头也士良辈知事连天子相与怨愤帝惧伪不语宦人得肆志杀戮则蛟龙而失水矣曰岂有者讳之也涯等既死举朝胁息诸藩镇亦皆观望不前谁为高秋之鹰隼快意于一击乎曰更无者伤之亦望之也至于昼号夜哭雪涕星闕而感之者益深悲夫

壽安公主出降

汾水闻贞媛。常山索锐师。昔忧迷帝力。今分送王姬。

事等和强虏。恩殊睦本枝。四郊多垒在。此礼恐无时。

△旧唐书开成二年六月丁酉以成德军节度使王元逵为驸马都尉尚壽安公主新书镇冀自李惟岳以来拒天子命至王庭湊恣凶悖不臣不仁虽夷狄不若也庭湊死其次子元逵袭节度识礼法岁时贡献如职帝悦之诏尚絳王悟女壽安公主元逵遣人纳聘阙下进千盘食良马主粧泽衾具奴婢议者嘉其恭一作真书釐降二女于汾汭唐书镇州常山郡属河北道本恒州恒山郡成德节度使治恒州

夕阳楼

花明柳暗绕天愁。上尽重城更上楼。欲问孤鸿向何处。不知身世自悠悠。

△原注在荥阳今遂宁箫侍郎牧荥阳日作○按箫侍郎萧瀚也旧唐书太和七年三月以给事中萧瀚为郑州刺史

春雨

帐卧新春白袷衣。白门寥落意多违。红楼隔雨相望冷。珠箔飘灯独自归。

遠路应悲春晚晚。残宵犹得梦依稀。玉璫缄札何由达。万里云罗一雁飞。

△风俗通耳珠曰璫张正见诗谁论白玉璫玉璫缄札犹今所云侑璫

中元作

绛节飘飏宫国来。中元朝拜上清廻。羊权须得金条脱。温峤终虚玉镜台。

曾省惊眠闻雨过。不知迷路为花开。有娥未抵瀛洲遠。青雀如何鹄鸟媒。

△梁邵陵王祀鲁山神文绛节陈竿满堂繁会杜甫诗上帝高居绛节朝道经七月十五中元之日地官按勾搜选人间分别善恶诸天圣衆普詣宫中一作虽真诰募緑华以晋升平二年十一月十日夜降羊权家权字道学简文帝黄门郎羊欣祖也緑华赠以诗一篇并致火浣布手巾一条金玉跳脱各一枚世説温峤从姑刘氏女美托峤觅壻峤密有自婚意答曰佳壻难得但得如峤比何如姑曰何敢希汝比也后少日峤报云已觅得壻处因下玉镜台一枚姑大喜既婚交礼女大笑曰我固疑是老奴玉镜台峤为刘越石长史北征刘聪所得离骚望瑶台之偃蹇兮见有娥之佚女吕氏春秋有娥氏有二佚女为九层台饮食必以鼓青雀注见上卷离骚吾令鹄为媒兮鹄告予以不好注鹄恶鸟也有毒杀人以喻谗贼

鸳鸯

雌去雄飞万里天。云罗满眼泪潸然。不须长结风波愿。锁向金笼始两全。

楚宫

湘波如泪色漻漻。楚厉迷魂逐恨遥。枫树夜猿愁自断。女萝山鬼语相邀。

空归腐败犹难复。更困腥臊岂易招。但使故乡三户在。綵丝谁惜惧长蛟。

△水经湘水出零陵始安县阳朔山东北过酃县西又北至巴江山入于江説文漻清深也庄子漻乎其清一作瀾古通礼祭统七祀曰泰厉疏泰厉古帝王无后者此鬼无所依好为民作祸故祀之招魂湛湛江水兮上有枫目极千里兮伤春心楚词山鬼若有人兮山之阿被薜荔兮带女萝屈原自况于鱼腹故曰困腥臊项羽传楚虽三户亡秦必楚续齐谐记屈原五月五日投汨罗死楚人每至此日竹筒贮米投水祭之汉建武中长沙欧回白日忽见一人自云三闾大夫谓回曰闻君当见祭甚善但常年所遗并为蛟龙所窃今若有惠可以楝树叶塞其上以五色丝缚之此二物蛟龙所惮回依其言世人作粽并带五色丝及楝叶皆汨罗遗风也

妓席暗记送同年独孤云之武昌

叠嶂千重叫恨猿。长江万里洗离魂。武昌若有山头石。为拂苍苔检泪痕。

宿晋昌亭闻惊禽

羁绪繇繇夜景清。高窗不掩见惊禽。飞来曲渚烟方合。过尽南塘树更深。

胡马嘶和榆塞笛。楚猿吟杂橘村砧。失羣挂木知何限。远隔天涯共此心。

△长安图自京城啓夏门北入东街第二坊曰进昌坊进亦作晋朱泚传姚令言迎泚于晋昌里第释名愁悵不能寐日常繇繇然华行汉书卫青西定河南地按榆溪旧塞注长榆塞名或谓之榆中水经注湘水又北迳南津城西对橘洲又龙阳有泛洲李衡植橘处

深宫

金殿销香闭绮栊。玉壶传点咽铜龙。狂飈不惜萝陰薄。清露偏知桂叶浓。

斑竹岭边无限泪。景阳宫里及时钟。岂知为雨为云处。只有高唐十二峰。

△鼓吹作香销一作笼一作响殷夔漏刻法为器三重圆皆径尺于器下为金龙口吐漏水转注南史齐武帝以内深隱不闻端门鼓漏置钟景阳楼上应五鼓及三鼓宫人闻声早起粧饰李贺诗今朝画眉早不待景阳钟鼓吹作意

明禅师院酬从兄见寄

贞吝嫌兹世。会心驰本原。人非四禅縛。地絕一尘喧。

霜露歇高木。星河压故园。斯游傥为胜。九折幸廻轩。

△贞吝见易大宝积经菩萨至于空处修习四禅阿毘昙经自初禅至四禅立为四地沉约诗四禅隐岳曲维摩经贪著禅味是菩萨縛一作堕汉书王阳为益州刺史行部至邛崃九折坂叹曰奈何以先人遗体乘此险乎遂以病归

寄裴衡

别地萧条极。如何更独来。秋应为黄叶。雨不厌青苔。

沉约只能瘦。潘仁岂是才。离情堪底寄。惟有冷于灰。

△沉约与徐勉书百日数旬革带常应移孔以手握臂卒计月小半分晋书潘岳少以才顯见

称

即日

小苑试春衣。高楼倚暮晖。夭桃惟是笑。舞蝶不空飞。

赤岭久无耗。鸿门犹合围。几家縁锦字。含泪坐鸳机。

△唐书鄯州鄯城县有天威军故石堡城天宝八载更名又西二十里至赤岭其西吐蕃有开元中分界碑汉书志鸿门在新丰东十七里旧大道北下坂口名项羽屯兵处

淮阳路

荒村倚废营。投宿旅魂惊。断雁高仍急。寒溪晓更清。

昔年尝聚盗。此日颇分兵。猜贰谁先致。三朝事始平。

△汉书淮阳国高帝十一年置明帝改为陈国唐书陈州淮阳郡属河南道按地志陈州与蔡州接壤呉少诚据蔡传至元济厯德顺宪三朝始讨平之

崇让宅东亭醉后沔然有作

曲岸风雷罢。东亭霁日凉。新秋仍酒困。幽兴暂江乡。

摇落真何遽。交亲或未忘。一帆彭蠡月。数雁塞门霜。

俗态虽多累。仙标发近狂。声名佳句在。身世玉琴张。

万古山空碧。无人鬓免黄。骅骝忧老大。鸚鵡妬芬芳。

密竹沉虚籁。孤莲泊晚香。如何此幽胜。淹卧剧清漳。

△説文鸚鵡春分鸣则衆芳生秋分鸣则衆芳歇楚词怨鸚鵡之先鸣兮使衆草为之不芳按韦氏述征记崇让坊出大竹及桃故此有密竹之句又七月二十九日崇让宅宴诗风过寒塘万竹悲注见上卷

晚晴

深居俯夹城。春去夏犹清。天意怜幽草。人间重晚晴。

併添高阁迴。微注小窗明。越鸟巢乾后。归飞体更轻。

迎寄韩鲁州同年

积雨晚骚骚。相思正鬱陶。不知人万里。时有燕双高。

寇盗纏三辅。莓苔滑百牢。圣朝推卫霍。归日动仙曹。

△韩瞻原注时兴元贼起三川兵出○按兴元为山南西道治所通鑑大中五年十月蓬果羣盗依阻鸡山寇掠三川果州刺史王贇弘讨平之胡三省注东西川及山南西道谓之三川图经百牢關故基在今兴元西县两壁山相对六十里不断汉江水流其间乃入金牛益昌路也寰宇记在汉中郡西县西南隋开皇中置以入蜀路险号曰百牢關一云置在百牢谷一作索○晋书尚书令卫瓘与尚书郎索靖俱善草书时人号为一台二妙白帖诸曹郎称为仙郎故曰仙曹

武夷山

只得流霞酒一杯。空中箫鼓几时迴。武夷洞里生毛竹。老尽曾孙更不来。

△方輿胜览武夷山道书谓第十六洞天旧有神降此自称武夷君又列仙传云錢鏐鍊丹之所也鏐二子长曰武次曰夷因以名山朱文公序曰武夷之名著于汉世祀以乾鱼不知果何神也一统志山在建寧府崇安县南三十里抱朴子项曼卿修道山中自言至天上游紫府遇仙人于流霞一盃饮之辄不饥渴一作当方輿胜览毛竹洞在西溪上流去武夷山百餘里徧生毛竹每节出一干其巨细与根等陆羽武夷山记武夷君于八月十五日山上置幔亭化虹桥通上下大?乡人宴饮曰汝等皆吾之曾孙也

一片

一片琼英价动天。连城十二昔虚传。良工巧费真为累。楮叶成来不直钱。

△诗尚之以琼英乎而說文琼赤玉礼记玉气若白虹天也当作五史记赵得楚和氏璧秦王请以十五城易之韩非子宋人刻玉为楮叶三年而成杂之楮叶不辨列子曰使天地三年而成一叶物之有叶者鲜矣

寄成都高苗二从事

红莲幕下紫梨新。命断湘南病渴人。今日问君能寄否。二江风水接天津。

△原注时二公从事商隐座主所南史王俭用庾杲之为卫将军萧勔与俭书曰庾景行泛綠

水依芙蓉何其丽也时人以俭府为莲花池蜀都赋紫梨津润杨慎曰紫梨选注不言其状按蜀有梨树花以秋日其花红色唐李遵有进紫梨表可証义山时在桂管水经注成都县有二江双流郡下故扬子云蜀都赋两江珥其前也华阳国志李冰为蜀守壅江作栅穿郫江捡江别支流双过郡下以行舟船溉田万顷寰宇记今谓外江内江尔雅注箕斗之间天汉之津梁

郑州献从叔舍人褰

蓬岛烟霞阆苑钟。三官笺奏附金龙。茅君奕世仙曹贵。许掾全家道气浓。

绦简尚参黄纸案。丹炉犹用紫泥封。不知他日华阳洞。许上经楼第几重。

△会昌中讨刘稹褰为郑州刺史本集有为舍人绦郡公上李相公诸啓可証真诰有上圣之德命终受三官书为地下主者一千年乃转三官之五帝又曰二天官立一官六天凡立为三官三官如今刑名之职主诸考谪常以真仙司命兼总御之注消魔经云岱宗又有左火官右水官及女官亦名三官并主考罚又曰受用金龙玉鱼此不可阙道源注东斋记道家有金龙玉简学士院撰文具一歲中斋醮投于名山洞府金龙以铜製玉简以阶石製之茅濛茅盈茅固茅衷事见前道源注神仙传许翺字道翔小名玉斧郡举上计掾主簿父穆长史为上清佐卿掾居方隅山洞石坛上焚香礼拜因而不起明旦视之如生真诰曰从张镇南受衣解法又许逊许迈事见前道源注绦简即赤章也凡仙经朱书亦曰绦简沉约与陶弘景书方当名书绦简身游?阙冯鑑续事始贞观十年诏用黄麻纸写诏勅文高宗上元二年勅曰制勅施行既为永式比用白纸各有虫蠹自今尚书颁下诸州县并用黄麻纸真诰紫微夫人诗庆云纏丹炉王绩游北山赋拭丹炉而调石髓紫泥注见上卷○唐制舍人掌丝纶故用黄纸紫泥事注见上卷道源注神仙感遇传陶贞白就兴世馆孙先生咨禀经法行道要拜表解职入茅山登岳告静自称华阳隐居书疏亦以此代名然勅命饬赉常为烦剧乃造三层楼栖止身居其上弟子居中接賓于其下令一小竖传授而已

西南行却寄相送者

百里陰云覆雪泥。行人只在雪云西。明朝惊破还乡梦。定是陈仓碧野鷄。

四皓庙

羽翼殊勲弃若遗。皇天有运我无时。庙前便接山门路。不长青松长紫芝。

△道源注庙在商县商雒山羽翼语见汉书

题白石莲花寄楚公

白石莲花谁所共。六时长捧佛前灯。空庭苔藓饶霜露。时梦西山老病僧。

大海龙宫无限地。诸天雁塔几多层。漫夸鶩子真罗汉。不会牛车是上乘。

△道源注续高僧传楚南闽人也俗姓张氏投开元寺昙藹师落髮后谒黄檗山禅师问答虽多机宜顿了武宗废教深窜山谷大中间裴公休出抚宛陵请黄檗出山南随侍焉昭宗闻其道化赐鹿皮衣五事卒年七十著般若经品颂偈一卷破邪论一卷行于世道源注凿白石为莲花台捧灯佛前法华经文殊师利坐千叶莲花从大海娑竭罗龙宫自然涌出住虚空中诣灵鷲山道源注佛书有三界诸天自欲界以上皆曰诸天西域记昔有比丘见羣雁飞翔思曰若得此雁可充饮食忽有一雁投下自殒佛谓比丘曰此雁王也不可食之乃瘞而立塢道源注法华经舍利弗此云鶩子连母为名以其取涅槃一日之价故不知有上乘亦非真阿罗汉佛为授记乃知真是佛子得佛法分法华经长者以牛车羊车鹿车立门外引诸子出离火宅释迦成道记注羊车喻声闻乘鹿车喻縁觉乘牛车喻菩萨乘俱以运载为义前二乘方便施設惟大白牛车是实引重致远不遗一物传灯録若顿悟自心即佛依此而修者是上乘禅

安定城楼

迢递高城百尺楼。緑杨枝外尽汀洲。贾生年少虚垂泪。王粲春来更遠游。

永忆江湖归白髮。欲迴天地入扁舟。不知腐鼠成滋味。猜意鴛鴦竟未休。

△唐书泾州保定郡属關内道本安定郡至德元载更名○按史太和九年十月王茂元为泾原节度使义山时往来其幕故有是诗一作上一作涕魏志王粲字仲宣山阳高平人献帝西迁徙居长安后之荆州依刘表庄子鷖得腐鼠鷖过之仰而视之曰吓

隋宫守歲

消息东郊木帝迴。宫中行乐有新梅。沉香甲煎为庭燎。玉液琼苏作壽杯。

遥望露盘疑是月。遠闻鼙鼓欲惊雷。昭阳第一倾城客。不踏金莲不肯来。

△月令立春之日亲率公卿诸侯大夫以迎春于东郊又曰孟春之月其帝太皞注太皞以木德王去声法苑珠林广志甲香出南方范晔和香方曰甲煎煎香是也纪闻贞观初天下义安时属除夜太宗延萧后同观灯问曰隋主如何后曰隋主每除夜殿前诸院设火山数十尽沉香木根每一山焚沉香数车火光暗则以甲煎沃之燄起数丈香闻数里一夜之间用沉香二百餘乘甲煎过二百石山海经崑崙山丹水出焉其中多白玉是有玉膏黄帝是食是飧汉武内传上药有风实云子玉液金浆陶潜诗白玉炼素液南岳夫人传设琼酥緑酒金觴四奏李斯书树灵鼙之鼓注以鼙皮为鼓也

利州江潭作

神劍飞来不易销。碧潭珍重驻兰桡。自携明月移灯疾。欲就行云散锦遥。

河伯轩窗通贝阙。水宫帷箔卷冰绡。此时燕脯无人寄。雨满空城蕙叶雕。

△原注感孕金轮所○唐书利州义成郡属山南西道按武后自册为金轮皇帝父士彘为利州都督生后袁天纲见之大惊曰当为天下主也见谭賓錄道源注用延平劍化龙事楚词紫贝阙兮珠宫用蛟人织绡事梁四公记杰公使罗子春赉烧燕五百枚入洞穴至龙宫以献龙女龙女食之大嘉子春乘龙载珠还国道源注南部新书龙嗜烧燕肉食燕肉人不可渡海

即目

地寬人已迴。人更迴于楼。细意经春物。伤醒属暮愁。

望賒殊易断。恨久欲难收。大執真无利。多情岂自由。

空园兼树废。败港拥花流。书去青枫驿。鸿归杜若洲。

单栖应分定。辞疾索谁忧。更替林鴝恨。惊频去不休。

△方輿胜览青枫浦在潭州浏阳县杜甫有青枫驿诗楚词採芳洲兮杜若

相思

相思树上合欢枝。紫凤青鸾共羽仪。肠断秦台吹管客。日西春尽到来迟。

△搜神记宋康王舍人韩凭娶妻何氏美王夺之凭怨自杀何氏乃陰腐其衣从王登台遂投台左右揽其衣不得而死遗书于带曰愿得与凭合 王弗聽使里人埋之冢相望也宿昔之间有梓生于二冢旬日盈抱屈体相就根交于下枝错于上又有鸳鸯雌雄各一恒栖树上交颈悲鸣宋人哀之号其木曰相思树列仙传萧史者秦穆公时人善吹箫能致孔雀白鹤穆公女弄玉好之公妻焉凤止其屋为作凤台博雅箫大者二十四管无底小者十六管有底

茂陵

汉家天马出蒲梢。苜蓿榴花遍近郊。内苑只知含凤觜。属车无复插鸡翘。

玉桃偷得怜方朔。金屋修成贮阿娇。谁料苏卿老归国。茂陵松柏雨萧萧。

△汉书武帝葬茂陵注在长安西北八十里史记武帝伐大宛得千里马名曰蒲梢作天马之歌汉书大宛马嗜苜蓿上遣使者持千金请宛马采苜蓿归种之离宫尔雅翼苜蓿似灰藿秋

后结实黑房纍纍如糲米可为饭亦可酿酒陆机与弟书张蹇为汉使西域十八年得涂林安石榴一作衔十洲记仙家煮凤喙麟角作胶名为续弦胶能连属弓弩断弦仙传拾遗武帝幸华林苑射虎兕弩弦断以灵胶续之武士数人对引不脱后汉舆服志大驾属车八十一乘法驾属车三十六乘蔡邕独断鸾旗编羽毛列繫幢旁民或谓之鸡翘西王母传王母七夕降武帝宫中命侍女取桃玉盘盛七枚四以与帝三自食之汉武故事东郡献短人曰巨灵指东方朔谓上曰王母种桃三千年一著子此儿不良三过偷之矣杨慎曰本是瑶池宴罢留王母俗作玉桃偷得怜方朔直似小儿语耳愚按汉武内传王母降承华之宫严车欲去帝叩头殷勤乃留若瑶池西宴自是穆王事如何可合徧检宋本俱无之不可以语出用修而不覈其实一作粧汉武故事帝为胶东王时长公主问曰儿欲得妇否曰欲得指女阿娇好否笑曰若得阿娇当以金屋贮之汉书苏武字子卿武帝天汉元年使匈奴至昭帝始元六年还始以强壮出及还鬓髮尽白帝以武为典属国按史武宗好游猎及武戏亲受道士赵归真法籙又深宠王才人欲立为后此诗全是託讽

镜槛

镜槛芙蓉入。香台翡翠过。拨弦惊火凤。交扇拂天鷲。

隐忍阳城笑。喧传郢市歌。仙眉琼作叶。佛髻钿为螺。

五里无因雾。三秋只见河。月中供药剩。海上得绡多。

玉集胡沙割。犀留圣水磨。斜门穿戏蝶。小阁锁飞蛾。

骑檐侵藕卷。车帷约幃鉞。传书两行雁。取酒一封駝。

桥迴凉风压。沟横夕照和。待乌燕太子。驻马魏东阿。

想像铺芳褥。依稀解醉罗。散时帘隔露。卧后幕生波。

梯稳从攀桂。弓调任射莎。岂能抛断梦。听鼓事朝珂。

△镜槛水槛也水光如镜故曰镜槛或曰北齐后主于宫中起镜殿宝殿又高宗时武后作镜殿四壁皆安镜为白画秘戏之须镜槛当是镜殿中栏槛耳拾遗记石虎春杂宝异香为屑使数百人于楼上吹散之名曰芳尘台春秋元命苞火离为凤唐会要贞观中有裴神符者妙解琵琶作胜蛮奴火凤倾盃乐三曲声度清美太宗深爱之道源注通志汉阳府産天鷲以天鷲羽为扇也注见上卷郢歌注别见楞严经世尊从肉髻中涌出百宝光法苑珠林如来申髮以尺量长一丈三尺五寸放已右旋还成蠡文蠡即螺王勃释迦像碑髻衔龙髮顶秀螺紋仙传拾遗张楷好道术居华山谷中能为五里雾学其术者填门如市故曰雾市天河也用姮娥窃药奔月事见上卷乐府白兔长跪虾蟇丸奉上陛下一玉杵北梦琐言唐朱建章为幽州司马

往渤海遇水仙遗以蛟绡轴之如箬夏天展之一室凜然尔雅翼蛟今之沙鱼大而长喙如锯者名胡沙小而鼉者名白沙说文蛟鱼皮可饰刀孔丛子秦王得西戎利刀割玉如割木抱朴子通天犀能杀毒水经注圣水出上谷郡西南圣水谷旧唐书宝历二年亳州言出圣水饮之者愈疾昌艳切将先切韵会说文檐衣蔽前又檐楡谓帷檐以蔽前后一曰禅襦郭璞云今之蔽膝也鞵马鞍具通作棧晋张方传乱军入宫割流苏武帐以为马棧吾禾切○道源注苍颉篇帛张车上曰轆龙龕手镜鉋去角也刊方为圆也汉书大月氏国出一封橐駝注脊上有一封高也如封土然今俗呼为鞞一作斜注见上卷洛神赋税驾乎蘅皋秣驷乎芝田西阳杂俎月中有桂高五百丈道源注北史后周豆卢宁悬莎草去百步射之

送郑大台文南覲

黎辟滩声五月寒。南风无处附平安。君怀一匹胡威绢。争拭酬恩泪得乾。

△旧唐书郑畋字台文年十八登进士第以书判授渭南尉直史馆未行父亚出为桂管都防御经略使畋随侍左右按北梦琐言载畋生于桂州小字桂儿时监军西门思恭诏徵赴阙亚餞于北郊以畋托之考旧史及义山此诗乃知其谬当作壁宋之问下桂江县黎壁诗吼沫跳急浪合流环峻滩道源注夷白堂便览南雄府保昌县有九滩黎壁乃其二晋阳秋胡威少有志尚厉操清白父质为荆州威自京都省之告归质赐绢一匹威跪曰大人清高不审于何得此绢质曰是我俸禄之余故以为汝粮耳

风

迴拂来鸿急。斜催别燕高。已寒休惨淡。更遼尚呼号。

楚色分鹵塞。夷音接下牢。归舟天外有。一为戒波涛。

△沉约咏风送归鸿于碣石庾肩吾风诗湘川燕起馀荆州记郡西沂江六十里南岸有山名荆门北岸有山名虎牙二山楚西塞元和郡国志下牢镇在夷陵县西二十八里隋于此置峡州贞观九年移于步闾垒其旧城因置镇

洞庭鱼

洞庭鱼可拾。不假更垂罾。闇若雨前蚁。多于秋后蝇。

岂思鳞作簟。仍计腹为灯。浩荡天池路。翱翔欲化鹏。

△杜阳杂编咸通末上迎佛骨入内道場设龙鳞之席史记始皇冢中以人鱼膏为灯见庄子

天涯

春日在天涯。天涯日又斜。莺啼如有泪。为溼最高花。

喜舍弟羲叟及第上礼部魏公

国以斯文重。公仍内署来。风标森太华。星象逼中台。

朝满迁鶯侣。门多吐凤才。宁同鲁司寇。惟铸一颜回。

△本集樊南甲集序仲弟圣僕羲叟特善古文学会昌中进士为第一旧唐书大中元年二月礼部侍郎魏扶奏臣所放进士三十三人其封彦卿等三人以父兄见居重位不令中选诏翰林学士韦琮重考覆唐诗纪事大中初扶知礼闈入贡院题诗云梧桐叶落满庭阴销闭朱门试院深曾是当年辛苦地不将今日负前心榜出无名子削为五言诗以讥之李羲叟义山弟也是歲登第义山因上魏公诗云云一作相山海经太华之山削成而四方高五千仞汉书上台司命为太尉中台司中为司徒下台司禄为司空刘賓客嘉话錄今谓登第为迁鶯蓋本毛诗伐木丁丁鸟鸣嚶嚶出自幽谷迁于乔木然并无鶯字顷试早鶯求友及鶯出谷诗别无证据岂非误欤愚按唐人阳枨诗轩树已迁鶯苏味道诗迁鶯远听闻后来遂承袭用之西京杂记扬雄著太玄经梦吐白凤皇集于玄上顷而灭纪事作只扬子或曰人可铸欤曰孔子铸颜回矣

哀箏

延颈全同鹤。柔肠素怯猿。湘波无限泪。蜀魄有馀冤。

轻幰长无道。哀箏不出门。何由问香炷。翠幕自黄昏。

△格物论猿性急而肠狭哀鸣则肠俱断而死籍田赋微风生于轻幰兮

自南山北归经分水岭

水急愁无地。山深故有云。那通极目望。又作断肠分。

郑驿来虽及。燕台哭不闻。犹馀遗意在。许刻镇南勲。

△南山终南山也水经注汉中记曰嶓冢以东水皆东流嶓冢以西水皆西流故俗以嶓冢为分水岭通志分水岭在汉中府略阳县东南八十里岭下水分东西流一作声误汉书郑当时尝置驿马长安诸郊请谢賓客夜以继日寰宇记燕昭王金台在易州易县东南三十里又有西金台俗呼此为东金台又有小金台在县东南十五里即郭隗台也哭不闻言死者不闻其哭晋书杜预为镇南将军都督荊州诸军事预平吳后刻二碑纪绩一立万山之上一沉万山下潭中曰焉知此后不为陵谷乎按史开成初令狐楚为山南节度使卒于镇山南治汉中题

云北归分水岭而诗有燕台哭不闻之句知必为令狐楚作也义山尝为楚撰志文故末曰许刻镇南勲史云楚没前一日自草遗表召从事李商隐助成之可证彭阳没时义山正在其幕也

旧顿

东人望幸久咨嗟。四海于今是一家。犹锁平时旧行殿。尽无宫户有宫鸦。

△增韵顿宿食处也天子行幸住宿处亦曰顿唐书禄山反帝西出令御史大夫魏方进为置顿

代董秀才却扇

莫将画扇出帷来。遮掩春山滞上才。若道团圆似明月。此中须放桂花开。

△通鑑中宗戏窦从一以老乳母王氏嫁之令从一诵却扇诗数首注唐人成昏之夕有催粧诗却扇诗何游看新妇诗如何花烛夜轻扇掩红粧注见上卷

有感

非關宋玉有微辞。却是襄王梦觉迟。一自高唐赋成后。楚天云雨尽堪疑。

△宋玉好色赋登徒子短宋玉曰玉为人体貌閒丽口多微辞

骊山有感

骊岫飞泉泛暖香。九龙呵护玉莲房。平明每幸长生殿。不从金輿惟壽王。

△寰宇记骊山在昭应县东南二里即蓝田山也温汤在山下唐实录玄宗生日源乾曜张說上表曰陛下二气含神九龙浴圣按骊山温汤东有龙湫杜甫诗初闻龙用壮劈石摧林丘中夜窟宅改移因风雨秋是也津阳门诗注骊山华清宫内除供奉两汤外更有汤十六所长汤每赐诸嫔御其修广与诸汤不侔甃以文瑶密石中央有玉莲花捧汤泉喷以成池又缝缀锦绣为鳧雁寘于水中上时汎鋹镂小舟以嬉游焉明皇杂录上于华清宫新广一汤制度弘丽安禄山以白玉石为鱼龙鳧雁仍为石梁及石莲花以献雕镌巧妙殆非人工上大悦命陈于汤中仍以石梁横亘汤上而莲花纔出水际汤上而莲花纔出水际长安志天宝六载改温泉为华清宫殿曰九龙以待上浴曰飞霜以奉御寝曰长生以备斋祀其他楼观殿阁不可胜纪长恨歌七月七日长生殿夜半无人私语时恨赋丧金輿及玉乘唐书壽王瑁母武惠妃频字不育及瑁生寧王请养邸中名为己子故封比诸王最厚又曰惠妃薨后宫无当意者或言壽王妃杨氏之美上见而悦之乃令妃自以己意乞为女官号太真更为壽王娶郎将韦昭训女

潜纳太真于宫中不暮歲宠遇如惠妃○末语与薛王沉醉壽王醒同意

别智玄法师

云鬓无端怨别离。十年移易住山期。东西南北皆垂泪。却是杨朱真本师。

△道源注智玄当作知玄佛祖通纪太和元年诏沙门知玄入殿问道赐号悟达国师玄五歲能吟诗出家为沙弥十四讲经李商隐赠以诗云十四沙弥解讲经似师年纪止携餅沙弥說法沙门听不在年高在性灵佛祖通载文宗癸丑十月帝召法师知玄与道士于麟德殿论道稽古略匡宗大德讳知玄姓陈氏咸通四年制署号悟达国师总教门事帝幸安国寺赐师沉香宝座僖宗中和二年幸蜀召师赴行在后辞还九龙山师三学洞贯名蓋一时世称陈菩萨

赠孙绮新及第

长乐遥听上苑钟。綵衣称庆桂香浓。陆机始拟夸文赋。不觉云间有士龙。

△汉书高祖五年后九月徙诸侯于關中治长乐宫汉旧仪上林苑离宫七十所皆容千乘万骑西京赋上林禁苑跨谷弥阜东至鼎湖斜界细柳臧荣绪晋书陆机妙解情理心识文体故作文赋杜甫诗陆机二十作文赋世說陆云与荀隐会于张华坐云抗手曰云间陆士龙

代秘书赠弘文馆诸校书

清切曹司近玉除。比来秋兴复何如。崇文馆里丹霜后。无限红梨忆校书。

△唐六典秘书省监一人少监二人丞一人秘书郎四人武德初置修文馆武德末改为弘文馆校书郎二人一作飞杜氏通典唐置崇贤馆属左春坊后避皇太子讳改为崇文馆其学士例与弘文馆同

乱石

虎踞龙蹲纵复横。星光渐减雨痕生。不须併碍东西路。哭杀厨头阮步兵。

△晋书阮籍闻步兵厨人善酿有贮酒三百斛乃求为步兵校尉○末二语途穷之悲

日日

日日春光鬪日光。山城斜路杏花香。几时心绪浑无事。得及游丝百尺长。

过楚宫

巫峡迢迢旧楚宫。至今云雨暗丹枫。微生尽恋人间乐。只有襄王忆梦中。

龙池

龙池赐酒敞云屏。羯鼓声高众乐停。夜半宴归宫漏永。薛王沉醉寿王醒。

△雍錄明皇为诸王时故宅在京城东南角隆庆坊宅有井井溢成池中宗时数有云龙之祥后引龙首堰水注池池面益广即龙池也开元二年七月以宅为宫是为兴庆宫南卓羯鼓錄羯鼓出外夷以戎羯之鼓故曰羯鼓其声促急破空透远特异众乐明皇极爱之尝聽琴未终遽止之曰速令花奴持羯鼓来为我解秽容斋续笔唐岐薛诸王俱薨于开元中而太真以天宝二载方入宫此篇与元稹连昌宫词百官队仗避岐薛俱失之愚按史云睿宗六年王德妃生业初王赵降封中山王进王薛开元二十二年薨子瑁嗣此诗与微之词岂俱指嗣王哉昔之作者微文刺讥不必一一核实

泪

永巷长年怨绮罗。离情终日思风波。湘江竹上痕无限。岷首碑前洒几多。

人去紫台秋入塞。兵残楚帐夜闻歌。朝来灞水桥边问。未抵青袍送玉珂。

△晋书羊祐卒百姓于岷山建碑望其碑者莫不流涕恨赋紫台稍远關山无极注紫台犹紫宫也杜甫咏明妃诗一去紫台连朔漠汉书项羽夜闻汉军皆楚歌乃惊起饮帐中悲歌慷慨泣下数行灞桥注见前古诗青袍似春草

十字水期韦潘侍御同年不至时韦寓居水次故郭汾宁宅

伊水溅溅相背流。朱栏画阁几人游。漆灯夜照真无数。蜡炬晨炊竟未休。

顾我有怀同大梦。期君不至更沉忧。西园碧树今谁主。与近高窗卧听秋。

△道源注王廷珪诗十字水中分岛屿数重花外见楼台水经伊水出南阳县蔓渠山东北至洛阳县南入洛李贺诗鬼灯如漆照松花晋书石崇以蜡代薪曹植诗清夜游西园燕城赋旋渊碧树注玉树也

流鸶

流鸶飘荡复参差。渡陌临流不自持。巧啖岂能无本意。良辰未必有佳期。

风朝露夜阴晴里。万户千门开闭时。曾苦伤春不忍听。凤城何处有花枝。

出關宿盘豆馆对丛芦有感

芦叶稍稍夏景深。邮亭暫欲洒尘襟。昔年曾是江南客。此日初为關外心。

思子台边风自急。玉孌湖上月应沉。清声不遠行人去。一世荒城伴夜砧。

△關潼關也道源注甘棠志盘豆馆在湖城县西二十里昔汉武帝过此父老以牙豆盘献因名焉汉戾太子传上怜太子无辜乃作思子宫为归来望思之台于湖师古曰台在今湖城县西阆乡东玉孌湖无考或曰嵩山记登封县有玉女台汉武帝见二玉女于此因名玉娘湖或在其侧

和韩録事送宫人入道

星使追还不自由。双童捧上緑琼輶。九枝灯下朝金殿。三素云中侍玉楼。

凤女颠狂成久别。月娥孌独好同游。当时若爱韩公子。埋骨成灰恨未休。

△张籍王建戴叔伦元稹于鹄项斯皆有作后汉李郃传和帝遣使者二人到益部郃曰有二使星入蜀分埜晋天文志流星天使也诗诂车前横木上勾衡者谓之輶亦曰輶九枝灯注见上卷道源注金根经黄金紫殿青要帝君居之真诰真人行则扶华晨蓋乘三素之云菰苑雌黄修真入道秘言立春日清朝北望有紫緑白云为三元君三素飞云也三元君是日乘八轮之輶上诣天帝唐试进士以立春日望三素云飞出此月娥谓月中姮娥韩公子未详或曰韩非为韩之诸公子借以况韩録事也

即目

小鼎煎茶面曲池。白鬚道士竹间棋。何人书破蒲葵扇。记著南塘移树时。

△广雅栟榈櫟也玉篇一名蒲葵晋阳秋谢安乡人有罢中宿县诣安安问归资答曰惟有五万蒲葵扇又以非时安乃取其中者执之士庶竞慕价十倍又曰王羲之见老姥持十许六角扇卖之因书其扇各五字老姥初有愠色羲之谓曰但云王右军书字索百钱姥从之人竞买之

李义山诗集注卷二上

●李义山诗集注卷二下

吳江朱鹤龄撰

圣女祠

杳蔼逢仙迹。苍茫滞客途。何年归碧落。此路向皇都。

消息期青雀。逢迎异紫姑。肠廻楚国梦。心断汉宫巫。

从骑裁寒竹。行车荫白榆。星娥一去后。月姊更来无。

寡鹄迷苍壑。羈凰怨翠梧。惟应碧桃下。方朔是狂夫。

△注见上卷一作靄注见上卷荆楚歲时记正月望日其夕迎紫姑神以卜异苑紫姑本人家妾为大妇所逐正月十五日感激而死故世人作其形于厕以迎之卜云子胥不在曹夫已行小姑可出子胥婿也曹夫姑也用神女事汉郊祀志上郡有巫病而鬼神下之上召置祠之甘泉用费长房骑竹杖事见上卷古诗天上何所有历历种白榆星娥谓织女月姊注见上卷英华作鹤鹄鹤古通用列女传陶婴夫死守义作歌曰悲夫黄鹄之早歌兮七年不双瑞应图雄曰凤雌曰凰羈凰即羈雌也东方朔偷桃事见前

七月二十九日崇让宅讌作

露如微霰下前池。月过廻塘万竹悲。浮世本来多聚散。红蕖何事亦离披。

悠扬归梦惟灯见。濩落生涯独酒知。岂到白头长只尔。嵩阳松雪有心期。

赠从兄闾之

怅望人间万事违。私书幽梦约忘机。荻花村里鱼标在。石藓庭中鹿迹微。

幽径定携僧共入。寒塘好与月相依。城中獬犬憎兰佩。莫损幽芳久不归。

△道源注鱼标以白水板为之插于水际投饵其下鱼争聚焉渔人以笼罩罩之吉器切左传国狗之瘕无不噬也杜预注瘕狂犬也今名獬犬李贺诗噉犬啗啗相索索舐掌偏宜佩兰客

吳宫

龙檻沉沉水殿清。禁门深掩断人声。吳王宴罢满宫醉。日暮水漂花出城。

嫦娥

云母屏风烛影深。长河渐落晓星沉。嫦娥应悔偷灵药。碧海青天夜夜心。

△云母屏注见上卷

残花

残花啼露莫留春。尖髮谁非怨别人。若但綰闌劳独梦。宝钗何日不生尘。

天津西望

虜马崩腾忽一狂。翠华无不到东方。天津西望肠真断。满眼秋波出苑墙。

△元和郡国志天津桥在河南县北四里隋大业元年造用大船连以鍊锁南北夹起四楼唐贞观中更令石工繫方石为脚

西亭

此夜西亭月正圆。疎帘相伴宿风烟。梧桐莫更翻清露。孤鹤从来不得眠。

忆住一师

无事经年别遠公。帝城钟晓忆西峰。炉烟消尽寒灯晦。童子开门雪满松。

△高僧传慧遠本姓贾氏雁门楼烦人因秦乱来游于晋居庐阜三十餘年化兼道俗

昨夜

不辞鶗鴂妬年芳。但惜流尘暗烛房。昨夜西池凉露满。桂花吹断月中香。

△刘铈诗堂上流尘生

海客

海客乘槎上紫氛。星娥罢织一相闻。只应不憚牵牛妬。聊用支机石赠君。

△刘桢诗奋翅凌紫氛集林昔有人寻河源见妇人浣纱问之曰此天河也乃与一石而归问严君平君平曰此织女支机之石

初食笋呈座中

嫩箨香苞初出林。于陵论价重如金。皇都陆海应无数。忍剪凌云一寸心。

△齐乘于陵在长山县二十五里即陈仲子所居汉书秦地有鄠杜竹林南山檀柘号陆海

早起

风露澹清晨。帘间独起人。鶯花啼又笑。毕竟是谁春。

寄蜀客

君到临邛问酒垆。近来还有长卿无。金徽却是无情物。不许文君忆故夫。

行至金牛驿寄兴元渤海尚书

楼上春云水底天。五云章色破巴牋。诸生个个王恭柳。从事人人庾杲莲。

六曲屏风江雨急。九枝灯檠夜珠圆。深惭走马金牛路。骤和陈王白玉篇。

△元和郡国志梁州金牛县武德二年置取五丁力士石牛出金为名唐书兴元元年升汉中郡为兴元府山南西道治焉渤海尚书以义山所作状考之乃高元裕也元裕会昌中为京兆尹大中初为刑部尚书但新旧史本传及除官制辞并云出为山南东道节度使非兴元也岂元裕自山南西道改东道而史失书乎俟再详道源注唐书韦陟使侍妾掌五采笺裁答授意陟惟署名自谓所书陟字若五朶云杜甫诗巴牋染翰光晋书王恭美姿仪人目之曰濯濯如春月柳注见前六曲屏注见上卷去声王筠灯檠诗百花曜九枝白玉篇今子建集不载疑逸

深树见一颗樱桃尚在

高桃留晚实。寻得小庭南。矮堕绿云髻。欹危红玉簪。

惜堪充凤食。痛已被鶯含。越鸟夸香荔。齐名亦未甘。

△古今注堕马髻今无复作者倭堕髻一云堕马之馀形也古乐府头上倭堕髻

细雨

帷飘白玉堂。簾卷碧牙牀。楚女当时意。萧萧髮彩凉。

歌舞

遏云歌响清。迴雪舞腰轻。只要君流盼。君倾国自倾。

△列子薛谭学讴于秦青一日辞归青饯于郊衢抚节悲歌声振林木响遏行云

海上

石桥东望海连天。徐福空来不得仙。直遣麻姑与搔背。可能留命待桑田。

△始皇石桥事见上卷仙传拾遗徐福字君房秦始皇时闻东海中祖洲上有不死之草生琼田中一名养神芝始皇乃遣福及童男女各三千人乘楼船入海寻祖洲不返列仙传麻姑降蔡经家经见麻姑手似鸟爪心言背大痒时得此爪以爬背当佳也王方平知经心言使人牵经鞭之曰麻姑神人也汝何忽谓其爪可爬背乎但见鞭著经背亦不见有人持鞭者方平告经曰吾鞭不可妄得也桑田注见上卷

魏侯第东北楼堂郢叔言别聊用书所见成篇

暗楼连夜阁。不拟为黄昏。未必断别泪。何曾妨梦魂。

疑穿花逶迤。渐近火温磨。海底翻无水。仙家却有邨。

锁香金屈戌。带酒玉崑崙。羽白风交扇。冰清月映盆。

旧欢尘自积。新岁电犹奔。霞绮空留段。云峰不带根。

念君千里舸。江草漏灯痕。

△説文逶迤衰去貌奴昆切○皮日休桃花赋或温磨而可薰或矮媵而莫持道源注梁简文诗织成屏风金屈戌李贺诗屈戌铜铺销阿甄辍耕録今人家户设铰名曰环钮即古金铺之遗意北方谓之屈戌摭异记物之异者有龙脑香崑崙子记事珠宇文卓方执崑崙玉盞听左丞檀超高谈不觉堕地按唐人小説多名奴子为崑崙玉崑崙乃玉刻人形作器玩耳一作印谢眺诗馀霞散成绮云根注见上卷

白云夫旧居

平生误识白云夫。再到仙簷忆酒垆。牆外万株人絶迹。夕阳惟照欲栖乌。

同学彭道士参寥

莫羨仙家有上真。仙家暫謫亦千春。月中桂樹高多少。試問西河斫樹人。

△真誥列羽服之上真西陽雜俎月中桂高五百丈下有一人常斫之樹創隨合人姓吳名剛西河人學仙有過謫令伐樹

到秋

扇風淅瀝簟流離。萬里南雲滯所思。守到清秋還寂寞。葉丹苔碧閉門時。

△簟竹席流離簟文也魯靈光殿賦流離爛漫濟曰皆光色貌陸機賦指南雲以寄欽

華師

孤鶴不睡雲無心。衲衣筇杖來西林。院門晝鎖迴廊靜。秋日當堦柿葉陰。

△西林注見上卷

華岳下題西王母廟

神仙有分豈關情。八馬虛隨落日行。莫恨名姬中夜沒。君王猶自不長生。

△謂穆王八駿穆天子傳天子游于河濟盛君獻女王為盛姬筑台砌之以玉天子西征至玄池之上乃奏樂三日終是日樂池盛姬亡天子嬪姬于穀丘之廟于樂池之南郡國志濮州璧玉台穆天子為盛姬所造也今旁地猶多珉石白居易李夫人詩君不見穆王三日哭重璧台前傷盛姬

按唐書武宗王才人善歌舞狀纖頰頗類帝每畋苑中才人必從袍而騎佼服光侈觀者莫知孰為帝也帝惑方士說欲餌藥長生後寢不豫才人獨憂之及大漸才人悉取所常貯散遺宮中帝已崩即日經幄下義山此詩豈有感其事而發歟

過華清內廐門

華清別館閉黃昏。碧草悠悠內廐門。自是明時不巡幸。至今青海有龍孫。

△青海馬龍種也注詳上卷

樂游原

萬樹鳴蟬隔岸虹。樂游原上有西風。羲和自趁虞泉宿。不放斜陽更向東。

△注见上卷一作是广雅曰羲和淮南子曰薄于虞泉是谓黄昏

赠荷花

世间花叶不相伦。花入金盆叶作尘。惟有绿荷红菡萏。卷舒开合任天真。

此荷此叶常相映。翠减红衰愁杀人。

丹丘

青女丁宁结夜霜。羲和辛苦送朝阳。丹丘万里无消息。几对梧桐忆凤凰。

△楚词仍羽人于丹丘兮留不死之旧乡拾遗记丹丘千年一烧至圣之君以为大瑞

房君珊瑚散

不见姮娥影。清秋守月轮。月中闲杵臼。桂子捣成尘。

△道源注陈藏器本草珊瑚生石崑下刺刻之汁流如血以金投之为丸名金浆以玉投之为玉髓久服长生箴中方治七八岁小儿眼有眵翳未坚不可妄传药宜点珊瑚散细研如粉每日少少点之三日立愈一作常南部新书杭州灵隐山多桂寺僧云是月中种也至今中秋夜往往有子坠

小桃园

竟日小桃园。休寒亦未暄。坐鸂当酒重。送客出墙繁。

啼久艳粉薄。舞多香雪翻。犹怜未圆月。先出照黄昏。

嘲樱桃

朱实鸟含尽。青楼人未归。南园无限树。独自叶如帟。

△陆机诗密叶成翠幄

和张秀才落花有感

晴暖感馀芳。红苞杂绛房。落时犹自舞。扫后更闻香。

梦罢收罗荐。仙归勅玉箱。迴肠九迴后。犹有剩迴肠。

△罗荐注见上卷汉武内传武帝葬茂陵冢中先有一玉箱一玉杖是西胡康渠王所献真诰侍女皆青绫衣捧赤玉箱二枚青带束络之一作久非

代越公房妓嘲徐公主

笑啼俱不敢。几欲是吞声。遽遣离琴怨。都由半镜明。

应防啼与笑。微露浅深情。

△古今诗话陈太子舍人徐德言尚乐昌公主陈政衰德言谓主曰以君之才容国亡必入豪家倘情缘未断犹期再见乃破一镜人执其半约他日以正月望日卖于都市及陈亡主果归杨素德言访于都市有苍头卖半镜者大高其价德言引至旅邸言其故出半镜以合之仍题诗曰镜与人俱去镜归人未归无复姮娥影空留明月辉主得诗悲泣不食素知之召德言至还其妻因命主赋诗口占曰今日何迁次新官对旧官笑啼俱不敢方信作人难

代贵公主

芳条得意红。飘落忽西东。分逐春风去。风迴得故丛。

明朝金井露。始看忆春风。

凤

万里峰峦归路迷。未判容彩借山鸡。新春定有将雏乐。阿阁华池两处栖。

△南越志曾城县多鷦〈左义右鸟〉鷦〈左义右鸟〉山鸡也光色鲜明五彩炫耀○言彩凤非山鸡之比晋书乐志呉歌杂曲一曰凤将雏帝王世纪黄帝时凤皇巢于阿阁韩诗外传齐景公出弋昭华之池

昭肃皇帝挽歌辞三首

九县怀雄武。三灵仰睿文。周王传叔父。汉后重神君。

玉律朝惊露。金茎夜切云。笳箫凄欲断。无复咏横汾。

玉塞惊宵析。金桥罢举烽。始巢阿阁凤。旋驾鼎湖龙。

门咽通神鼓。楼凝警夜钟。小臣观吉从。犹误欲东封。

莫验昭华琯。虚传甲帐神。海迷求药使。雪隔献桃人。

桂寝青云断。松扉白露新。万方同象鸟。举恸满秋尘。

△唐书武宗会昌六年崩谥至道昭肃孝皇帝葬端陵后汉书九县颺回三灵注见前唐书武宗讳瀼始封颺王开成五年立为皇太弟废太子成美为陈王汉郊祀志上求神君舍之上林中〈脱一字〉氏馆神君者长陵女子以乳死见神于先后宛若宛若祠之其室及上即位置祠内中闻其言不见其人云按通鑑?昌三年筑望仙观于禁中五年又筑望仙台于南郊故用此事后汉律历志候气之法殿中用玉律十二惟二至乃候灵台用竹律六寸金茎注见上卷楚词冠切云之崔嵬汉武秋风词泛楼船兮济汾河横中流兮扬素波出塞从玉门關故曰玉塞王勃赋金山之断鹤玉塞之惊鸿唐书会昌三年正月河东节度使刘沔大破回鹘于杀胡山迎太和公主以归故曰惊宵析按此语谓平刘稹之叛义山李卫公集序天井雄關金桥故地跨摇河北倚胁山东适有军书果闻戎捷可证金桥在上党吳融有金桥感事诗即此地也鼓吹注乃云洛阳桥名大误乐志凡天神之类皆以雷鼓地祇之类皆以灵鼓人鬼之类皆以路鼓用景阳钟事陈后主诗愿上东封书○尚书大传尧致舜天下赠以昭华之玉西京杂记高祖初入咸阳宫周行府库有玉笛长二尺三寸二十六孔吹之则见车马山林隐鳞相次吹息亦不复见铭曰昭华之琯甲帐注见上卷史记始皇使徐市等入海求诸仙人及不死之药汉书武帝遣方士入海求蓬莱安期生之属而事化丹砂诸药齐为黄金拾遗记西王母进穆王崦州甜雪崦州去玉门二千里地多寒雪献桃注见前汉书上令长安作飞廉桂馆使公孙卿持节设具而候神人符子尧曰余坐华殿之上森然而松生于棟立櫺扉之内霏然而云生于牖帝王世纪舜 苍梧下有羣象尝为之耕水经注禹崩于会稽因 之有鸟来为之耘春拔其根秋啄其秽一作淨

梓州罢吟寄同舍

不拣花朝与雪朝。五年从事霍嫖姚。君縁接座交珠履。我为分行近翠翘。

楚雨含情皆有託。漳濱卧病竟无憀。长吟遠下燕台去。惟有衣香染未销。

△汉书霍去病为嫖姚校尉按师古音嫖频妙反姚羊召反服虔音飘摇后人多从之史记楚春申君上客三千人皆躡珠履翠翘注见上卷

无题二首

凤尾香罗薄几重。碧文圆顶夜深缝。扇裁月魄羞难掩。车走雷声语未通。

曾是寂寥金烬暗。断无消息石榴红。斑骓只繫垂杨岸。何处西南任好风。

重帏深下莫愁堂。卧后清宵细细长。神女生涯原是梦。小姑居处本无郎。

风波不信菱枝弱。月露谁教桂叶香。直道相思了无益。未妨惆怅是清狂。

△班婕妤诗裁为合欢扇团团似明月乐府团扇郎歌憔悴无复理羞与郎相见长门赋雷隐
隐而响起兮声象君之车音徐彦伯诗玉盘红泪滴金烬彩光圆道源注梁元帝乌栖曲芙蓉
为带石榴裙斑骓注见上卷原注古诗有小姑无郎之句○古乐府青溪小姑曲开门白水侧
近桥梁小姑所居独处无郎吴均续齐谐记会稽赵文韶宋元嘉为东宫扶侍廨在青溪中桥
秋夜步月忽有青衣诣门相问须臾女郎至年可十八九许容色绝妙顾青衣取箜篌鼓之留
连宴寝将旦别去以金簪遗文韶明日于青溪庙中得之乃知昨所见青溪神女也刘敬叔异
苑青溪小姑蒋子文第三妹也杨炯少姨庙碑虞帝二妃湘水之波澜未歇蒋侯三妹青溪之
轨迹可寻

病中早访招国李十将军遇挈家游曲江

十顷平波溢岸清。病来惟梦此中行。相如未是真消渴。犹放沱江过锦城。

△汉书沱水在蜀郡郫县西东入大江其一在汶江县西南东入江

昨日

昨日紫姑神去也。今朝青鸟使来賒。未容言语还分散。少得团圆足怨嗟。

二八月轮蟾影破。十三弦柱雁行斜。平明钟后更何事。笑倚墙边梅树花。

△鲍照玩月诗三五二八时千里与君同急就篇注箏瑟类也本十二弦今则十三通典弦柱
拟十二月十三则闰月也

櫻桃花下

流鶯舞蝶两相欺。不取花芳正结时。他日未开今日谢。嘉辰长短是参差。

故驿迎弔故桂府常侍有感

饥乌翻树晚鸡啼。泣过秋原没马泥。二纪征南恩与旧。此时丹旆玉山西。

△按旧唐书大中元年二月以给事中郑亚为御史中丞桂管防御观察使二年正月以李德
裕坐累责授循州刺史未几卒此云常侍或后来赠官丹旆铭旌也王褒送葬诗丹旆书空位
玉山即蓝田山

槿花

风露凄凄秋景繁。可怜荣落在朝昏。未央宫里三千女。但保红颜莫保恩。

△汉武故事上起光明宫发燕赵美女三千人充之建章未央长乐三宫皆辇道相属

暮秋独游曲江

荷叶生时春恨生。荷叶枯时秋恨成。深知身在情长在。怅望江头江水声。

任弘农尉献州刺史乞假还京

黄昏封印点刑徒。愧负荆山入座隅。却羡卞和双刖足。一生无复没阶趋。

△唐书弘农县属虢州贞观八年徙州治弘农本传调补弘农尉以活狱忤观察使孙简将罢去此诗当在是时作按地志荆山非一处此乃弘农郡之荆山也注详上卷因荆山而用卞和事其实卞和泣玉乃楚之荆山古人用事不甚泥

赠勾芒神

佳期不定春期赊。春物夭阏兴咨嗟。愿得勾芒索青女。不教容易损年华。

△月令注少皞氏子重为木官曰勾芒疏云木初生而有芒角也

无愁果有愁曲北齐歌

东有青龙西白虎。中含福星包世度。玉壶渭水笑清潭。凿天不到牵牛处。

骐驎踏云天马狞。牛山撼碎珊瑚声。秋娥点滴不成泪。十二玉楼无故钉。

推烟唾月抛千里。十番红桐一行死。白杨别屋鬼迷人。空留暗记如蚕纸。

日暮西风牵短丝。血凝血散今谁是。

△无愁注见上卷曲名縁起未详礼记行前朱雀而后玄武左青龙而右白虎道源注云笈七籤包括世度璇玑照明渭水本清玉壶纳之开凿天荒无所不至特不及河汉耳一作麒麟山海经马成之山有兽焉状如白犬而黑头见人则飞名曰天马括地志牛山在临淄县南十里即齐景公所游僧齐已诗昔年曾梦涉蓬瀛惟闻撼动珊瑚声按史齐文宣造三台穷极靡侈故以十二玉楼拟之去声音杭道源注酉阳杂俎南中桐花有深红色者陈藏器本草白杨北

土极多人种墟墓间树大皮白道源注何延之兰亭记羲之游山陰兰亭修禊挥毫製序兴乐而书用蚕茧纸鼠鬚笔遒媚劲健絶代更无短丝鬢丝也李贺诗寒緑幽风生短丝推烟唾月以下言人已离物已死萧萧白杨徒记其人于蚕纸耳血凝血散生死相乘是果不能无愁也义山集中此等诗全学李长吉

房中曲

薔薇泣幽素。翠带花钱小。娇郎痴若云。抱日西帘晓。

枕是龙宫石。割得秋波色。玉簟失柔肤。但见蒙罗碧。

忆得前年春。未语含悲辛。归来已不见。锦瑟长于人。

今日涧底松。明日山头檠。愁到天池翻。相看不相识。

△刘子春花含日似笑秋露?叶如泣玉堂閒话息壤记云禹堙洪水至荊州见有海眼汜溢无垠禹乃镌石造龙之宫室寘于穴中以塞其水脉李贺诗一双瞳人剪秋水李白诗拂拭青玉簟蒙罗是蒙彼绉絺之蒙祖咏诗碧罗蒙天阁説文檠黄木也味苦古乐府黄檠向春生苦心随日长又曰高山种芙蓉复经黄檠坞一作地

齐梁晴云

缓逐烟波起。如妬柳絲飘。故临飞阁度。欲入迴陂销。

萦歌怜画扇。敞景弄柔条。更奈天南位。牛渚宿残宵。

△道源注效齐梁体赋晴云也一作耐牛渚牵牛渚也

效徐陵体赠更衣

密帐真珠络。温帟翡翠装。楚腰知便宠。宫眉正鬪强。

结带悬梔子。绣领刺鸳鸯。轻寒衣省夜。金斗熨沉香。

△道源注杜阳杂编同昌公主堂中设连珠之帐外国传斯条国王作白珠交结帐招魂翡翠帟饰高堂些本草梔子花六出甚芬香俗説即西域薝蔔花也梁徐悱妻刘氏诗同心何处恨梔子最關人汉书广川王太姬为太刺方领绣晋灼曰今之妇人直领也绣为方领上刺作黼黻文费〈上日下永〉捣衣诗方绣领间斜

又效江南曲

郎船安两桨。侬舸动双桡。扫黛开宫额。裁裙约楚腰。

乖期方积思。临酒欲拌娇。莫以采菱唱。欲羨秦台箫。

△古今乐録梁武帝改西曲製江南上云乐十四曲江南弄七曲乐府莫愁乐艇子打两桨方言南楚江湖船大谓之舸楫谓之桡飞燕外传为薄眉号逵山黛烟花记炀帝日给宫人螺子黛五斛○江南弄七曲五曰采菱

月夜重寄宋华阳姊妹

偷桃窃药事难兼。十二城中锁彩蟾。应共三英同夜赏。玉楼仍是水精帘。

△偷桃方朔事窃药嫦娥事俱见上卷王勃啓叶□三英尚隔黄衣之梦宋之问明河篇水精帘外转逶迤

访人不遇留别馆

卿卿不惜锁窗春。去作长楸走马身。閒倚绣帘吹柳絮。日高深院断无人。

△世説王安丰妇常卿安丰曰怜卿爱卿是以卿卿曹植诗走马长楸间

雨中长乐水馆送赵十五滂不及

碧云东去雨云西。苑路高高驿路低。秋水緑芜终尽分。夫君太骋锦障泥。

△锦障泥注见上卷

汴上送李郢之苏州

人高诗苦滞夷门。万里梁王有旧园。烟幌自应怜白紵。月楼谁伴咏黄昏。

露桃涂颊依苔井。风柳夸腰住水村。苏小小坟今在否。紫兰香径与招魂。

△唐书李郢字楚望大中进士第为侍御史九国志郢长安人唐末避乱岭表有集一卷史记侯羸年七十家贫为大梁夷门监西京杂记梁孝王好宫室苑囿之乐筑兔园园有雁池池间有鹤洲鳧渚○宋书乐志白苧舞词有巾袍之言紵本呉地所出宜是呉舞也唐六典江南道常湖等州贡白紵北史卢士深妻崔氏有才学春日以桃花釀儿面作釀面辞梁简文帝桃花

诗飞花入露井柳腰注见上卷乐府广题苏小小钱塘名娼也南齐时人吳地记嘉兴县前有晋妓苏小小墓按唐志嘉兴县属苏州此故及之

赠郑说处士

浪迹江湖白髮新。浮云一片是吾身。寒归山观随碁局。暖入汀洲逐钓轮。

越桂留烹张翰鱸。蜀薑供煮陆机蓴。相逢一笑怜疎放。他日扁舟有故人。

△维摩经是身如浮云须臾变灭一作基一作纶○江赋或挥轮于悬碁善曰轮钓轮也南越有桂林故曰越桂吕氏春秋和之美者阳朴之薑招摇之桂越骆之菌晋书张翰见秋风起思吳中蓴羹鲈鱼鱸遂命驾而归道源注搜神记左慈少有神道尝在曹公座公曰今日高会所少者松江鲈鱼为鱸慈求铜盘贮水钓于盘中引一鲈鱼出公曰今既得鲈恨无蜀中薑耳慈曰亦可得也公恐其近路买因曰吾有使至蜀买锦可勅使增市二端须臾还得生薑歳馀使还果增二端问之曰某月某日见人于肆下以公勅故增耳世説陆机诣王武子武子前置数斛羊酪指以示陆曰卿江东何以敌此陆曰有千里蓴羹但未下盐豉耳

复至裴明府所居

伊人卜筑自幽深。桂巷杉篱不可寻。柱上雕虫对书字。槽中秣马仰听琴。

求之流辈岂易得。行矣關山方独吟。賒取松醪一斗酒。与君相伴洒烦襟。

△扬子雕虫篆刻壮夫不为説文序六曰鸟虫书所以书旛信也白帖虫书即蝌蚪书荀子伯牙鼓琴而六马仰秣

览古

莫恃金汤忽太平。草间霜露古今情。空糊赭壤真何益。欲举黄旗竟未成。

长乐瓦飞随水逝。景阳钟堕失天明。廻头一弔箕山客。始信逃尧不为名。

△芜城赋糊赭壤以飞文注糊粘也赭壤赤土也以粘和之饰壁故曰飞文吳志孙权传陈纪曰旧説黄旗紫盖运在东南哀江南赋昔之虎踞龙蟠加以黄旗紫气莫不随狐兔而窟穴与风尘而殄瘁道源注南史宋废帝景和元年以东府城为未央宫以石头城为长乐宫景阳钟见前

子初郊墅

看山对酒君思我。听鼓离城我访君。腊雪已添墙下水。斋钟不散槛前云。

陰移竹柏浓还淡。歌杂渔樵断更闻。亦拟村南买烟舍。子孙相约事耕耘。

汉南书事

西师万衆几时廻。哀痛天书近已裁。文吏何曾重刀笔。将军犹自舞轮台。

几时拓土成王道。从古穷兵是祸胎。陛下好生千万壽。玉楼长御白云杯。

△通鑑大中三年二月吐蕃秦原安乐三州及石门等七關来降诏泾原灵武凤翔邠寧振武皆出兵应援又募百姓垦闢三州七關土田将吏营田者官给牛及种粮其山南劔南没蕃州县亦令收复四年秋八月发诸道兵讨党项连年无功戍馈不已上颇厌用兵此诗乃作于其时也汉书赞萧何曹参皆起秦刀笔吏汉西域传自炖煌西至盐泽往往起亭而轮台渠犁皆有田卒数百人置使者校尉领护以给使外国者轮台在车师国西北千餘里渠犁在轮台东北乐府射鸟辞陛下壽万年臣为二千石

当句有对

密迩平阳接上兰。秦楼鸳瓦汉宫盘。池光不定花光乱。日气初涵露气乾。

但觉游蜂饶舞蝶。岂知孤凤忆离鸾。三星自转三山遠。紫府程遥碧落寬。

△道源注三辅黄图有平阳封宫又汉书平阳侯曹壽尚帝姊号平阳主李适诗歌舞平阳第园亭沁水林西京赋正垒壁乎上兰师古曰上兰观名在上林中徐陵诗欲知迷下蔡先将过上兰邳中记邳都铜雀台皆鸳鸯瓦梁昭明太子诗日丽鸳鸯瓦诗三星在天注心星也昏见东方三神山在海上紫府碧落注俱见上卷

井络

井络天彭一掌中。漫夸天设劔为峰。阵图东聚燕江口。边柝西悬雪岭松。

堪歎故君成杜宇。可能先主是真龙。将来为报姦雄輩。莫向金牛访旧踪。

△河图括地象岷山之精上为井络帝以建昌神以会福水经注李冰为蜀守见氏道县有天彭山两峯相对其形如阙谓之天彭门亦曰天彭阙旧唐书劔州劔門县界大劔山即梁山也其北三十里有小劔山元和郡国志其山峭壁千丈下瞰絶涧作飞阁以通行旅晋书初诸葛亮造八阵图于鱼复平沙上纍石为八行相去二文桓温见之曰此常山蛇势也荆州图副永安宫南一里渚下平碛上有孔明八阵图聚细石为之各高五丈广十围厯然碁布纵横相当

中间相去九尺正中间南北巷悉方广五尺凡六十四聚或为人散乱及为夏水所没冬时水退依然如故寰宇记八阵图有奉节县西南七里燕江无考必夔字之讹点画相近耳雪岭注见上卷一作笑注见上卷吳志周瑜曰刘备非久为人用者恐蛟龙得云雨终非池中物也十三州志秦惠王未知蜀道乃刻石五头置金于尾下言此天牛能粪金蜀人信之令五丁共引牛成道致之成都秦因使张仪伐之通志金牛峡在汉中府沔县西一百七十里

写意

燕雁迢迢隔上林。高秋望断正长吟。人间路有潼江险。天外山惟玉垒深。

日向花间留返照。云从城上结层阴。三年已制思乡泪。更入新年恐不禁。

△水经注驰水出五妇候亦曰潼水南迳梓潼县自县西迳涪城东又南入涪水元和郡国志梓州射洪县有梓潼水与涪江合流玉垒注见上卷

随师东

东征日调万黄金。几竭中原买鬪心。军令未闻诛马谡。捷书惟是报孙歆。

但须鸞鷟巢阿阁。岂假鸱鸢在泮林。可惜前朝玄菟郡。积骸成莽阵云深。

△通鑑太和元年李同捷盗据沧景诏乌重胤王智兴康志睦史宪诚李载义李昕张璠各率本道兵讨之二年九月命诸军进讨王庭湊十月宪诚及同捷战于平原屡败之载义又败之于长芦柳公济败庭湊于新乐又败之于博野刘从谏又败之于昭庆时诸军讨同捷久未成功每有小胜则虚张首虏以邀厚赏朝廷竭力奉之馈运不给沧州丧乱之后骸骨蔽地城空野旷户口什无三四详诗中语正此时事也蜀志建兴六年诸葛亮出军向祁山拔马谡统大衆在前与魏将张郃战于街亭为郃所破亮退军还汉中谡下狱死原注平吳之役上言得歆首吳平歆尚在○王隐晋书杜预伐吳军入乐乡至都督孙歆帐下生将歆诣预王叡先列得歆头而预生送歆洛中大笑诗翩彼飞鸢集于泮林汉书武帝元封四年以朝鲜地置乐浪玄菟真番临屯四郡昭帝罢真番筑辽东玄菟城按隋煬帝大业中频年用兵高丽末二语蓋举往事以讽也

宋玉

何事荆台百万家。惟教宋玉擅才华。楚辞已不饶唐勒。风赋何曾让景差。

落日渚宫供观阁。开年云梦送烟花。可怜庾信寻荒径。犹得三朝託后车。

△家语楚王将游荆台司马子期谏方輿胜览荆台在监利县西三十里土洲之南宋玉讽赋

楚襄王时宋玉休归唐勒谗之于王又风赋楚襄王游于兰台之宫宋玉景差侍道源注荆楚故事襄王与唐勒景差宋玉游云梦之台王令各赋大言唐勒景差赋不如王意宋玉赋曰方地为舆圆天为盖弯弓挂扶桑长劒倚天外王于是喜赐以云梦之田左传王使子西为商公沿汉沂江将入郢王在渚宫注小洲曰渚郡县志渚宫楚别宫也一统志在江陵故城东南梁元帝即位渚宫即此沉约与徐勉书开年以来病增虑切渚宫故事庾信因侯景之乱自建康遁归江陵居宋玉故宅北史信先事梁简文帝后奔江陵元帝除御史中丞聘西魏遂留长安累迁仪同三司周孝闵帝践阼迁骠骑大将军三朝谓梁魏周也

韩同年新居饯韩西迎家室戏赠

籍籍西征万户侯。新縁贵壻起朱楼。一名我漫居先甲。千骑君翻在上头。

云路招邀廻綵凤。天河迢递笑牵牛。南朝禁脔无人近。瘦尽琼枝咏四愁。

△韩同年即韩畏之易先甲三日唐书诸进士试时务策五条帖一大经策全得者为甲第乐府东方千馀骑夫壻居上头晋书孝武帝为晋陵公主求壻谓王珣曰如谢混便足袁崧欲以女妻混珣曰卿莫近禁脔元帝初渡江公私交窘得〈狂。去王加屯〉以为美项上一脔尤佳辄以荐帝呼为禁脔或云肢一作有离骚折琼枝以继佩张衡有四愁诗

奉和太原公送前杨秀才戴兼招杨正字戎

潼關地接古弘农。万里高飞雁与鸿。桂树一枝当白日。芸香三代继清风。

仙舟尚惜乖双美。綵服何由得尽同。谁憚士龙多笑疾。美髭终类晋司空。

△太原公王茂元也唐六典正字掌校讐典籍刊正文字雍録潼關在华州华陰县东北二十九里關西一里有潼水因名汉书弘农郡武帝元鼎四年置二杨必兄弟故云此语送戴此语招戎后汉书李膺与郭泰同舟而济衆賓望之以为神仙晋书吳平二陆入洛机初诣张华华问云何在机曰云有笑疾未敢自见俄而云至华为人多姿制又好帛纏鬚云见而大笑不能自已华封广武侯进中书监拜司空

池边

玉管葭灰细细吹。流鶯上下燕参差。日西千遶池边树。忆把枯条撼雪时。

△后汉书候气之法竹为管葭莩为灰为室三重布緹縵木为案内庑外高加律其上以葭莩灰抑其内端按厯候之气至灰飞殿中用玉律十二

贾生

宣室求贤访逐臣。贾生才调更无伦。可怜夜半虚前席。不问苍生问鬼神。

送王十三校书分司

多少分曹掌秘文。洛阳花雪梦随君。定知何逊縁联句。每到城东忆范云。

△何范联句注见上卷

寄恼韩同年时韩住萧洞二首

帘外辛夷定已开。开时莫放艷阳回。年华若到经风雨。便是胡僧话劫灰。

龙山晴雪凤楼霞。洞里迷人有几家。我为伤春心自醉。不劳君劝石榴花。

△本草辛夷花正二月间开初发如笔北人呼为木笔其花最早南人呼为迎春注见上卷扶南传顿逊国有安石榴取其汁停杯中数日成美酒梁简文帝诗蠡杯石榴酒

谒山

从来繫日乏长绳。水去云迴恨不胜。欲就麻姑买沧海。一杯春露冷如冰。

△李白诗安得长绳繫白日麻姑注见上卷

钧天

上帝钧天会衆灵。昔人因梦到青冥。伶伦吹裂孤生竹。却为知音不得听。

△用赵简子事见上卷周礼孤竹之管注孤竹竹特生者古诗冉冉孤生竹结根太山阿

失猿

祝融南去万重云。清啸无因更一闻。莫遣碧江通箭道。不教肠断忆同羣。

△长沙记衡山七十二峯最大者五芙蓉紫盖石廩天柱祝融而祝融为最高

戏题友人壁

花迳逶迤柳巷深。小阑亭午啜春禽。相如解作长门赋。却用文君取酒金。

△长门赋序武帝陈皇后得幸颇妬别居长门宫愁闷悲思闻司马相如工为文奉黄金百斤为相如文君取酒相如为文以悟主上皇后复得幸

假日

素琴弦断酒觥空。倚坐欹眠日已中。谁向刘灵天幕内。更当陶令北窗风。

△楚词聊假日日以愉乐兮一作伶刘伶酒德颂幕天席地纵意所如陶潜传夏日高卧北窗之下清风飒至自谓羲皇上人

寄遠

姮娥捣药无时已。玉女投壶未肯休。何日桑田俱变了。不教伊水向东流。

△神异经东王公与玉女投壶梟而脱误不接者天为之笑开口流光今电是也

王昭君

毛延壽画欲通神。忍为黄金不顾人。马上琵琶行万里。汉宫长有隔生春。

△西京杂记元帝时后宫既多使画工图形按图召幸之宫人多赂画工独昭君不肯匈奴来朝求美人为阏氏上以昭君行召见貌为后宫第一帝悔之而名籍已去不复更人乃穷按其画工毛延壽等同日弃市石崇明君词序昔公主嫁乌孙令琵琶马上作乐以慰其道路之思其送明君亦必尔也

旧将军

云台高议正纷纷。谁定当时荡寇勲。日暮灞陵原上猎。李将军是故将军。

△后汉书显宗图画建武中二十八将于南宫云台江淹赋高议云台之上汉书李广屏居蓝田南山射猎尝夜从人田间饮还至亭灞陵尉醉呵止广广骑曰故李将军尉曰今将军尚不得夜行何故也

曼倩辞

十八年来堕世间。瑶池归梦碧桃间。如何汉殿穿针夜。又向窗中覩阿环。

△汉书东方朔字曼倩平原馱次人东方朔别传朔谓同舍郎曰天下人无能知朔知朔者惟太王公耳朔卒后武帝召太王公问之曰尔知东方朔乎公曰不知公何所能曰颇善星厯帝

问诸星具在否曰具在独不见歲星十八年今复见耳帝叹曰东方朔在朕旁十八年而不知是歲星哉惨然不乐穿针事见上卷一作前博物志七月七日夜七刻王母降于九华殿王母索七桃以五枚与帝母食二枚惟母与帝对坐其从者皆不得进时东方朔窃从殿南厢朱鸟牖中窥母母顾之谓帝曰此窥牖小儿尝三来盗我桃汉武内传七月七日西王母降于宫中遣侍女郭密香与上元夫人相问须臾上元夫人遣问云阿环再拜

所居

窗下寻书细。溪边坐石平。水风醒酒病。霜日曝衣轻。

鸡黍随人设。蒲鱼得地生。前贤无不谓。容易即遗名。

高松

高松出衆木。伴我向天涯。客散初晴候。僧来不语时。

有风传雅韵。无雪试幽姿。上药终相待。他年访伏龟。

△嵩山记嵩高山有大松树或百歲或千歲其精变为青牛为伏龟採食其实得长年

访秋

酒薄吹还醒。楼危望已穷。江皋当落日。帆席见归风。

烟带龙潭白。霞分鸟道红。殷勤报秋意。只是有丹枫。

昭州

桂水春犹早。昭川日正西。虎当官道鬪。猿上驿楼啼。

绳烂金沙井。松乾乳洞梯。乡音殊可骇。仍有醉如泥。

△唐书昭州平乐郡属岭南道楚词桂水兮潺湲水经注桂水出桂阳县北界山北迳南平县而东北流右?鍾水故应劭曰桂水出桂阳东北入湘英华作州通志昭潭在平乐府城东二里有十六滩英华作路道源注方輿胜览金沙井在平乐府治东方輿胜览乳洞在兴安县西南洞有三上曰飞霞中曰驻云下曰喷雷下洞泉流石壁间田垄沟塍如凿中洞有三石柱及石室石牀左盘至上洞行八十步得平地有五色石横亘其上然平乐恭城皆出鍾乳蓋洞亦非一大率昭潭多有之英华作吁

哭刘司户蕡

路有论冤谪。言皆在中兴。空闻迁贾谊。不待相孙弘。

江濶惟迴首。天高但抚膺。去年相送地。春雪满黄陵。

△汉书公孙弘对贤良策武帝擢第一后为相封平津侯水经注湖水西流迳二妃庙南世谓之黄陵庙方輿胜览庙在潭州湘陰县北九十里

裴明府居止

爱君茅屋下。向晚水溶溶。试墨书新竹。张琴和古松。

坐来闻好鸟。归去度疎钟。明日还相见。桥南贯酒醲。

陆发荆南始至商洛

昔去真无奈。今还岂自知。青辞木奴橘。紫见地仙芝。

四海秋风濶。千嵒暮景迟。向来忧际会。犹有五湖期。

△水经注龙阳县汜洲长二十里呉丹阳太守李衡植橘于其上临死勅其子曰吾汜洲木奴千头不责衣食有绢千匹道源注酉阳杂俎凡学道三十年不倦天下金翅鸟衔芝至罗门山生石芝得地仙

陈后宫

玄武开新苑。龙舟讌幸频。渚莲参法驾。沙鸟犯勾陈。

壽献金茎露。歌翻玉树尘。夜来江令醉。别诏宿临春。

△玄武湖注见上卷应劭汉官仪天子法驾所乘曰金根车星经勾陈六星为六宫亦主六军晋天文志勾陈六星在紫宫中勾陈后宫也王者法勾陈设环列陈书后主作新曲有玉树后庭花临春阁注见上卷

乐游原

春梦乱不记。春原登已重。青门弄烟柳。紫阁舞云松。

拂砚轻冰散。开樽绿酎浓。无惊託诗遣。吟罢更无惊。

△三辅黄图长安城东出南头第一门曰霸城门或曰青门张礼游城南记圭峯紫阁在终南山四皓祠之西圭峯下有草堂寺紫阁之阴即溪陂音宙一作酒汉书广陵王歌曰出入无惊为乐亟韦昭曰惊乐也

赠子直花下

池光忽隐墙。花气乱侵房。屏绿蝶留粉。窗油蜂印黄。

官书惟小吏。侍史从清郎。并马更吟去。寻思有底忙。

△唐书令狐綯字子直倪甸切唐书诸部郎有令史书令史杜氏通典汉尚书郎给侍史一人女侍史二人

小园独酌

柳带谁能结。花房未肯开。空馀双蝶舞。竟绝一人来。

半展龙鬚席。轻斟玛瑙杯。年年春不定。虚信岁前梅。

△山海经贾超之山其草多龙修郭璞曰龙鬚也生石穴中而倒垂可以为席郑缉之东阳记仙姥窟下不生蔓草尽出龙鬚唐书秦州丹州俱土贡龙鬚席一作马洛阳伽蓝记元琛酒器有玛瑙盃

思归

固有楼堪倚。能无酒可倾。岭云春沮洳。江月夜晴明。

鱼乱书何託。猿哀梦易惊。旧居连上苑。时节正迁鶯。

献寄旧府开封公

幕府三年远。春秋一字褒。书论秦逐客。赋续楚离骚。

地理南溟濶。天文北极高。酬恩抚身世。未觉胜鸿毛。

△按开封公即令狐楚也楚镇汴州义山从为巡官时义山尚未第一作里

向晚

当风横去幰。临水卷空帷。北土鞦韆罢。南朝祓禊归。

花情羞脉脉。柳意怅微微。莫叹佳期晚。佳期自古稀。

△古今艺术图鞦韆绳戏北方山戎以习轻趫

春游

桥峻斑骓疾。川长白鸟高。烟轻惟润柳。风滥欲吹桃。

徙倚三层阁。摩挲七宝刀。庾郎年最少。青草妬春袍。

△古琅琊王歌词新买五尺刀悬著中梁柱一日三摩挲剧于十五女古诗青袍似春草

离席

出宿金樽掩。从公玉帐新。依依向馀照。远远隔芳尘。

细草翻惊雁。残花伴醉人。杨朱不用劝。只是更沾巾。

△芳尘注见上卷

俳谐

短顾何由遂。迟光且莫惊。鸢能歌子夜。蝶解舞宫城。

柳讶眉双浅。桃猜粉太轻。年华有情状。吾岂怯生平。

△杜诗有俳谐体子夜注见上卷道源注唐六典都城三重外一重名京城内一重名重城又内一重名宫城一作吾敢怯平生

细雨

萧洒傍廻汀。依微过短亭。气凉先动竹。点细未开萍。

稍促高高燕。微疎的的萤。故园烟草色。仍近五门青。

△郑玄礼记注天子五门皋雉库应路也

商于新开路

六百商于路。崎岖古共闻。蜂房春欲暮。虎弄日初曛。

路向泉间辨。人从树杪分。更谁开捷径。速拟上青云。

△唐书商州上洛郡贞元七年刺史李西华自蓝田至内乡开新道七百餘里迴山取涂人不病涉行旅便之

题郑大有隐居

结构何峰是。喧閒此地分。石梁高泻月。樵路细侵云。

偃卧蛟螭室。希夷鸟兽羣。近知西岭上。玉管有时闻。

△原注君居近子晋憩鹤台○子晋好吹笙玉管玉笙也

夜饮

卜夜容衰鬓。开筵属异方。烛分歌扇泪。雨送酒船香。

江海三年客。乾坤百战塲。谁能辞酩酊。淹卧剧清漳。

△大业拾遗作小舸子长八尺七艘木人长二尺许乘船行酒每一船一人擎酒杯一人捧酒鉢一人撑船二人盪桨遶曲水池随岸而行疾于水饰水饰遶池一匝酒船得三遍每到坐客处即停住擎酒木人于船头伸手酒客取酒饮讫还杯木人受杯迴向捧酒鉢人取杓斟酒满杯船依式自行李白诗嵇山无贺老却放酒船回

江上

万里风来地。清江北望楼。云通梁苑路。月带楚城秋。

刺字从漫灭。归途尚阻修。前程更烟水。吾道岂淹留。

△典略祢衡自荊州北游许都书一刺怀之漫灭无所适

凉思

客去波平檻。蟬休露滿枝。永懷當此節。倚立自移時。

北斗兼春遠。南陵寓使遲。天涯占夢數。疑誤有新知。

△舊唐書梁置南陵縣武德七年屬池州後屬宣州

鸞鳳

舊鏡鸞何處。衰桐鳳不栖。金錢饒孔雀。錦段落山雞。

王子調清管。天人降紫泥。豈無雲路分。相望不應迷。

△道源注南州異物志孔雀自背及尾皆作圓文五色山雞注見前

李衛公

絛紗弟子音塵絕。鸞鏡佳人舊會稀。今日致身歌舞地。木棉花暖鷓鴣飛。

△唐書劉稹平德裕以功兼守太尉進封衛國公大中初歷貶崖州司戶卒○按詩有木棉鷓鴣語蓋衛公投竄南荒時作也後漢書馬融嘗坐高堂施絛紗帳前授生徒後列女樂吳錄交趾有木棉樹高大實如酒杯中有棉如絮可作布名曰縹一名毛布羅浮山記木棉正月開花大如芙蓉花落結子楊慎曰即今班枝花鷓鴣注見前

韋蟾

謝家離別正淒涼。少傅臨岐賭佩囊。却憶短亭迴首處。夜來烟雨滿池塘。

△晉書謝玄少好佩紫羅香囊叔父安患之而不欲傷其意因戲賭取而焚之于此遂止

自貺

陶令棄官後。仰眠書屋中。誰將五斗米。擬換北窗風。

蝶

孤蝶小徘徊。翩翾粉翅開。併應傷皎潔。頻近雪中来。

夜意

帘垂幕半捲。枕冷被仍香。如何为相忆。魂梦过潇湘。

因书

絕徼南通栈。孤城北枕江。猿声连月檻。鸟影落天窗。

海石分碁子。郫筒当酒缸。生归话辛苦。别夜对凝缸。

△鲁灵光殿赋尔乃悬栋结阿天窗绮疎张载注天窗高窗也一作锦道源注杜阳杂编日本东三万里有集真岛岛上有凝霞台台上有手谈池池中出玉碁子不由製度自然黑白分明冬温夏冷谓之冷暖玉更産楸玉状如楸木琢之为碁局光洁可鑑华阳风俗録郫县有郫筒池池旁有大竹郫人剝其节倾春酿于筒苞以藕丝蔽以蕉叶信宿香闻于林外然后断之以献俗号郫筒酒

奉寄安国大师兼筒子蒙

忆奉莲花座。兼闻贝叶经。岩光分蜡屐。涧响入铜鉶。

日下徒推鹤。天涯正对萤。鱼山羨曹植。眷属有文星。

△道源注佛祖通载安国寺赐紫大达法师端甫为左街僧録内供奉裴休撰碑今玄秘塔碑是也愚按安国大师即前知玄法师也高僧传云知玄与弟子僧録僧彻住上都大安国寺号安国大师又按元氏长庆集有寄卢评事子蒙作疑即此子蒙文殊传世尊之座高七尺名曰七宝莲花台注见上卷晋书阮孚好蜡屐叹曰未知一生当著几两屐道源注寄归传军持有二若鼈瓦者是淨用若铜锡者是触用晋书陆云与荀隐素未相识尝会张华座云抗手曰云间陆士龙隐曰日下荀鸣鹤鸣鹤隐字也晋书车胤家贫不尝得油夏月则以练囊盛数十萤火照书读以夜继日焉通典济州东阿有鱼山一名吾山瓠子歌吾山平兮钜野溢是也异苑陈思王植尝登鱼山忽闻岳岫里有诵经声清遒深亮逺谷流响不觉歛襟祇敬便效而则之今梵唱皆植依拟所造慧皎唱导序陈思王深爱声律属意经音既通般若之瑞响又感鱼山之神製传声则三千有馀在契则四十有二晋天文志文昌六星在北斗魁前道源注子蒙必安国俗家眷属故以曹植拟之

閒游

危亭题竹粉。曲沼唤荷花。数日同携酒。平明不在家。

寻幽殊未极。得句总堪夸。强下西楼去。西楼倚暮霞。

县中恼饮席

晚醉题诗赠物华。罢吟还醉忘归家。若无江氏五色笔。争奈河阳一县花。

题李上暮壁

旧著思玄赋。新编杂拟诗。江庭犹近别。山舍得幽期。

嫩割周顒韭。肥烹鲍照葵。饱闻南烛酒。仍及拨醅时。

△文选注张衡为侍中诸常侍皆恶直丑正危衡故作思玄赋以非时俗文选有杂拟诗南史文惠太子问周顒菜食何味最胜顒曰春初早韭秋末晚菘道源注鲍照园葵赋乃羹乃瀹堆鼎盈筐甘旨蒨脆柔滑芬芳一作蜀本草南烛草木叶煮汁浸米蒸作饭谓之青飢或云亦可酿酒饮之延年韵会醅酒未熟者庾信春赋石榴聊汎蒲萄醅醅

江村题壁

沙岸竹森森。维艖听越禽。数家同老寿。一径自陰深。

喜客尝留橘。应官説採金。倾壶真得地。爱日静霜砧。

即日

桂林闻旧説。曾不异炎方。山响匡牀语。花飘度腊香。

几时逢雁足。著处断猿肠。独抚青青桂。临城忆雪霜。

△原注宋考功有小长安之句庄子丽姬与王同筐牀食刍豢

漫成五章

沉宋裁辞矜变律。王杨落笔得良朋。当时自谓宗师妙。今日惟观对属能。

李杜操持事略齐。三才万象共端倪。集仙殿与金銮殿。可是苍蝇惑曙鸡。

生儿古有孙征虏。嫁女今无王右军。借问琴书终一世。何如旗盖仰三分。

代北偏师衔使节。關中裨将建行台。不妨常日饶轻薄。且喜临戎用草莱。

郭令素心非黠武。韩公本意在和戎。两都耆旧皆垂泪。临老中原见朔风。

△唐书建安后讠江左诗格屡变至沉约庾信以音韵相婉附属对精密及宋之问沉佺期又加靡丽王勃杨炯卢照隣骆宾王皆以文章齐名时号四杰炯尝曰吾愧在卢前耻居王后唐六典开元十三年召学士张説等宴于集仙殿改名集贤殿唐书杜甫传天宝中进三大礼赋上奇之命待制集贤院召试文章李白传贺知章言于玄宗召见金銮殿论当世事奏颂一篇帝赐食亲为调羹诗匪鸡则鸣苍蝇之声○李沮于贵妃杜抑于时相是皆以苍蝇惑曙鸡也孙权传曹公曰生子当如孙仲谋刘景升儿子〈狂。去王加屯〉犬耳曹公表权为讨虏将军一作全晋书郗鉴使门生求壻于王导导令就东厢偏观子弟王氏诸少咸自矜持惟羲之在东牀坦腹卧若不闻鉴曰正此佳壻耶遂以女妻之孙权传黄旗紫盖运在东南郭子仪传乾元元年进中书令张仁愿传神龙中为朔方总管筑三受降城于河北景龙二年封韩国公

射鱼曲

思牢弩箭磨青石。绣额蛮渠三虎力。寻潮背日伺洄鳞。贝阙夜移鲸失色。

纖纖粉簪馨香饵。綠鸭廻塘养龙水。含冰汉语遠于天。何由廻作金盘死。

△始皇本纪徐市等入海求神仙数歲不得乃诈曰蓬莱药可得然常为大蛟鱼所苦故不得至愿请善射与俱见则以连弩射之自琅琊北至荣成山弗见至之罘见巨鱼射杀一鱼遂并海西至平原津而病异物志南方思牢国産竹可斫指甲即今〈箒。去劳加思〉箒竹也韵会此竹皮利可为刀岭表録异皮上有籀文以为错子错甲利胜于鍔若钝以酸浆洗之杨慎曰今东广新州有此种字又作澁勒老学庵笔记云澁勒竹名竹肤有芒可剉爪是也魏志挹娄在扶余东北千餘里弓长四尺如弩括长八寸青石为鏃唐书黑水靺鞨居肃慎地亦曰挹娄人劲健善步战其矢石鏃长二寸蓋楷弩遗法绣额犹云雕题蛮渠南蛮渠魁也诗有力如虎贝阙注见前夜移失色惧为所射也箒同唐书高丽国有马訾水出靺鞨之白山色若鸭头号鸭綠水遁甲开山图徂北有神龙池帝王歷代养龙之处○言大鱼不可得见于是悬饵箭竹以求之鸭綠养龙之水焉二语未详或曰汉武射蛟因于礼祠与始皇射鱼总之求长生耳宜乎含冰汉语遠在天上何为金盘承露卒不免于死乎此诗亦讽求仙

日高

镀鍔故锦縻轻拖。玉〈箒。去劳加氏〉不动便门锁。水精眠梦是何人。栏药日高红髮〈髮。去皮加我〉。

飞香上云春訴天。云梯十二門九關。轻身灭影何可望。粉蛾帖死屏风上。

△○广韵鍔指鍔也以金镀之曰镀鍔真诰欲闻起居金为盟书注谓受此宜用金鍔二双黄庭经黄庭为不死之道受者盟以玄云之锦九十尺韵会縻繫也拖衣裾也一作筏非道源注黄庭内景经玉〈箒。去劳加氏〉金钥长完坚注道经云善闭者无闕鍵不可开按〈箒。去劳加氏〉字字书不载或谓即匙也水精眠梦谓眠梦于水精宫也栏药即药栏説文髮鬣

也按〈髮。去皮加我〉字字书亦不载甘泉赋崇丘陵之駉駉兮注駉駉高大貌髮 当亦此意一作哀一作开○招魂君无上天些虎豹九闕啄害下人些言云天之高門關之邃非轻身灭影者不能到徒如粉蛾之帖死于屏风耳

宫中曲

云母滤宫月。夜夜白于水。赚得羊车来。低扇遮黄子。

水精不觉冷。自刻鸳鸯翅。蚕缕茜香浓。正朝纏左臂。

巴牋两三幅。满写承恩字。欲得识青天。昨夜苍龙是。

△宫月逗出云母窗如滤漉然晋书武帝掖庭殆将万人并宠者甚衆常乘羊车恣其所适宫人取竹叶插户以盐汁洒地引帝车又南史潘淑妃事同南都赋中黄穀玉善引博物志石中黄子黄石脂也额黄想用之故曰遮黄子音倩説文茜茅蒐也可染绦色道源注茜草染绦丝如长命缕以繫臂也汉书薄姬曰昨夜梦苍龙据妾胸上曰此贵徵也吾为汝成之遂幸有身生文帝

海上謡

桂水寒于江。玉兔秋冷咽。海底觅仙人。香桃如瘦骨。

紫鸾不肯舞。满翅蓬山雪。借得龙堂寛。晓出揲云髮。

刘郎旧香炷。立见茂陵树。云孙帖帖卧秋烟。上元细字如蚕眠。

△傅玄拟天问月中何有玉兔捣药汉郊祀志自威宣燕昭使人入海求蓬莱方丈瀛洲诸仙人及不死之药皆在焉未至望之如云及到三神山反居水下楚词鱼鳞屋兮龙堂道源注揲集韵作拙説文閱持也诗鬢髮如云汉武内传七月七日燔百和之香以待王母武帝葬茂陵言其死之速尔雅昆孙之子为仍孙仍孙之子为云孙汉武内传帝以上元夫人所授五真图灵光经六甲灵飞十二事自撰集为一卷及诸经图皆奉以黄金之箱封以白玉之函珊瑚为轴紫锦为囊安著柏梁台上数自斋洁朝拜焚香洒扫然后乃执省焉海録碎事书断鲁秋胡翫蚕作蚕书宋之问诗宛转结蚕书○言武帝云孙皆尽此上元蚕书亦安在哉

李夫人三首

一带不结心。两股方安髻。慚愧白茅人。月没教星替。

剩结茱萸枝。多擘秋莲的。独自看波光。綵囊盛不得。

蚕丝繫条脱。妍眼和香屑。壽宫不惜铸南人。柔肠早被秋眸割。

清澄有馀幽素香。鰥鱼渴凤真珠房。不知瘦骨类水井。更许夜帘通晓霜。

土花漠漠云茫茫。黄河欲尽天苍苍。

△梁武帝诗腰间双绮带梦为同心结汉书武帝拜栾大为五利将军又刻玉印曰天道将军使衣羽衣立白茅上以示弗臣也按史云李夫人卒齐人少翁以方致夫人天子自帷中望见焉乃拜翁为文成将军夫文成能致夫人之神尚以伪书见杀今复尊信五利是月没而以星替之也此语骤读不解尔雅荷芙蕖其实莲其根藕其中的诗义疏青皮里白子为的招魂嫉光眇视目曾波些华山记邓绍八月旦入华山见童子执百綵囊盛柏叶上露如珠满囊绍问之答曰赤松先生取以明日又述征记八月一日作五明囊盛取百草头露洗眼眼明殷芸小说金条脱为臂饰即今钏也真诰安妃有斲粟金跳脱又萼绿华赠羊权金玉跳脱各一香屑百和香屑也费〈上日下永〉诗衣薰百和屑鬟插九枝花汉郊祀志上起幸甘泉病良已大赦置壽宫神君注壽宫奉神之宫也李夫人传夫人少而早卒上怜悯焉图画其形于甘泉宫铸南人无解或南金之讹言不惜以金铸其像也白居易诗双眸剪秋水十指剥春葱释名愁悵不能寐日常鰥鰥然字从鱼鱼目恒不寐谓使方士夜致其神一作漠碧一作苍黄

景阳宫井双桐

秋港菱花乾。玉盘明月蚀。血渗两枯心。情多去未得。徒经白门伴。

不见丹山客。未待刻作人。愁多有魂魄。谁将玉盘与。不死翻相误。

天更濶于江。孙枝觅郎主。昔妬隣宫槐。道类双眉歛。今日繁红樱。

抛人占长簾。翠襦不禁绽。留泪啼天眼。寒灰劫尽问方知。石羊不去谁相绊。

△南史隋军克台城张贵妃与后主俱入井隋军出之晋王广命斩之于青溪金陵志景阳井在台城内陈后主与张丽华孔贵嫔投其中以避隋兵旧传栏有石脉以帛拭之作臙脂痕名臙脂井一名辱井在法华寺魏文帝诗双桐生空井枝叶自相加菱花镜注见上卷李白诗小时不识月呼作白玉盘宋书建康宣阳门谓之白门文帝以白门为不祥讳之丹山客凤也言桐枯而凤亦不来汉书武帝以江充治巫蛊遂掘蛊于太子宫得桐木人道源注风俗通梧桐生峯阳山岳石上採东南孙枝为琴声甚雅祖台之志怪騫保至坛丘坞上北楼宿暮鼓二中有人著黄练单衣白袷将人持炬火上楼保惧止壁中须臾有二婢迎一女子上与白袷人入帐中宿未明白袷人辄先去如是四五宿后向晨白袷人纔去保因入帐中持女子问向去者谁答曰桐郎即道东庙树是至暮鼓二中桐郎来保乃斫取之縛著楼柱明日视之形如人长三尺馀檻送诣丞相渡江未半风浪起桐郎得投入水风浪乃息尔雅守宫槐叶昼晷宵炕注槐叶昼日晷合而夜炕布者名曰守宫槐王筠寓直诗霜被守宫槐风惊护门草○列仙传修

羊公化石羊汉景帝置之灵台上后去不知所在○言此桐生于宫井故隣宫之槐犹以类颦眉也而妬之今惟见红樱之繁任人携簞其下焉当日深宫之绽衣啼泪者竟安往哉灰劫之餘石羊谁辨亦可以极今古兴亡之痛也已

秋日晚思

桐槿日零落。雨馀方寂寥。枕寒庄蝶去。窗冷胤萤销。

取适琴将酒。忘名牧与樵。平生有游旧。一一在烟宵。

春宵自遣

地胜遗尘事。身閒念歲华。晚晴风过竹。深夜月当花。

石乱知泉咽。苔荒任迳斜。陶然恃琴酒。忘却在山家。

七夕偶题

宝婺摇珠珮。常娥照玉轮。灵归天上匹。巧遗世间人。

花果香千户。笙竽滥四隣。明朝晒犊鼻。方信阮家贫。

△宝婺婺女星也左传注婺女为已嫁之女织女为处女徐陵玉台新咏序金星与婺女争华谢惠连牛女诗云汉有灵匹用乞巧事一作溢一作郎竹林七贤论阮咸好酒而贫旧俗七月七日晒衣诸阮庭中烂然莫非绋锦咸乃豎长竿以大布犊鼻褌曝于庭中曰未能免俗聊复尔尔

灵仙阁晚眺寄郢州韦评事

愚公方住谷。仁者本依山。共誓林泉志。胡为樽俎间。

华莲开菡萏。荆玉刻孱颜。爽气临周道。岚光入汉關。

满壶从蚁泛。高阁已苔斑。想就安车召。宁期负矢还。

潘游全璧散。郭去半舟閒。定笑幽人迹。鸿轩不可攀。

△灵仙阁无考按诗有华莲荆玉周道汉關等句阁必在陕州境也唐书郢州东平郡属河南道水经注时水又北迳杜山北有愚公谷齐桓公时公隐于谿隣人有认其驹者公以与之故

谓愚公寰宇记愚公谷在临淄县西二十五里晏子春秋不出樽俎之间而折衝千里之外晏子是也注见上卷一作出尔雅酒有泛齐浮蚁在上洗洗然汉书武帝以安车蒲轮召申公汉书相如为中郎将建节使蜀太守以下郊迎县令负弩矢先驱晋书潘岳与夏侯湛并美姿容行止同輿接茵京师谓之连璧郭泰事见前五君咏交吕既鸿轩攀嵇亦凤举

幽居冬暮

羽翼摧残日。郊园寂寞时。晓鸡惊树雪。寒鹭守冰池。

急景忽云暮。颓年寝已衰。如何匡国分。不与夙心期。

过姚孝子庐偶书

拱木临周道。荒庐积古苔。鱼因感姜出。鹤为弔陶来。

两鬓蓬常乱。双眸血不开。圣朝敦尔类。非独路人哀。

△华阳国志姜诗事母至孝妻龐氏奉顺尤笃姑嗜鱼鱠又不能独食夫妇尝力作供鱠呼隣母共之舍侧忽有涌泉每旦辄出双鲤鱼常以供母膳晋书陶侃丁母艰在墓下忽有二客来弔不哭而退仪服鲜洁知非常人随而看之但见双鹤飞而冲天

赋得月照冰池

皓月方离海。坚冰正满池。金波双激射。璧彩两参差。

影占徘徊处。光含的皪时。高低连素色。上下接清规。

顾兔飞难定。潜鱼跃未期。鹊惊俱欲遶。狐听始无疑。

似镜将盈手。如霜恐透肌。独怜游翫意。达晓不知疲。

△金波注见上卷尚书中候甲子冬至日月如悬璧曹植诗明月炤高楼流光正徘徊上林赋的皪江靡梁简文帝诗青山衔月规顾兔注见上卷易卦通验大雪鱼负冰郑玄注负冰上近冰也魏武短歌月明星稀乌鹊南飞遶树三匝无枝可依郭縁生述征记河冰始合要须狐行云此物善听听冰下无水声然后过河枚乘月赋蔽修堞而如镜陆机诗安寝北堂上明月入我牖照之有馀辉揽之不盈手李白诗牀前明月光疑是地上霜

永乐县所居一草一木无非自栽今春悉已芳茂因书即事一章

手种悲陈事。心期玩物华。柳飞彭泽雪。桃散武陵霞。

枳嫩栖鸾叶。桐香待凤花。绶藤萦弱蔓。袍草展新芽。

学植功虽倍。成蹊迹尚赊。芳年谁共玩。终老邵平瓜。

△唐书永乐县属河中府武德元年置后汉仇览传枳棘非鸾凤所栖桐花注见前王维诗印绶隔垂藤袍草注见前史记桃李不言下自成蹊汉书邵平秦东陵侯汉为布衣种瓜长安城东

南潭上亭讌集以疾后至因而抒情

马卿聊应召。谢傅已登山。歌发百花外。乐调深竹间。

鹄舟萦远岸。鱼钥启重关。鹭蝶如相引。烟萝不暇攀。

佳人启玉齿。上客颌朱颜。肯念沉痾士。俱期倒载还。

△淮南子龙舟鹄首鱼钥注见前昭明太子七契启玉齿而安歌招魂美人既醉朱颜酡些晋山简传儿童歌云日夕倒载归酩酊无所知

寒食行次冷泉驿

驿途仍近节。旅宿倍思家。独夜三更月。空庭一树花。

介山当驿秀。汾水遶关斜。自怯春寒苦。那堪禁火赊。

△水经注袁崧郡国志曰介休县有介山有绵上聚有之推庙寰宇记介山在汾州灵石县东三十里昔介子推隐于此因名水经汾水出太原汾阳县北管涔山南至汾阴县北西注于河唐书汾州灵石县有阴地闕琴操晋文公出亡子绥割股以啖之文公复国忘其赏子绥作龙蛇之歌而隐文公求之不出乃燔左右木子绥抱木而死文公哀之令人是日不得举火即寒食节也

寄华岳孙逸人

灵岳几千仞。老松逾百寻。攀崖仍蹑壁。瞰叶复眠阴。

海上呼三岛。斋中戏五禽。唯应逢阮籍。长啸作鸾音。

△魏方伎传华陀晓养性术名五禽之戏谓虎鹿熊猿鸟也体中不快起作一禽之戏薛道衡诗盘跚五禽戏晋书阮籍尝于苏门山遇孙登与商略终古及栖神导气之术登皆不应籍因长啸而退至半岭闻有声若鸾凤之音响动崑谷乃登之啸也

戏题赠稷山驿吏王全

绛台驿吏老风尘。耽酒成仙几十春。过客不劳询甲子。惟书亥字与时人。

△原注全为驿吏五十六年人称有道术往来多赠诗章○唐书稷山县属绛州县在州城西五十五里左传晋悼夫人食舆人之城杞者绛县人或年长矣无子而往与于食使之年曰臣生之歲正月甲子朔四百有四十五甲子矣其季于今三之一也吏走问诸朝师旷曰七十三年矣史赵曰亥有二首六身下二如身是其目数也士文伯曰然则二万六千六百有六旬也赵孟石之而谢过焉

和韦潘前辈七月十二日夜泊池州城下先寄上李使君

桂含爽气三秋首。蓂吐中旬二叶新。正是澄江如练处。玄晖应喜见诗人。

△旧唐书池州属江南西道本隋宣城郡之秋浦县武德四年置池州一作三误帝王世纪尧时蓂莢每月朔生一莢月半生十五莢望后日落一莢月小尽则一莢不落观之以知晦朔谢朓晚登三山诗餘霞散成绮澄江淨如练李白诗解道澄江淨如练令人长忆谢玄晖按玄晖尝为宣城内史池州本宣城郡地故末二语云然

花下醉

寻芳不觉醉流霞。倚树沉眠日已斜。客散酒醒深夜后。更持红烛赏残花。

所居永安县久旱县宰祈祷得雨因赋诗

甘膏滴滴是精诚。昼夜如丝一尺盈。祗怪间阎喧鼓吹。邑人同报束长生。

△张协诗密雨如散丝道源注晋书束皙太康中郡大旱皙为邑人请雨三日而雨注衆以皙诚感为作歌曰束先生通神明请天三日甘雨零我黍以育我稷以生何以畴之报束长生

李义山诗集注卷二下

●李义山诗集注卷三上

吳江朱鶴齡撰

正月十五夜闻京有灯恨不得观

月色灯光满帝都。香车寶辇隘通衢。身闲不睹中兴盛。羞逐乡人赛紫姑。

赠赵协律皙

俱识孙公与谢公。二年歌哭处还同。已叨邹马声华末。更共刘卢族望通。

南省恩深宾馆在。东山事往妓楼空。不堪岁暮相逢地。我欲西征君又东。

△唐六典隋太常协律郎二人皇朝因之旧唐书王质传质在宣城辟崔珣刘蕡裴夷直赵嘏为从事皆一代名流本集有为安平公兖州奏赵皙充观察判官状晋书孙绰字兴公博学善属文除著作佐郎袭爵长乐侯谢公谢安也一作皆邹阳司马相如俱为梁孝王賓客原注愚与赵俱出今吏部相公门下又同为故尚书安平公所知复皆是安平公表姪○刘卢注见中卷陆游笔记唐人本以尚书省在大明宫之南故谓之南省谢安传安常住临安山中每游赏必以妓女从

摇落

摇落伤年日。羈留念遠心。水亭吟断续。月幌梦飞沉。

古木含风久。疎萤怯露深。人闲始遥夜。地迴更清砧。

结爱曾伤晚。端忧复至今。未谙沧海路。何处玉山岑。

滩激黄牛暮。云屯白帝陰。遥知霑洒意。不减欲分襟。

△楚词靚杪秋之遥夜谢庄月赋端忧多暇水经江水又东迳黄牛山注下有滩名曰黄牛滩南岸重岭迭起最外高崖间有石如人负刀牵牛人黑牛黄成就分明行者謡曰朝发黄牛暮宿黄牛言水路纡深迴望如一矣宜都记自黄牛滩东入西陵界至峡口一百馀里郡国志公孙述据蜀自称白帝号鱼复为白帝城杜甫诗不堪垂老髯还对欲分襟

滞雨

滞雨长安夜。残灯独客愁。故乡云水地。归梦不宜秋。

偶题二首

小亭閒眠微醉消。山榴海柏枝相交。水文簟上琥珀枕。傍有堕钗双翠翘。
清月依微香露轻。曲房小院多逢迎。春丛定是饶栖鸟。饮罢莫持红烛行。

△东宫旧事有乌韬赤花双文簟琥珀枕注见上卷七启扬翠羽之双翘

月

过水穿楼触处明。藏人带树遶含清。初生欲缺虚惆怅。未必圆时即有情。

夜冷

树遶池宽月影多。村砧坞笛隔风萝。西亭翠被馀香薄。一夜将愁向败荷。

△左传楚子翠被豹舄招魂翡翠珠被烂齐光些

正月崇让宅

密锁重闌掩绿苔。廊深阁迥此徘徊。先知风起月含晕。尚自露寒花未开。

蝙拂帘旌终展转。鼠翻牕网小惊猜。背灯独共馀香语。不觉犹歌起夜来。

△广韵晕日月旁气月晕则多风王褒闕山月风多晕更生道源注南史柳世隆命典籤李党取笔题帘箔旌招魂网户朱缀铣曰织网于户上以朱缀之程大昌曰网户刻为连文递相缀属其形如网后世遂有直织丝网张之簷窗以护鸟雀者元微之诗网索西临太液池是也一作立一作夜起柳恹起夜来曲飒飒秋桂响悲君起夜来

城外

露寒风定不无情。临水当山又隔城。未必明时胜蚌蛤。一生长共月亏盈。

△吕氏春秋月望则蚌蛤实羣陰盈月晦则蚌蛤虚羣陰缺

撰彭阳公志文毕有感

延陵留表墓。岷首送沉碑。敢伐不加点。犹当无愧辞。

百生终莫报。九死谅难追。待得生金后。川原亦几移。

△旧唐书令狐楚临没谓其子曰吾生无益于人勿请谥号葬日勿请鼓吹志铭但志宗门秉笔者无择高位卒年七十二道源注方輿胜览延陵季子墓在晋陵县北七十里申浦之西孔子常题曰呜呼有吴延陵季子之墓旧石湮灭唐玄宗命殷仲容摹以传注见中卷用禰衡赋鸚鵡事见上卷后汉书郭泰卒刻石立碑蔡邕为文谓卢植曰吾为碑铭多矣皆有惭德惟郭有道无愧色耳道源注王隱晋书永嘉初陈国项县贾逵石碑中生金人凿取卖卖已复生此江东之瑞也庾信碑文刺史贾逵之碑既生金粟将军卫青之墓方留石麟

北青萝

残阳西入崦。茅屋访孤僧。落叶人何在。寒云路几层。

独敲初夜磬。闲倚一枝藤。世界微尘里。吾宁爱与憎。

△山海经崦嵫山下有虞泉日所入

戏赠张书记

别馆君孤枕。空庭我闭闌。池光不受月。野气欲沉山。

星汉秋方会。關河梦几还。危弦伤遠道。明镜惜红颜。

古木含风久。平芜尽日闲。心知两愁絕。不断若寻环。

幽人

丹灶三年火。苍崖万岁藤。樵归說逢虎。碁罢正留僧。

星斗同秦分。人烟接汉陵。东流清渭苦。不尽照衰兴。

△别赋守丹灶而不顾晋天文志自井十六度至柳八度为鹑首之次秦分野汉帝十一陵在长安

念遠

日月淹秦甸。江湖动越吟。苍桐应露下。白阁自云深。

皎皎非鸾扇。翘翘失凤簪。牀空鄂君被。杵冷女嬃砧。

北思惊沙雁。南情属海禽。關山已摇落。天地共登临。

△史记越人庄舄仕楚为执珪有顷而病楚王曰舄今富贵矣亦思越否使人往听之犹尚越声也登楼赋庄舄显而越吟一作梧白阁注见上卷鸾扇注见上卷后汉舆服志太皇太后皇太后簪以玳瑁为搔长一尺端为花胜上为鳳爵以翡翠为羽毛注见上卷离骚女嬃之婵媛兮注女嬃屈原之姊也楚谓姝为嬃水经注栢归县北有屈原宅宅东北六十里有女嬃庙擣衣石犹存

过故崔兗海宅与崔明秀才话旧因寄旧僚杜赵李三掾

绦帐恩如昨。乌衣事莫寻。诸生空会葬。旧掾已华簪。

共入留賓驿。俱分市骏金。莫憑无鬼论。终负託孤心。

△崔兗海崔戎也杜赵李三掾即杜胜赵哲李潘也注俱见前一作思绦帐马融事见中卷世說王公曰元规欲来吾角巾径还乌衣方輿胜览乌衣巷在秦淮南去朱雀桥不遠王谢子弟所居汉书郭泰卒四方之士千余人皆来会葬注见中卷战国策涓人为君求千里马马已死买其骨五百金幽冥录阮瞻素秉无鬼论有一鬼通姓名作客诣之客甚有才情未及鬼神事反覆甚苦客作色曰鬼神古今圣贤所共传君何独谓无即变为鬼形须臾便灭阮年馀病死

微雨

初随林霭动。稍共夜凉分。窻迴侵灯冷。庭虚近水闻。

南山赵行军新诗盛称游讌之洽因寄一絕

莲幕遥临黑水津。囊鞬无事但寻春。梁王司马非孙武且免宫中斩美人

△南山终南山也唐书节度使有行军司马一人水经汉水又东黑水注之注水出北山南流入汉诸葛亮牋云朝发南郑暮宿黑水指是水也說文囊鞬所以戢弓矢也增韵会箭器鞬弓衣史记孙武子以兵法见吳王王曰可试以妇人乎曰可于是出宫中美入百八十人孙子分为二队以王宠姬二人为队长即三令五申以鼓之右妇人大笑复三令五申鼓之左妇人复大笑遂斩队长二人用其次为队长于是复鼓之皆中规矩绳墨无敢出声

曲江

望断平时翠辇过。空闻子夜鬼悲歌。金輿不返倾城色。玉殿犹分下苑波。

死忆华亭闻唳鹤。老忧王室泣铜驼。天荒地变心虽折。若比阳春意未多。

△司马相如哀二世赋临曲江之隈洲注曲江在杜陵西北五里康骕剧谈录曲江开元中疏凿为胜境其南有紫云楼芙蓉苑其西有杏园慈恩寺花卉环周烟水明媚都人游赏盛于中和上巳之节道源注晋书孝武太元中琅琊王轲之家有鬼歌子夜下苑注见中卷晋书宦人孟玖谮陆机于成都王颖机被收叹曰华亭鹤唳可得闻乎晋书索靖知天下将乱指宫门铜驼曰会见汝在荆棘中耳疑作伤旧唐书太和九年十月郑注言秦中有灾宜兴土工猷之乃濬昆明曲江二池上好为诗每诵杜甫曲江行云江头宫殿锁千门细柳新蒲为谁绿知天寶已前曲江四岸皆有行宫台殿百司廨署思复升平故事乃搆紫云楼彩云亭内出书额左军中尉仇士良以百戏于银台门迎之壬午赐羣臣宴于曲江亭十一月有甘露之变流血涂地京师大骇十二月甲申勅罢修曲江亭馆此诗前四句追感玄宗与贵妃临幸时事后四句则言王涯等被祸忧在王室而不胜天荒地变之悲也

景阳井

景阳宫井剩堪悲。不尽龙鸾誓死期。肠断吴王宫外水。浊泥犹得葬西施。

△注见中卷隋书高颀先入建康晋王广使驰诣颀令留张丽华颀曰昔太公蒙面以斩妲己今岂可留丽华乃斩之于青溪○杨慎曰墨子云西施之沉其美也蓋勾践平吴后沉之于江杜牧所谓逐鸱夷者安知不谓子胥乎皮日休馆娃宫怀古诗响屧廊中金玉步采香径里绮罗身不知水葬归何处溪月湾湾欲効颦李义山景阳井一首亦叶此意

故番禺侯以赃罪致不辜事觉母者他日过其门

饮鸩非君命。兹身亦厚亡。江陵从种橘。交广合投香。

不见千金子。空馀数仞墙。杀人须显戮。谁举汉三章。

△旧唐书广州南海县即汉番禺地有番山禺山襄阳耆旧传吴丹阳太守李衡每欲治家事妻辄不听后密遣人往武陵龙阳泛洲上作宅种柑橘千株衡亡后柑橘成岁得绢数千匹晋书吴隱之隆安中为广州刺史归自番禺其妻刘氏齎沉香一舫隱之见之遂投于湖亭之水寰宇记取投石门内水中后人谓之沉香浦亦谓之投香浦

咏云

捧月三更断。藏星七夕明。纔开飘迴路。旋见隔重城。

潭暮随龙起。河秋压雁声。只应惟宋玉。知是楚神名。

夜出西溪

东府忧春尽。西溪许日曛。月澄新涨水。星见欲销云。

柳好休伤别。松高莫出羣。军书虽倚马。犹未当能文。

△西溪注见上卷山谦之丹阳记东府城地晋简文为会稽王时第也东则丞相?稽王道子府道子领扬州故俗称东府晋书桓温北征鲜卑唤袁虎倚马前作露布文手不辍笔时义山在河东公幕府故云然

效长吉

长长汉殿眉。窄窄楚宫衣。镜好鸾空舞。帘疎燕误飞。

君王不可问。昨夜约黄归。

△后汉马廖疏长安语曰城中好广眉四方且半额庾肩吾诗细腰宜窄衣黄额黄也梁简文帝诗约黄能效月裁金巧作星

柳

江南江北雪初消。漠漠轻黄惹嫩条。灞岸已攀行客手。楚宫先骋舞姬腰。

清明带雨临官道。晚日含风拂野桥。如线如丝正牵恨。王孙归路一何遥。

△南史刘俊之献蜀柳数株枝条甚长状如丝缕

九月于东逢雪

举家忻共报。秋雪堕前峯。岭外他年忆。于东此日逢。

粒轻还自乱。花薄未成重。岂是惊离鬓。应来洗病容。

△于东商于东也

四皓庙

本为留侯慕赤松。汉庭方识紫芝翁。萧何只解追韩信。岂得虚当第一功。

送阿龟归华

草堂归意背烟萝。黄绶垂腰不奈何。因汝华阳求药物。碧松根下茯苓多。

△道源注初学记四百三百二百石皆黄绶一采纯黄圭长丈五尺六十首汉官仪云黄绶缘八十首长丈七尺别录茯苓生大松下二月八月採陰乾唐本草茯苓第一出华山形极龐大雍州南山亦有不如华山

九日

曾共山翁把酒时。霜天白菊绕堦墀。十年泉下无人问。九日樽前有所思。

不学汉臣栽苜蓿。空教楚客咏江蓠。郎君官贵施行马。东阁无因再得窥。

△山翁山简也以比彭阳公一作消息汉书大宛马嗜苜蓿上遣使者採归种之离宫說文江蓠靡芜博物志芎藭苗曰江蓠根曰靡芜楚词览椒兰其若兹兮又况揭车与江蓠周礼设枹再重注枹行马也或曰行马遶舍交木以御衆汉官仪光禄勳门外特施行马以旌别之后世人臣得用行马始此一作閣汉书公孙弘开东阁以延贤人北梦琐言李商隱员外依彭阳令狐楚以笺奏受知相国既没子綯继有幸平之拜疎陇西未常展分重阳日义山詣宅于厅事上留题云云綯觀之慙怅乃扃闭此厅终身不处唐诗纪事綯恶商隱从郑亚之辟疎之重阳日商隱留诗于其厅事云云綯乃补太学博士苕溪渔隱曰唐史义山从王茂元辟其子綯以为忘家恩放利偷合谢不通綯当国商隱归穷綯憾不置则义山此诗必此时作也但綯父名楚商隱又受知于楚诗中楚客之语更不避其家讳何耶钱龙惕笺文宗时李宗闵牛僧孺令狐楚与李德裕大相仇怨德裕相武宗五年虽未尝忘情于大牢然救杨嗣复李珣之死犹有大臣之度大中初立賛皇萌驂乘之祸令狐綯当国举賛皇之客诛剪无子遗矣义山自开成登第后累辟王茂元郑亚卢弘正府三人皆太尉委用故綯尤深恶之十年秉政抑之终于使府綯真险刻寡恩哉

僧院牡丹

叶薄风才倚。枝轻雾不胜。开先如避客。色浅为依僧。

粉壁正荡水。绡帏初卷灯。倾城惟待笑。要裂几多缯。

△韵会绡浅黄色○道源注荡水言花影卷灯言花光帝王世纪妹喜好闻裂缯之声桀为发缯裂之以适其意

赠司勳杜十三员外

杜牧司勳字牧之。清秋一首杜秋诗。前身应是梁江总。名总还曾字总持。

心铁已从干镆利。鬓丝休叹雪霜垂。汉江远吊西江水。羊祜韦丹尽有碑。

△杜牧杜秋传杜秋金陵女也年十五为李錡妾錡叛灭入宫有宠于景陵穆宗即位命秋为皇子传姆皇子壮封漳王郑注用事诬丞相欲去已者指王为根王被罪废削秋因赐归故里予过金陵感其穷且老为之赋诗云云西谿丛语新书李德裕传漳王养母杜仲阳归浙西有诏在所存问南部新书云杜仲阳即杜秋也南史江总字总持笃学有文辞仕梁为尚书僕射入陈历官尚书令陈亡入隋拜上开府魏志注魏武令曰长史王必忠能勤事心如鐵石吴越春秋阖闾使欧冶子造二劍一干将一镆铘杜牧诗今日鬓丝禅榻畔茶烟轻颺落花风○按牧之杜秋娘诗乃自寓天涯迟暮之感耳故此诗有鬓丝休叹雪霜垂之句原注时杜奉诏撰韦碑○晋书羊祜都督荊州甚得江汉之心卒时年五十八百姓于岷山建碑立庙其上望其碑者莫不流涕杜预名之曰堕泪碑通鑑大中三年正月上与宰相论元和循吏孰为第一周墀曰臣尝守土江西闻观察使韦丹功德被于八州没四十年老稚歌思如丹尚存乙亥诏史馆修撰杜牧撰丹遗爱碑以记之

高花

花将人共笑。篱外露繁枝。宋玉临江宅。墙低不碍窥。

△登徒子好色赋此女登墙窥臣三年至今未许

嘲桃

无赖夭桃面。平明露井东。春风为开了。却拟笑春风。

送丰都李尉

万古商于地。憑君泣路岐。固难寻绮季。可得信张仪。

雨气燕先觉。叶陰蝉遽知。望乡尤忌晚。山晚更参差。

△唐书丰都县属忠州义宁二年析临江置

天平公座中呈令狐令公时蔡京在坐京曾为僧徒故有第五句

罢执霓旌上醮坛。慢粧娇树水晶盘。更深欲诉蛾眉歛。衣薄临醒玉艳寒。

白足禅僧思败道。青袍御史拟休官。虽然同是将军客。不敢公然子细看。

△唐书方镇表元和十五年赐郢曹濮节度使号天平军节度使唐诗纪事邕州蔡大夫京者故令狐文公楚镇滑台日于僧中见之曰此童眉目疎秀进退不慑可以劝学乎师从之乃得陪学于相国子弟后以进士举上第寻人学究登科作尉畿服为御史覈狱淮南李相绅忧悸而卒颇传绣衣之称谪居澧州稍迁抚州刺史后假节邕交没而藁殡其地旧唐书大中三年二月贬殿中侍御史蔡京为澧州司马通鑑咸通三年京以左庶子为岭南西道节度使后赐自尽高唐赋霓为旌翠为盖西都赋虹旖旎旌水晶盘注见上卷座中必有官妓故云法苑珠林魏太武时沙门昙始甚有神异足不蹶履跣行泥秽中奋足便净色白如面俗号曰白足阿练也杜甫诗膏袍也自公将军谓天平公唐诗纪事令狐文公在天平后堂宴乐蔡京时在坐故义山诗云云愚按天平公未知为谁若果是楚不应下又出令狐公虽令狐父子先后为中书门下平章事皆可称令公然以此诗五六语証之知必为絢而非楚也白足禅僧拟蔡京青袍御史必义山自谓义山以会昌三年应王茂元之辟始授御史去楚没时久矣史称絢排窄义山谢不与通以九日一诗验之良信然集中酬寄令狐之作不下数首皆在就辟茂元之后何欵此诗又于天平坐中会饮可証絢虽心憾义山未尝显与之絶也九日题诗自是文人恃才本色而絢之城府奸深亦于此见之矣

江上忆严五广休

征南幕下带长刀。梦笔深藏五色毫。逢著澄江不敢咏。镇西留与谢功曹。

△谢朓诗澄江净如练南史朓为齐随王子隆镇西功曹除新安王中军记室

饯席重送从叔余之梓州

莫歎万重山。君还我未还。武關犹怅望。何况百牢關。

访隱

路到层峯断。门依老树开。月从平楚转。泉自上方来。

薤白罗朝饌。松黄暖夜盃。相留笑孙绰。空解赋天台。

△谢朓诗平楚正苍然注平楚丛木广达也维摩经汝往上方界分度四十二恒河沙佛土潘岳闲居赋绿葵含露白薤负霜唐本草薤是韭类有赤白二种白者补而美本草松花曰松黄裴𪔐传奇酒有松醪春文选注孙绰闻天台山神秀可以长往因使图其状遥为之赋

寓兴

薄宦仍多病。从知竟遠游。谈谐叨客礼。休澣接冥搜。

树好频移榻。云竒不下楼。岂關无景物。自是有乡愁。

△休澣即休沐鲍照诗休澣自公日天台赋序逵寄冥搜

东南

东南一望日中乌。欲逐羲和去得无。且向秦楼棠树下。每朝先覓照罗敷。

△乐府陌上桑日出东南隅照我秦氏楼秦氏有好女自名为罗敷

归来

旧隱无何别。归来始更悲。难寻白道士。不见惠禅师。

草径虫鸣急。沙渠水下迟。却将波浪眼。清晓对红梨。

△按集内有赠白道者絕句一首此诗白道士即其人也又李洞有赠三惠师诗韩退之有送惠上人诗亦与义山同时人有引晋释白逵及惠逵者非是

子直晋昌李花

吴馆何时熨。秦台几夜熏。绡轻谁解卷。香异自先闻。

月里谁无姊。云中亦有君。罇前见飘荡。愁极客襟分。

△长安志酉阳杂俎载令狐宅在开化坊牡丹最盛而李商隱诗多言晋昌里第未详按令狐綯字子直以此诗考之晋昌乃綯之居也吴越春秋阖闾城西砚石山上有馆娃宫鳳台事见中卷注

河清与赵氏昆季讌集得拟杜工部

胜槩殊江右。佳名逼渭川。虹收青嶂雨。鸟没夕阳天。

客鬓行如此。沧波坐渺然。此中真得地。漂荡钓鱼船。

△旧唐书河清县属河南府咸亨四年置大基县先天元年改为河清

寓目

园桂悬心碧。池莲饫眼红。此生真逺客。几别即衰翁。

小幌风烟入。高窗雾雨通。新知他日好。锦瑟傍朱栊。

△道源注广韵饫饱也馱也佛书眼以色为食

题道静院院在中条山故王顔中丞所置虢州刺史捨官居此今写真存焉

紫府丹成化鹤羣。青松手植变龙文。壶中别有仙家日。岭上犹多隠士云。

独坐遗芳成故事。褰帷旧貌似元君。自怜筑室灵山下。徒望朝岚与夕曛。

△宣室志河中永乐县道静院居蒲中之胜境文宗时道士邓太玄炼丹于此括地志蒲州河东县雷首山一名中条山亦名首阳山紫府注见上卷神仙传蘓仙公耽升云而玄后化白鹤止郡城东北楼又丁令威亦化白鹤集辽东华表柱抱朴子松树之三千岁者其皮中有聚脂状如龙形王维诗种松皆作老龙鳞壶公事见上卷陶弘景答诏诗山中何所有岭上多白云老子内传受元君神图寶章变化之方及还丹伏火水汞液金之术真诰常月月朝太素三元君常建诗梦寐升九崖杳霭逢元君

赋得桃李无言

夭桃花正发。穠李蕊方繁。应候非争艳。成蹊不在言。

静中霞暗吐。香处雪潜翻。得意摇风态。含情泣露痕。

芬芳光上苑。寂默委中园。赤白徒自许。幽芳谁与论。

△史记桃李不言下自成蹊李贺诗芙蓉泣露香兰笑

登霍山驿楼

庙列前峯迴。楼开四望穷。岭巖岚色外。陂雁夕阳中。

弱柳千条露。衰荷一面风。壶闕有狂孽。速继老生功。

△唐书义宁元年以霍邑赵城汾西灵石置霍山郡有霍山祠水经注河东霍太山有岳庙甚灵鸟雀不栖其林猛虎常守其庭説文鼯小鼠也尔雅有螫毒者或谓之甘口鼠汉书上党郡有壶口關有壶闕县应劭曰黎侯国也寰宇记壶闕在潞州城东二十五里因山似壶故名狂孽谓刘稹唐书高祖兵发太原次灵石县隋将宋老生屯霍邑以拒义师太宗与段志玄自南

原引兵驰下衝老生阵出其背老生兵败投堑刘弘基就斩之遂取霍邑

寄和水部马郎中题兴德驿

仙郎倦玄心。郑驿暂登临。水色潇湘濶。沙程朔漠深。

鷁舟时往复。鸥鸟恣浮沉。更想逢归马。悠悠岳树陰。

△原注时昭义已平

题小松

怜君孤秀植庭中。细叶轻陰满座风。桃李盛时虽寂寞。雪霜多后始青葱。

一年几变枯荣事。百尺方资柱石功。为谢西园车马客。定悲摇落尽成空。

行次昭应县道上送户部李郎中充昭义攻讨

将军大旆扫狂童。诏选名贤賛武功。暂逐虎牙临故绛。遥含鸡舌过新丰。

鱼游沸鼎知无日。鸟覆危巢岂待风。早勒勲庸燕石上。伫光纶綍汉廷中。

△唐书地理志天寶二年分新丰万年置会昌县七载省新丰改会昌为昭应治温泉宫之西北方镇表大厯元年相卫六州节度赐号昭义军节度建中元年昭义节度兼领泽潞二州徙治潞州刘稹传会昌三年昭义节度使刘从諫卒子稹拒命自为留后诏以成德王元逵魏博何弘敬为招讨使与河东刘沔河阳王茂元合兵讨之四年七月郭谊斩稹传首京师左传祁瞒亡大旆之左旃唐书李德裕曰刘稹驂孺子耳汉匈奴传本始二年遣云中太守田顺为虎牙将军出五原左传晋人谋去故绛一统志绛州春秋时属晋即故绛与新田之地汉官仪尚书郎怀香握兰含鸡舌奏事新丰注见中卷丘迟与陈伯之书将军鱼游于沸鼎之中后汉书窦宪登燕然山命班固勒石纪功

水斋

多病欣依有道邦。南塘晏起想秋江。卷帘飞燕还拂水。开户暗虫犹打窗。

更閱前题已披卷。仍斟昨夜未开缸。谁人为报故交道。莫惜鲤鱼时一双。

奉同诸公题河中任中丞新创河亭四韵之作

万里谁能访十洲。新亭云构压中流。河蛟纵翫难为室。海蜃遥惊耻化楼。

左右名山穷远目。东西大道锁轻舟。独留巧思传千古。长与蒲津作胜游。

△唐书河中府河东郡本蒲州属河东道史天官书海旁蜃气象楼台唐书河中府河西县有蒲津關开元十二年铸八牛牛有一人?之牛下有山皆铁柱夹岸以维浮梁

过故府中武威公交城旧庄感事

信陵亭馆接郊畿。幽象遥通晋水祠。日落高门喧燕雀。风飘大树撼熊羆。

新蒲似笔思投日。芳草如茵忆吐时。山下祇今黄绢字。泪痕犹堕六州儿。

△旧唐书交城县属太原府隋分晋阳县置取县西北古交城为名武威公王茂元也本集偶成转韵诗武威将军使中侠一统志信陵亭在开封府城内相国寺前本魏公子无忌胜游之地旧有亭按茂元乃鄜坊节度使王栖曜子故以信陵拟之道源注水经注晋水有唐叔虞祠侧有凉堂杂树交荫希见曦景羁游宦子莫不寻梁契集用相娱慰晋川之中最为胜处一作感稗雅熊好举木引气尔雅注羆猛憨多力能拔树木后汉书班超为官佣书久劳苦投笔歎曰大丈夫当立功异域安能久事笔砚乎谢万春游赋草靡靡以成茵汉书丙吉驭吏嗜酒醉呕丞相车上西曹吏白欲斥之吉曰此不过污丞相车茵耳音支一作只魏畧邯鄲淳作曹娥碑蔡邕题其后曰黄绢幼妇外甥壻白杨修读之即解曹操行三十里乃悟曰黄绢色丝絶字也幼妇少女妙字也外孙女子好字也壻白受辛器辞字也言絶妙好辞与修合用堕泪碑事按茂元开成中授忠武军节度会昌中授河阳军节度旧书地理志忠武军管许陈蔡三州河阳军管孟怀卫三州故曰六州

赠田叟

荷筱衰翁似有情。相逢携手遶村行。烧畬晓映远山色。伐树暝传深谷声。

鸥鸟忘机翻浹洽。交亲得路昧平生。抚躬道直诚感激。在野无贤心自惊。

△韵会畬火种田也杜甫诗烧畬度地偏列子海上有人每旦从鸥鸟游鸥之从者百数其父令取来鸥鸟舞而不下本集太仓箴海翁忘机鸥故不飞

赠别前蔚州契苾使君

何年部落到陰陵。奕世勤王国史称。夜掩牙旗千帐雪。朝飞羽骑一河水。

蕃儿襁负来青塚。狄女壶浆出白登。日晚鸛鵒泉畔猎。路人遥识郅都鹰。

△原注使君遠祖国初功臣也○唐书蔚州兴唐郡属河东道隋雁门郡之灵丘上谷郡之飞狐县地武德六年置蔚州又曰契苾何力其先铁勒别部之酋长贞观六年随其母率衆千餘家诣沙州奉表内附后以军功封凉国公按史记颞顼任地北至幽陵南至交趾陰陵疑即幽陵唐书贞观二十年铁勒九姓大酋领率衆降分置瀚海燕然金微幽陵等九都督府一作三唐书何力三子明光贞明袭爵凉国公光右豹韬卫将军贞司膳少卿牙旗注见中卷谢灵运征赋序羽骑盈途飞旂蔽日青塚注见中卷汉书注白登在平城东南十餘里括地志朔州定襄县本汉平城县东北三十里有白登山山上有台唐书西受降城北三百里有鵕鹑泉寰宇记鵕鹑泉在丰州北胡人饮马于此一作认汉书郅都行法不避贵戚号曰苍鹰景帝拜为雁门太守匈奴竟都死不近雁门

和人题真娘墓

虎丘山下劒池边。长遣游人叹逝川。冢树断丝悲舞席。出云清梵想歌筵。

柳眉空吐效顰叶。榆荚还飞买笑钱。一自香魂招不得。祇应江上独婵娟。

△原注真娘吴中乐妓墓在虎丘山下寺中吴越春秋阖闾死葬于国西北名曰虎丘方輿胜览劒池在虎丘寺磐郢鱼肠之劒在焉故曰劒池庄子西子病心而瞶其里丑人见而效之鲍照诗千金顾笑买芳年

人日即事

文王喻复今朝是。子晋吹笙此日同。舜格有苗旬太遠。周称流火月难穷。

镂金作胜传荆俗。翦綵为人起晋风。独想道衡诗思苦。离家恨得二年中。

△董勋答问正月七日为人日易七日来复列仙传王子晋七月七日乘白鹤驻缙氏山头书七旬有苗格诗七月流火荆楚岁时记人日翦綵为人或镂金箔帖屏风上亦戴之头髻贾充典戒人日造华胜相遗又刘臻妻陈氏进见仪曰人日上人胜于人薛道衡人日思归诗入春才七日离家已二年人归落雁后思发在花前

春日寄怀

世间荣落重逡巡。我独丘园坐四春。纵使有花兼有月。可堪无酒又无人。

青袍似草年年定。白髮如丝日日新。欲逐风波千万里。未知何路到龙津。

△道源注任昉知己赋过龙津而一息望凤条而再翔

和刘评事永乐闲居见寄

白社幽闲君暂居。青云器业我全疎。看封谏草归鸾掖。尚贲衡门待鹤书。

莲耸碧峯關路近。荷翻翠扇水堂虚。自探典籍忘名利。欹枕时惊落蠹鱼。

△晋书董京与陇西计吏俱至洛阳逍遥吟咏常宿白社中五君咏仲容青云器掖殿旁小门也杨汝士诗文章旧价留鸾掖北山移文鹤书赴陇善注萧子良古今篆隶文体曰鹤头书与偃波书俱诏版所用在汉谓之尺一简彷彿鹄头故有其称谓莲花峯

和马郎中移白菊见示

陶诗只採黄金实。郢曲新传白雪英。素色不同篱下发。繁花疑自月中生。

浮杯小摘开云母。带露全移缀水精。偏称含香五字客。从兹得地始芳荣。

△玉函方甘菊九月上寅日採名曰金精宋玉对楚王问客有歌于郢中者曰下里巴人属而和者数千人人为阳春白雪国中和者不过数人谢希送琴论白雪师旷所作商调曲也谢灵运永嘉记百卉正发时聊以小摘供日郭颂魏晋世语司马景王命中书郎虞松作表再呈不可意令松更定之经时竭思不能改中书郎锺会取草视为定五字松悦服以呈景王王曰不当尔耶松曰锺会也王曰如此可大用沉佺期诗五字擢英才

喜闻太原同院崔侍御台拜兼寄在台三二同年之什

鹏鱼何事遇屯同。云水升沉一会中。刘放未归鸡树老。邹阳新去兔园空。

寂寥我对先生柳。赫奕君乘御史骢。若向南台见莺友。为传垂翅度春风。

△魏志刘放字子弃涿郡人説王松附太祖以放参司空军事后与孙资久典机任夏侯献曹肇心不平殿中有鸡栖树二人相谓曰此亦久矣其能复几放资惧陰图间之荐曹爽为大将军献肇皆免急就篇注皂荚树一名鸡栖雪赋梁王不悦游于兔园乃置旨酒命賓友召邹生延枚叟陶潜集有五柳先生传后汉书桓典拜侍御史常乘骢马京师语曰行行且止避骢马御史通典御史台亦谓之兰台寺梁及后魏北齐或谓之南台魏制有公事百官朝会名簿自尚书令僕以下悉送南台莺友和乐之友注见中卷冯异传始虽垂翅回谿终能奋翼渰池

喜雪

朔雪自龙沙。呈祥势可嘉。有田皆种玉。无树不开花。

班扇慵裁素。曹衣讵比麻。鹅归逸少宅。鹤满令威家。

寂寞门扉掩。依稀履迹斜。人疑游麴市。马似困盐车。

洛水妃虚妬。姑山客漫夸。联辞虽许谢。和曲本惭巴。

粉署闱全隔。霜台路正赊。此时倾贺酒。相望在京华。

△注见上卷雪赋盈尺则呈瑞于丰年注见上卷班婕妤怨歌行新製齐纨扇皎洁如霜雪曹风麻衣如雪法书要录王羲之性好鷺山陰昙〈左石右襄〉村有道士养好者十馀王往求市易道士言府君若能自屈书道德经两章便合羣以奉王住半日为写毕笼鹅以归白居易诗雪似鹅毛飞散乱搜神后记丁令威本辽东人后化白鹤归集城门华表柱空中言曰有鸟有鸟丁令威去家千年今始归谢惠连雪赋皓鹤夺鲜白居易雪诗舞鹤庭前毛稍定录异传汉时大雪积地大馀洛阳令身出按行至袁安门无有路谓安已死除雪入户见安僵卧问何以不出曰大雪人皆饿不宜干人用东郭先生事见上卷束皙赋重罗之麴尘飞雪白张説对雪诗积如沙照月散似麴从风白居易雪诗北市风生飘散麴东楼日出照凝酥战国策骥服盐车而上大行梁简文帝雪诗盐飞乱蝶舞洛神赋飘飘兮若流风之迴雪庄子藐姑射之山有神人焉肌肤若冰雪用谢道韞事见上卷注见前琴赋绍陵阳度巴人注皆琴曲汉官仪省中皆胡粉涂壁故曰粉署通典御史为风霜之任故曰霜台

柳枝五首

有序

柳枝。洛中里娘也。父饶好贾。风波死湖上。其母不念他儿子。独念柳枝。生十七年。涂粧绾髻未尝竟。已复起去。吹叶嚼蕊。调丝〈左扌又仄〉管。作天海风涛之曲。幽忆怨断之音。居其傍。与其家接。故往来者闻十年。尚相与疑其醉眠。梦断不娉。余从昆让山。与柳枝居为近。他日春曾陰。让山下马柳枝南柳下。咏紫燕台诗。柳枝惊问谁人有此。谁人为是。让山谓曰。此吾里中少年叔耳。柳枝手断长带。结让山为赠叔乞诗。明日。余比马出其巷。柳枝丫鬟毕粧抱立扇下。风鄣一袖指曰。若叔是。后三日隣当去溅裙水上。以博香山待。与郎俱过。余诺之。会所友有偕当诣京师者。戏盗余卧装以先。不果留。雪中。让山至。且曰。为东诸侯取去矣。明年。让山复东。相背于戏上。因寓诗以墨其故处云。

花房与蜜脾。蜂雄蛺蝶雌。同时不同类。那复更相思。

本是丁香树。春条结始生。玉作弹碁局。中心亦不平。

嘉瓜引蔓长。碧玉水寒浆。东陵虽五色。不忍值牙香。

柳枝井上蟠。莲叶浦中乾。锦鳞与绣羽。水陆有伤残。

画屏绣步障。物物自成双。如何湖上望。只是见鸳鸯。

△説文〈左扌 又仄〉一指按也南都赋弹琴〈左扌 又仄〉籥一本有物字陈启源曰丫鬟谓头上梳双髻未适人之粧也辛延年咏胡姬两鬟何窈窕正指十五岁时刘禹锡诗云花面了头十三四句音笺北史窦泰母梦风雷有娠期而不産甚惧有巫者曰度河湔裙産子必易便向水所忽见一人曰当生贵子可徙而南母从之俄而生泰及长为御史中尉玉烛宝典元日至晦日并为酺食士女湔裙度厄史记索隠戏上在新丰县东二十里戏亭北孟康曰水名也本草丁香出交广木类桂高丈馀叶似栌陵冬不凋花圆细黄色其子出枝蕊上如丁子中有龕大如山茱萸者谓之母丁香按陈藏器云丁香击之则顺理而解为两向杜诗丁香体柔弱乱结枝犹垫盖其合则为结也注见上卷去声阮籍诗昔闻东陵瓜近在青门外连畛距阡陌子母相钩带五色曜朝日嘉賓四面?治去声言种非其所鲍照芙蓉赋戏锦鳞而夕映曜绣羽以晨过

燕台四首

风光冉冉东西陌。几日娇魂寻不得。蜜房羽客类芳心。冶叶倡条偏相识。

暖蔼辉迟桃树西。高鬟立共桃鬟齐。雄龙雌鳳杳何许。絮乱丝繁天亦迷。

醉起微阳若初曙。映帘梦断闻残语。愁将铁网罟珊瑚。海濶天翻迷处所。

衣带无情有宽窄。春烟自碧秋霜白。研丹擘石天不知。愿得天牢锁冤魄。

夹罗委篋单绡起。香肌冷衬琤琤珮。今日东风自不胜。化作幽光入西海。

△蜜房蜂房也郭璞蜂赋亦託名于羽族花丛无所不入一作共立春心如絮乱丝繁天若有情亦当迷矣微阳夕阳也注见上卷高唐赋云无处所吕氏春秋石可破也而不可夺坚丹可磨也而不可夺赤道源注汉书戴匡六星六曰司灾在魁中贵人之牢孟康曰贵人牢曰天理即天牢也情不得伸故曰冤魄一作眠冤魄锁天牢幽光入西海皆所谓幽忆怨断之音也

右春

前阁雨帘愁不卷。后堂芳树陰陰见。石城景物类黄泉。夜半行郎空柘弹。

绡扇唤风闾阖天。轻帷翠幕波渊旋。蜀魂寂寞有伴未。几夜瘴花开木棉。

桂宫留影光难取。嫣薰兰破轻轻语。直教银汉堕懷中。未遣星妃镇来去。

浊水清波何异源。济河水清黄河浑。安得薄雾起绡裙。手接云輶呼太君。

△石城注见上卷宋玉讽赋君不御兮妾谁怨死日将至兮下黄泉文选注古史考云柘树枝长而劲鸟集之将飞柘起弹鸟乌乃呼号因名乌号弓道源注南部烟花记陈宫人喜于春林放柘弹汉书注闾阖天门也道源注帷幕风动如旋波之有文一作魄蜀都赋鸟生杜宇之魄木棉注见中卷桂宫谓月宫洛神赋含辞未吐气若幽兰星妃谓织女说文妃匹也梁范静妻沉氏竹火笼诗氤氲拥翠被出入随绡裙真诰驾风骋云輶道源注道书有太极道君太虚上真元君

右夏

月浪衝天天宇湿。凉蟾落尽疎星入。云屏不动掩孤颿。西楼一夜风箏急。

欲织相思花寄遠。终日相思却相怨。但闻北斗声迴环。不见长河水清浅。

金鱼锁断红桂春。古时尘满鸳鸯茵。堪悲小苑作长道。玉树未怜亡国人。

瑶琴愔愔藏楚弄。越罗冷薄金泥重。帘鉤鸚鵡夜惊霜。唤起南云绕云梦。

双璫丁丁联尺素。内记湘川相识处。歌唇一世衔雨看。可惜馨香手中故。

△风箏注见上卷一作识杜甫诗七星在北户河汉声西流古诗河汉清且浅道源注金鱼即鱼钥也一品集平泉庄有剡溪之红桂茵褥也西京杂记飞燕为皇后其女弟上遗鸳鸯褥南史文惠太子求东田起小苑用陈后主事见上卷一作瑟稽康琴赋乱曰愔愔琴德不可测兮艺文类聚后汉蔡邕好琴道每一曲製一弄琴歷曰琴曲有蔡氏五弄又有九引九曰楚引锦裙记惆悵金泥簇蝶裙陆机赋指南云以寄钦高唐赋序昔者楚襄王与宋玉游于云梦之台望高唐之观即前诗玉璫缄札

右秋

天东日出天西下。雌凤孤飞女龙寡。青溪白石不相望。堂中遠甚苍梧野。

冻壁霜华交隱起。芳根中断香心死。浪乘画舸忆蟾蜍。月娥未必婵娟子。

楚管蛮絃愁一櫂。空城舞罢腰支在。当时欢向掌中销。桃叶桃根双姊妹。

破鬟矮堕凌朝寒。白玉燕钗黄金蝉。风车雨马不持去。蜡烛啼红怨天曙。

△通卦验鳳仁鸟也雄曰鳳雌曰凰左传帝赐夏孔甲乘龙河汉各二有雌雄法苑珠林梁释

法聪临泉有雌龙雄龙各就手取食此云女龙即雌龙也陈启源曰按古今乐录云神弦歌十一曲五曰白石郎六曰清溪小姑青溪白石正指此也搜神后记云沙门昙遂入青溪梦一妇人曰我是青溪庙中姑不相望言杳隔也谢朓诗云去苍梧野月娥谓月中常娥注见上卷一作委矮堕注见中卷玉燕钗注见上卷黄金蝉亦首饰韩偓诗醉后金蝉重

右冬

河内诗二首

鼉鼓沉沉虬水咽。秦丝不上蛮絃絕。常娥衣薄不禁寒。蟾蜍夜艳秋河月。

碧城冷落空蒙烟。帘轻幙重金鈎栏。灵香不下两皇子。孤星直上相风竿。

八桂林边九芝草。短襟小鬟相逢道。入门暗数一千春。愿去闰年留月小。

梔子交加香蓼繁。停辛伫苦留待君。

△孙绰刻漏铭灵虬吐注陰虫承泻秦丝秦箏也通典秦蒙恬始作箏曹植诗秦箏发西气齐瑟扬东讴杜甫诗斟酌常娥寡天寒奈九秋一作濛碧城注见上卷古今注汉顾成庙槐树悉设扶老鈎栏李贺诗啼蛄弔月鈎栏下道源注真诰周灵王有子三十八人子晋太子也是为王子乔灵王第三女名观灵字衆爱于子乔为别生妹受子乔飞解脱网之道又有妹观香成道受书为紫清宫内侍妃领东宫中候真夫人子乔兄弟得道者七人其眉壽是观香之同生兄亦得道晋令车驾出入相风前引先贤传太僕寺丞高岱立一竹竿于前庭其上有枢机标以鸡尾相风色以验吉凶傅玄相风赋栖神乌于竿首孙楚赋建殊才于辰极八桂注见上卷汉旧仪元丰六年甘泉宫產芝九茎金色绿叶朱实夜有光乃作芝房之歌音了本草梔子味辛蓼味苦○仙家相逢以千岁为期惟留待之切故欲去闰年而留月小也

右一曲楼上

阊门日下吴歌遠。陂路绿菱香满满。后溪暗起鲤鱼风。船旗闪断芙蓉干。

轻身奉君畏身轻。双桡两桨樽酒清。莫因风雨罢团扇。此曲断肠惟北声。

低楼小径城南道。犹自金鞍对芳草。

△通典吴歌杂曲并出江东晋宋以来稍有增广梁内人王金珠善歌吴声西曲提要录鲤鱼风九月风也梁简文帝诗灯生阳燧火尘散鲤鱼风李贺诗鲤鱼风起芙蓉老一作倾道源注拾遗记飞燕每轻风至殆欲随风入水暗用此事古今乐录团扇郎歌者晋中书令王珣好捉白团扇与嫂婢谢芳姿有情好嫂捶挞婢过苦王东亭闻而止之芳姿素善歌嫂令歌一曲当

赦之芳姿应声而歌白团扇辛苦五流连是郎眼所见珉闻更问汝歌何道芳姿即改歌云白团扇顛悴非昔容羞与郎相见后人因而歌焉吕氏春秋有娥氏二佚女帝令燕遗二卵北飞不返二女作歌始为北音文心雕龙涂山歌于 人始为南音有娥謡乎飞燕始为北声

右一曲湖中

赠送前刘五经映三十四韵

建国宜师古。兴邦属上庠。从来以儒戏。安得振朝纲。

叔世何多难。兹基遂已亡。泣麟犹委吏。歌凤更佯狂。

屋壁馀无几。焚坑逮可伤。挟书秦二世。坏宅汉诸王。

草草临盟誓。区区务富强。微茫金马署。狼籍鬪鸡场。

尽欲心无窍。皆如面正墙。惊疑豹文鼠。贪窃虎皮羊。

南渡宜终否。西迁冀小康。策非方正士。贡絶孝廉郎。

海鸟悲钟鼓。狙公畏服裳。多岐空扰扰。幽室竟伉伉。

凝邈为时范。虚空作士常。何由羞五霸。直自咎三皇。

别派驱杨墨。他鑣并老庄。诗书资破冢。法制困探囊。

周礼仍存鲁。隋师果禅唐。鼎新麾一举。革故法三章。

星宿森文雅。风雷起退藏。縲囚为学切。掌故受经忙。

夫子时之彦。先生迹未荒。褐衣终不召。白首兴难忘。

感激殊非圣。栖迟异稂。片辞褒有德。一字贬无良。

燕地尊邹衍。西河重卜商。式间真道在。拥簪信谦光。

获预青衿列。叨来绛帐旁。虽从各言志。还要大为防。

勿谓孤寒弃。深忧讪直妨。叔孙谗易得。盗跖暴难当。

雁下秦云黑。蝉休陇叶黄。莫踰巾屨念。容许后升堂。

△家语哀公曰终没吾世弗敢以儒为戏矣汉书惠帝四年除挟书律张晏曰秦律敢有挟书者族汉书鲁共王坏孔子旧宅以广其居闻钟磬琴瑟之声遂不敢复坏于其壁中得古文经传后汉马援传武帝时善相马者东门京铸作铜马法献之诏立马于鲁班门外更名鲁班门曰金马门汉书东方朔公孙弘皆待诏金马门汉书宣帝少喜游侠鬪鸡走马上下诸陵周徧三辅庄子儵与忽谋报混沌之德曰人皆有七窍此独无有尔雅注鼯鼠文采如豹汉武时得此鼠终军知之赐帛百匹又摯虞三辅决录载窦攸事亦同杨子羊质而虎皮见草而悦见狼而战南渡谓晋元帝渡江西迁谓陈后主归隋庄子昔者海鸟止于鲁郊鲁侯御而觴之于庙奏九韶以为乐具太牢以为膳鸟乃眩视忧悲三日而死江淹诗咸池飧爰居钟鼓或愁辛广雅猴一名狙庄子狙公赋茅曰朝三而暮四衆狙皆怒然则朝四而暮三衆狙皆喜又曰猿狙而衣以周公之服彼必齕眙挽裂尽去而后嘽列子大道以多岐亡羊学以多方丧生礼记瞽者无相依依乎其何之终夜有求于幽室非烛何见音莫凝邈虚空蓋指何平叔王夷甫诸人也訾同説文訾诃也曹植书田巴毁五帝罪三王訾五伯于稷下庄子儒以诗礼发冢庄子将为舢篋探囊发匮之盗而为守备则必摄絨膝固扃钥书右秉白旄以麾汉书夏侯胜黄霸皆下廷尉繫狱当死霸因从胜受尚书狱中再踰冬积三岁乃出史记晁错以文学为太常掌故文帝时天下无治尚书者帝遣错受尚书伏生所还以尚书称説诏以为太子舍人后汉书桓谭极言忤之非经帝大怒曰桓谭非圣无法将下斩之良久得解礼记五十异粃注粃粮也史记邹衍如燕燕昭王拥篲先驱列弟子之坐受业焉子夏居西河教授为魏文侯师原注外舅太原公亦受经于公也○按外舅谓王茂元礼记大为之防民犹踰之见论语详庄子盗跖篇

哭遂州萧侍郎二十四韵

遥作时多难。先令祸有源。初惊逐客议。旋骇党人冤。

密侍荣方入。司刑望愈尊。皆因优诏用。实有谏书存。

苦雾三辰没。穷陰四塞昏。虎威狐更假。隼击鸟踰喧。

徒欲心存阙。终遭耳属垣。遗音和蜀魄。易箠对巴猿。

有女悲初寡。无男泣过门。朝争屈原草。庙馁莫敖魂。

迴阁伤神峻。长江极望翻。青云宁寄意。白骨始霑恩。

早岁思东阁。为邦属故园。登舟惭郭泰。解榻愧陈蕃。

分以忘年契。情犹锡类敦。公先真帝子。我系本王孙。

嘯傲張高蓋。從容接短轅。秋吟小山桂。春醉後堂萱。

自歎離通籍。何嘗忘叫閤。不成穿圻入。終擬上書論。

多士還魚貫。云誰正駿奔。暫能誅儻忽。長與問乾坤。

螻蛄三泉路。蟹螯百草根。始知同泰講。微福是虛言。

△唐書遂州遂寧郡屬山南東道舊書太和九年六月京兆尹楊虞卿坐妖言得罪人皆以為冤誣宰相李宗閔于上前極言論列上怒數宗閔之罪叱出之貶明州刺史再貶虔州長史貶吏部侍郎李漢為邠州刺史刑部侍郎蕭瀚為遂州刺史瀚通鑑作瀚唐六典龍朔三年改刑部尚書為司刑太常伯戰國策虎得狐狐曰無啖我天帝令我長百獸我為子先行子隨我後百獸見我能無走乎虎隨狐而行百獸皆走虎不知百獸畏已反以為畏狐也月令立秋日鷹隼始擊文子身在江海之上心在魏闕之下詩耳屬於垣原注公止裴氏一女結褵之明年人喪良人史記屈原為楚懷王左徒王甚任之上官大夫與同列爭寵而心害其能王使原造為憲令原屬草藁未定上官大夫見而欲奪之原不與因讒之一作若左傳若敖氏之鬼不其餒而原注余初謁于鄭舍○按舊唐書太和七年蕭瀚為鄭州刺史義山有居在鄭州故曰故園蕭氏乃蕭梁之後注見上卷文選注淮南王安好士八公之徒分造詩賦或稱大山小山猶詩有大雅小雅也招隱士桂樹丛生兮山之幽漢紀注籍者為二尺竹牒記其年及名字物色懸之宮門相應乃得入也去聲甘泉賦選巫威兮叫帝閤史記田橫與二客乘傳詣洛陽未至三十里自殺以王禮葬二客穿塚旁皆自刎下從之一作然莊子南海之帝曰儵北海之帝曰忽三輔故事始皇葬驪山起墳高五十丈下周三泉周迴七百步玉篇蟹寒蟬屬梁書武帝听覽餘閒即于同泰寺講說涅槃大品淨名三慧諸經名僧碩學四部听衆常萬餘人○錢龍惕箋瀚坐宗閔虞卿牽累本當時黨魁故曰初驚逐客議旋駭黨人冤也時李訓鄭注竊弄威權凡不附己者目為宗閔德裕黨貶逐無虛日中外震駭連月陰晦人情不安故曰苦霧三辰沒窮陰四塞昏虎威狐更假隼擊鳥逾喧也瀚沒于遂寧故曰遺音和蜀魄易箒對巴猿也訓注誅後文宗始大赦量移貶謫諸臣故曰青雲寧寄意白骨始霑恩也義山至開成二年始登第故曰自歎離通籍何嘗忘叫閤也因瀚為梁武後裔故引同泰微福之事以為虛語傷之之深也

送千牛李將軍赴闕五十韻

照席琮枝秀。當年紫綬榮。班資古直閣。勲伐舊西京。

在昔王綱紊。因誰國步清。如無一戰霸。安有大橫庚。

內豎依憑切。凶門責望輕。中台終惡直。上將更要盟。

丹陛祥烟滅。皇闈杀气橫。喧闐衆狙怒。容易八蠻驚。

檣机寬之久。防风戮不行。素来矜异类。此去岂亲征。
捨鲁真非策。居邠未有名。曾无力牧御。宁待雨师迎。
火箭侵乘石。云桥逼禁营。何时絕刁斗。不夜见欃枪。
屡亦闻投鼠。谁其敢射鲸。世情休念乱。物议笑轻生。
大卤思龙跃。苍梧失象耕。灵衣沾愧汗。仪马困陰兵。
别馆兰薰酷。深宫蜡燄明。黄山遮舞态。黑水断歌声。
纵未移周鼎。何辞免赵坑。空拳转鬪地。数板不沉城。
且欲憑神算。无因计力争。幽囚蘓武节。弃市仲由缨。
下殿言终验。增埤事早萌。蒸鸡殊减饕。屑麴异和羹。
否极时还泰。屯馀运果亨。流离几南度。仓卒得西平。
神鬼收昏黑。姦凶首满盈。官非督护贵。师以丈人贞。
覆载还高下。寒暄急改更。马前烹莽卓。坛上揖韩彭。
扈跸三才正。回军六合晴。此时惟短劒。仍世尽双旌。
顾我由羣从。逢君叹老成。庆流归嫡长。貽厥在名卿。
隼撃须当要。鹏抃莫问程。趋朝排玉座。出位泣金茎。
幸藉梁园赋。叨蒙许氏评。中郎推贵婿。定遠重时英。
政已标三尚。人今伫一鸣。长刀悬月魄。快马骇星精。
披豁慚深眷。睽离动素诚。蕙留春晚晚。松待岁峥嵘。
异县期迴雁。登时已饭鯖。去程风刺刺。别夜漏丁丁。
庾信生多感。杨朱死有情。絃危中妇瑟。甲冷想夫箏。

会与秦楼鳳。俱听汉苑鷟。洛川迷曲沼。烟月两心倾。

△通典千牛刀名后魏有千牛备身掌执御刀因以名职显庆五年置左右千牛府后改为卫置大将军一人将军各一人以副之○详诗语李千牛乃李晟之孙离骚折琼枝而继佩汉官仪公侯皆紫绶传旧唐书舆服志侍中中书令加貂蝉佩紫绶按兴元元年李晟加中书令故云紫绶荣一作阁○通典梁天监六年置左右骁骑领朱衣直阁给仪从隋置备身府即其职左传一战而霸汉文帝本纪大臣使人迎代王王卜之兆得大横占曰大横庚庚予为天王注曰兆筮曰卦卜以荆灼文正横也庚庚横貌淮南子大将受命已则设明衣翦指爪凿凶门而出按唐书代宗时宦官程元振譖杀来瑱河北叛镇率以藉口所谓内竖依憑切也诸节度使各置监军兵柄不一所谓凶门责望轻也宰相张镒忠直为德宗所重卢杞忌之出之于凤翔所谓中台终恶直也朱滔拒命赐爵通义王冀以安之滔反谋益急所谓上将更要盟也注见前家语禹致羣臣于会稽防风氏后至戮而杀之其骨专车礼记我舍鲁奚适矣居邠见孟子○通鑑大历中朱泚入朝留京师建中元年令镇凤翔三年朱滔以蜡书约泚同反马燧获之以闻上召泚慰勉之赐予甚厚泚怏怏思乱旧唐书建中四年十月丙午诏泾原节度使姚令言率兵救哥舒曜泾原军出京城至滻水倒戈谋叛令言不能禁上令载繒綵二车遣晋王往慰谕之乱兵已阵于丹凤阙下促神策军拒之无一人至者上乃与太子诸王妃主百余人出苑北门其夕至咸阳饭数七而过令言率乱兵奉朱泚为主戊申上至奉天圣贤羣辅录风后受金法力墨受準尺宋均曰力墨或作力牧黄帝辅之二帝王世纪黄帝得风后于海隅力牧于大泽风俗通玄冥雨师也广雅雨师曰屏翳韩非子昔者黄帝合鬼神于泰山之上风伯进扫雨师洒道尸子昔者武王崩成王少周公旦践东宫履乘石祀明堂假为天子七年注乘石王所登上车之石也云梯即云梯尔雅彗星为欃枪注亦谓之孛天文录偏指曰彗芒气四出曰孛浪遇切汉书投鼠忌器旧唐书泚自将侵逼奉天军势颇盛于奉天东三里下营大修攻具十一月乙亥杜希全与贼战于漠谷官军不利贼攻城益急矢石雨下人心危惧戊子贼造云梯攻城东北隅兵仗不能及城中震恐相顾失色浑瑊预为地道命纵火焚之贼乃退説文鹵西方咸地也左传晋荀吴败狄于大鹵注大鹵太原晋阳地一行并州起义堂颂我高祖龙跃晋水鳳翔太原册府元 太宗生时有二龙戏于门外井中经三日乃冲天而去象耕注见中卷楚词灵衣兮披披道源注仪马庙中木马也甘泽謡许云封因乘仪马入长安○按高宗葬乾陵在奉天县旧唐书朱泚据乾陵作乐下瞰城中辞多侮慢通鑑自赋攻城斩乾陵松柏以夜继昼泚移帐于乾陵下视城中动静皆见之苍梧失象耕言贼惊陵寝也灵衣仪马皆陵庙中物困陰兵似暗用昭陵石马汗流事旧唐书姚令言迎泚于晋昌里第泚乘马拥从北向烛炬星罗观者万计明日入居含元殿徙居白华殿汉书武帝微行北至池阳西至黄山晋灼曰黄山宫名在槐里长安志右扶风槐里县有黄山宫惠帝三年起禹贡黑水西河惟雍州史记武安君白起大破赵于长平坑降卒四十馀万当作弩司马迁书李陵提步卒不满五千转鬪千里矢尽道穷张空弩冒白刃北向争死敌注弩弩弓也史记智伯与韩魏攻赵晋阳引汾水灌之城不浸者三板○通鑑贼并兵攻城东北隅贼已有登城者上与浑瑊对泣时士卒冻餒又无甲冑瑊激以忠义力战败之入夜泚复来攻城矢及御前三步而坠○通鑑大理卿蒋沆诣行在为贼所得沆絶食称病潜窜得免事见史记○通鑑司农卿段秀实与刘海賓何明礼岐灵岳密谋诛泚泚召秀实等议称帝事秀实勃然起夺源休象笏唾泚面大骂因以笏擊之纔中其额溅血满地贼衆争前杀之海賓等相次死下殿注见中卷原注先时桑道茂请修

奉天城○通鑑建中元年六月术士桑道茂言陛下不出数年暂有离宫之厄臣望奉天有天子气宜高大其城以备非常辛丑命筑奉天城左传公饕餮日双鸡饕人窃更之以鹜御者知之去其肉而以其泊馈注泊肉汁也饕人御者欲使诸大夫怨庆氏减其饕蓋卢蒲癸王何之谋晋愍帝纪永嘉四年冬十月京师饥甚米斗金二两人相食死者大半太仓有麴数千饼麴允屑为粥以供帝○唐书奉天围久食且尽以芦秣帝马大官粝米止二斛围解父老争上壶飧饼饵通鑑时供御止有粝米二斛每伺贼休息夜缒人于城外采芡菁根而进之唐书李怀光与朱泚通谋兴元元年二月上南幸梁州是年八月李晟改封西平郡王去声通典汉置西域都护晋宋以后有督护之官亦其任也齐书广州西南有二江川源深遽别置督护专征讨之见易旧唐书神策将李晟自定州率师赴难军于渭桥兴元元年五月移军光泰门外贼来薄我军奋擊大破之追擊至白华门朱泚姚令言率衆遁去晟收复京城浑瑊戴休顏韩游瓌亦破贼于咸阳泚走至彭原西城屯韩旻斩之传首行在姚令言投泾州源休李子平走鳳翔寻并斩获旧唐书七月壬午车驾至自兴元浑瑊韩游瓌以其衆扈从李晟骆元光尚可孤以其衆奉迎步骑十馀万旌旗数十里唐书节度使赐双旌双节行则建节树六纛按晟子愿愬听宪皆为节度使唐书元和四年诏以晟配飨德宗庙廷其家编附属籍义山本宗室故云犹羣从旧唐书晟十五子长子侗无禄早世此云嫡长岂千牛乃侗之子欤诗貽厥孙谋注见前后汉书许劭论乡党人物每月朔輒更品题故汝南有月旦评道源注世説谢中郎万是王蓝田女婿后汉书班超封定遠侯三尚未详或曰即夏尚忠商尚质周尚文淳于髡传此鸟不鸣则已一鸣惊人古乐府何当大刀头破镜飞上天吴兢解题大刀头刀头有环问夫何时当还也破镜飞上天言月半缺当还也天文志房为天府曰天驷其陰右驂白帖马为房星之精鲍照赋岁峥嵘而催暮古乐府他乡复异县迴雁谓雁书字林鯖杂肴也道源注西京杂记娄君卿厯游五侯之门每旦五侯遗饔之君卿合为鯖世传五侯鯖七迹切古乐府大妇织绮罗中妇织流黄小妇无所为挟瑟上高堂杜甫诗银甲弹箏用道源注唐乐府有相府莲后语讹为想夫怜乐苑曰想夫怜羽调曲也去声

咏怀寄秘阁旧僚二十六韵

年鬓日堪悲。衡茅益自嗤。攻文枯若木。处世钝如錐。

敢忘垂堂戒。宁将暗室欺。悬头曾苦学。折臂反成医。

僕御嫌夫懦。孩童笑叔痴。小男方嗜栗。幼女漫忧葵。

遇炙谁先噉。逢螯即便吹。官衔同画饼。面貌乏凝脂。

典籍将蠹测。文章若管窥。图形翻类狗。入梦肯非黑。

自哂成书簞。终当咒酒卮。懒霑襟上血。羞镊镜中丝。

橐籥言方喻。樗蒲齿讎知。事神徒惕虑。佞佛愧虚辞。

曲艺垂麟角。浮名状虎皮。乘轩宁见宠。巢幕更逢危。

礼俗拘稽喜。侯王忻戴逵。途穷方结舌。静胜但搘颐。

粝食空弹劒。亨衢讎置锥。柏台成口号。芸阁暂肩随。

悔逐迁鶯伴。谁观择虱时。瓮间眠太率。牀下隱何卑。

奋迹登弘阁。摧心对董帷。校讐如有暇。松竹一相思。

△魏畧兰台为外台秘书为内阁○义山释褐秘书省校书郎故有旧僚郭象庄子注与枯木同其不华晋书祖约谓梅陶锺雅曰君汝穎之士利如椎我幽冀之士钝如鎚去声汉书千金之子坐不垂堂梁简文帝纪不欺暗室岂况三光楚国先贤传孙敬在太学编柳为简以写经睡则悬头于梁左传三折肱知为良医楚词九折臂而成医兮吾今而知其然乳兗切○韵会汉书公卿选悞劣弱也或作懦晋书王湛初有隱德皆以为痴兄子济轻之尝诣湛湛谈易玄理微妙叹曰家有名士三十年而不知武帝见济曰卿家痴叔死未曰臣叔殊不痴陶潜责子诗通子垂九龄但覓梨与栗列女传鲁漆室女倚柱而啸隣妇曰欲嫁乎曰我忧鲁君老太子少也妇曰此鲁大夫之忧女曰昔晋客舍我家繫马于园马佚践我园葵使我终岁不厌葵味语林王右军年十一周顗异之时絕重牛心炙座客来未噉先割啖右军乃知名一作更楚词惩于羹者吹壺王逸注言人歡羹而热中心惩之见壺即恐而吹也道源注魏志名士如画地为饼不可啖食世說王右军见杜弘治叹曰面如凝脂眼如点漆此神仙中人东方朔传以蠡测海张晏曰瓠瓢也王献之传此郎亦管中窺豹时见一斑马援传画虎不成反类狗也六韬文王将田卜曰所获非龙非鬻非虎非黑乃伯王之辅果遇太公于渭阳晋书傅迪广读书而不解其义刘柳惟读老子而已迪每轻柳柳曰卿读书虽多而无所解可谓书簏矣唐书李善淹贯古今不能属辞号为书簏晋书刘伶求酒于妻妻諫曰非养生之道宜断之伶曰善当祝鬼神自誓耳卿可致酒五斗吾当断之妻如其言伶祝曰天生刘伶以酒为名一饮一石五斗解醒妇人之言慎不可听于是饮酒御肉块然复醉韵会祝或作呪琴操卞和抱玉而哭昼夜不止涕尽继之以血齐书高帝曰岂有人作曾祖而镊白髮者乎老子天地之间其犹橐籥乎虚而不屈动而愈出马融樛橘赋排五木散九齿葛洪别传洪少好读书至不知基层几道不识樛橘几齿晋书何充与弟準俱崇信释氏谢万讥之云二何佞佛北史文苑传学者如牛毛成者如麟角骆賓王启业成麟角引茅茹而弹冠注见前左传卫懿公好鹤鹤有乘轩者注轩大夫车也左传夫子之在此也犹燕之巢于幕上西征赋危素卵之繫殼甚玄燕之巢幕晋书阮藉见礼俗之士以白眼对之稽喜来弔藉作白眼喜不悻而退晋书戴逵字安道性高洁以礼度自处累徵为散骑常侍不至太元二十年太子太傅会稽王道子少傅王雅詹事王珣上疏曰逵执操贞厉含味独游年在耆老清风弥劭东宫虚德式延事外宜加旌命以参僚侍会病卒支通王维诗支颐问樵客孟尝君传冯驩蒯缞弹劒而歌曰长铗归来乎食无鱼庄子尧舜有天下子孙无置锥之地三辅黄图武帝元鼎二年春起柏梁台帝尝置酒于其上诏羣臣二千石能为七言诗者乃得上坐秘阁掌秘书图籍故称芸阁礼记五年以长则肩随之晋书王导在扬州辟顾和为从事月旦当朝未入停车门外周顗遇之和方择虱夷然不动晋书

毕卓为吏部郎比舍郎酒熟卓夜至其瓮间盗饮之醉卧其下为掌酒者所缚道源注唐书王维私邀孟浩然入内署俄而玄宗至浩然匿牀下一作閣○公孙弘东閣见前汉书董仲舒为博士下帷讲诵弟子转相授业莫见其面

戊辰会静中出贻同志二十韵

大道谅无外。会越自登真。丹元子何索。在巳莫问隣。

蒨璨玉琳华。翱翔九真君。戏掷万里火。聊召六甲旬。

瑶简被灵诰。持符开七门。金铃摄羣魔。绛节何飈飈。

吟弄东海若。笑倚扶桑春。三山诚迴视。九州扬一尘。

我本玄元胄。禀华由上津。中迷鬼道乐。沉为下土民。

託质属太陰。鍊形复为人。誓将覆宫泽。安此真与神。

龟山有慰荐。南真为弥纶。玉管会玄圃。火枣承天姻。

科车遏故气。侍香传灵氛。飘飖被青霓。婀娜佩紫纹。

林洞何其微。下仙不与羣。丹泥因未控。万劫犹逡巡。

荆芜既以薙。舟壑永无湮。相期保妙命。腾景侍帝宸。

△黄庭经心神丹元字守灵道源注内景经真人在巳莫问隣黄庭经赤珠灵裙华蒨璨真诰上元夫人腰垂鳳文琳华之绶执流黄挥精之劒太上正法经九真者九天之陰气凝而成也神仙传得仙者有九品第一上仙号九天真王神仙感遇传玄宗与张果叶法善棊召罗公遠齿坐剑南有果初进名为日熟子张叶以术取每过午必至其日继夜都不到相顾曰莫是罗君否时天寒围炉公遠笑于火中树一筋及此除之遂至叶诘使者云欲到京焰火亘天无路可过值火歇方得度道源注度人经掷火万里流金八衝汉武内传上元夫人授帝六甲左右灵飞之符可以召山灵朝地神真诰仙道有素奏丹符以召六甲西谿丛语古以甲子数日故谓之旬如今陰阳家所云甲子旬中甲午旬中之类瑶简玉简也太上八素经司命著籍玉简丹书沉约华山馆营功德诗玉简黄金编真诰许长史云钦愿崇荣欣想灵诰一作闕黄庭经负甲持符开七门注谓七窍云笈七籤五色焕耀昇入七门真诰老君佩神虎之符带流金之铃云笈七籤左佩玉瑞右腰金铃音精绛节注见中卷說文飈进也○夫子庙堂碑飈飈让席楚词令海若兮舞冯夷一作迴海外更有九州扬尘用麻姑语○封演见闻记国朝以李氏出自老君故崇道教高宗乾封元年还自岱岳过真源诣老君庙追尊为玄元皇帝韵会津气液

也曹昆诗体鍊五灵妙气含云露津佛经六道中有鬼道汉武内传帝下席叩头曰彻下土浊民神仙传仙家有太陰鍊形之法能令日中无影集仙录七魄营侍三魂守宅者或三十年三十年十年三年当血肉再生复质成形必胜于未死之容此名鍊形太陰易貌三官之仙也芳六切一作官道源注覆还也还元辰本宫之泽以安此真神也集仙传西王母者九灵太妙龟山金母也天上天下三界十方女子之登仙者咸隶焉所居宫阙在龟山春山西那之都南岳魏夫人传夫人北诣上清宫玉阙之下诸真君授夫人玉札金文位为紫虚元君领上真司命南岳夫人比秩仙公陶贞白真诰所呼南真即夫人也大戴礼舜时西王母献白玉管十洲记崑崙山三角其一角正西曰玄圃台真诰紫微王夫人谓许长史曰交梨火枣腾飞之药不比于金丹也君心中荆棘相杂是以二树不见酉阳杂俎祁连山上有仙树其实如枣以竹刀剖则苦以木刀剖则酸以芦刀剖则辛以金刀剖则甘或曰此即仙经所谓火枣道源注王母传科车天马霓旌羽幢千乘万骑光耀宫阙云笈七籤存日如鸡子在泥丸中毕乃吐出一气存气为黑色名之尸气次吐二气为日色名之故气次吐三气存气为苍色名之死气真诰人卧室宇当令洁盛则受灵气否则受故气注谓尘浊不正之气一作芬○真诰仙官有侍香之职説文氛祥气也司马彪诗上凌青云霓李贺绿封章事青霓叩额呼宫神真诰仙道十七条在灵书紫文中并琅玕药之所变化也紫纹疑作文道书有上仙中仙下仙抱朴子李公丹法用真丹及五石之水各一升和合如泥上清经真丹秘诀先以黄丹三五斤渐筑令实约厚五寸更下丹轻筑都大令实取鼎为度不计斤数然后以六一泥泥鼎丹房须知药泥十四日黄土蚌粉石灰赤石脂食盐六味各一两为末水调用之名六一泥一作丹误一作因○庄子藏舟于壑夜半有力者负之而趋○言人心稠浊如荆榛之芜秽能剪薙之斯清浄可守永无壑舟之移矣真诰有保命君云笈七籤太乙保命固神定生道源注真诰侍帝宸有八人如世之侍中王子乔郭世干皆为之云林右英王夫人诗相携侍帝宸

和郑愚赠汝阳王孙家箏妓二十韵

水雾怨何穷。秦丝娇未已。寒空烟霞高。白日一万里。

碧嶂愁不行。浓翠遥相倚。茜袖捧琼姿。皎日丹霞起。

孤猿耿幽寂。西风吹白芷。回首苍梧深。女萝闭山鬼。

荒郊白鳞断。别浦晴霞委。长鈞压河心。白道连地尾。

秦人昔富家。绿窻闻妙旨。鸿惊雁背飞。象牀殊故里。

因令五十丝。中道分宫徵。斗粟配新声。娣姪徒纖指。

风流大堤上。怅望白门里。蠹粉实雌弦。灯光冷如水。

羌管促蛮柱。从醉吴宫耳。满内不扫眉。君王对西子。

初花惨朝露。冷臂凄愁髓。一曲送连钱。远别长于死。

玉砌街红兰。粧窗结碧绮。九门十二闕。清晨禁桃李。

△北梦琐言郑愚广州人擢进士第〈左易右文〉厯清要旧唐书咸通三年充岭南西道节度使唐书让皇帝子璿开元中封汝阳王一作水秦丝注见前四句言箏妓之丽九歌辛夷楣兮葯房注葯白芷也九歌山鬼被薜荔兮带女萝杜甫诗山鬼闭门中○四句言箏声之哀鱼书难寄职畧切説文洑水上横木所以渡者地尾地尽处○四句言所思之人不可即集韵秦人薄义有父子争瑟者各入其半故当时名为箏古以竹为之汉书淮南王长死民作歌曰一尺布尚可缝一斗粟尚可舂兄弟二人不相容説文娣女弟也又娣姒妯娌也姪兄之女也○按箏本父子争瑟而起此诗上云鸿惊雁背飞下云斗粟配新声似作兄弟事用岂所传有不同耶清商曲襄阳乐朝发襄阳城莫至大堤宿大堤诸女儿花艳惊郎目白门注见中卷説文蠹水中虫也又衣书中虫俗呼蠹鱼其粉鳞手触则落碎之如银汉书黄帝制十二箏其雄鸣为六雌鸣亦六○此句之义未详羌管笛也马融长笛赋近世双笛从羌起按晋书桓伊令奴吹笛伊抚箏而歌怨诗促蛩柱竹与丝合也道源注西子擅宠故宫内不复扫眉言箏妓同之横吹曲紫骝马长安美少年金络饰连钱尔雅青骊驎曰驎注色斑驳如鱼鳞今连钱驄也言弹入送远别离之曲益增惨凄道源注言箏妓所处华邃桃李之容不可得窥

四年冬以退居蒲之永乐渴然有农夫望岁之志遂作忆雪又作残雪诗各一百言以寄情于游旧

忆雪

爱景人方乐。同云候稍愆。徒闻周雅什。愿赋朔风篇。

欲俟千箱庆。须资六出妍。咏留飞絮后。歌唱落梅前。

庭树思琼蕊。粧楼认粉绵。瑞邀盈尺日。丰待两岐年。

预约延枚酒。虚乘访戴船。映书孤志业。披氅阻神仙。

几向霜阶步。频将月幌褰。玉京应已足。白屋但颀然。

△小雅南山上天同云雨雪其雱卫风北风其凉雨雪其滂雪赋咏南山于周雅歌北风于卫诗韩诗外传草木花多五出雪花独六出注见上卷梁简文帝雪朝诗落梅飞四注雪赋盈尺则呈瑞于丰年后汉书张堪为渔阳太守百姓歌曰桑无附枝麦秀两岐诗传丰年之冬必有积雪汜胜之书雪是五穀精用兔园事见前语林王子猷雪夜访戴安道时戴在剡溪便乘轻船就之既造门不前便返人问其故曰吾本乘兴而行兴尽而返何必见戴谈薺齐太原孙伯翳家贫常映雪读书与王亮范云为莫逆交晋书王恭乘高輿披鹤氅裘涉雪而行孟〈上日

下永〉叹曰真神仙中人也

残雪

旭日开晴色。寒空失素尘。遶墙全剥粉。傍井渐消银。

刻兽摧盐虎。为山倒玉人。珠还犹照魏。璧碎尚留秦。

落日惊侵昼。馀光悞惜春。簷冰滴鹺管。屋瓦镂鱼鳞。

岭霁岚光坼。松暄翠粒新。拥林愁拂尽。著砌恐行频。

焦寝忻无患。梁园去有因。莫能知帝力。空此荷平均。

△何逊雪诗时逐微风起谁言非玉尘左传王使周公閱来聘享有昌歜白黑形盐辞曰国君文足昭也武可畏也则有盐虎形以献功世説嵇叔夜醉如玉山之将頽用照乘珠事见上卷史记秦王得赵璧无意偿城藺相如前曰璧有瑕请指示王因持璧却立曰王必欲急臣臣头与璧俱碎矣李贺诗王子吹笙鹺管长庾信赋秦王馀石仍为雁齿之阶汉后旧陶即用鱼鳞之瓦顾愔新罗国记松树大连抱有五粒子形如桃仁而稍小皮硬浸酒疗风西阳杂俎松凡言两粒五粒粒当言鬣五粒松皮不鳞李贺有五粒小松歌高士传焦光野火烧庐因露寝遭大雪光袒卧不移人以为死就视如故雪霁故去

大卤平后移家到永和县居书怀十韵寄刘韦二前辈二公尝于此县寄居

驱马遶河干。家山照露寒。依然五柳在。况值百花残。

昔去惊投笔。今来分挂冠。不忧悬磬乏。乍喜覆盂安。

甑破宁迴顾。舟沉岂暇看。脱身离虎口。移疾就猪肝。

鬓入新年白。顔无旧日丹。自悲秋穫少。谁惧夏畦难。

逸志忘鸿鹄。清香披蕙兰。还持一杯酒。坐想二公懽。

△大卤注见前唐书会昌四年正月河东都将杨弁逐节度使李石据军府应刘稹三月李义忠克太原生擒弁尽诛乱卒上林赋过鵙鹊望露寒注观名在云阳甘泉宫接太原唐北都故得用之汉书逢萌解冠挂东都城门梁书陶弘景挂冠神武门国语室如悬磬东方朔传连四海之外以为席安于覆盂后汉书孟敏荷甑堕地不顾而去郭泰问其故曰甑已破矣视之何益豫章记晁友夜射白鹿寻踪不见乃见箭著一梓树伐之取二板为牂牁后友船行遇风作

皆没惟友船独全寻看乃向梓板夹扶其船庄子料虎头编虎须几不免虎口哉后汉书大原
闵仲叔徵博士不至客居安邑老病家贫不能肉日买猪肝一片安邑令闻之勅吏常给仲叔
曰岂可以口腹累安邑遂去陈涉传燕雀安知鸿鹄之志哉

李义山诗集注卷三上

●李义山诗集注卷三下

吳江朱鹤龄撰

河阳诗

黄河摇溶天上来。王楼影近中天台。龙头泻酒客寿杯。主人浅笑红玫瑰。
梓泽东来七十里。长沟複堑埋云子。可惜秋眸一眴光。汉陵走马黄尘起。
南浦老鱼腥古涎。真珠密字芙蓉篇。湘中寄到梦不到。衰容自去抛凉天。
忆得蛟丝裁小卓。蛱蝶飞迴大棉薄。绿绣笙囊不见人。一口红霞夜深嚼。
幽兰泣露新香死。画图浅缥松溪水。楚丝微觉竹枝高。半曲新辞写绵纸。
巴陵夜市红守宫。后房点臂斑斑红。堤南渴雁自飞久。芦花一夜吹西风。
晓帘串断蜻蜓翼。罗屏但有空青色。玉湾不钓三千年。莲房暗被蛟龙惜。
湿银注镜井口平。鸾钗映月寒铮铮。不知桂树在何处。仙人不下双金茎。
百尺相风插重屋。侧近嫣红伴柔绿。百劳不识对月郎。湘竹千条为一束。

△玉楼中天台注俱见上卷道源注酒器刻作龙形广州有龙铛李贺诗龙头泻酒邀酒星子虚赋其石则赤王玫瑰晋灼曰玫瑰火齐珠也。戴延之西征记梓泽去洛阳六十里梓泽金谷也中朝贤達所集赋诗犹存是石崇居处此云子似谓如云之女子与杜诗所用不同秋眸注见中卷二句暗用双鱼寄书事当作蛟一作棹非浅缥画图之色楚丝犹云楚弄刘禹锡竹枝词序建平里中儿联歌竹枝吹短笛击鼓以赴节歌者扬袂杂舞含思宛转有淇澳之豔音李贺诗花房夜擣红守宫汉书守宫虫名术家云以器养之食以丹砂满七斤擣治万杵以点女人体终身不灭若有房室之事即脱言可防闲淫逸故谓之守宫道源注石龙子即守宫也图经云长者一尺今出山南襄州安州申州以三月四月八月採去腹中物火乾之按诗云巴陵巴陵正属山南道也玉湾犹云玉川玉溪镜如井口之平道源注杜阳杂编唐同昌公主有九鸾之钗谓月中桂树金茎见上卷相风注见前尔雅鵲伯劳也通卦验伯劳性好单栖言泪痕之多

自桂林奉使江陵途中感怀寄献尚书

下客依莲幙。明公念竹林。纵然膺使命。何以奉徽音。

投刺虽伤晚。酬恩岂在今。迎来新琐闥。从到碧瑶岑。
水势初知海。天文始识参。固惭非贾谊。惟恐后陈琳。
前席惊虚辱。华樽许细斟。尚怜秦痔苦。不遣楚醪沉。
既载从戎笔。仍披选胜襟。洸通伏波柱。帘对有虞琴。
宅与严城接。门藏别岫深。阁凉松冉冉。堂静桂森森。
社内容周续。乡中保展禽。白衣居士访。乌帽逸人寻。
佞佛将成传。耽书或类淫。长怀五羖赎。终著九州箴。
良讯封鸳绮。馀光借玳簪。张衡愁浩浩。沉约瘦悁悁。
芦白疑粘鬓。枫丹欲照心。归期无雁报。旅抱有猿侵。
短日安能驻。低云只有阴。乱鸦衝晒网。寒女簇遥砧。
东道违宁久。西园望不禁。江生魂黯黯。泉客泪涔涔。
逸翰应藏法。高辞肯浪吟。数须传庾翼。莫独与卢谌。
假寐凭书簏。哀吟叩剑铓。未尝贪偃息。那复议登临。
彼美迴清镜。其谁受曲针。人皆向燕路。无乃费黄金

△时义山为桂府观察判官此诗乃寄郑亚者但二史俱不云亚兼尚书疑有误原注公与江陵相国韶叙叔侄按唐书宰相表无名韶者此注疑亦误○竹林七贤阮籍阮咸为叔侄范云诗摄官青琐闥桂林郡瀕海杜甫诗天横醉后参陈琳为曹操管记室庄子秦王召医破痈溃痤者得车一乘痔者得车五乘所治愈下得车愈多张协七命箴醪投川可使三军告注楚与晋战或进王一箪酒王欲与军士共之则少而不徧乃倾酒于水令衆迎流而饮之士卒皆感惠尽力遂大捷。洸水注见中卷后汉书马援为伏波将军征交趾立铜柱为汉之极界投荒杂录爱州九真郡有铜柱马援以表封疆礼记舜弹五弦之琴以歌南风之诗释氏通鑑惠遠居庐山三十年社衆数千著者十八人高僧传彭城刘遗民豫章雷次宗雁门周续之新蔡毕穎之南阳宗炳张莱民张季硕等并弃世遗荣依远居止家语鲁人有独处室者隣之嫠妇室坏趋而託焉鲁人闭户不纳妇曰子何不如柳下惠然嫠不逮门之女鲁人曰柳下惠则可我固不可佛书维摩诘经世号白衣居士陈周弘正有谢勅赉乌纱帽启唐书隋贵臣多服乌纱

帽后渐废贵贱通服折上巾南史刘峻苦所见不博闻有异书必往祈借清河崔慰祖谓之书淫史记百里奚亡秦走宛楚鄙人执之缪公闻其贤以五羖羊皮赎之左传虞人之箴曰芒芒禹迹画为九州扬雄传箴莫善于虞箴作州箴注见上卷史记赵平原君使人于楚欲夸楚为玳瑁簪王筠诗徒歌鹿卢剑空贻玳瑁簪四愁诗序张衡出为河间相时天下渐弊鬱鬱不得志为四愁诗注见中卷左传若舍郑以为东道主西园见上卷一作山误江淹别赋黯然销魂者惟别而已矣述异记蛟人即泉先也又名泉客吳都赋泉室潜织而卷绡渊客慷慨而泣珠音朔晋书王羲之书初不胜庾翼郗愔及暮年方妙尝以草书答庾亮而翼深歎服因与羲之书云吾昔有伯英草书十纸过江狼狽遂乃亡失忽见足下答家兄书焕若神明顿还旧观晋书刘琨为段匹磾所拘为五言诗赠其别驾卢湛琨诗託意非常摅畅幽愤遠想张陈感鸿门白登之事用以激湛湛以常词酬和殊乖琨心重以诗赠之音寻○說文鐔剑鼻也汉书注剑口旁横出者虞翻与客书琥珀不取腐芥磁石不受曲针

送从翁从东川弘农尚书幕

大镇初更帅。嘉賓素见邀。使车无遠近。归路更烟霄。
穩放骅骝步。高安翡翠巢。御风知有在。去国肯无聊。
早忝诸孙末。俱从小隱招。心悬紫云阁。梦断赤城标。
素女悲清瑟。秦娥弄玉箫。山连玄圃近。水接绛河遥。
岂意闻周铎。翻然慕舜韶。皆辞乔木去。遠逐断蓬飘。
薄俗谁其激。斯民已甚忼。鸾皇期一举。燕雀不相饶。
敢共頽波遠。因之内火烧。是非过别梦。时节惨惊飈。
未至谁能赋。中乾欲病瘳。屡曾纡锦绣。勉欲报琼瑶。
我恐霜侵鬢。君先绶挂腰。甘心与陈阮。挥手谢松乔。
锦里差隣接。云台闭寂寥。一川虚月魄。万崦自芝苗。
瘴雨泂间急。离魂峡外销。非關无烛夜。其奈落花朝。
几处逢鸣佩。何筵不翠翘。蛮童骑象舞。江市卖鲛绡。
南诏知非敌。西山亦屡骄。勿贪佳丽地。不为圣明朝。

少减东城饮。时看北斗杓。莫因乖别久。遂逐岁寒凋。

盛幕开高宴。将军问故僚。为言公玉季。早日弃渔樵。

△旧唐书开成元年杨汝士转兵部侍郎其年十二月检校礼部尚书梓州刺史剑南东川节度使四年入为吏部侍郎一作便杜甫诗江上小堂巢翡翠庄子列子御风而行秋兴赋序高阁连云阳景罕曜会稽记天台赤城山土色皆赤岩岫连沓状若云霞天台赋赤城霞起而建标汉书黄帝使素女鼓五十絃瑟悲帝禁不止故破为二十五弦用弄玉事白帖天河谓之银河亦曰绛河庄子因以为甞靡因以为波流甞即頽也郭注变化頽靡世事波流李白诗杨马激頽波白居易诗悲火烧心曲孟郊诗悔至心自烧雪赋相如未至居客之右左传外强中乾韵会瘠渴疾相如瘠渴通作消谓赠诗陈琳阮瑀赤松子王子乔西京赋美往昔之松乔益州记张仪筑益州城城故锦澗也号锦里蔡质汉仪尚书郎入直云台时从翁必以郎官参幕府故云説文洿奔湍也俗谓水湍峻者为洿唐书南诏本哀牢夷后乌蛮别种也居永昌姚州之间铁桥之南西北与吐蕃接天宝后臣吐蕃西山即岷山李宗谔图经岷山巖絶崛立实捍阻羌夷全蜀倚为巨屏唐自肃代后西山三城屡陷吐蕃三辅黄图惠帝更筑长安城城南为南斗形城北为北斗形至今人称汉旧京为斗城杜甫诗秦城近斗杓末二语义山自谓也公玉季未详

李肱所遗画松诗书两纸得四十韵

万草已凉露开图披古松青山徧沧海此树生何峯孤根邈无倚直立撑鸿濛端如君子身挺若壮士胸樛枝势夭矫忽欲蟠挐空又如惊螭走默与奔云逢孙枝擢细叶旖旎狐裘茸邹颠蓍髮软丽姬眉黛浓视久眩目睛倏忽变辉容竦削正稠直婀娜旋敷峯又如洞房冷翠被张穹笼亦若暨罗女平旦粧顔容细疑袭气母猛若争神功燕雀固寂寂雾露常衝衝香兰愧伤暮碧竹慚空中可集呈瑞鳳堪藏行雨龙淮山桂偃蹇蜀郡桑重童枝条亮眇脆灵气何由同昔闻咸阳帝近説嵇山依或著仙人号或以大夫封终南与清都烟雨遥相通安知夜夜意不起西南风美人昔清兴重之犹月钟寶笥十八九香缙千万重一旦鬼瞰室稠迭张羆置赤羽中要害是非皆忽忽生如碧海月死践霜郊蓬平生握中玩散失随奴童我闻照妖镜及与神劒锋寓身会有地不为凡物蒙伊人秉兹图顾盼择所从而我何为者开顔捧灵踪报以漆鸣琴悬之真珠栊是时方暑夏座内若严冬忆昔谢四骑学仙玉阳东千株尽若此路入琼瑶宫口咏玄云歌手把金芙蓉浓蔼深霓袖色映琅玕中悲哉堕世网去之若遗弓形魄天坛上海日高曈曈终骑紫鸾归持寄扶桑翁

△云溪友议开成元年秋高锴司贡籍李肱榜元及第肱乃宗室官止于岳齐二牧一作徧苍庄子云将东游适遭鸿濛注鸿濛气也楚词纷旖旎乎都房左传狐裘靡茸説文颠顶也蓍陈草复生又蓍也○此句难解疑有讹如字庄子毛嫱丽姬人之所美也一作数道源注暨罗女西子也方輿胜览苕罗山在诸暨县南五里庄子伏戏氏得之以袭气母一作重谢朓高松赋集五鳳之光景西阳杂俎不空三藏塔前多老松岁旱时官伐其枝为龙骨以祈雨蓋三藏役龙以其树必有灵也注见前蜀志先主舍东南角篱上有桑树高五丈馀遥望童童如小车蓋

一作修谓秦始皇未详道源注晋法潜隐会稽剡山或问其胜<上又下又>为谁指松曰此苍髯叟也一作佳似指赤松子注见上卷一作青集仙录女仙鲁妙兴居山有钟一口形如偃月神人所送韵会缙帛丹黄色音鸾童○韵会羆网也置捕鸟网也家语赤羽若日一作照妖鑑博物志身毒国镜如八铢钱旧传此镜照见妖魅佩之为天神所福水经注刘曜隐居管涔山夜中忽有二童子入跪曰管涔王献劔一口背有铭曰神劔服御除衆毒曜遂服之劔随时变为五色美人至此言画松初见重于贵室及身名败后流落奴童然此如寶镜神劔终非凡物乃今遂以遗我能无兴亡之感乎按旧唐书王涯传涯家法书名画皆原为垣竑藏之複壁既诛人破垣取之或剔取函奁金寶之饰与其玉轴而弃之观此诗云云岂画松即涯所藏者欤鲍令暉诗客从遠方来赠我漆鸣琴説文枕房室之疏徐曰窻也按通典唐武德七年改上大都督为骁骑尉大都督为飞骑尉帅都督为云骑尉都督为武骑尉后置节度使即都督之任义山尝为节度巡官此云谢四骑言辞去使府耳张籍送胡鍊师归王屋山诗玉阳峯下学长生通志东玉阳山在怀庆府济源县西三十里唐睿宗女玉真公主修道于此有西玉阳山亦其栖息之所道源注汉武内传西王母命侍女安法婴歌玄云之曲杜阳杂编沧州有金莲花研之如泥以间彩绘光辉灿烂与真金无异尔雅崑崙之墟有璆琳琅玕焉吕氏春秋楚人亡乌号之弓左右请求之王曰楚人亡之楚人得之何求也一统志天坛山在济源县西一百二十里王屋山兆其东曰日精西曰月华絶顶有石坛名清虚小有洞天十洲记扶桑在碧海中太真东王君所治处○言此松终当假翼鸾鸟为仙家之玩

戏题枢言草阁三十二韵

君家在河北我家在山西百岁本无业陰陰仙李枝尚书文与武战罢幕府开君从渭南至我自仙游来平昔苦南北动成云雨乖逮今两携手对若牀下鞦夜归碣石馆朝上黄金台我有苦寒调君抱阳春才年顏各少壮髮绿齿尚齐我虽不能饮君时醉如泥政静筹画简退食多相携扫掠走马路整顿射雉翳春风二三月柳密鶯正啼清河在门外上与浮云齐欹冠调玉琴弹作松风哀又弹明君怨一去怨不迴感激坐者泣起视雁行低翻忧龙山雪却杂胡沙飞仲容铜琵琶项直声凄凄上贴金捍拨画为承露鸡君时卧振触劝客白玉盃苦云年光疾不饮将安归我赏此言是因循未能谐君言中圣人坐卧莫我违榆莢乱不整杨花飞相随上有白日照下有东风吹青楼有美人顏色如玫瑰歌声入青云所痛无良媒少年苦不久顾慕良难哉徒令真珠胝裹入珊瑚腮君今且少安听我苦吟诗古诗何人作老大徒伤悲

△义山尝寄居太原神仙传老子生而能言指李树为姓杜甫诗仙李蟠根大尚书谓王茂元旧唐书太和中茂元检校工部尚书镇岭南?昌中为河阳节度使河北诸军讨刘稹茂元亦以本军屯天井唐书渭南属京兆府在华州西五十里仙游县属清源郡又长安志蓋屋县有仙游泽复有仙游宫图经云隋文帝避暑处顏延之诗朋好云雨乖一作鞋史记邹衍如燕昭王筑碣石宫身往师之正义宫在幽州薊县西三十里注见中卷○言其在幕府魏文帝乐府有苦寒行梁元帝纂要白雪阳春皆古歌曲名射雉赋尔乃擎扬挂翳注翳者所以隱射也道源注乐府河间新弄二十一章有风入松琴操昭君在匈奴恨帝始不见遇作怨思之歌后人名为昭君怨注见上卷晋书阮咸字仲容国史纂异元行冲为太常少卿时有于古墓中得铜物似琵琶而身正圆莫有识者元视之曰阮咸所造乐也命匠人改以木其声清雅今呼为阮

咸是也金捍拨注见上卷一作水误江表传南郡献长鸣承露鸡广韵振触也南人以触物为振谢惠连祭古冢文以物振拨之魏畧徐邈为尚书郎时禁酒邈私饮沉酣赵逵问以曹事曰中圣人○説文膾牛百叶也韵会一曰五脏总名集韵或作肱通作脾俗顛字○江总诗盈盈扇掩珊瑚臂

偶成转韵七十二句赠四同舍

沛国东风吹大泽。蒲青柳碧春一色。我来不见隆準人。沥酒空馀庙中客。
征东同舍鸳与鸾。酒酣劝我悬征鞍。蓝山寶肆不可入。玉中仍是青琅玕。
武威将军使中侠。少年箭道惊杨叶。战功高后数文章。怜我秋斋梦蝴蝶。
诘旦九门传奏章。高车大马来煌煌。路逢邹枚不暇揖。腊月大雪过大梁。
忆昔公为会昌宰。我时入谒虚怀待。衆中赏我赋高唐。迴看屈宋由年辈。
公事武皇为铁冠。厯厅请我相所难。我时顛顛在书阁。卧枕芸香春夜阑。
明年赴辟下昭桂。东郊恸哭辞兄弟。韩公堆上跋马时。迴望秦川树如荠。
依稀南指阳台云。鲤鱼食钩猿失羣。湘妃庙下已春尽。虞帝城前初日曛。
谢游桥上澄江馆。下望山城如一弹。鷓鴣声苦晓惊眠。朱槿花娇晚相伴。
顷之失职辞南风。破帆坏桨荆江中。斩蛟断璧不无意。平生自许非忝忝。
归来寂寞灵台下。著破蓝衫出无马。天官补吏府中趋。玉骨瘦来无一把。
手封狴牢屯制囚。直厅印锁黄昏愁。平明赤帖使修表。上贺嫖姚收贼州。
旧山万仞青霞外。望见扶桑出东海。爱君忧国去未能。白道青松了然在。
此时闻有燕昭台。挺身东望心眼开。且吟王粲从军乐。不赋渊明归去来。
彭门十万皆雄勇。首戴公恩若山重。廷评日下握灵蛇。书记眠时吞綵鳳。
之子夫君郑与裴。何甥谢舅当世才。青袍白简风流极。碧沼红莲倾倒开。

我生羸疎不足数。梁父哀吟鸛鹄舞。横行濶视倚公怜。狂来笔力如牛弩。

借酒祝公千万年。吾徒礼分常周旋。收旗卧鼓相天子。相门出相光青史。

△后汉书沛国故秦泗水郡高帝改沛郡汉书高祖为人隆准而龙颜沛郡有高祖庙蓝田山注见首卷一作山本草琅玕一名青珠蜀都赋所云青珠黄环也蕪恭曰琅玕有数种以青者为胜火齐寶也出嶠州以西乌白蛮中及于阗国谓王茂元旧唐书本传茂元虽读书为儒本将家子战国策养由基去杨叶百步射之百发百中本传茂元爱其才以女妻之汉书陈留郡浚仪县故大梁唐书天寶二载分新丰万年置会昌县七载省新丰改会昌为昭应县○据此语卢弘正尝为会昌令二史俱失书高唐诗见上卷犹通通典侍御史一名柱后史谓冠以铁为柱唐书卢弘正初佐刘悟府累擢监察御史沉传师表为江西团练副使入为侍御史本集樊南甲集序两为秘省房中官恣展古籍唐书昭州平乐郡桂州始安郡俱属岭南道郑亚观察桂管辟义山为判官道源注长安志韩公堆驿名在蓝田县南二十五里又有桓公堆亦曰韩公堆也梁戴嵩诗长安树如荠阳台注见上卷一作红一作中一作春江方輿胜览黄陵庙在湘陰县北四十里虞舜庙在长按谢朓集有忝役湘州与吏民别诗谢游桥澄江馆必亦在长沙也朱槿注见上卷义山自桂林奉使至江陵因归朝一作破博物志澹台子羽济河齎千金之璧阳侯波起两蛟夹船子羽左操璧右操剑击蛟皆死既渡以璧投于河河伯跃而归之子羽毁璧而去通志灵台在鄠县东三辅决录第五颉伦之小子洛阳无故人乡里无田宅寄止灵台中或十日不炊崔峒诗灵台暮宿意多违古乐府冉冉府中趋义山归朝选整屋尉本传京兆尹卢弘正奏署掾曹令典章奏按弘正传不言尝为京兆尹必史误辨详诗谱旧唐书中宗三年正月吐蕃宰相论恐热以秦原安乐三州及石门等七關军民归国诏灵武节度使朱叔明邠宁节度使张景绪等各出兵应接十二月以河湟收复追册顺宗宪宗庙号通鑑大中三年五月宁武军乱逐其节度李廓诏以弘正代之时义山从为掌书记旧唐书徐方自王智兴之后军士骄怠有银刀都尤甚前后屡逐主帅弘正在镇期年去其首恶喻之忠义讫于受代军旅无譁曹植书人人自谓握灵蛇之珠傳?灵蛇铭嘉兹灵蛇断而能续飞不须翼行不假足进此明珠预身龙族廷评书记皆幕府官一作生道源注晋书王导补谢尚为掾导谓之曰闻君能作鸛鹄舞一座倾想尚更著衣帻而舞令座下击节为应旁若无人志林云鍾繇弟子宋翼每作一戈如干钩弩又汉军有八牛弩汉书相门出相将门出将义山生平游歷畧见于此篇

五言述德抒情诗一首四十韵献上杜七兄僕射相公

帝作黄金阙仙开白玉京有人扶太极惟岳降元精耿贾官勲大荀陈地望清旂常悬祖德甲令著嘉声经出宣尼壁书留晏子楹武乡传阵法践土主文盟自昔流王泽由来仗国桢九河分合沓一柱忽峥嵘得主劳三顾惊人肯再鸣碧虚天共转黄道日同行后饮曹参酒先和傅説羹即时贤路闢此夜泰阶平愿保无疆福将图不朽名率身期济世叩额虑兴兵感念殽尸露咨嗟赵卒坑傥令安隱忍何以賛贞明恶草虽当路寒松实挺生人言真可畏公意本无争故事留台阁前驱且旆旌芙蓉王俭府杨柳亚夫营清啸频疎俗高谈屡析醒过庭多令子乞墅有名甥南诏应闻命西山莫敢惊寄辞收的博端坐扫揜枪雅宴初无倦长歌底有情檻危

春水暖楼迴雪峯晴移席牵绡蔓迴桡扑绦英谁知杜武库只见谢宣城有客趋高义于今滞
下卿登门惭后至置驿恐虚迎自是依刘表安能比老彭雕龙心已切画虎意何成岂有曾黔
突徒劳不倚衡乘时乖巧宦占象合艰贞废忘淹中学迟迴谷口耕悼伤潘岳重树立马迁轻
陇鸟悲丹觜湘兰怨紫茎归期过旧岁旅梦遶残更弱植叨华族衰门倚外兄欲陈劳者曲未
唱泪先横

△旧唐书杜惊字永裕式方子尚宪宗女岐阳公主会昌四年七月拜中书侍郎同中书门下
平章事寻加左僕射汉郊祀志三神山在海中黄金银为宫阙神异经西北荒中有二金阙高
百文中有金阶西北入两阙中名天门注见上卷汉郎闳传元精所生王之佐臣后汉书耿弇
封好畤侯贾复封胶东侯并图像南宫云台后汉书荀淑为朗陵相陈寔为太丘长皆以德行
称世説正始中人士比论以五荀方五陈唐书惊祖佑相德顺宪三宗拜司徒封岐国公汉纪
注令有先后故有令甲令乙令丙注见前道源注晏子春秋晏子将死凿楹纳书谓妻子曰子壮
而视之及子壮发书书曰布帛不可穷穷不可服事不可穷穷不可壮蜀志建兴三年封诸葛
亮为武乡侯亮推演兵法作八阵图通志荣泽县故城西北有践土台即晋文公盟诸侯处书
传河水分为九道在兖州界平原以北是一柱砥柱也汉书日有中道中道者黄道一曰光道
晋书黄道日之所行也半在赤道外半在赤道内曹参传来者皆欲有言参辄饮以醇酒见説
命见左传注见前钱龙惕笺旧唐书大中三年九月西川节度使杜惊收复维州维州古西戎
地南界江阳岷山连岭而西不知其极北望陇山积雪如玉东望成都如在井底其州在岷山
之孤峯三面临江天寶后河陇继陷惟此州在焉吐蕃利其险要二十年间设计得之遂据其
城号曰无忧城先是李德裕镇西川吐蕃首领悉怛谋以城来降德裕奏之执政者与德裕不
协遽勒还其城至是收复之亦不因兵刃乃人情所归也按维州之争事在太和五年会昌中
德裕复相尝追论之悉怛谋已赠官矣大中继立僧孺党曰敏中令狐綯等共排德裕逐之时
惊有收复维州之功当非执政所喜故诗云恶草虽当路寒松实挺生人言真可畏公意本无
争恶草指敏中诸人也悉怛谋之勒归也吐蕃戮之汉界之上三百余人冤叫呼天擲其婴孩
承以抢槩此实以僧孺鈎党杀降故诗云感激殽尸露咨嗟赵卒坑倘令安隱忍何以賛贞明
也蜀志陈壽与荀勗等定故蜀丞相诸葛亮故事二十四篇以进注俱见上卷风赋清冷冷
愈病析醒唐书惊子裔休述休儒休音气晋书谢安与玄围棋赌别墅玄惧不胜安顾甥羊昙
曰以乞汝广韵乞与人物也唐书韦皋命将出西山灵關被峨和通鹤定廉城踰的博岭遂围
维州杜甫诗已收的博云间戍钱龙惕笺李卫公奏维州事曰此地内附可减八处镇兵坐收
千里旧地臣见莫大之利乃为恢复之基况臣未尝用兵攻取自感化来降惊之收维州可比
卫公也一作湘王隱晋书杜预为尚书损益万几不可胜数号曰杜武库言其无所不有齐书
谢朓转中书郎出为宣城太守以下自序注见中卷史记谈天衍雕龙奭注驹奭修衍之文飾
若雕镂龙文故曰雕龙魏刘勰撰文心雕龙一作省韩子墨突不得黔突灶突囱也黔黑也占
象言占易象去声昭明集序淹中稷下之生金马石渠之士杨子法言谷口郑子真耕于崑石
之下名震京师雍录谷口在云阳县西四十里岳有悼亡诗司马迁传特以为智穷罪极不能
自免卒就死耳何则素所自树立使然也人固有一死或重于太山或轻于鸿毛禰衡鸚鵡赋
命虞人于陇坻又曰绀趾丹觜绿衣翠衿楚词秋兰兮青青绿叶兮紫茎白帖舅之子为内兄
弟姑之子为外兄弟谢混诗信此劳者歌善曰韩诗伐木废朋友之道缺劳者歌其事诗人伐
木自苦其事故以为文此诗乃杜惊再镇西川义山居东川幕府所上言外有觐其荐達之意

今月二日。不自量度。辄以诗一首四十韵干瀆尊严。伏蒙仁恩俯赐。披览獎踰。其实情溢于辞。顾惟疎芜。曷用酬戴。辄复五言四十韵诗献上。亦诗人咏叹不足之义也。

家擅无双誉朝居第一功四时当首夏八节应条风淅濯临清济巉岩倚碧嵩鲍壶水皎洁王佩玉丁东处剧张京兆通经戴侍中将星临迴夜卿月丽层穹下令销秦盗高谈破宋聳含霜太山竹拂雾峰阳桐乐道乾知退当官蹇匪躬服箱青海马入兆渭川熊固是符真宰徒劳让化工鳳池春潋灩鸡树晓曈曨愿守三章约还期九译通薰琴调大舜寶瑟和神农慷慨资元老周旋值狡童仲尼羞问阵魏絳喜和戎欵欵将除蠹孜孜欲達聰所求因渭浊安肯与雷同物议将调鼎君恩忽赐弓开吴相上下全蜀占西东銳卒鱼悬餌豪胥鸟在笼疲民呼杜母隣国仰羊公置驿推东道安禅合北宗嘉賓增重价上士悟真空扇举遮王导樽开见孔融烟飞愁舞罢尘定惜歌终岸柳兼池绿园花映烛红未曾周顗醉转觉季心恭繫滯喧人望便蕃属圣衷天书何日降庭燎几时烘早岁乖投刺今晨幸发蒙遠途哀跛鼃薄艺獎雕虫故事曾尊隗前修有荐雄终须烦刻画聊拟更磨礪蛮岭晴留雪巴江晚带枫营巢怜越燕裂帛待燕鸿自苦诚先檠长瓢不后蓬容华虽少健思绪即悲翁感激淮山馆优游碣石宫待公三入相丕祚始无穷

△后汉黄香传天下无双江夏黄童萧何传君位为相国功第一不可复加陶潜诗首夏犹清和易纬立春条风至东北风也鲍照诗清如玉壶冰原注摯虞决录要注曰汉末絕无玉佩侍中王粲识旧佩始复作之今玉佩受法于粲也○韵府丁当佩声或谓丁东汉书张敞拜胶东相自谓治剧郡非赏罚无以劝善惩恶后守京兆尹枹鼓希鸣市无偷盗后汉书戴憑举明经微试博士后拜侍中正旦朝贺帝令羣臣能說经者更相诘难不通辄夺其席以益通者憑重坐五十餘席京师语曰解经不穷戴侍中汉书五帝坐后聚十五星曰哀乌郎位旁一大星将位也洪范卿士惟月杜甫诗卿月升金掌左传士会为将军于是晋盗奔秦左传申舟以孟诸之役恶宋曰郑昭宋聳注昭明也聳暗也○旧唐书太和六年惊为京兆尹七年出为鳳翔陇右节度使八年授忠武军节度使陈许蔡观察等使京兆鳳翔秦地也陈许宋地也竹谱鲁郡邹山有篠形色不殊质特坚润宜为笙管诸方莫及禹贡峰阳孤桐注峰山在邹县北桐以向日孤生为良乾蹇见易說文大车两较之内谓之箱青海马注见上卷注见前老子有真宰足以制万物晋书荀勗从中书监迁尚书令人贺之曰夺我鳳皇池何贺耶鸡栖树注见前○唐书会昌四年惊拜同中书门下平章事一作期尝补史记三皇本纪神农氏作五弦之瑟按五弦十五弦小瑟也二十五弦中瑟也五十弦大瑟也一作直见左传周旋值狡童言在朝周旋值有刘稹之叛惊之罢相二史不详其故通鑑云惊以餽运不继请赦郭谊帝俛首不言仲尼羞问阵魏絳喜和戎盖徵言罢相之由也时李德裕力贊用兵此云安肯与雷同意必与德裕不协唐书刘稹平惊进左僕射兼门下侍郎未几以本官罢出为剑南东川节度使徙西川黄石公芳餌之下必有悬鱼杜甫诗直作鸟窥笼后汉书杜诗为南阳太守时人方于召信臣故为之语曰前有召父后有杜母晋书羊祐镇襄阳务修德信以怀吴人吴边人皆悦服传灯录神秀嗣五祖法住荊州当阳山号北宗时曹溪为南宗道源注佛号无上士僧称上士人法两空曰真空即般若智也世說西风尘起王导举扇自蔽曰元规尘汚人张璠汉纪孔融拜大中大夫每叹曰坐上客尝满樽中酒不空吾无忧矣刘向别录善讴歌者鲁人虞公发声清哀能

动梁尘世說周伯仁过江积年大饮酒尝经三日不醒时人谓之三日僕射汉书季布弟季心
气蓋關中遇人恭谨旧唐书惊无他才常延接寒素庭燎见诗以下自叙孙卿子跬步不休跛
鼃千里扬子或问吾子少好赋曰然童子雕虫篆刻俄而曰壮夫不为也郭隗扬雄时义山在
东川用蘓武事神仙传淮南王好神仙有八公詣门王迎之登思仙之台注见前惊后至咸通
初复入相

骄儿诗

衮师我骄儿美秀乃无匹文葆未周晬固已知六七四岁知名姓眼不视梨栗交朋颇窥观谓
是丹穴物前朝尚器貌流品方第一不然神仙姿不尔燕鹤骨安得此相谓欲慰衰朽质青春
妍和月朋戏浑甥侄绕堂复穿林沸若金鼎溢门有长者来造次请先出客前问所须含意不
吐实归来学客面〈门内加为〉败秉爷笏或谑张飞胡或笑邓艾吃豪鹰毛削劣猛马气佻
僂截得青篲簪骑走恣唐突忽复学参军按声唤苍鹘又复纱灯旁稽首礼夜佛仰鞭冒蛛网
俯首饮花蜜欲争蛱蝶轻未谢柳絮疾阶前逢阿姊六甲颇输失凝走弄香奁拔脱金屈戌抱
持多反侧威怒不可律曲躬牵牕网略唾拭琴漆有时看临书挺立不动膝古锦请裁衣玉轴
亦欲乞请爷书春胜春胜宜春日芭蕉斜卷笺辛夷低过笔爷昔好读书恳苦自著述顛顛欲
四十无肉畏蚤虱儿慎勿学爷读书求甲乙穰苴司马法张良黄石术便为帝王师不假更纖
悉况今西与北羌戎正狂悖诛赦两未成将养如痼疾儿当速成大探雏入虎穴当为万户侯
勿守一经帙

△史记公孙杵臼程婴谋取他人婴儿负之衣以文葆韵会晬子生一岁也陶潜责子诗雍端
年十三不识六与七通子垂九龄但覓梨与栗作气燕颌鹤步皆贵人风骨一作明非一作石
羽委切說文〈门内加为〉闢门世国语〈门内加为〉门而为之言道源注〈门内加为〉
败者败其门而入秉爷笏以学客面也胡多髯也世說登艾口吃语称艾艾化力切良直切○
杜甫诗代北有豪鹰鲁灵光殿赋削劣嶙嶭杜甫朝献太清宫赋张猛马出腾虬异物志篲簪
竹生水边长数丈围一尺五六寸一节相去六七尺或一丈庾陵界有之以竹为马也杜氏幽
求子年五岁有鸩车之乐七岁有竹马之乐乐府杂录开元中优人黄旛绰张野狐弄参军始
自汉馆陶令石耽西谿丛语吴史曰徐知训怙威骄淫调谑尝登楼狎戏荷衣木简自号参军
令王鬢髻鹑衣为苍头以从五代史吴世家云知训为参军隆演鹑衣鬢髻为苍鹘前云苍头
非也太和正音云副末古谓苍鹘故可朴艶艶谓狐也如鹘之可击狐故副末执磕?以朴艶也
傳粉黑者谓之艶献笑供諛者也古为参军书语称狐为田参军六甲注见前注见中卷道源
注春胜春旛也书春帖于上以迎新辛夷一名木笔注见前海录晋武帝分秘书为甲乙丙丁
四部秘书郎四人各掌其一史记齐威王追论古司马兵法附穰苴于其中号曰司马穰苴兵
法张良传黄石公出一编书乃太公兵法

行次西郊作一百韵

蛇年建午月我自梁还秦南下大散關北济渭之濱草木半舒坼不类冰雪晨又若夏苦热焦
卷无芳津高田长槲?下田长荆榛农具弃道旁饥牛死空墩依依过村落十室无一存存者皆

面啼无衣可迎宾始若畏人问及门还具陈右辅田畴薄斯民常苦贫伊昔称乐土所赖牧伯仁官清若冰玉吏善如六亲生儿不遠征生女事四隣浊酒盈瓦缶烂穀堆荆困健儿庇旁妇衰翁舐童孙况自贞观后命官多儒臣例以贤牧伯徵入司陶钧降及开元中姦邪挠经纶晋公忌此事多录边将勲因令猛毅辈杂牧异平民中原遂多故除授非至尊或出倖臣辈或由帝戚恩中原因屠解奴 厌肥豚皇子弃不乳椒房抱羌浑重赐竭中国强兵临北边控弦二十万长臂皆如猿皇都三千里来往同彫鹫五里一换马十里一开筵指顾动白日煖热迴苍旻公卿辱嘲叱唾弃如粪大朝会万方天子正临轩綵旂转初旭玉座当祥烟金障既特设珠帘亦高褰捥须蹇不顾坐在御榻前忤者死艰屢附之升顶颠华侈矜递衒豪俊相併吞因失生惠养渐见徵求频奚寇西北来挥霍如天翻是时正忘战重兵多在边列城遶长河平明插旗旛但闻虏骑入不见汉兵屯大妇抱儿哭小妇攀车轡生小太平年不识夜闭门少壮尽点行疲老守空村生分作死誓挥泪连秋云廷臣例蹙怯诸军如羸奔为贼扫上阳捉人送潼關玉輦望南斗未知何日旋诚知开關久邁此云雷屯送者问鼎大存者要高官抢攘互间谍孰辨梟与鸾千马无返轡万车无还辕城空鼠雀死人去豺狼喧南资竭吳越西费失河源因令左藏库摧毀惟空垣如人当一身有左无右边筋体半痿痺肘腋生臊臙列圣蒙此耻含怀不能宣谋臣拱手立相戒无敢先万国困杼轴内库无金钱健儿立霜雪腹歉衣裳单馈饷多过时高估铜与鉛山东望河北爨烟犹相联朝廷不暇给辛苦无半年行人推行资居者税屋椽中间遂作梗狼籍用戈鋌临门送节制以锡通天班破者以族灭存者尚迁延礼数异君父羈縻如羌零直求输赤诚所望大体全巍巍政事堂宰相厌八珍敢问下执事今谁掌其权疮疽几十载不敢扶其根国蹙赋更重人稀役弥繁近年牛医儿城社更扳援盲目把大旆处此京西藩乐祸忘怨敌树党多狂狷生为人所憚死非人所怜快刀断其头列若猪羊悬鳳翔三百里兵马如黄巾夜半军牒来屯兵万五千乡里骇供亿老少相扳牵儿孙生未孩弃之无惨顏不复议所适但求死山间尔来又三岁甘泽不及春盜賊亭午起问谁多穷民节使杀亭吏捕之恐无因咫尺不相见旱久多黄尘官健腰佩弓自言为官巡常恐值荒迴此輩还射人愧客问本末愿客无因循鄆坞抵陈仓此地忌黄昏我听此言罢冤愤如相焚昔闻举一会羣盜为之奔又闻理与乱在人不在天我愿为此事君前剖心肝叩头出鮮血滂沱污紫宸九重黯已隔涕泗空沾唇使典作尚书廝养为将军慎勿道此言此言未忍闻

△开成二年丁巳梁州汉中郡一作岭○太散關注见上卷地理志大散水源在鳳县东界大散岭通志渭河在寶鸡县治南佳买切玉篇檉松榆木也韵会枋〈左木右斯〉木名鳳翔府汉扶风郡地为右辅汉书元后父禁好酒色多娶旁妻唐书开元二十五年上以几致刑措推功大臣封李林甫为晋国公林甫疾儒臣以战功进尊宠间已乃请上专用蕃将因以安思顺代已领节度而擢安祿山高仙芝等为大将林甫利其虏也无入相之资故祿山得专三道劲兵处十四年不徙言视民如牛狗屠之解之林甫谗杀太子瑛鄂王瑶光王琚安祿山事迹祿山生日后三日玄宗召祿山入内贵妃以锦绣綳縛祿山令内人以綵輿舁之玄宗就观大悦因赐贵妃三日洗儿金银钱自是宫中皆呼祿山为祿儿不禁出入按羌浑趣韵祿山实西北种落非羌浑种也唐书祿山晚益肥每驰驿入朝半道必易马号大夫换马台不尔马辄仆格物总论蜣螂噉粪能以土包粪转成丸唐书帝登勤政楼幄坐之左张金鸡大障前置特榻诏祿山坐褰其幄以示尊宠太子諫曰陛下宠祿山太过必骄帝曰胡有异相吾欲厌之道源注蹇不顾言祿山于御座前捥须偃蹇无所顾忌也艰屢未详或曰释名艰根也如物根也艰屢

言脚根下之屨唐书帝为禄山起第京师服御华僭以金银为笏篋箠篋禄山得阿布思衆兵雄天下又夺张文俨马牧当作东安禄山事迹禄山养同罗奚契丹八千馀名曳落河又畜单于护真大马习战鬪者数万匹天寶十四载十一月九日起兵反旧唐书禄山以诸蕃马步十五万夜半行平明食日行六十里十二月渡河汉书注輜车蔽也韵会轡性善惊故从章章者惺惶也説文繫传六畜多瘦惟羊则羸唐书东都上阳宫在禁苑之东东接皇城之西南隅上元中置高宗之季常居以听政玄宗幸蜀唐书禄山反胡虜蠶食鳳翔以西邠州以北皆为左衽至广德间吐蕃尽取河西陇右之地一作右道源注晋书有左右藏右纳左给通鑑玄宗出延秋门细民争入宫禁焚左藏大盈库唐书德宗时江淮多鉛锡钱以铜盪外不盈斤两销千钱为铜六斤唐书德宗建中三年搜括富商钱增两税盐〈摧去崔。加鹤去鸟〉钱又于诸道津要置吏税商货每贯税二十文竹木茶漆皆什税一四年税间架钱每屋两架为间上者税钱二千中税千下税五百谓河北诸镇朱滔田悦王武俊以及朱泚李怀光李纳李希烈等相继叛乱节旌节制制书也音伶一作连○羌戎西戎也先零西羌名赵充国传先零首为畔逆旧唐书郑注始以药术游长安本姓鱼兼冒郑氏时号鱼郑两目不能遠视自言有金丹之术可去痿弱重髓元和末依李愬为愬煮黄金餌之得效王守澄总枢密荐于丈宗深宠异之注天资狂妄日聚京师轻薄子弟方镇将吏以招权利生平恩讐丝毫必报心所恶者目为李宗闵李德裕之党朝士相继斥逐班列为空太和九年与李训谋诛宦官训出注为鳳翔节度使欲中外合势事败注自鳳翔率亲兵五百余人赴阙监军使张仲清诱而斩之传首京师家属屠灭靡有子遗新书臬注首光宅坊三日瘞之后汉书张角聚人三十六万皆著黄巾谓之黄巾贼唐书开成二年四月乙卯以旱避正殿旧书七月乙亥以久旱徙市闭坊门通志董卓郿坞在郿县东北一十六里陈仓注见上卷土?也一作繫下同一云史唐书都督府州各有史有典狱

井泥四十韵

皇都依仁里西北有高斋昨日主人氏治井堂西陲工人三五辈犂出土与泥到水不数尺积共庭树齐他日井甃毕用土益作堤曲随林掩映繚以池周迴下去冥冥穴上承雨露滋寄辞别地脉因言谢泉扉昇腾不自意畴昔忽已乖伊余掉行鞅行行来自西一日下马到此时芳草萋四面多好树旦暮云霞姿晚落花满地幽鸟鸣何枝萝幄既已荐山樽亦可开待得孤月上如与佳人来因兹感物理惻怆平生怀茫茫此羣品不定轮与蹄喜得舜可禅不以瞽瞍疑禹竟代舜立其父吁咈哉羸氏并六合所来因不韦汉祖把左契自言一布衣当涂佩国玺本乃黄门携长戟乱中原何妨起戎氏不独帝王耳臣下亦如斯伊尹佐兴王不藉汉父资礪溪老钓叟坐为周之师屠狗与贩缯突起定倾危长沙启封土岂是出程姬帝问主人翁有自卖珠儿武昌昔男子老苦为人妻蜀王有遗魄今在林中啼淮南鸡舐药翻向云中飞大钧运羣有难以一理推顾于冥冥内为问秉耒者谁我恐更万世此事愈云为猛虎与双翅更以角副之鳳凰不五色联翼上鸡栖我欲秉钓者竭来与我偕浮云不相顾寥沕谁为梯悒悒夜将半但歌井中泥

△在东都白氏长庆集有宿崔十八依仁新亭诗乾曰土湿曰泥甃修井也一作寂一作固一作垂杜甫诗高萝成帷幄老子圣人执左契而不责于人注契券也魏志白马令李云上言许

昌气见于当涂高当涂高者当昌于许当涂高魏也象魏两观阙是也文帝受禅汉献帝遣使者送玺绶陈琳为袁绍檄司空曹操祖父中常侍腾父嵩乞匄携养因赃假位魏志注曹瞒传郭颁世语并云嵩夏侯氏之子晋十六国前秦为氏汉父未详尚书大传文王至磻溪见吕望拜之答曰望钓得玉璜刻曰周受命吕佐之十道志栢阳有钓璜浦屠狗樊哙贩缗灌婴汉书长沙定王发母唐姬故程姬侍者帝召程姬程姬有所避饰侍者唐儿使夜进上醉不知以为程姬而幸之遂有身一作复汉书窦太主寡居年五十馀矣近幸董偃始偃与母以卖珠为事年十三随母出入主家左右言其佼好主召见曰吾为母养之年十八而冠出则执轡入则侍内主请上幸山林坐未定上曰愿谒主人翁主自引董君叩头谢时董君见尊不名称为主主人翁道源注搜神记哀帝时豫章有男子化为女子嫁为人妇武昌则未详杜宇注见中卷神仙传八公与安白日升天馀药器置在中庭鸡犬舐啄之尽得升天故鸡鸣天上犬吠云中也鹏赋大钧播物一作愿虎翅犹云虎翼扬子或问酷吏扬子曰虎哉虎哉角而翼者也诗鸡栖于埘后汉书谚曰车如鸡栖马如狗广韵寥沆空貌一作参易云井况不食故此诗以井泥起兴深刺世之沉湎下才而倖居高位者舜禹以下杂言古今升沉变态难以理断猛虎角翼小人乘权鳳皇鸡栖君子失位所以三叹于浮云之不可梯也此诗与前诗史典作尚书廐养为将军同意必有所指

●新添集外诗

夜思

银箭耿寒漏。金釭凝夜光。綵鸾空自舞。别雁不相将。
寄恨一尺素。含情双玉璫。窗前犹月在。去后始宵长。
往事经春物。前期託报章。永令虚粲枕。长不揜兰房。
觉动迎猜影。疑来浪认香。鹤应闻露警。蜂亦为花忙。
古有阳台梦。今多下蔡倡。何为薄冰雪。消瘦滞非乡。

△诗角枕粲兮阮籍诗萱草树兰房下蔡注见上卷

思贤顿

内殿张弦管。中原絶鼓鼙。舞成青海马。鬪杀汝南鸡。
不见华胥梦。空闻下蔡迷。宸襟他日泪。薄暮望贤西。

△即望贤宫也旧唐书天寶十五载六月乙未上至咸阳望贤驿置顿官吏骇散无复储供上憇于宫门之树下津阳门诗注望贤宫在咸阳东数里唐书乐志玄宗尝以马百疋盛饰分左右施三重榻舞倾杯乐数十曲每千秋节舞于勤政楼下汉旧仪汝南出长鸣鸡古鸡鸣歌东方欲明星烂烂汝南晨鸡登坛唤陈鸿祖东城父老传玄宗乐民间清明鬪鸡戏立鸡坊于两宫间索长安雄鸡金毫鍊距高冠昂尾千数养于鸡坊选六军小儿五百人使驯扰教饲之列子黄帝昼寢而梦游华胥华胥国人入水不濡入火不热乘空如履实寢虚如处林帝既寤怡然自得又二十八年天下大治几如华胥国矣

无题

万里风波一叶舟。忆归初罢更夷犹。碧江地没元相引。黄鹤沙边亦少留。
益德冤魂终报主。阿童高义镇横秋。人生岂得长无谓。怀古思乡共白头。

△按诗中益德阿童皆用巴阆事恐是在东川时作楚词君不行兮夷犹注犹豫也蜀志张飞字益德先主伐吴飞当率兵万人自阆中会江州临发其帐下将张逵范疆杀飞持其首顺流而奔孙权晋五行志孙皓天纪中童谣曰阿童复阿童衔刀游渡江不畏岸上虎但畏水中龙

武帝闻之加王濬龙骧将军及征吴江西衆军无过者而濬先定秣陵濬小字阿童故帝因谣言用之王濬传濬除巴郡太守巴人生子皆不举濬严其科条寛其徭役所活数千人及后伐吴所活者皆堪供军其父母戒之曰王府君生尔尔必死之

有怀在蒙飞卿

薄宦频移疾。当年久索居。哀同庾开府。瘦极沉尚书。

城绿新陰遠。江清返照虚。所思惟翰墨。从古待双鱼。

春深脱衣

睥睨江鸦集。堂皇海燕过。减衣怜蕙若。展帐动烟波。

日烈忧花甚。风长奈柳何。陈遵容易学。身世醉时多。

△释名城上垣谓之睥睨汉胡广传列坐堂皇上注堂无四壁曰皇本草杜若一名杜蘅香草也汉书陈遵字孟公嗜酒每大饮賓客满堂辄取客车辖投井中虽有急终不得去

怀求古翁

何时粉署仙。傲兀逐戎旃。關塞犹传箭。江湖莫繫船。

欲收碁子醉。竟把钓车眠。谢朓真堪忆。多才不忌前。

△陶潜诗兀傲差若顓谢朓辞隋王賸契濶戎旃元结诗醉里长歌挥钓车

五月十五夜忆往岁秋与彻师同宿

紫阁相逢处。丹岩议宿时。堕蝉翻败叶。栖鸟定寒枝。

万里飘流遠。三年问讯迟。炎方忆初地。频梦碧琉璃。

△按彻师乃知玄法师弟子僧彻见高僧传非越州灵彻也紫阁注见中卷法华经诸佛皆遣侍者问讯释迦牟尼佛楞严经于大菩提善得通達觉通如来尽佛境界名欢喜地即初地也观经下有金刚七寶金幢擎琉璃地琉璃地上以黄金绳杂厕间错道源注临济曰龙生金鳳子衝破碧琉璃

城上

有客虚投笔。无繆独上城。沙禽失侣远。江树著陰轻。

边遽稽天讨。军须竭地征。贾生游刃极。作赋又论兵。

△説文遽传也徐曰传驿车左传子産乘遽而至贾谊传屠牛坦一朝解十二牛而芒刃不顿所排击剥割皆中理解也谊作弔屈原赋鹏赋又欲施五饵三表以繫单于是论兵也

如有

如有瑶台客。相难复索归。芭蕉开绿扇。菡萏荐红衣。

浦外传光远。烟中结响微。良宵一寸焰。回首是重帏。

朱槿花二首

莲后红何患。梅先白莫夸。纔飞建章火。又落赤城霞。

不卷锦步障。未登油壁车。日西相对罢。休澣向天涯。

西北朝天路。登临思上才。城閒烟草徧。邨暗雨云迴。

人岂无端别。猿应有意哀。征南予更远。吟断望乡台。

△汉书太初元年柏梁殿灾越巫勇之曰越俗有火灾复起屋必以大用胜服之于是作建章宫西京赋柏梁既灾越巫陈方建章是经用厌火祥赤城霞注见前注见上卷乐府蕓小小歌妾乘油壁车郎骑青骢马成都记望乡台隋蜀王秀所筑寰宇记益州记云昇仙亭夹路有二台一名望乡台在成都县北九里

寓怀

綵鸾餐颢气。威鳳入卿云。长养三清境。追随五帝君。

烟波遗汲汲。矰缴任云云。下界围黄道。前程合紫氛。

金书惟是见。玉管不胜闻。草为迴生种。香缘却死熏。

海明三岛见。天迴九江分。褰树无劳援。神禾岂用耘。

鬪龙风结阵。恼鹤露成文。汉岭霜何早。秦宫日易曛。

星机抛密绪。月杵散灵氛。阳鸟西南下。相思不及羣

△西都赋鲜顗气之清英汉书注威鳳鳳之有威仪者三清注见上卷汉郊祀志秦襄公作西時祠白帝宣公作密時祠青帝灵公作上時祠黄帝下時祠炎帝高祖问天有五帝而四何也莫知其說高祖曰是待我而具五也乃立黑帝祠名曰北時增韵云云衆语也汲黯传我欲云云注犹言如此如此也刘桢诗奋翅凌紫氛集仙传大茅君南至句曲山天帝赐以黄金刻书九锡之文玉管注见前道源注博物志禹戮防风二臣恐以刃自贯其心而死禹哀之乃拔其刃疗以不死之草述异记汉武时日支国献活人草三茎有人死者将草覆面即活之矣述异记聚窟洲有返魂树伐其根心于玉釜中煮取汁又〈上敖下火〉之令可丸名曰惊精香又名震灵丸或名返生香或名却死香尸在地闻气即活当作騫道源注云笈七籤月中树名騫树一名药王凡有八树在月中也空洞灵章经紫薇焕七台騫树秀玉霞真诰酆都山稻名重思米如石榴子粒异大色味如菱亦以上献仙官杜琼作重思赋曰神禾鬱乎浩京巨穗横我玄台一作殿道源注张衡周天大象赋畴遂睇于汉阳乃攸窥于织女引寶毓圉摇机弄杼重押一作氲或云当作芬○傅玄拟天问月中何有白兔擣药月杵擣药杵也冯衍显志赋扬屈原之灵芬禹贡注阳鸟随阳之鸟鸿雁属

木兰

三月二十二。木兰开坼初。初当新病酒。复自久离居。

愁絶更倾国。惊新闻远书。紫丝何日障。油壁几时车。

弄粉知伤重。调红或有馀。波痕空映袜。烟态不胜裾。

桂岭含芳远。莲塘属意疎。瑶姬与神女。长短定何如。

△晋书王恺作紫丝布步障四十里注见前洛神赋凌波微步罗袜生尘洛神赋曳雾绡之轻裾山海经姑瑶之山帝女死焉化为瑶草服者媚于人集仙传灵华夫人名瑶姬王母第二十三女尝游东海过巫山授禹上清寶文理水之策神女赋穠不短纖不长登徒子好色赋臣东家之女增之一分则太长减之一分则太短

细雨成咏献尚书河东公

洒砌听来响。卷帘看已迷。江间风暂定。云外日应西。

稍稍落蝶粉。班班融燕泥。飏萍初过沼。重柳更縁堤。

必拟和残漏。宁无晦暝鼙。半将花漠漠。全共草萋萋。

猿别方长啸。鸟惊始独栖。府公能八咏。聊且续新题。

△金华志齐隆昌元年沉约出为东阳太守作八诗题于玄畅楼后人更为八咏楼

病中闻河东公乐营置酒口占寄上

闻驻行春旆。中途赏物华。缘忧武昌柳。遂忆洛阳花。

嵇鹤元无对。荀龙不在夸。只将沧海月。长压赤城霞。

兴欲倾燕馆。欢终到习家。风长应侧帽。路隘岂容车。

楼迴波窥锦。窗虚日弄纱。锁门金了鸟。展障玉鸦叉。

舞妙从兼楚。歌能莫杂巴。必投潘岳果。谁掺襦衡挝。

刻烛当时忝。传杯此夕賒。可怜漳浦卧。愁绪乱如麻。

△后汉书谢夷吾为钜鹿太守行春乘柴车从雨吏晋书陶侃领江州刺史镇武昌尝课诸营种柳都尉夏施夜盗拔郡西门柳为己所种侃驻车施门诘之施怖谢罪何逊诗洛阳城东西却作经年别昔去雪如花今来花似雪晋书嵇绍始入洛或谓王戎曰昨于稠人中见嵇绍昂然如野鹤之在鸡羣后汉书荀淑子八人并有才名时谓八龙世説陈太丘诣荀朗陵既至荀使叔慈应门慈明行酒馀六龙下食按此以况柳仲郢诸子也仲郢子珪璧玼旧唐书皆有传燕馆即碣石宫一作于襄阳记岷山南习郁有大鱼池山简镇襄阳每临此池辄大醉而归用独孤信事见上卷原注乐府相逢狭路间路隘不容车金了鸟未详障屏障也玉鸦叉谓画叉又汉书高祖令戚夫人楚舞自为楚歌注见前晋书潘岳美姿仪少时出洛阳道妇人遇之者投之以果满车而归七勘切注见上卷南史萧文琰丘令楷江拱并以文称竟陵王夜集赋诗为四韵刻烛一寸

回中牡丹为雨所败二首

下苑他年未可追。西州今日忽相期。水亭暮雨寒犹在。罗荐春香暖不知。

舞蝶殷勤收落蕊。佳人惆怅卧遥帷。章台街里芳菲伴。且问宫腰损几枝。

浪笑榴花不及春。先期零落更愁人。玉盘迸泪伤心数。锦瑟惊絃破梦频。

万里重陰非旧圃。一年生意属流尘。前溪舞罢君迴顾。併觉今朝粉态新。

△汉书元封四年行幸雍通回中道遂出萧關应劭曰回中在安定平高有险阻其中有宫元和郡国志秦回中宫在鳳翔府天兴县西一统志在陇州西北一百十里下苑注见中卷安定谓之西州后汉书皇甫规安定人自以西州豪杰耻不与党人之数一作有非道源注旧唐书孔绍安仕隋高祖受禅自洛阳间行来奔拜内史舍人时夏侯端先绍安归朝受秘书监绍安因侍宴应制咏石榴云可惜庭中树移根逐汉臣祇为来朝晚开花不及春色角切

拟意

怅望逢张女迟迴送阿侯空看小垂手忍问大刀头妙选茱萸帐平居翡翠楼云屏不取暖月扇未遮羞上掌真何有倾城岂自由楚妃交荐枕汉后共藏阍夫向羊车覓男从鳳穴求书成被襖帖唱杀畔牢愁夜杵鸣江练春刀解若榴象牀穿幰网犀帖钉窻油仁寿遗明镜陈仓拂綵毬真防舞如意佯葢卧箜篌濯锦桃花水溅裙杜若洲鱼儿悬寶劒燕子合金瓠银箭催摇落华筵惨去留几时销薄怒从此抱离忧帆落啼猿峡樽开画鷁舟急弦肠对断翦蜡泪争流璧马谁能带金虫不复收银河扑醉眼珠串咽歌喉去梦随川后来风贮石邮兰丛衔露重榆荚点星稠解佩无遗迹凌波有旧游曾来十九首私讖咏牵牛

△潘岳笙赋辍张女之哀弹吳均诗掩抑摧藏张女弹阿侯注见上卷垂手注见上卷吳均诗且复小垂手乐府何当大刀头吳竞解题刀头有环环还也梁简文帝烛赋茱萸幔里铺锦筵张正见艳歌并捲茱萸帐争移翡翠牀崔湜诗草绿鸳鸯殿花明翡翠楼一作衣语林满奋体羸畏风侍坐武帝屡顾云母幌帝笑之奋曰北窻琉璃屏风似密实疎月扇注见上卷上掌用飞燕事又南史羊侃舞人张静婉腰围一尺六寸能掌上舞乐府杂录张永元嘉技录有吟歎四曲一曰楚妃叹高唐赋闻君游高唐愿荐枕席一作鈎○辛氏三秦记昭帝母鈎弋夫人手拳而有国色武帝宠之世人藏鈎之戏法此也羊车注见中卷杜甫诗二毛生鳳穴即右军兰亭帖注见上卷汉书扬雄作广骚又旁惜诵至懷沙一卷名曰畔牢愁注畔离也牢聊也与君相离愁而无聊也夜杵擣衣杵也一作石广雅若榴石榴也幰网言牀幔为网户纹道源注集韵帖牀前帷也以薄犀为帖钉于窻枕

道源注陆机与弟云书洛阳仁寿殿前有大方镜高五尺馀广三尺二寸暗著庭中向之便写人形体武平一诗令节重遨游分鑣戏綵毬按打毬即蹴鞠本寒食事又唐时清明有鬪鸡之戏陈仓乃暗用寶鸡事也拾遗记孙和悦邓夫人尝著膝上和月下舞水精如意误伤夫人颊道源注洛阳伽蓝记魏高阳王雍美人徐月华能弹卧箜篌为明妃出塞之曲后为将军原士康侧室徐鼓箜篌而歌其声入云行者俄而成市张正见诗影间莲花出光涵濯锦流漾色随桃水飘香入桂舟溅裙注见前楚词採芳洲兮杜若将以遗兮下女唐书车服志一品至六品以玉金饰劒给随身鱼西京杂记汉元后在家尝有白燕衔石大如指墮后绩筐中后取之石自剖为二其中有文曰母天后地乃合之遂复还合及为后尝置玺笥中神女赋頽薄怒以自持兮道源注李季兰诗弹得相思曲弦肠一时断蜡泪注见上卷甘泉赋璧马犀之璘〈左王右扁〉注作马及犀牛为璧饰也吳均古意莲花衔青雀寶粟钿金虫李贺诗坡陀簪碧鳳腰褰带金虫或曰金虫簪饰也白居易诗何郎小妓歌喉好严老呼为一串珠自注严尚书与于驸马诗云莫损歌喉一串珠洛神赋于是屏翳收风川后静波注川后河伯也乐府丁都护歌

愿作石尤风四面断行旅客斋随笔石邮打头逆风也唐人诗多用之邮与尤同诗不知其邮列仙传江妃二女出游汉江湄逢郑交甫挑之不知其神人也女遂解佩与之交甫悦受佩而去数十步空怀无佩女亦不见洛神赋凌波?步道源注古诗十九首其九首云迢迢牵牛星皎皎河汉女洛神赋咏牵牛之独处

谢往桂林至彤庭窃咏

辰象森罗正勾陈翊卫宽鱼龙排百戏劒佩俨千官城禁将开晚宫深欲曙难月轮移杵诣仙路下栏干共贺高祿应将陈寿酒欢金星压芒角银汉转波澜王母来空濶羲和上屈盘鳳皇传诏旨獬廌冠朝端造化中台座威风上将坛甘泉犹望幸早晚冠呼韩

△西都赋玉墀彤庭注帝居也勾陈注见中卷汉武帝为鱼龙曼延之戏详上卷乌诣切關中记建章宫中有馼娑骀盪杵诣承光四殿三辅黄图杵诣木名宫中美木茂盛也月令仲春玄鸟至日天子以太牢祠于高祿注求子之祭天官占太白者西方金之精白帝之子径一百里角摇则兵起史记注角芒角也王母降汉宫详上卷李贺诗金窠篆字红屈盘用木鳳銜书事俗作豸唐书法冠者御史大夫中丞御史之服也一名獬廌冠汉书宣帝纪行幸甘泉郊泰畤匈奴呼韩邪单于稽侯〈狂。去王加册〉来朝賛謁称藩臣而不名匈奴传单于朝天子于甘泉宫汉宠以殊礼位在诸侯王上

烧香曲

钿云蟠蟠牙比鱼孔雀翘尾蛟龙鬚漳宫旧様博山鑪楚娇捧笑开芙蕖八蚕茧绵分小炷兽燄微红隔云母白天月泽寒未冰金虎含秋向东吐玉珮呵光铜照昏帘波日暮衝斜门西来欲上茂陵树柏梁已失栽桃魂露庭月井大红气轻衫薄细当君意蜀殿琼人伴夜深金銮不问残灯事何当巧吹君懷度襟灰为土填清露

△王琰冥祥记费崇先尝以雀尾香炉置〈漆。去水加足〉前齐刘绘咏博山炉诗下刻蟠龙势矫首半衔莲道源注西京杂记丁媛作九层博山香炉镂以奇禽怪兽自然能动邺中记石季龙冬月为複帐四角安纯金银凿镂香炉吳都赋乡贡八蠶之绵善曰刘欣期交州记蚕一岁八育出日南汉俞益期牋日南蚕八熟茧软而薄又永嘉记永嘉有八辈蚕蛭珍蚕三月绩柘蚕四月初绩蛭蚕四月末绩爱珍五月绩爱蚕六月末绩寒珍七月末绩四出蚕九月初绩寒蚕十月绩凡蚕再熟者谓之珍道源注以八蚕绵绳分炷炉火取其易然也晋朝杂记洛下少炭羊琇擣小炭为屑以物和之作兽形用以温酒陆机诗望舒离金虎善曰汉书西方金也尚书考灵曜西方秋虎孔传昂白虎中星然西方七宿毕昂之属俱白虎也○言炉烟之暖金虎亦回其秋令铜照谓镜也一作依道源注西京杂记汉陵寝皆以竹为帘帘皆水文及龙凤之像帘波水文也或曰香烟拂帘如波斜门宫中角门也王母传帝食桃辄收其核母问帝帝曰欲种之母曰中夏地薄种之不生帝乃止道源注殿前广庭曰露庭四周有屋中空曰月井拾遗记蜀先主甘后玉质柔肌先主置于白绡帐中如月下聚雪河南献玉人置后侧昼则讲說军谋夕则拥后而玩玉人后与玉人洁白齐润宠者非惟妬后亦妬玉人也

送从翁东川弘农尚书幕

昔帝迴冲眷维皇惻上仁三灵迷赤气万彙叫苍旻刊木方隆禹陞陟始创殷夏台曾圯闭汜水敢逡巡拯溺休规步防虞要徙薪蒸黎今得请宇宙昨还淳纘祖功宜急贻孙计甚勤降灾虽代有稔恶不无因宫掖方为蛊边隅忽遘迎献书秦逐客间谍汉名臣北伐将谁使南征决此辰中原重板荡玄象失鉤陈诘旦违清道衔枚别紫宸兹行殊厌胜故老遂分新去异封于巩来宁避处幽永嘉几失坠宣政遽酸辛元子当传后皇孙合授询时非三揖让表请再陶钧旧好盟还在中枢策屡遵苍黄传国玺违远属车尘雏虎如憑怒縻龙性漫驯封崇自何等流落乃斯民逗挠官军乱优容败将频早朝披草莽夜缒连丝纶忘战追不及长驱气益振妇言终未易庙算况非神日驭难淹蜀星旄要定秦人心诚未去天道亦无亲锦水湔云浪黄山扫地春斯文虚梦鸟吾道欲悲麟断续殊乡泪存亡满席珍魂销季羔裘衣化子张绅建议庸何所通班昔滥臻浮生见开泰独得咏汀苹

△按此题重见又全诗都咏禄山乱后事与题无干必有脱误○诗内有锦水湔云浪之句当是作于成都皇览蚩尤冢在东郡壽张县阡乡城中高七丈民尝十月祀之有赤气出如一匹绦名为蚩尤旗尔雅春为苍天秋为旻天禹贡随山刊木书序伊尹相汤伐桀升自陟遂与桀战于鸣条注陟在河南之曲史记桀囚汤于夏台汉书汉王即皇帝位于汜水之阳张晏曰在济陰界文选注蕪子曰行务应规步虑投矩汉书曲突徙薪无恩泽以下言玄宗幸蜀本末谓陈平也○二语未详何指谓玄宗幸蜀汉匈奴传上以太岁厌胜所在唐书上将发马嵬父老道请留上按辔久之命太子于后宣慰父老父老因曰至尊既不肯留某等愿率子弟从殿下东破贼取长安史记周考王封其弟桓公于河南至孙惠公封少子于巩号东周惠公晋书怀帝永嘉五年为汉刘聪所执春明退朝录唐制日御宣政殿五代史宣政前殿也谓之衙衙有仗紫宸便殿也谓之阁汉书宣帝武帝曾孙名病已霍光与诸大臣迎立之后更名询○元子谓肃宗皇孙谓代宗也肃宗迎上皇归京师再表始允谓修好回纥借兵讨贼唐自李辅国以后宦官多典兵为枢密使○以下又似杂言肃代时事左传今君奋焉震电憑怒史记昔夏后氏之衰有二神龙止于帝庭而言曰余褒之二君也夏帝卜杀与去之与止之莫吉卜请其縻而藏之乃吉于是龙亡而縻在自夏至殷至周莫敢发至厉王发之縻流于庭后宫童妾遭之而孕生子弃之有卖縻弧箕服者逃于道见而收之奔于褒是为褒姒直类切夜缒缒城而出也似指肃宗张皇后甘泉赋流星旄而电烛华阳国志锦江织锦濯其中则鲜明他江则不好黄山注见前道源注幽明录桂阳罗君章不属意学问常昼寝梦得一鸟五色杂耀不似人间物梦中因取吞之遂勤学读九经以清才称○以下自序礼记儒有席上之珍以待聘家语蒯聩之乱季羔逃之走郭门门者谓曰彼有缺羔曰君子不踰又曰彼有窦羔曰君子不窦柳惲诗汀洲採白苹

晋昌晚归马上赠

勇多侵路去。恨有碍灯还。嗅自微微白。看成沓沓殷。

坐来疑物外。归去有帘间。君问伤春句。千辞不可删。

△楞严经观鼻中气出入如烟烟相渐销鼻息成白

哭虔州杨侍郎虞卿

汉网疎仍漏齐民困未蕪如何大丞相翻作弛刑徒中宪方外易尹京终就拘本矜能弭谤先
议取非辜巧有凝脂密功无一柱扶深知狱吏贵几迫季冬诛叫帝青天濶辞家白日晡流亡
诚不弔神理若为诬在昔恩知忝诸生礼秩殊入韩非剑客过赵受钳奴楚水招魂远邙山卜
宅孤甘心亲垤蚁旋踵戮城狐陰隲今如此天灾未可无莫憑性

△唐书杨虞卿字师皋太和中牛僧孺李宗闵辅政引为给事中七年宗闵罢李德裕知政事
出为常州刺史八年宗闵复入相召为工部侍郎九年拜京兆尹其年六月京师讹言郑注为
上合金丹须小儿心肝民间相告语局锁小儿甚密街肆汹汹上闻之不悦注颇不自安而雅
与虞卿有怨因约李训奏曰语出虞卿家御史大夫李固言素嫉虞卿朋比因传左端倪上大
怒收虞卿下狱于是子弟八人皆自繫挝鼓诉冤诏虞卿还私第翌日贬虔州司马再贬司户
卒于贬所玉请便望救焦枯老子天网恢恢疎而不漏汉书西羌反发三辅中都官徒弛刑注
弛释也若今徒解钳《左金右犬》赭衣置任输作也○二语谓宗闵史记商鞅多左建外易
索隱左建谓左道建立威权也外易在外革易君命○此语谓固言谓虞卿二语谓郑注盐铁
论昔秦法繁于秋荼而密于凝脂周勃传吾常将百万军安知狱吏之贵也司马迁书今少卿
抱不测之罪涉旬月迫季冬注迫季冬言将刑也甘泉赋选巫咸兮叫帝阍左传哀公诔孔子
曰昊天不弔不憖遗一老史记严仲子与韩相侠累有郢告聂政政仗剑至韩直入上阶刺杀
侠累史记豫让事智伯甚尊宠之赵襄子灭智伯让乃变姓名为刑人入宫涂厕中欲刺襄子
钳奴刑人也汉书季布匿濮阳周氏周氏乃髡钳布置广柳车中○言念其恩知欲报以聂政
豫让之事十道志邙山在洛阳北十里杨佺期洛城记邙山古今东洛九原之地也說文垤蚁
封也岭南异物志蚁封者蚁子聚土为台也原注是冬舒李伏易○晋谢鲲传刘隗诚始祸然
城狐社鼠通鑑秋七月李训召舒元舆为右司郎中兼侍御史知杂鞠杨虞卿狱九月元舆训
并同平章事十月有甘露之变元舆训俱族诛诗靡神不举靡爱斯牲圭璧既卒宁莫我听唐
书开成二年旱自四月至七月不雨

寄太原卢司空三十韵

隋舰临淮甸唐旗出井陘断鳌搯四柱卓马济三灵祖业隆盘古孙谋复大庭从来师俊杰可
以焕丹青旧族开东岳雄图奋北溟邪同獬廌触乐伴鳳凰听酣战仍挥日降妖亦鬪霆将军
功不伐叔舅德惟馨鸡塞谁生事狼烟不暂停拟填沧海鸟敢竞太阳蜚内草纔传诏前茅已
勒铭那劳出师表尽入大荒经德水萦长带陰山绕画屏祗忧非繫肯未觉有臃脰保佐资冲
漠扶持在杳冥乃心防暗室华髮称明廷按甲神初静挥戈思欲醒羲之当妙选孝若近归宁
月色来侵幌诗成有转櫺罗含黄菊宅柳恹白苹汀神物龟酬孔僊才鹤姓丁西山童子药南
极老人星自顷徒窥管于今愧挈瓶何由叨末席还得叩玄扃庄叟虚悲雁终童漫识鼙幕中
虽策画剑外且伶俜侯侯行忘止鰥鰥卧不瞑身应瘠于鲁泪欲溢为茱禹贡思金鼎尧图忆
土鉶公乎来入相王欲驾云亭

△唐书卢钧字子和系出范阳徙京兆蓝田举进士第太和中累迁给事中开成元年冬擢岭南节度使时称廉洁会昌初迁山南东道节度使四年诛刘稹以钧领昭义节度使检校兵部尚书宣宗即位改吏部尚书授宣武节度使加检校司空四年入为太子太师六年充太原尹北都留守河东节度使九年召为左僕射十一年九月拜同平章事充山南西道节度使懿宗初以太保致仕卒年八十七隋书大业二年八月帝幸江都舳舻相接二百里唐书井陘县属镇州又获鹿县有故井陘關一名土门關括地志井陘故關在并州石艾县陘东十八里即井陘口也柳芳唐历大业十三年高祖为太原留守起义兵明年四月受隋禅列子断鼈足以立四极道源注卓马犹云立马也真诰卓灵虚之骏庄子昔容成氏大庭氏结绳而用之若此时则至治也古史考大庭氏姜姓以火德王号曰炎帝汉蕪武传竹帛所载丹青所画何以过子卿唐书世系表卢氏出自姜姓食采于卢济北卢县是也其后因以为氏庄子北溟有鱼其名为鯢唐书钧迁监察御史争宋申锡知名汉律历志黄帝取竹嶰谷制十二簫以听鳳鸣其雄鸣为六雌鸣亦六淮南子鲁阳公与韩酣战日暮援戈麾之日反三舍北齐书神武尝閱马于北牧道逢暴雨大雷电震地前有浮图一所神武令薛孤延视之孤延乃驰马按稍直前未至三十步震烧浮图孤延唱杀绕浮图走火遂灭孤延还眉鬚及马鬣尾皆焦神武叹其勇决曰薛孤延乃能与霹雳鬪礼记天子同姓谓之叔父异姓谓之叔舅白帖长曰伯舅少曰叔舅后汉书窦宪将万骑出朔方鸡鹿塞西阳杂俎狼粪烟直上烽火用之用精卫事见上卷道源注易畧例蜚燐争耀于太阳左传前茅虑无注军行前有斥埃躡伏备虑有无茅明也或曰时楚以茅为旌识勒铭用班固事山海经有大荒东西南北中经汉郊祀志秦文公获黑龙此水德之瑞于是更名河曰德水功臣表黄河如带秦本纪西北斥逐匈奴自榆中并河以东属之陰山徐广曰陰山在五原北通典陰山唐为安北都护府唐书钧宿齿数外迁而后来者多至宰相原注小弟義叟早蒙眷以嘉姻原注三十五丈明府高科来归膝下○晋书夏侯湛字孝若官散骑常侍卒潘岳称其文非徒温雅乃别是孝弟之性樸窳樸也注俱见上卷会稽后贤传孔愉字敬康尝至吳兴县餘干亭见人笼龟于路愉求买放之溪中龟行至水反顾愉及封此亭侯铸印龟首迴屈三铸不正有似昔龟之顾愉悟乃取而佩焉唐书太和四年钧封范阳郡开国公丁令威事见上卷尚书故实卢元公钧奉道暇日与賓友话言必及神仙之事魏文帝诗西山一何高高殊无极上有两仙童不饮亦不食与我一丸药光曜有五色服药四五日身轻生羽翼道源注拾遗记相州栖霞谷昔有桥顺二子于此得仙服飞龙一丸十年不饥故魏文帝诗云云隋天文志老人一星在弧南一曰南极常以秋分之旦见于丙春分之夕没于丁见则治平主寿昌注见前左传虽有挈瓶之智守不假器注挈瓶汲者喻小智庄子庄子舍于故人之家故人喜令竖子杀一雁而烹之竖子曰其一能鸣其一不能鸣请奚杀主人曰杀不能鸣者注见前一作聘诗硕人侯侯道源注左传何必齐鲁以肥杞禹贡导沅水东流为济入于河溢为滎左传夏之方有德也贡金九牧铸鼎象物史记尧舜饭土簋啜土飴注瓦器也史记黄帝封太山禅亭亭顓頊封太山禅云云钱龙惕笺钧为北都留守义山时在东川作此寄之隋舰临淮甸以下因太原为高祖兴王之地故特述之美其功著丹青而承家世之盛也酣战仍挥日以下序其为镇将之功也武宗讨刘稹以钧寬厚得衆诏节度昭义军令乘驿往钧次高平稹将白惟信献欵俄而遣潞卒戍代北卒饮醉为乱钧选牙兵尽斩之于太平驿及镇河东奏韦宙为副使禁唐民侵掠虏境杂虏遂安那劳出师表尽入大荒经蓋以诸葛比之也義之当妙选以下叙姻娅之谊以及寄诗之情也钧別墅在城南晚岁被召谢病邀游故有黄菊白苹之句其再为司空年逾大耋故有西山南极之祝也钧累朝耆硕公望所归故终愿

其入相而告成功于封禅也

安平公诗

丈人博陵王名家怜我总角称才华华州留语晓至暮高声喝吏放两衙明朝骑马出城外送我习业南山阿仲子延岳年十六面如白玉欹乌纱其弟炳章犹两丱瑶林琼树含奇花陈留阮家诸姪秀迢迢出拜何骈罗府中从事杜与李麟角虎翅相过摩清词孤韵有歌响击触钟磬鸣环珂三月石堤冻销释东风开花满阳坡时禽得伴戏新木其声尖咽如鸣梭公时载酒领从事踊跃鞍马来相过仰看楼殿撮清汉坐视世界如恒沙面热脚掉互登陟青云表柱白云崖一百八句在贝叶三十三天长雨花长者子来辄献盖辟支佛去空留鞞公时受诏镇东鲁遣我草诏随车牙顾我下笔即千字疑我读书倾五车呜呼大贤苦不寿时世方士无灵砂五月至止六月病遽颓泰山惊逝波明年徒步弔京国宅破子毁哀如何西风衝户捲素帟隙光斜照旧燕窠古人常歎知己少况我沦贱艰虞多如公之德世一二岂得无泪如黄河沥胆咒愿天有眼君子之泽方滂沱

△原注故赠尚书韦氏○崔戎也注见中卷旧唐书戎高伯祖玄暉神龙初有大功封博陵郡王戎拜给事中驳奏为当时所称太和七年七月改华州刺史一作廷延岳或云崔雍也按唐书雍字顺中炳章崔衮也一作璠璵并列诸姓秀○晋书阮籍陈留尉氏人也父瑀魏丞相掾子浑侄咸咸子瞻瞻弟孚咸从子修孚族弟放放弟裕皆知名唐书世系表戎姪有庾序福裕原朗诸人杜胜李潘见中卷麟角虎翅注俱见前阳坡坡之向日者杜甫诗阳坡可种瓜水经注康泰扶南传曰恒水之源出崑崙山中有五大源诸水分流皆由此枝扈大江出山西北流东南注大海枝扈黎即恒水也故西域志有恒曲之目楞严经恒河从阿耨达池师子口流出周围四十里其中沙细如麴亦云金沙河也维摩经取三千大千世界如陶家轮著右掌中掷过恒沙世界之外道源注楞伽经有不生句生句等一百八句佛言大慧是百八句先佛所說汝及诸菩萨摩訶萨应当修学贝叶注见上卷道源注三十三天欲天也天主曰忉利居须弥山顶四方各八帝释忉利居中楞严经世尊座天雨百寶莲花青黄赤白间杂纷糅道源注维摩经毘耶离城有长者子名曰寶积与五百长者子俱持七寶盖来诣佛所佛之威力令诸寶盖合成一盖徧覆三千大千世界而此世界广长之相悉于中现道源注释氏要览辟支梵云辟勒支底迦唐言独行此有二谓部行麟喻也水经注于闐国城一十五里有利刹寺中有石鞞石上有足迹彼俗言是辟支佛迹西阳杂俎于闐国贊摩寺有辟支佛鞞非皮非綵岁久不烂旧唐书太和八年三月丙子戎迁兗海沂密都团练观察等使华民恋惜遮道至有解靴断〈左革右登〉者疑作奏道源注建牙旗于车前故曰车牙庄子惠子多方其书五车呼同本草有太清服鍊灵砂法旧唐书戎理兗一年太和八年五月卒新书年五十五按旧纪戎以八年六月卒与此诗合本传误子毁是哀毁之毁有谓戎子雍赐死宣州者非也雍赐死在咸通九年世說顾长康哭桓宣武声如震雷破山泪如倾河注海楞严经时心怀欢喜谓得天眼

赤壁

折戟沉沙铁未销。自将磨洗认前朝。东风不与周郎便。铜雀春深锁二乔。

△此诗见杜牧集○以下四首一本阙

垂柳

垂柳碧鬋茸。楼昏雨带容。思量成夜梦。束久废春慵。

梳洗凭张敞。乘骑笑稚恭。碧虚随辅笠。红烛近高舂。

怨目明秋水。愁眉淡远峰。小阑花尽蝶。静院醉醒蛩。

旧作琴台凤。今为药店龙。宝奁抛掷久。一任景阳钟。

△晋书庾翼字稚恭世説庾小征西尝出未还妇母阮与女上安陵城楼俄顷翼归阮语女闻庾郎能骑我何由得见妇告翼翼便于道盘马始两转坠马堕地意气自若淮南子日至于虞渊是谓高舂至于连石是谓下舂即秋眸也见中卷西京杂记文君姣好眉色如望远山脸际常若芙蓉疑作闻益部耆旧传相如宅在少城中笮桥下百许步有琴台在马相如琴歌鳳兮鳳兮归故乡遨游四海求其皇乐府独曲歌自从别郎后卧宿头不举飞龙落药店骨出则为汝李贺诗骨出似飞龙注见上卷

清夜怨

含泪坐春宵。闻君欲度辽。绿池荷叶嫩。红砌杏花娇。

曙月当窗满。征云出塞遥。画楼终日闭。清管为谁调。

定子

檀槽一抹广陵春。定子初开睡脸新。郤笑嚙虚隋炀帝。破家亡国为何人。

△此诗亦见杜牧外集题作隋苑注一云定子牛相小青谭寅录开元中有中官使蜀回得琵琶以献其槽逻皆杪檀为之温润如玉光耀可鉴杨妃每抱是奏于梨园音韵凄清颺如云外虢国以下竞为贵妃琵琶弟子每受曲毕皆广有进献去声韵会收漾韵西谿丛语北里志刘泰娘门有樗树赠诗云寻常凡木最轻樗今日寻樗桂不如汉高新破咸阳后莫使奔波遂嚙虚